

O ā A'oa'oga Mai i le Tusi Paia?





Talosaga mo se su'esu'ega
faale-Tusi Paia e aunoa ma se totogi.



bhs-SM
161 222

O ā A'oa'oga Mai i le Tusi Paia?

O LE TUSI LENEI A

Ata:

- Itulau e 27: WHO photo by Edouard Boubat
- Itulau e 110-111: Explosion: Based on USAF photo; child: Based on WHO photo by W. Cutting

E lē faatauina lenei tusi. Ua saunia e a'oa'oina ai le Tusi Paia i le lalolagi aoao, ma ua lagolagoina e ala i foa'i tauofo.

Mo le faia o foa'i tauofo, taga'i i le www.jw.org.

Se'i vaganā ua faailoa atu, ae o mau uma o loo i lenei tusi ua sii mai i le faaliliuga *O le Tusi Paia—O le Faaliliuga a le Lalolagi Fou*.

What Can the Bible Teach Us?

Lomia iā Oketopa 2016

Samoan (bhs-SM)

© 2016

Watch Tower Bible and Tract Society of Pennsylvania

O Ē LOMIA

Watchtower Bible and Tract Society of New York, Inc.

Wallkill, New York, U.S.A.

Made in Japan

Lomia i Iapani

LISI O MATAUPU

MATAUPU	ITULAU
O le ā le Finagalo o le Atua mo i Tatou?	3
1. O Ai le Atua?	8
2. Le Tusi Paia—O le Tusi Mai i le Atua	21
3. O le ā le Finagalo o le Atua mo Tagata?	32
4. O Ai Iesu Keriso?	45
5. Le Togiola—Le Meaalofa Silisili a le Atua	59
6. O le ā le Tulaga o Ē ua Maliliu?	70
7. O le a Iai le Toetū	80
8. O le ā le Malo o le Atua?	94
9. Po ua Lata Mai le l’uga o le Lalolagi?	107
10. Le Mea Moni e Faatatau i Agelu ma Temoni	120
11. Aiseā ua Matuā Tele ai Mafatiaga?	132
12. E Faapefea Ona Avea Oe ma Uō a le Atua?	141
13. Ia Faatāua le Meaalofa o le Ola	154
14. E Mafai Ona Fiafia Lou Aiga	165
15. Le Auala e Tatau Ona Tapua’i ai i le Atua	175
16. Ia Filifili e Tapua’i i le Atua	187
17. Le Faaeaga o le Tatalo	199
18. Pe e Tatau Ona Tuuina Atu Lo’u Ola i le Atua ma Papatisoina?	211
19. Ia Mafuta Vavalalata Atu Pea iā leova	225
Faaopoopoga	237

O LE Ā LE FINAGALO O LE ATUA MO I TATOOU?

PE A e faitau i le nusipepa, matamata i le televise, pe faalogologo fo'i i le leitiō, e te vaaia ma faalogoina ai le tele o tala i soligatulafono, taua ma faiga faatupu faalavelave. Atonu fo'i o loo e mafatia ona o se ma'i, po ua maliu fo'i se tasi e pele iā te oe.

Fesili ifo iā te oe lava:

- Po o le finagalo lea o le Atua mo a'u ma lo'u aiga?
- O fea e mafai ona ou maua ai se fesoasoani mo o'u faafitauli?
- Pe e iai ea se taimi o le a maua ai le filemu moni?

Ua aumaia i le Tusi Paia tali manino e mafai ona faatalitonuina ai oe.




UA A'OA'OINA
I LE TUSI PAIA O LE
A FAIA E LE ATUA MEA
MATA'INA I LE LALOLAGI.

E lē toe lagona e tagata se tigā,
ola matutua pe feiti fo'i.—Faaaliga 21:4

'O le a osooso
lē ua pipili e
pei o le 'aila.'
—Isaia 35:6

'O le a
faapupulaina
mata o ē ua
pō le vaai.'
—Isaia 35:5



O le a toe faatutūina
mai ē ua maliliu.
—Ioane 5:28, 29

E lē toe iai se
tasi e ma'i.
—Isaia 33:24

O le a tele mea'ai mo
tagata uma i le lalolagi.
—Salamo 72:16

IA MAUA AOGĀ MAI I AʻOAʻOGA O LE TUSI PAIA

E te ono mafaufau, o mea na e faitauina i itu-lau muamua o lenei tusi, ua na o se miti. Peitaʻi, ua folafola mai e le Atua e lē o toe umi ona ia faia lea o na suiga i le lalolagi, ma ua faamatalaina i le Tusi Paia le auala o le a faia ai e le Atua na suiga.

E lē gata i lea, o loo faamatalaina foʻi i le Tusi Paia mea e manaʻomia ona tatou iloa, ina ia maua ai le fiafia moni ma se olaga faamalieloto i le taimi nei. Seʻi mafaufau i mea e faapopoleina ai oe. Atonu ua lē lava lau faasoa, o faafitauli i lou aiga, aafia i maʻi pe maliu foʻi sē e pele iā te oe. E mafai e le Tusi Paia ona fesoasoani iā te oe e faafetaiaʻia nei faafitauli, ma avatu le faamāfanafanaga e ala i le taliina o nisi o fesili e pei o:

- Aiseā ua tatou mafatia ai?
- E faapefea ona tatou feagai ma o tatou faafitauli?
- Pe e mafai ona fiafia o tatou aiga?
- O le ā le tulaga o ē ua maliliu?
- Po o le a tatou toe feiloaʻi ma ē pele iā i tatou?
- Aiseā e tatou te mautinoa ai o le a faataunuaina e le Atua mea uma ua ia folafolaina mai?




O lou faitauina o lenei tusi, e faaalua ai o loo e fia malamalama i a'oa'oga a le Tusi Paia. O le a fesoasoani lenei tusi iā te oe e faia faapea. O loo iai fesili mo palakalafa, ma o le a fesoasoani iā te oe ina ia atili malamalama ai i le Tusi Paia. E faitau miliona tagata e fiafia e talatalanoa ma Molimau a Ieova e faatatau i le Tusi Paia. E matou te faamoemoe e faapena fo'i ou lagona. Tau ina ia faamanuia le Atua iā te oe, a o e iloilo ina a'oa'oga mai i le Tusi Paia.

IA ILOA VAEGA ESEESE O LAU TUSI PAIA

E 66 tusi o le Tusi Paia. Ua vaevaeina nei tusi ta'itasi i mataupu ma fuaiupu. O lenei auā e faigofie ai ona e su'eina se mau. Pe a aumai i lenei tusi se mau, o le numera e sosoo ma le igoa o le tusi o lona uiga o le mataupu lenā o le tusi, a o le isi numera o le fuaiupu. O se faata'ita'iga o le "2 Timoteo 3:16," o lona uiga o le tusi lona lua o Timoteo, mataupu e 3, fuaiupu e 16.

E vave lava ona e iloa vaega eseese o le Tusi Paia, pe afai e te su'eina mau o loo aumaia i lenei tusi. E mafai fo'i ona amata ona e faitauina le Tusi Paia i aso ta'itasi. Pe afai e tolu i le lima ni mataupu e te faitauina i le aso, e uma ane le tausaga, ua mae'a ona e faitauina le Tusi Paia atoa.



O AI LE ATUA?

E TELE fesili e faia e tamaiti. Atonu e te faamalalama-lama atu iā i latou se mea, ae e masani ona latou fesili mai, ‘O le ā le māfuaaga?’ Pe a e taumafai fo’i e avatu se tali, atonu e latou te toe fesili mai ‘Aiseā?’

² E tusa pe e tatou te matutua pe lāiti, ae o i tatou uma lava e tuufesili i lea mea ma lea mea. Atonu e tatou te fesili po o ā a tatou mea e ‘ai, o ofu e fai, ma po o ā mea e faatau. Pe atonu fo’i e iai ni a tatou fesili tāua e faatatau i le olaga ma le lumana’i. Peita’i, a tatou lē maua ni tali faamalieleoto i nei fesili, atonu o le a tatou lē toe sa’ili loa mo ni tali.

³ Pe e maua i le Tusi Paia tali o fesili tāua o loo tatou sa’ilia? Ua faapea mai nisi atonu e maua i le Tusi Paia tali o a latou fesili tāua. Peita’i, e latou te manatu e faigatā tele ona malamalama i le Tusi Paia. E latou te ono manatu e na o faia’oga po o ta’ita’i lotu e maua ai tali i na fesili. E matamumuli fo’i isi e ta’utino mai e latou te lē iloa tali i na fesili. Ae o le ā sou manatu?

⁴ Atonu e te mana’o e maua tali o fesili e pei o le:

1, 2. O ā fesili e masani ona fesili ai tagata?

3. Aiseā e manatu ai le to’atele e lē mafai ona latou maua tali i a latou fesili tāua?

4, 5. (a) O ā ni fesili tāua o loo e fia maua ni tali? (e) Aiseā e tatau ai ona e sa’ili pea mo tali i na fesili?

Pe e iai se fuafuaga o le olaga? O le ā e tupu i tagata pe a feoti? O ā uiga o le Atua? Na fetalai le Faia’oga ta’uta’ua o Iesu: “Ia talosaga atu pea, ona foa’iina mai ai lea iā te outou. Ia sa’ili atu pea, ona outou maua ai lea. Ia tu’itu’i atu pea ona tatalaina mai ai lea iā te outou.” (Mataio 7:7) Aua e te fiu, ae ia sa’ili pea se’ia oo ina e maua tali e mafai ona e tali-tonuina.

⁵ O le mea moni pe afai e te “sa’ili atu pea,” o le a e maua tali i le Tusi Paia. (Faataoto 2:1-5) E lē fai-gatā tele ona malamalama i nei tali. O mea e te a’oa’oina o le a e maua ai se olaga e sili ona fiafia i le taimi lenei, faapea se faamoemoe matagofie mo le lumana’i. Se’i o tatou iloilo ina nei se tasi o fesili e lē o malamalama i ai le to’atele.

PO O SILASILA ALOFA MONI MAI LE ATUA?

⁶ E manatu le to’atele, e lē o silasila alofa mai le Atua iā i tatou. E latou te manatu, pe ana alofa mai le Atua semanū e ese le tulaga o le a iai le lalolagi. Peita’i o loo iai le tele o faigātaua, le faitaga’i ma mafatiaga. E faasolo ina mama’i tagata, puapuagatia ma feoti ai. E manatu nisi, ‘Pe afai e silasila alofa mai le Atua iā i tatou, aiseā la ua ia lē taofia ai nei mafatiaga?’

⁷ O nisi taimi e faatalitonu ai e ta’ita’i lotu

6. Aiseā e manatu ai nisi tagata e lē o silasila alofa mai le Atua i o latou mafatiaga?

7. (a) Ua faapefea ona a’oa’o e ta’ita’i lotu tagata e manatu e sauā le Atua? (e) Aiseā e tatou te mautinoa ai e lē tuua’ia le Atua mo mea leaga o loo tutupu?

tagata e manatu e sauā le Atua. Pe a iai se mea leaga e tupu, e latou te faapea mai o le finagalo lea o le Atua. E tusa ua latou tuua'ia le Atua. Peita'i, o loo a'oa'oina i le Tusi Paia e **lē o le Atua le pogai o mea leaga**. Ua faapea mai le Iopu 34:12: "E lē faia e le Atua se mea leaga." O lona uiga, e ui lava o loo silafia e le Atua mea leaga o loo tutupu, ae e na te **lē faatupuina** na mea leaga. O lea, e na te lē tofotofoina i tatou i mea leaga. (**Faitau le Iakopo 1:13.**) Se'i fai se faata'ita'iga.

⁸ Se'i faapea o loo nonofo faatasi se alii talavou ma ona mātua. E matuā alofa lava lona tamā iā te ia, ma sa a'oa'oina fo'i o ia i le auala e faia ai fili-filiga lelei. Peita'i, ua fouvale le atalii i lona tamā ma tuua lona aiga. Ua ia faia mea leaga ma ua oo ai faafitauli iā te ia. Pe e te tuua'ia le tamā i le mea ua tupu i lona atalii, ona o lona lē taofia o ia mai i le tuua o le aiga? E mautinoa e leai. (Luka 15:11-13) I le pei o le tamā, e le'i taofia fo'i e le Atua tagata ina ua latou filifili e fouvale iā te ia ma faia mea leaga. O lea, pe a tupu se mea leaga, e tatau ona tatou manatua e lē o le Atua na faatupuina. E lē sa'o le tuua'ia o le Atua i na mea.

⁹ E iai se māfuaaga e sili ona tāua ua lē taofia ai e le Atua le tutupu o mea leaga. I le Mataupu 11, o le a e a'oa'oina ai faamatalaga a le Tusi Paia e faatatau i lea manatu. Ae ia e mautinoa e alofa le Atua

8, 9. Aiseā e lē sa'o ai le tuua'ia o le Atua i o tatou faafitauli? Aumai se faata'ita'iga.

iā i tatou, ma e lē tuua'ia o ia i o tatou faafitauli. O le mea moni, e na o ia lava e mafai ona fo'ia na faafitauli.—Isaia 33:2.

10 E paia le Atua. (Isaia 6:3) O lona uiga, o mea uma e na te faia e lelei atoatoa, e mamā ma lelei. O lea, e mafai ona tatou talitonu atoatoa iā te ia. Ae e lē faapena tagata, auā e iai taimi e latou te faia ai mea sesē. E oo lava i se pule e sili ona faamaoni, e leai sona malosi e faaleleia ai mea leaga uma ua faia e tagata leaga. E leai se tasi e iai sona mana e pei o le Atua. E mafai ona faaleleia e le Atua mea leaga uma ua faia e tagata leaga, ma e mautinoa o le a ia faia faapea. O le a ia aveesea atoatoa mea leaga uma.—**Faitau le Salamo 37:9-11.**

O Ā FAALOGONA O LE ATUA PE A MAFATIA TAGATA?

11 O ā faalogona o le Atua pe a silasila mai i mea o loo tutupu i le lalolagi, faapea mea o loo e fesaga'ia? Ua faapea mai le Tusi Paia, “e fiafia [le Atua] i le faamasinogatonu.” (Salamo 37:28) O lea, e tāua tele i le silafaga a le Atua le mea sa'ō ma le mea sesē. E lē fiafia o ia pe a mafatia tagata. Ua faapea mai le Tusi Paia, i aso anamua 'na tigā lona finagalo' ina ua ia silasila mai i le lalolagi ua tumu i le amioleaga. (Kenese 6:5, 6) E lē fesuisuia'i pe liliu le Atua. (Iakopo 1:17) O loo

10. E faapefea ona tatou mautinoa o le a faaleleia e le Atua mea leaga uma ua faia e tagata leaga?

11. O ā faalogona o le Atua e faatatau i ou mafatiaga?

faapea mai fo'i le Tusi Paia, e manatu mamafa pe silasila alofa mai le Atua iā te oe.—**Faitau le 1 Peteru 5:7.**

12 Ua faapea mai fo'i le Tusi Paia na faia i tatou e le Atua i lona faatusa. (Kenese 1:26) O lona uiga, na foafoaina i tatou e le Atua ma tuuina iā i tatou uiga lelei e pei o ona uiga. Pe afai la e te faanoanoa ona o mea leaga o loo tutupu i tagata lelei, e mautinoa lava e sili atu le faanoanoa o Ieova pe a ia silasila mai i na tulaga. E faapefea ona tatou iloa e moni lea manatu?

13 Ua tatou a'oa'oina mai i le Tusi Paia, “o le Atua o le alofa lava ia.” (1 Ioane 4:8) O so o se mea lava e faia e le Atua, e mǎfua ona o le alofa. E tatou te alolofa ona e alofa fo'i le Atua. Se'i mafaufau i le tulaga lenei: Pe ana iai se mana iā te oe, pe e te aveesea mafatiaga ma faiga lē tonu uma o loo i le lalolagi? E mautinoa e te faia faapea, ona e te alofa i tagata. Ae faapefea la le Atua? E iai lona mana, ma ona o lona alofa iā i tatou, o le a ia aveesea ai mafatiaga ma faiga lē tonu uma o loo iai. E mafai ona e mautinoa e faataunuaina folafolaga uma lava a le Atua, o loo ta'ua i le amataga o lenei tusi. Ae ina ia mafai ona e talitonuina nei folafolaga, e mana'omia ona e iloa atili e faatatau i le Atua.

12, 13. (a) Aiseā e tatou te alolofa ma manatu mamafa ai i isi? (e) O ā ni o tatou faalogona e faatatau i mafatiaga o tagata i le lalolagi? (i) Aiseā e mafai ai ona tatou mautinoa o le a aveesea e le Atua mafatiaga ma faiga lē tonu uma?

E FINAGALO LE ATUA INA IA E ILOA O IA

14 Pe a fia avea oe ma uō a se tasi, o le ā le mea e masani ona e ta’u muamua atu iā te ia? O lou igoa. Pe e iai se suafa o le Atua? O le tele o lotu e fai mai o lona suafa o le Atua po o le Alii, peita’i e lē o ni suafa na o le Atua. O mea na e pei o ni faalupega po o ta’u, e pei o le “tupu” po o le “palemia.” Ua uma ona faailoa mai e le Atua o lona suafa o Ieova. Ua faapea mai le Sa-

Pe a fia avea oe ma uō a se tasi, e te ta’u atu iā te ia lou igoa. Ua faailoa mai e le Atua iā i tatou lona suafa i le Tusi Paia

lamo 83:18: “Ina ia iloa ai e tagata o oe e ou le suafa o Ieova, e na o oe lava o Lē e Silisili Ese i le lalolagi uma.” E sili atu ma le 7,000 taimi na faa-aogā ai e tusitala o le Tusi Paia le suafa o le Atua. E finagalo Ieova ina ia e iloa lona suafa ma faa-aogā. Ua ia faailoa mai iā te oe lona suafa ina ia mafai ai ona avea oe ma ana uō.

15 E iai se uiga loloto o le suafa o le Atua, o

14. O ai le suafa o le Atua, ma e faapefea ona tatou iloa e tatau ona tatou faa-aogāina?

15. O le ā le uiga o le suafa o le Atua, o leova?



Ieova. O le suafa Ieova o lona uiga, e mafai e le Atua ona faataunuu ana folafolaga uma, ma e mafai ona ia faataunuu lona finagalo. E leai se mea e mafai ona taofia o ia mai i le faia faapea. E na o Ieova e ona lenei suafa.*

16 E pei ona ta'ua i se palakalafa ua muamua atu, ua faapea mai le Salamo 83:18 e faatatau iā Ieova: “E na o oe lava o Lē e Silisili Ese.” O loo iai fo'i i le Tusi Paia isi faalupega e na o Ieova e faasino atu i ai. O se faata'ita'iga, ua faapea mai le Faaaliga 15:3: “Ieova e, le Atua, o Lē e ona le malosi uma lava, e mata'ina ma ofoofogia au galuega. E tonu ma faamaoni ou ala, le Tupu o le vavau e.” O le ā le uiga o le faalupega “Lē e ona le malosi uma lava”? O lona uiga, e sili atu le malosi o Ieova nai lo o se isi lava i le lagi ma le lalolagi. Ae o le faalupega “Tupu o le vavau,” o lona uiga e leai se amataga o Ieova. Ua faapea mai le Salamo 90:2, o ia e mai i le vavau e oo i le faavavau. Ma'eu le ofoofogia o lenā tulaga!

17 E na o Ieova o Lē na foafoaina mea uma lava. Ua faapea mai le Faaaliga 4:11: “Ieova e, lo matou Atua, ua tatau lava oe ona e mauaina le viiga, ma le mamalu, ma le mana, auā na e foafoaina mea

* Pe afai e te fia iloa nisi faamatalaga e faatatau i le uiga ma le faaleoina o le suafa o le Atua, faamolemole taga'i i le Faaopoopoga 1.

16, 17. O le ā le uiga o le faaupuga (a) “Lē e ona le malosi uma lava”? (e) “Tupu o le vavau”? (i) “Lē na foafoaina mea uma lava”?



Ua a'oa'oina i le Tusi Paia
o Ieova e alofa ma o Lē na
foafoaina le lagi ma le lalolagi

uma lava, ma o lou finagalo fo'i ua iai nei mea ma na foafoaina ai." Ioe, na foafoaina e Ieova mea uma lava e pei o agelu, fetu, fua o laau ma i'a o le sami.

PE E MAFAI ONA AVEA OE MA UŌ A IEOVA?

18 Pe a faitau isi tagata i uiga ofoofogia o Ieova,

18. (a) Aiseā atonu e manatu ai nisi tagata e lē mafai ona avea i latou ma uō a le Atua? (e) O le ā le faamatalaga a le Tusi Paia e faatatau i lenā manatu?

e latou te fefefe ma manatu e faapea, 'E malosi tele le Atua, e mamalu tele ma e mamao ese o ia. Aiseā la o le a ia silasila alofa mai ai fua iā te a'u?' Ae po o le auala lenā e finagalo le Atua e tatou te mafaufau ai? E leai. E finagalo o ia ina ia mafuta vavalalata mai iā i tatou. Ua faapea mai le Tusi Paia "e lē o mamao [le Atua] mai iā i tatou ta'ito'atasi." (Galuega 17:27) E finagalo le Atua ina ia e mafuta vavalalata atu iā te ia, ma ua ia folafola mai o le a ia 'mafuta vavalalata mai iā te oe.'—Iakopo 4:8.

19 O le ā e tatau ona e faia ina ia avea ai oe

19. (a) O le ā e tatau ona e faia ina ia avea ai oe ma uō a le Atua?
 (e) O le ā le uiga o leova e sili ona e fiafia i ai?

E alofa se tamā i lana fanau, ae e sili atu le alofa o lo tatou Tamā i le lagi iā i tatou



ma uō a le Atua? Na fetalai Iesu: “O le ola e faavavau fo’i lenei, ia latou iloa oe, le Atua moni e to’atasi, atoa ma lē na e auina mai, o Iesu Keriso.” (Ioane 17:3) Ia faaauau pea ona e a’oa’oina e faatatau iā Ieova ma Iesu, ona e iloa ai lea o mea e uiga iā i la’ua. O se faaa’oa’oga, ua uma ona tatou a’oa’oina “o le Atua o le alofa lava ia.” (1 Ioane 4:16) Peita’i, e tele fo’i isi uiga matagofie o Ieova. Ua faapea mai le Tusi Paia o Ieova “e alofa mutimutivale ma alofa fua, e telegese lona to’asā ae e tele lona alofa faamaoni ma fai mea moni.” (Esoto 34:6) ‘E lelei Ieova ma e nofosauni e faamagalo.’ (Salamo 86:5) E onosa’i ma faamaoni le Atua. (2 Peteru 3:9; Faaaliga 15:4) E tele isi mea o le a e a’oa’oina e faatatau i uiga matagofie o le Atua, a o e faitau e uiga iā te ia i le Tusi Paia.

20 E faapefea ona e faalatalata atu i le Atua e ui e lē mafai ona e vaai atu iā te ia? (Ioane 1:18; 4:24; 1 Timoteo 1:17) A o e faitau e faatatau iā Ieova i le Tusi Paia, o le a atili ai ona e iloa moni o ia ma ona uiga. (Salamo 27:4; Roma 1:20) A o faateleina pea mea e te a’oa’oina e faatatau iā Ieova, o le a faatuputeleina ai lou alofa mo ia ma atili ai ona e mafuta vavalalata atu iā te ia.

21 O le a oo ina e malamalama o Ieova o lo tatou Tamā. (Mataio 6:9) Na ia foa’i mai le ola,

20, 21. E faapefea ona tatou faalatalata atu i le Atua e ui e lē mafai ona tatou vāai atu iā te ia?

ma e finagalo fo'i ina ia tatou maua se olaga e sili ona lelei. O le mea lenā e mana'o i ai se tamā alofa mo lana fanau. (Salamo 36:9) O le mea moni, ua a'oa'oina i le Tusi Paia e mafai ona avea oe ma uō a Ieova. (Iakopo 2:23) Se'i mafaufau i lenā mea! E finagalo Ieova, o Lē na foafoaina le lagi ma le lalolagi, ina ia avea oe ma ana uō.

22 Atonu o le a manana'o isi tagata ina ia tuu lou su'esu'eina o le Tusi Paia. E ono faapopoleina i latou ina ne'i suia lau tapua'iga. Ae aua lava ne'i e faatagaina so o se tasi e taofia oe mai i le avea ma uō a Ieova. O ia o le Uō e aupito sili ona lelei e mafai ona e mauaina.

23 A o e su'esu'eina le Tusi Paia, o le a iai mea e te lē malamalama i ai. Peita'i, aua e te mā e fesili pe sa'ili mo se fesoasoani. Na fetalai Iesu e tatau ona tatou faaalua le lotomaulalo e pei o tamaiti. E tele fesili e faia e tamaiti. (Mataio 18:2-4) E finagalo le Atua ina ia e maua tali i au fesili. O lea, ia su'esu'e ma le mae'ae'a le Tusi Paia, ina ia faamautinoa ai o mea o loo e a'oa'oina o mea moni.
—**Faitau le Galuega 17:11.**

24 O le auala sili e a'oa'oina ai mea e faatatau iā Ieova, o le su'esu'e lea o le Tusi Paia. I le mataupu o sosoo mai, o le a tatou iloiloaina ai le māfuaaga e ese ai le Tusi Paia mai i isi tusi.

22. O le ā e tatau ona e faia pe a manana'o isi tagata ina ia tuu lou su'esu'eina o le Tusi Paia?

23, 24. (a) Aiseā e tatau ai ona e fesili atu pea? (e) O le ā o le a tatou iloiloaina i le mataupu o sosoo mai?

A'OA'OGA
MONI 1

O AI LE ATUA?

“Na e foafoaina mea uma lava.”—Faaaliga 4:11

O le ā e tatou te a’oa’oina mai i le Tusi Paia e faatatau i le Atua?

Faaaliga 15:3

O ia o Lē e ona le malosi uma lava. E leai ma se tasi e sili atu iā te ia i le lagi ma le lalolagi.

Salamo 90:2

E leai sona amataga.

Mataio 6:9

O le Atua o lo tatou Tamā. E finagalo o ia ina ia tatou maua se olaga e sili ona lelei.

Galuega 17:27

E finagalo le Atua ina ia mafuta valalata mai iā i tatou.

A'OA'OGA
MONI 2

E IAI LE SUAFA O LE ATUA

‘O Ieova o lo’u igoa lenā e faavavau.’—Esoto 3:15

Aiseā e tāua ai le suafa o le Atua?

Salamo 83:18

Ua faailoa mai e le Atua, o lona suafa o leova. E lē o ni suafa le “Atua” ma le “Alii.” O mea na e pei o ni faalupega po o ta’u, e pei o le “tupu” po o le “palemia.” E finagalo leova ina ia e faaaogā lona suafa.

Esoto 3:14

O le uiga o le suafa leova: “E Gaoioi o la e Tusa ai ma Tulaga Mana’omia.” Talu ai na foafoaina e leova mea uma lava, e mafai la ona ia faataunuu ana folafolaga uma, ma e mafai ona ia faataunuu lona finagalo.

**A'OA'OGA
MONI 3**
E ALOFA IEOVA IĀ I TATOU

“O le Atua o le alofa lava ia.”—1 Ioane 4:8

O ā auala ua faaaliga mai ai e le Atua lona alofa mo i tatou?

Esoto 34:6; Salamo 37:28

E alofa mutimutivale o ia ma alofa fua. E fiafia i le mea moni ma le faamasinogatonu.

Salamo 86:5

E lotofaamagalo o ia.

2 Peteru 3:9

E onosa'i mai o ia iā i tatou.

Faaaliga 15:4

E faamaoni o ia iā i tatou.

**A'OA'OGA
MONI 4**
**E SILASILA ALOFA MAI LE ATUA
IĀ TE OE**

“Ia ta'u atu o outou popolega uma iā te ia, auā o loo manatu mamafa mai o ia iā te outou.”—1 Peteru 5:7

E faapefea ona e iloa e silasila alofa mai le Atua iā te oe?

Salamo 37:9-11

Ua ia folafola mai o le a ia aveesea mafatiaga, ma faaleleia mea leaga uma ua faia e tagata leaga.

Iakopo 4:8

E finagalo leova ina ia e mafuta vavalalata atu iā te ia.

Ioane 17:3

O le tele o mea e te a'oa'oina e faatatau i le Atua, o le faatuputeleina fo'i lenā o lou alofa mo ia.

LE TUSI PAIA —O LE TUSI MAI I LE ATUA

O Ā NI ou faalogona pe a avatu e sau uō se meaalofo iā te oe? E mautinoa lou matuā naunau e tatala lenā meaalofo, ma e te fiasia ona sa mafaufau atu lau uō iā te oe. O lea, e te faafetai atu ai iā te ia mo le meaalofo.

² O le Tusi Paia o se meaalofo mai i le Atua. O loo aumaia ai faamatalaga e tatou te lē mauaina i se isi lava mea. O se faata'ita'iga, o loo ta'u mai ai na foafoaina e le Atua le lagi, le lalolagi faapea le ulua'i tane ma le fafine. O loo aumaia ai fo'i ta'iala po o mataupu silisili e mafai ona fesoasoani iā i tatou pe a iai ni o tatou faa-fitauli. E tatou te a'oa'oina mai i le Tusi Paia, le auala o le a faataunuuina ai e le Atua lona finagalo ina ia faaleleia le tulaga o mea i le lalolagi. Ioe, o le Tusi Paia o se meaalofo matagofie.

³ A o e su'esu'eina le Tusi Paia, o le a e iloa ai e finagalo le Atua e avea oe ma ana uō. O le tele o mea e te a'oa'oina e faatatau iā te ia, o le atili māfana fo'i lenā o la oulua faiā.

⁴ Ua faaliliuina le Tusi Paia i le silia ma le 2,800 gavana, ma e faitau piliona kopi ua lomiaina. E faitau piliona tagata i le lalolagi ua mafai ona faitau i le Tusi Paia i a latou lava gavana. I **vaiaso ta'itasi**, e silia ma le

1, 2. Aiseā ua avea ai le Tusi Paia o se meaalofo matagofie?

3. O le ā o le a e iloa a o e su'esu'eina le Tusi Paia?

4. O le ā se mea e sili ona mata'ina ai le Tusi Paia iā te oe?



*O le Tusi Paia—O le Faaliliuga a le Lalolagi Fou
lea e mau i le tele o gaganā*

miliona kopi o le Tusi Paia e tufatufaina i tagata. O le mea moni, e leai ma se tusi e pei o le Tusi Paia.

⁵ O le Tusi Paia “e mai i le agaga o le Atua.” (**Faitau le 2 Timoteo 3:16.**) Peita’i e ono manatu nisi, ‘E faapefea ona faapea atu e mai i le Atua le Tusi Paia a o lea sa tusia e tagata?’ O loo aumai le tali i le Tusi Paia: “Na tautatala tagata i mea na faailoa mai e le Atua e ala i le ta’ita’iga a le agaga paia.” (2 Peteru 1:21) E talitutusa lenei tulaga ma se alii faipisinisi o lē e fai atu i lana failautusi e tusia se tusi, ae o faamatalaga o loo iai o manatu o le alii faipisinisi. O ai e ona manatu o loo tusia i le tusi? O le alii faipisinisi, ae e lē o le failautusi. I se

5. Aiseā e mafai ai ona tatou faapea atu o le Tusi Paia “e mai i le agaga o le Atua”?

tulaga tutusa, o Lē e ona le Tusi Paia o le Atua ae e lē o tane na ia faaogā e tusia. Na ta'ita'ia i latou e le Atua e tusia ona manatu. O le mea moni, o le Tusi Paia “o le afioga a le Atua.”—1 Tesalonia 2:13; taga'i i le Faa-poopoga 2.

E SA'O ATOATOA LE TUSI PAIA

6 E silia i le 1,600 tausaga na tusia ai le Tusi Paia. E eseese vaitaimi na soifua ai tusitala o le Tusi Paia. O isi sa lelei tulaga taua'oa'oga, ae o isi e leai. O se faata'ita'iga, o se tasi o tusitala o se foma'i. O isi tusitala o tagata faifaato'aga, o faifaiva, o leoleo mamoe, o perofeta, o faamasino ma tupu. E ui lava la e eseese tusitala, ae e leai ma se vaega o le Tusi Paia e feteena'i. E lē faapea e ese faamatalaga e aumai i le isi mataupu, ese faamatalaga mai i le isi mataupu.*

7 O loo faamatalaina i le tusi muamua o le Tusi Paia, na foafoaina e le Atua le ulua'i ulugalii o Atamu ma Eva. Na la fouvale i le Atua, ma o le i'uga, na la oo atu ai i le soifua matua, maua i ma'i ma oo atu ai i le oti. I le 4,000 tausaga mulimuli ane, na tusia ai e le apose-tolo o Ioane le tusi mulimuli o le Tusi Paia. O loo faamatalaina ai le gaoioiga o le a faia e le Atua ina ia toe maua ai e tagata le soifua mālōlōina, le ola e faavavau ma le fafia. Ua faaalua mai i le Tusi Paia e faataunuuina lava le finagalo o le Atua.

* Ua faapea mai isi tagata e feteena'i faamatalaga o loo i le Tusi Paia, ae e lē moni lenā manatu. Taga'i i *Le Olomatamata* o Iuni 1, 2012, itulau e 7 ma le *Ala Mai!* o Aperila 2008, itulau e 25 lomina e Molimau a Ieova.

6, 7. Aiseā e tatou te faapea atu ai e lē feteena'i faamatalaga o loo i le Tusi Paia?

8 E le'i tusia le Tusi Paia ina ia a'oa'oina ai le faasaienisi pe avea fo'i o se tusi a'oga. Peita'i, o faamatalaga faasaienisi o loo iai e matuā sa'o atoatoa. O le mea lenā e tatou te faatalitalia i se tusi mai i le Atua. O se faaa'oa'oga, o loo iai i le tusi o Levitiko faatonuga a le Atua mo tagata Isaraelu, i auala e taofia ai le pipisi atu o faama'i i isi. Ua leva ona iai nei faatonuga i le Tusi Paia, a o le'i oo ina malamalama tagata i le auala e faatupu ai e siama ma vairusi faama'i. E sa'o fo'i le a'oa'oga o loo i le Tusi Paia e faapea, e leai se mea o tautau ai le lalolagi. (Iopu 26:7) Na talitonu fo'i le to'atele e mafolafola le lalolagi, ae ua faapea mai le Tusi Paia o le lalolagi e lapotopoto.—Isaia 40:22.

9 Pe a faamatalaina i le Tusi Paia mea na tutupu i le talafaasolopito, e sa'o atoatoa faamatalaga e aumaia ai. Ae o le tele o tusi o le talafaasolopito e lē sa'o atoatoa faamatalaga o loo iai, auā e le'i faamaoni tusitala na tusiaina. O se faata'ita'iga, e latou te le'i tusia taimi uma na faato'ilaloina ai o latou nuu i se taua. Ae e ese mai ai tusitala o le Tusi Paia, auā e latou te faamaoni ma tusia faamatalaga uma e oo lava i taimi na faato'ilaloina ai le nuu o Isaraelu. Sa latou faamauina fo'i o latou masei. O se faata'ita'iga, i le tusi o Numera o loo faamatala mai ai e Mose se mea sesē matuiā na ia faia, ma sa a'oa'ia ai o ia e le Atua. (Numera 20:2-12) O le faamaoni o tusitala o le Tusi Paia ua faaalua manino mai ai, o le Tusi Paia e mai i le Atua ma e mafai ona tatou talitonuina.

8. Aumai ni faaa'oa'oga e faamaonia ai le sa'o atoatoa o faamatalaga faasaienisi o loo i le Tusi Paia.

9. O le ā ua tatou malamalama i ai ona o le faamaoni o tusitala o le Tusi Paia ?

O SE TUSI O LOO IAI LE TELE O FAUTUAGA LELEI


10 O le Tusi Paia “e mai i le agaga o le Atua, ma e aogā e a’oa’o ai, e a’oa’i ai, e faasa’o ai mea.” (2 Timoteo 3:16) O le mea moni e aogā fautuaga o loo i le Tusi Paia mo i tatou i aso nei. E silafia e Ieova le auala na foafoaina ai i tatou. O lea, e malamalama o ia i o tatou faalogona faapea le auala e tatou te mafaufau ai. E sili atu lona silafia o i tatou nai lo o i tatou lava, ma e finagalo o ia ina ia tatou fiafia. E na te silafia le mea e lelei ma le mea e leaga mo i tatou.

11 I le Mataio mataupu e 5 e oo i le 7, e tatou te faitau ai i fautuaga e sili ona lelei a Iesu i le auala e maua ai le fiafia, le auala e faatumauina ai pea ni faiā lelei ma isi, le auala e tatalo ai ma le vaaiga e tatau ona iai i tupe. E ui lava na ia avatu na fautuaga i le pe ā ma le 2,000 tausaga ua mavae, ae o loo telē pea sona aafiaga ma aogā i aso nei.

12 Ua a’oa’oina fo’i i tatou e Ieova i le Tusi Paia e faatatau i mataupu silisili, e fesoasoani iā i tatou e maua ai se olaga faaleaiga e sili ona lelei, avea o ni tagata galulue malolosi, ma nonofo ai ma le filemu ma isi. E mafai e mataupu silisili o le Tusi Paia ona fesoasoani iā i tatou i so o se taimi, po o le ā lava lo tatou tulaga, po o fea e tatou te nonofo ai ma po o ā faafitauli o loo tatou fesaga’ia.—**Faitau le Isaia 48:17**; taga’i i le Faaopoopoga 3.

10. Aiseā e aogā ai fautuaga o loo i le Tusi Paia mo i tatou i aso nei? 11, 12. (a) O ā fautuaga lelei a Iesu o loo i le Mataio mataupu e 5 e oo i le 7? (e) O ā isi lesona e mafai ona tatou a’oa’oina mai i le Tusi Paia?

Na valoia e
le tusitala o le
Tusi Paia o Isaia o
le a faato'ilaloina
Papelonía



E MAFAI ONA E TALITONUINA VALOAGA A LE TUSI PAIA

13 E tele valoaga a le Tusi Paia ua uma ona faatau-
nuuina. O se faaa'oa'oga, na valoia e Isaia o le a faa-
to'ilaloina Papelonía. (Isaia 13:19) Na ia faamatalaina

13. O le ā na valoia e Isaia o le a tupu i le aai o Papelonía?

le auala tonu o le a faato'ílaloina ai lea aai. Na puipuia le aai i pā tetele ma se vaitafe. Peita'i, na valoia e Isaia o le a faapa'umātūina le vaitafe ma o le a lē tapunia fo'i faitoto'a o le aai. O le a nofoia le aai e aunoa ma se taua. Sa valoia fo'i e Isaia o le a faato'ílaloina Papelonia e se tagata e suafa iā Kuresa.—**Faitau le Isaia 44:27–45:2**; taga'i i le Faaopoopoga 4.

14 I le 200 tausaga mulimuli ane talu ona tusia lenā valoaga, ae taunuu ane loa se 'autau ua nofosauni e osofa'ia Papelonia. O ai na ta'ita'ia le 'autau? E pei lava ona valoia, o Kuresa le tupu o Peresia. Ae pe o le a mafai e le 'autau a Kuresa ona osofa'ia Papelonia, e pei ona valoia e le perofeta o Isaia?

15 I le pō lea na osofa'ia ai le aai, na faia ai se tautamiga a tagata Papelonia. Sa latou manatu na malupuipuia i latou, ona o pā tetele o le aai ma le vaitafe. Ae i fafo atu o le aai, na eli ai e Kuresa ma lana 'autau se alāvai ina ia faatafe ese ai le vaitafe. Na oo ina papa'u le vaitafe ma mafai ai loa e fitafita Peresia ona asā

14, 15. Na faapefea ona faataunuuina le valoaga a Isaia?

Toega o mea i Papelonia



le vai. Ae o le a faapefea ona sao atu lenei 'autau i pā o Papelonia? E pei lava ona valoia, e le'i tapunia faitoto'a o le aai. O lea, na ō atu ai loa le 'autau ma nofoia le aai e aunoa ma se taua na faia.

16 Sa valoia e Isaia o le a leai lava se tasi e toe nofo i Papelonia mulimuli ane, e ala i le faapea mai: "O le a lē toe 'ainā lenā aai, pe tumau [nonofo] ai i lea tupulaga ma lea tupulaga." (Isaia 13:20) Pe na taunuu lenā valoaga? I le vaipanoa lea sa iai Papelonia, pe tusa ma le 50 maila (pe ā ma le 80 km) i le itu i saute o Baghdad i Iraq, e na o toega lava o mea o loo iai. E oo mai lava i aso nei, e lē o toe iai se tasi o nofo ai i inā. Na 'saluina [tafiuese] e Ieova Papelonia i le salu o le faaumatiaga.'—Isaia 14:22, 23.*

17 O le faataunuuga o le tele o valoaga o le Tusi Paia, ua mafai ai ona tatou talitonuina faamatalaga a le Tusi Paia e faatatau i le lumana'i. E tatou te mautinoa e faataunuu lava e Ieova lana folafolaga, o le faia lea o le lalolagi ia avea ma parataiso. (**Faitau le Numera 23:19.**) O le mea moni, ua iā i tatou le faamoemoe o le "ola e faavavau lea na folafola mai i aso anamua e le Atua, e lē mafai ona tala pepelo."—Tito 1:2.#

* Pe a e fia iloa atili e faatatau i valoaga o le Tusi Paia, e mafai ona e faitau i ai i le *Ala Mai!* o Iulai 2012, itulau e 20-22; *Le Olomata-mata* o Ianuari 1, 2008, itulau e 22-24, ma le Oketopa 1, 2008, itulau e 3-4 ua lomia e Molimau a Ieova.

O le faaumatiaga o Papelonia ua na o se tasi lea o valoaga ua faataunuuna. E te maua faamatalaga i valoaga e faatatau iā Iesu Keriso i le Faapoopoga 5.

16. (a) O le ā na valoia e Isaia e faatatau i le mea o le a oo iā Papelonia? (e) E faapefea ona tatou iloa sa faataunuu le valoaga a Isaia?

17. Aiseā e mafai ai ona tatou talitonuina folafolaga uma a le Atua?

E MAFAI E LE TUSI PAIA ONA SUIA LOU OLAGA

18 Ua tatou a’oa’oina e leai lava se isi tusi e pei o le Tusi Paia. E lē feteena’i faamatalaga o loo iai. E sa’o atoatoa fo’i faamatalaga faasaienisi o loo iai faapea faamatalaga e faatatau i le talafaasolopito. E tatou te maua ai fo’i fautuaga lelei ma le tele o valoaga ua uma ona faataunuaina. Peita’i, e iai se isi aogā e sili atu o le Tusi Paia. Na tusi le aposetolo o Paulo: “O loo ola le afioga a le Atua ma e matuā malosi fo’i.” O le ā le uiga o lenā faamatalaga?—**Faitau le Eperu 4:12.**

19 E mafai e le Tusi Paia ona suia lou olaga. E mafai ona fesoasoani iā te oe ina ia su’esu’e ai e oe lava lou tulaga, ma e iloa ai le ituaiga tagata moni e te iai. E mafai fo’i ona fesoasoani iā te oe ina ia e malamalama ai i manatu o loo i lou loto ma ou faalogona moni. O se faata’ita’iga, atonu e tatou te manatu e tatou te alolofa i le Atua. Peita’i, ina ia faamaonia atu e tatou te alolofa iā te ia, e mana’omia ona tatou faatatauina mea o loo fai mai ai le Tusi Paia.

20 O le mea moni, o le Tusi Paia o le tusi mai i le Atua. E finagalo o ia ina ia e faitau i ai, su’esu’e i ai ma ia avea o se mea e te fiafia i ai. Ia faaalua le lotofaafetai mo lenei meaalofo ma faaaauu pea ona su’esu’e i ai. O lou faia faapea, o le a e malamalama ai i le finagalo o le Atua mo tagata. I le mataupu o sosoo mai, o le a tatou iloiloaina ai isi faamatalaga e faatatau i le finagalo o le Atua.

18. O le ā le faamatalaga a Paulo e faatatau i “le afioga a le Atua”?
 19, 20. (a) E faapefea ona fesoasoani le Tusi Paia iā te oe, ina ia e iloa ai le ituaiga tagata moni e te iai? (e) E faapefea ona e faaalua le lotofaafetai mo le meaalofo o le Tusi Paia?

A'O'A'OGA
MONI 1

O LE TUSI PAIA E MAI I LE ATUA

“O Tusitusiga Paia uma e mai i le agaga o le Atua.”

—2 Timoteo 3:16

O ā vala e ese ai le Tusi Paia mai i isi tusi?

Ua faaliliuina le Tusi Paia i le silia ma le 2,800 gagana, ma e faitau piliona kopi ua lomaiaina.

O loo aumaia ai faamatalaga e tatou te lē mauaina i se isi lava mea.

1 Tesalonia 2:13

O le Atua o le Tusitala o le Tusi Paia.

2 Peteru 1:21

Na ta'ita'ia e le Atua ni tane e tusia ona manatu.

A'O'A'OGA
MONI 2

O LE TUSI PAIA
—O SE TUSI O VALOAGA

‘E lē mafai ona tala pepelo le Atua.’—Tito 1:2

Aiseā e mafai ai ona e talitonuina le Tusi Paia?

Isaia 44:27–45:2

Na valoia mai i le Tusi Paia le auala o le a faato'ilaloina ai Papeleonia, i le faitau selau tausaga muamua atu a o le'i oo i le taimi e faataunuuna ai.

2 Timoteo 3:1-5

O loo faasolosolo pea le faataunuuna o valoaga o le Tusi Paia i le taimi lenei.

Numera 23:19

E mafai ona tatou talitonuina faamatalaga o loo i le Tusi Paia e faatatau i mea o le a tutupu i le lumana'i.

**A'OA'OGA
MONI 3**
**UA SAUNIA LE TUSI PAIA
INA IA FESOASOANI IĀ TE OE**

“O a’u o Ieova, lou Atua, o Lē o loo a’oa’o oe i mea e aogā iā te oe.”—Isaia 48:17

O ā mea ua e a’oa’oina e faatatau i le Tusi Paia?

Iopu 26:7; Isaia 40:22

E sa’o atoatoa faamatalaga faasaienisi o loo iai i le Tusi Paia.

Numera 20:2-12

E moni faamatalaga na tusia e tane na faaaogā e le Atua e tusia le Tusi Paia.

Mataio 5-7

Na aumaia e Iesu fautuaga i le auala e maua ai le fiafia, le auala e faatumauina ai pea ni faiā lelei ma isi, le auala e tatalo ai ma le vaaiga e tatau ona iai i tupe.

**A'OA'OGA
MONI 4**
**E MAFAI E LE TUSI PAIA
ONA SUIA LOU OLAGA**

“O loo ola le afioga a le Atua ma e matuā malosī fo’i.”
—Eperu 4:12

O le ā le aogā o le Afioga a le Atua mo oe?

- E mafai ona fesoasoani iā te oe e malamalama ai i le finagalo o le Atua.
- E mafai ona fesoasoani iā te oe ina ia e iloa ai le ituaiga o tagata moni e te iai.
- E mafai ona fesoasoani iā te oe e malamalama ai i le finagalo o le Atua mo oe.

E finagalo le Atua ina ia e faitau i le Tusi Paia, su’esu’e i ai ma ia avea o se mea e te fiafia i ai.

O LE Ā LE FINAGALO O LE ATUA MO TAGATA?

E MATUĀ matagofie le finagalo o le Atua mo tagata. Na ia foafoaina le ulua'i tamāloa ma le ulua'i fafine o Atamu ma Eva, ina ia ola i se faato'aga matagofie. Na finagalo o ia ina ia maua ni a la fanau, galulue ina ia avea le lalolagi atoa o se parataiso ma tausia manu.—Kenese 1:28; 2:8, 9, 15; taga'i i le Faaopoopoga 6.

² O le ā sou manatu, pe o le a tatou ola i se parataiso? Ua faapea mai Ieova: “Ua ou faia lea faai'uga, ma ou te faia lava.” (Isaia 46:9-11; 55:11) Ioe, o le a faataunuu e Ieova lana faai'uga po o le mea ua ia finagalo i ai, ma e leai se mea e mafai ona taofia o ia. Na fetalai Ieova e na te “lē foafoaina fua” le lalolagi. (Isaia 45:18) Na ia foafoaina le lalolagi, ona o lona finagalo ia tumu le lalolagi atoa i tagata. O ai e finagalo le Atua e ola i le lalolagi? O le ā le umi e finagalo o ia e latou te ola ai? Ua faapea mai le Tusi Paia: “E fai lava le lalolagi mo ē e **amiotonu** [po o ē e usiusita'i], e **nonofo** [ola] ai pea i latou e oo i le faavavau.”—Salamo 37:29; Faaaliga 21:3, 4.

1. O le ā le finagalo o le Atua mo tagata?

2. (a) E faapefea ona tatou iloa e faataunuu lava e le Atua le mea ua ia finagalo i ai? (e) O ai e finagalo le Atua e ola i le lalolagi, ma o le ā le umi e latou te ola ai?

³ Peita'i, o loo mama'i ma feoti tagata i aso nei. I le tele o vaipanoa, e fetaua'i ma toe fasioti lava e le tasi le isi. E mautiloa e lē o le finagalo lea o le Atua. O le ā tonu la le mea na tupu? O le ā le māfuaaga o nei mea uma? E na o le Tusi Paia lava e maua ai le tali.

O SE FILI O LE ATUA

⁴ O loo ta'ua i le Tusi Paia e iai le filii o le Atua, o lē 'ua igoa i le Tiapolo ma Satani.' Na faaaogā e Satani se gata e tautala atu ai iā Eva i le faato'aga o Etena. (Faaaliga 12:9; Kenese 3:1) Na ia faafoliga atu e pei lava o loo tautala moni le gata.—Taga'i i le Faaopoopoga 7.

⁵ Pe na foafoaina e le Atua ia Satani le Tiapolo? E leai. Sa iai se **tasi o agelu** na iai i le lagi, a o saunia e le Atua le lalolagi mo Atamu ma Eva. **Na liua e lenā agelu o ia lava ma avea ai ma Tiapolo.** (Iopu 38:4, 7) Na faapefea ona tupu lenā mea? O se faata'ita'iga, e faapefea ona avea se tagata faamaoni ma gai? E le'i fanau mai o ia o se gai. Peita'i e tu'inanau pe mana'ona'o o ia i se mea e lē o sana meatotino. E **faaauau pea** ona ia **mafaufau i ai**, ma ua faasolo ina malosi lenā tu'inanauga sesē. Pe a ia maua loa le avanoa e faatino ai lea tu'inanauga sesē, ona ia faia loa lea o le gai. O lea, ua ia avea

3. Atonu o le ā se fesili e oso a'e i lou mafaufau, talu ai o loo mama'i ma feoti tagata?

4, 5. (a) O ai na tautala atu iā Eva e ala i se gata i le faato'aga o Etena? (e) E faapefea ona avea se tagata faamaoni ma gai?

ai o ia lava o se gaoui.—**Faitau le Iakopo 1:13-15**; taga'i i le Faaopoopoga 8.

⁶ O le tulaga lenā na tupu i le agelu lea na ta'ua muamua. Ina ua uma ona foafoaina e le Atua o Atamu ma Eva, ona ia fetalai atu lea iā i la'ua ina ia fanafanau ma “ia tumu ai le lalolagi.” (Kenese 1: 27, 28) Atonu na manatu lenā agelu e faapea, ‘E mafai e nei tagata uma ona tapua'i mai iā te a'u nai lo o Ieova.’ O le faaauau pea ona ia mafaufau i lenā mea, o le malosi fo'i lenā o lona tu'inanau ina ia tapua'i atu tagata iā te ia, lea e na o Ieova e tatau ona avatu i ai. Na mana'o lenā agelu ina ia tapua'i atu tagata iā te ia. O lea na ia pepelo ai iā Eva ma faasesēina ai o ia. (**Faitau le Kenese 3:1-5.**) O lona faia faapea, na avea ai o ia ma Satani le Tiapolo, le fili o le Atua.

⁷ Na lē usiusita'i Atamu ma Eva i le Atua, ma la aai ai i le fua o le laau. (Kenese 2:17; 3:6) Na la agasala iā Ieova, ma na mulimuli ane la feoti e pei lava o le fetalaiga a Ieova. (Kenese 3:17-19) Sa avea le fanau a Atamu ma Eva ma tagata agasala, o lea na feoti ai i latou. (**Faitau le Roma 5:12.**) Ina ia fesoasoani iā i tatou e malamalama i le māfuaaga na avea ai fo'i le fanau a Atamu ma Eva o ni tagata agasala, se'i mātau le faata'ita'iga lenei. Se'i faapea o lea ua tao se falaoa i se 'apa e iai se omo. O falaoa uma lava e maua mai ai, o le a iai lea omo po

6. Na faapefea ona avea se agelu ma fili o le Atua?

7. (a) Aiseā na feoti ai Atamu ma Eva? (e) Aiseā ua tatou ola matutua ai ma feoti?

o se tulaga ua lē lelei atoatoa ai le falaoa. Ina ua lē usiusita'i Atamu i le Atua, na lē lelei atoatoa ai o ia ma avea ai ma tagata agasala. Talu ai o i tatou uma na tupuga mai iā Atamu, ua tuufaasolo mai la iā i tatou le tulaga lē lelei atoatoa, ma ua avea ai i tatou ma tagata agasala. Ona o i tatou uma la e agasala, ua tatou ola matutua ai ma feoti.—Roma 3:23; taga'i i le Faaopoopoga 9.


8 Na amata e Satani se fouvalega iā Ieova, ina ua ia uuna'ia Atamu ma Eva e lē usiusita'i i le Atua. Na mana'o o ia e talitonu Atamu ma Eva o Ieova e pepelo, ma o se pule leaga e lē mana'o i se olaga lelei mo i la'ua. E tusa o lea na faapea atu Satani, e lē mana'omia e tagata le Atua e faatonu i latou i le mea e fai, ma e tatau iā Atamu ma Eva ona filifili lava e i la'ua le mea e lelei ma leaga. O le ā la le gaioiga o le a faia e Ieova? Sa ono mafai lava ona ia faaumatia loa i le taimi lenā nei tagata fouvale, ma faamuta ai le fouvalega. Ae po o le a faamaonia ai o Satani o sē e pepelo? E leai.

9 O lea, e le'i faaumatia e Ieova nei tagata fouvale. Nai lo o lea, na ia tuu atu se taimi i tagata e latou te pule ai iā i latou lava. E faamaonia ai i inei e pepelo Satani, ma e silafia e Ieova le mea e sili ona lelei mo tagata. E tatou te a'oa'oina nisi faamatalaga e faatatau i lenā manatu i le Mataupu 11. Ae o le ā sou manatu e faatatau i le filifiliga a Atamu ma Eva? Pe na tonu mo i la'ua ona

8, 9. (a) O le ā na mana'o Satani e talitonu i ai Atamu ma Eva? (e) Aiseā na lē faaumatia ai e Ieova ē na fouvale?

talitonu iā Satani ae lē usiusita'i i le Atua? Na foa'i atu e Ieova iā Atamu ma Eva mea uma lava. Na ia tuuina iā i la'ua le ola lelei atoatoa, o se nofoaga matagofie e ola ai, ma galuega e la te fiafia ai. Peita'i, e le'i iai lava se taimi na faia ai e Satani se mea

Pe na mafai e Satani ona ofoina atu malo uma o le lalolagi iā Iesu pe ana faapea e lē o ia e ona nei malo?



lelei mo i la'ua. Pe ana e iai i inā, o le ā lau gaoioiga e fai?

10 Ua iai fo'i iā i tatou ta'ito'atasi se filifiliga faapena, ma e faalagolago i ai lo tatou ola. E mafai ona tatou filifili e usiusita'i iā Ieova e avea ma o tatou Pule, ma faia se sao e faamaonia ai e pepelo Satani. E ono mafai fo'i ona tatou filifili e avea Satani ma o tatou pule. (Salamo 73:28; **faitau le Faataoto 27:11.**) E to'aitiiti lava tagata i lenei lalolagi o loo usiusita'i i le Atua. O le mea moni, e lē o le Atua le pule o lenei lalolagi. Pe afai la o le tulaga lenā, o ai la le pule o lenei lalolagi?

O AI O LOO PULEA LE LALOLAGI?

11 Na silafia e Iesu lē o loo pulea moni le lalolagi. I se tasi taimi, na “faaali atu [e Satani] iā te ia o malo uma o le lalolagi ma o latou mamalu.” Ona folafola atu lea e Satani: “Ou te avatu nei mea uma iā te oe, pe afai e tau lava ina e faapa'ū [pe ifo] ma tapua'i mai iā te a'u.” (Mataio 4:8, 9; Luka 4:5, 6) Ia fesili ifo iā te oe lava, 'Pe na mafai e Satani ona ofoina atu na malo iā Iesu pe ana faapea e lē o ia e ona nei malo?' E leai. O Satani e ona malo uma.

12 E te ono manatu: 'E faapefea ona avea Satani ma pule o le lalolagi? Pe e lē o Ieova o le Atua o Lē e ona le malosia uma lava na foafoaina le lagi ma le

10. O le ā le filifiliga tāua ua iai iā i tatou ta'ito'atasi?

11, 12. (a) O le ā e tatou te a'oa'oina mai i mea na ofoina atu e Satani iā Iesu? (e) O ā mau o le Tusi Paia e faamaonia ai o Satani le pule o le lalolagi?

lalolagi?’ (Faaaliga 4:11) O le mea moni lenā. Peita’i na ta’ua ma le manino e Iesu, o Satani o ia o “le pule o lenei lalolagi.” (Ioane 12:31; 14:30; 16:11) Na ta’ua e le aposetolo o Paulo ia Satani le Tiapolo o “le atua o lenei faiga o mea a le lalolagi.” (2 Kori-nito 4:3, 4) Na tusi fo’i le aposetolo o Ioane, “o le lalolagi atoa o loo nofo to’ilalo i le pule a lē o loo leaga.”—1 Ioane 5:19.

O LE A FAAPEFEA ONA FAAUMATIA LE LALOLAGI A SATANI?

¹³ Ua faateteleina le tulaga leaga i lenei lalolagi. O loo tatou vaaia i so o se mea taua, faiga pi’opi’o, le pepelo ma faiga sauā. E lē mafai e tagata ona ave-sea nei tulaga leaga, e tusa lava po o ā a latou tau-mafaiga. Peita’i, ua toetiiti ona faaumatia lea e le Atua o lenei lalolagi amioleaga e ala i lana taua o Amaketo, ma o le a ia suia i se lalolagi fou e nonofo ai tagata amiotonu.—Faaaliga 16:14-16; taga’i i le Faaopoopoga 10.

¹⁴ Na tofia e Ieova ia Iesu Keriso e avea ma Tupu o Lona malo i le lagi. I le faitau afe o tausaga ua mavae, na valoia ai e le Tusi Paia o le a pule Iesu o se “Perenise o le Filemu” ma e tumau e faavavau lona malo. (Isaia 9:6, 7) Na a’oa’o e Iesu ona soo e tatalo mo lenei malo ina ua ia fetalai: “Ia oo mai lou malo. Ia faia lou finagalo i le lalolagi, e pei ona faia i le lagi.” (Mataio 6:10) I le Mataupu 8, o le a

13. Aiseā e tatou te mana’omia ai se lalolagi fou?

14. O ai na tofia e le Atua e avea ma Tupu o lona Malo, ma o le ā na valoia e le Tusi Paia e faatatau iā Iesu?

tatou iloiloina ai le auala o le a avea ai le Malo o le Atua ma malo e tasi o le a pulea le lalolagi. (**Faitau le Tanielu 2:44.**) Mulimuli ane, o le a faia e le Malo o le Atua le lalolagi e avea o se parataiso matagofie. —Taga’i i le Faaopoopoga 11.

E LĒ O TOE UMI ONA IAI LEA O SE LALOLAGI FOU

15 Ua folafola mai i le Tusi Paia: “E tatou te faatalitali i le lagi fou ma le lalolagi fou,” ma “e mau ai le amiotonu.” (2 Peteru 3:13; Isaia 65:17) O nisi taimi pe a ta’ua i le Tusi Paia le upu “lalolagi,” o loo faasino atu i tagata o loo nonofo i le lalolagi. (Kenese 11:1) O lea, e faasino atu “le lalolagi fou” amiotonu, i tagata uma e usiusita’i i le Atua ma maua faamanuiaga mai iā te ia.

16 Na fetalai Iesu o le a maua e i latou e nonofo i le lalolagi fou a le Atua le “ola e faavavau.” (Mareko 10:30) O le ā e tatau ona tatou faia ina ia tatou maua ai lenā meaalofa? Faamolemole **faitau le Ioane 3:16 ma le Ioane 17:3** ina ia maua ai le tali. Se’i o tatou iloiloina nei le faamatalaga a le Tusi Paia i le olaga o le a iai i le Parataiso i le lalolagi.

17 O le a lē toe iai le amioleaga, taua, soligatulafono ma faiga sauā. O le a lē toe iai ni tagata

15. O le ā le “lalolagi fou”?

16. (a) O le ā le meaalofa matagofie o le a foa’i mai e le Atua mo i latou e nonofo i lana lalolagi fou? (e) O le ā e tatau ona tatou faia ina ia maua ai lenā meaalofa?

17, 18. E faapefea ona tatou iloa o le a iai le filemu i le lalolagi atoa, ma o le a tatou lagonaina fo’i le saogalemu?

amioleaga i le lalolagi. (Salamo 37:10, 11) O le a “faai'uina [e le Atua] taua i tulu'iga o le lalolagi.” (Salamo 46:9; Isaia 2:4) O le a tumu le lalolagi i tagata e alolofa i le Atua ma usiusita'i iā te ia. O le a tumau e faavavau le filemu.—Salamo 72:7.

18 O le a saogalemu tagata o Ieova. I taimi o le Tusi Paia, a o usiusita'i le fanauga a Isaraelu i le Atua, sa saogalemu i latou auā sa puipuia i latou e Ieova. (Levitiko 25:18, 19) I le Parataiso, e tatou te lē toe fefefe i se mea po o se tasi. O le a tatou lagonaina pea le saogalemu.—**Faitau le Isaia 32:18; Mika 4:4.**

19 O le a anoanoa'i meataumafa. “O le a tele saito i le laueleele; o le a fau ma soloi i tumu-tumu o mauga.” (Salamo 72:16) O le a 'faamanuia i tatou e Ieova lo tatou Atua,' ma “e fua mai lava e le laueleele ona fua.”—Salamo 67:6.

20 O le a avea le lalolagi atoa ma parataiso. O le a iai fale mananaia o tagata ma togālaau matagofie. (**Faitau le Isaia 65:21-24; Faaaliga 11:18.**) O le a matagofie le lalolagi atoa e pei o le faato'aga o Etena. O le a foa'i mai lava e Ieova mea uma e tatou te mana'omia. Ua faapea mai le Tusi Paia e faatatau iā te ia: “Ua e faamafola lou aao ma faamalie le mana'o o mea ola uma lava.”—Salamo 145:16.

19. E faapefea ona tatou mautinoa o le a anoanoa'i meataumafa i le lalolagi fou a le Atua?

20. E faapefea ona tatou iloa o le a avea le lalolagi ma parataiso?



21 O le a nonofo filemu tagata ma manu. O le a lē toe osofa'ia e manu tagata. O le a saogalemu tamaiti ma lē toe fefefe i manu, e oo lava i manu o loo fe'ai i aso nei.—**Faitau le Isaia 11:6-9; 65:25.**

22 O le a lē toe ma'i se tasi. A o iai Iesu i le lalolagi, sa ia faamālōlōina le to'atele o tagata. (Mataio 9:35; Mareko 1:40-42; Ioane 5:5-9) Ae i le avea ai o ia ma Tupu o le Malo o le Atua, o le a ia faamālōlōina tagata uma. E leai se tasi e toe faapea mai: “Ou te ma'i.”—**Isaia 33:24; 35:5, 6.**

23 O le a toetutū mai ē ua feoti. Ua folafola mai e le Atua o le a ia toe faatutūina mai le faitau miliona o tagata ua maliliu. Ua ta'ua i le Galuega 24:15: “E toetutū mai tagata amiotonu ma tagata amiolētonu.”—**Faitau le Ioane 5:28, 29.**

24 Ua iai iā i tatou uma se filifiliga. E mafai ona tatou filifili e a'oa'oina e faatatau iā Ieova ma auaua iā te ia, pe e filifili fo'i e fai o tatou lava loto. Pe a tatou filifili e auaua iā Ieova, e mafai ona tatou maua se lumana'i matagofie. Na fetalai atu Iesu i se tamāloa ua lata ina maliu o loo i ona autafa e faapea: “O le a ta faatasi ma oe i le Parataiso.” (Luka 23:43) Se'i o tatou a'oa'oina atili e uiga iā Iesu Keriso, ma le auala o le a ia faataunuuina ai folafolaga matagofie a le Atua.

21. E faapefea ona tatou iloa o le a nonofo filemu tagata ma manu?

22. O le ā o le a faia e Iesu mo i latou e mama'i?

23. O le ā o le a faia e le Atua mo i latou ua maliliu?

24. O ā ni ou faalogona e faatatau i le ola ai i le Parataiso?

A'OA'OGA
MONI 1NA FOAFOAINA I TATOU E LE
ATUA MO SE FUAFUAGA

“E fai lava le lalolagi mo ē e amiotonu, e nonofo ai pea i latou e oo i le faavavau.”—Salamo 37:29

O le ā le finagalo o le Atua mo tagata?

Kenese 1:28

Na finagalo le Atua ina ia galulue aiga e faia le lalolagi e avea o se parataiso, ma tausia meaola.

Isaia 46:9-11; 55:11

O le a faataunuu e le Atua le mea ua ia finagalo i ai, ma e leai se mea e mafai ona taofia o ia.

A'OA'OGA
MONI 2O MĀFUAAGA UA FAIGATĀ
AI LE OLAGA

“O le lalolagi atoa o loo nofo to'ilalo i le pule a lē o loo leaga.”—1 Ioane 5:19

O ai o loo pulea le lalolagi?

Ioane 12:31

Na ta'ua e Iesu Satani o le pule o le lalolagi.

Iakopo 1:13-15

Na mana'o Satani i se mea e lē o ia e ana.

Kenese 2:17; 3:1-6

Na faasesēina e Satani Eva, ma lē usiusita'i ai Atamu ma Eva i le Atua. Mulimuli ane, na feoti i la'ua.

Roma 3:23; 5:12

Ua tatou feoti ona ua tuufaasolo mai iā i tatou le agasala mai iā Atamu.

2 Korinito 4:3, 4

Ua faasesēina e Satani tagata.

**A'OA'OGA
MONI 3**
**O LE A FO'IA E LE MALO O LE
ATUA FAAFITAULI UMA**

“Ia oo mai lou malo. Ia faia lou finagalo i le lalolagi.”

—Mataio 6:10

O le ā o le a faia e leova?

Tanielu 2:44

O le a avea le Malo o le Atua ma malo e tasi o le a pulea le lalolagi.

Faaaliga 16:14-16

O le a faaumatia e le Atua lenei lalolagi amioleaga iā Amaketo.

Isaia 9:6, 7

Ua tofia e leova Iesu e avea ma Tupu o Lona malo i le lagi. O le a pule Iesu mai le lagi i le lalolagi.

**A'OA'OGA
MONI 4**
**O LE A FAIA E LE MALO
O LE ATUA LE LALOLAGI
E AVEA O SE PARATAISO**

“Ua e faamafola lou aao ma faamalie le mana’o o mea ola uma lava.”—Salamo 145:16

O le ā o le a faia e le Malo o le Atua mo i tatou?

Salamo 46:9

O le a lē toe iai ni taua, soligatulafono ma faiga sauā.

Isaia 32:18; 65:21-24

I le lalolagi fou, o le a nonofo tagata uma i fale mananaia ma iai ni o latou togālaau matagofie. O le a latou nonofo uma fo’i ma le filemu.

Salamo 72:16

O le a anoanoa’i meataumafa.

Isaia 11:6-9

O le a nonofo filemu tagata ma manu.

Isaia 33:24; Galuega 24:15

E lē toe ma’i se tasi, ma o le a toetutū mai ē ua feoti.

O AI IESU KERISO?

E TO'ATELE tagata ta'uta'ua i le lalolagi. Atonu e te iloa le igoa o se tagata ta'uta'ua. Ae e lē faapea a e iloa le igoa o lenā tagata, ona e iloa lelei ai lea o ia. E lē faapea ai ua e iloa mea uma e faatatau iā te ia ma le ituaiga o tagata e iai moni o ia.

² Atonu ua e faalogo e faatatau iā Iesu Keriso, e ui lava na soifua o ia i le lalolagi i le pe ā ma le 2,000 tausaga ua mavae. Peita'i, o le to'atele o tagata e latou te lē iloa lelei le ituaiga o tagata e iai moni Iesu. E fai mai isi o ia o se tagata lelei, ae fai mai isi o ia o se perofeta. E talitonu nisi o ia o le Atua. Ae o le ā sou manatu?—Taga'i i le Faaopoopoga 12.

³ E tāua ona e iloa le a'oa'oga moni e faatatau iā Iesu. Aiseā? Ua faapea mai le Tusi Paia: “O le ola e faavavau fo'i lenei, ia latou iloa oe, le Atua moni e to'atasi, atoa ma **lē na e auina mai, o Iesu Keriso.**” (Ioane 17:3) Ioe, pe afai e te iloa le mea moni e uiga iā Ieova ma Iesu, o le a mafai ona e ola e faavavau i le lalolagi parataiso. (Ioane 14:6)

1, 2. (a) Pe e te iloa lelei se tasi pe afai e na o lona igoa e te iloa-ina? Faamatala. (e) O ā manatu o tagata e faatatau iā Iesu?

3. Aiseā e tāua ai ona e iloa leova le Atua ma Iesu Keriso?

O lou iloaina fo'i o le mea moni e faatatau iā Iesu, o le a aogā iā te oe talu ai o ia le faaa'oa'oga sili o le auala e ola ai ma feutaga'i ai ma isi. (Ioane 13:34, 35) I le Mataupu 1 na tatou iloilo-ina ai le a'oa'oga moni e faatatau i le Atua. Ae o lea o le a tatou iloiloina le a'oa'oga a le Tusi Paia e faatatau iā Iesu.

UA MA MAUA LE MESIA!

⁴ Mo le tele o tausaga a o le'i fanau mai Iesu, na folafola mai ai e Ieova i le Tusi Paia o le a ia auina mai le Mesia po o le Keriso. O le upu "Mesia" e maua mai i le gagana Eperu, ae o le upu "Keriso" e maua mai i le gagana Eleni. O nei faalupega po o ta'u, ua faailoa mai ai o le a filifilia e le Atua le Mesia na folafolaina mai ma avatu iā te ia se tulaga faapitoa. O le a faataunuuina e le Mesia folafolaga uma a le Atua. O le a e a'oa'oina pe e faapefea ona aogā iā te oe i le taimi lenei, le togiola sa saunia e Iesu a o iai i le lalolagi. Peita'i a o le'i fanau mai Iesu, e to'atele na tuufesili, 'O ai o le a avea ma Mesia?'

⁵ Na mautinoa e soo o Iesu, o ia o le Mesia na folafolaina mai. (Ioane 1:41) O se faata'ita'iga, na faapea atu Simona Peteru iā Iesu: "O oe o le Keriso." (Mataio 16:16) E faapefea ona tatou mautinoa o Iesu o le Mesia?

4. O le ā ua faailoa mai i upu nei: "Mesia" ma le "Keriso"?

5. Pe na talitonu soo o Iesu o ia o le Mesia?

6 A o le'i taitai fanau mai Iesu, e tele faamatalaga sa faamauina e perofeta a le Atua e fesoasoani ai i tagata e iloa le Mesia. E faapefea ona iloa e tagata le Mesia? O se faata'ita'iga, se'i faapea na fai atu se tasi e te alu e faatali se tagata e te le'i feiloa'i muamua i ai, i le fale faatali pasi. Pe afai e manino faamatalaga na avatu e lenā tagata iā te oe, e mautinoa o le a faigofie ona e iloa le tagata lea e te alu e faatali. I se tulaga tutusa, na faaaogā e Ieova ana perofeta e faailoa mai iā i tatou mea o le a faia e le Mesia, ma le mea o le a tupu iā te ia. O le faataunuuga o na valoaga uma ua fesoasoani i tagata lotofaamaoni e iloa ai, o Iesu o le Mesia.

7 Se'i manatu i ni faaa'oa'oga se lua. Muamua, i le 700 tausaga a o le'i fanau mai Iesu, na valoia ai e Mika o le a fanau mai le Mesia i le aai la'itiiti o Peteleema. (Mika 5:2) O le aai tonu lava lenā na fanau ai Iesu. (Mataio 2:1, 3-9) Lua, na valoia e Tanielu o le a alia'e mai le Mesia i le 29 T.A. (Tanielu 9:25) O nisi nei o faaa'oa'oga e lua mai i le tele o valoaga e faamaonia manino ai, o Iesu le Mesia na folafolaina mai.—Taga'i i le Faaopoopoga 13.

8 Na faailoa manino mai e Ieova o Iesu o le Mesia. Na folafola e le Atua o le a ia faaali atu iā

6. Na faapefea ona fesoasoani Ieova i tagata lotofaamaoni ina ia iloa po o ai le Mesia?

7. O ā ni valoaga se lua e faamaonia ai o Iesu o le Mesia?

8, 9. O le ā le mea na tupu i le papatisoga o Iesu e faamaonia ai o ia o le Mesia?



Ioane le Papatiso se faailoga, e na te iloa ai po o ai le Mesia. Ina ua alu atu Iesu iā Ioane ina ia papatisoina o ia i le vaitafe o Ioritana i le 29 T.A., na vaaia ai e Ioane lenā faailoga. O le faamatalaga lenei a le Tusi Paia i le mea na tupu: “Ua uma ona papatisoina Iesu, ona maliu a’e loa lea o ia mai le vai. Faauta! ua matala mai le lagi, ma ua iloa atu ai e Ioane le agaga o le Atua e pei o se lupe ua alu ifo i ona luga. Faauta fo’i! Ua faapea mai le si’ufofoga mai i le lagi: ‘O lo’u Atalii pele lenā, o lē ua malie i ai lo’u loto.’” (Mataio 3:16, 17) Ina ua vaaia e Ioane lenei faailoga ma faalogo i ai, na ia iloa ai o Iesu o le Mesia. (Ioane 1:32-34) I lenā aso ina ua liligi ifo e le Atua lona agaga i luga o Iesu, na avea ai o ia ma Mesia. O ia o lē ua fili-filia e le Atua e avea ma Ta’ita’i ma Tupu.—Isaia 55:4.

° O valoaga o le Tusi Paia, o fetalaiga a Ieova lava ia ma le faailoga na ia faaali atu i le papatisoga o Iesu, ua faamaonia ai o Iesu o le Mesia. Ae o fea na afio mai ai Iesu, ma o le ā le ituaiga o tagata na iai o ia? Se’i o tatou iloilo po o le ā le faamatalaga a le Tusi Paia.

O FEA NA AFIO MAI AI IESU?

10 Ua a'oa'oina i le Tusi Paia na soifua Iesu i le lagi mo se taimi umi a o le'i afio mai i le lalolagi. Na ta'ua e Mika "e mai anamuā" le Mesia. (Mika

10. O le ā ua a'oa'oina i le Tusi Paia e faatatau i le soifuaga o Iesu a o le'i afio mai i le lalolagi?

I le taimi o le papatisoga o Iesu,
na avea ai o ia ma Mesia
po o le Keriso



5:2) E tele taimi na fetalai ai Iesu lava ia na soifua muamua o ia i le lagi, a o le'i fanau mai o se tagata. (Faitau le Ioane 3:13; 6:38, 62; 17:4, 5.) E oo fo'i i le taimi a o le'i afio mai Iesu i le lalolagi, na iai sa la faiā faapitoa ma Ieova.

¹¹ E matuā pele Iesu iā Ieova. Aiseā? Talu ai na muamua foafoaina o ia e le Atua i lo o isi mea uma lava. O le māfuaaga lea ua ta'ua ai o ia “o le ulumatua o foafoaga uma.”* (Kolose 1:15) E pele fo'i Iesu iā Ieova ona e na o ia lava na faia tuusa'o e Ieova. O le māfuaaga lenā ua ta'ua ai o ia o le “Atalii e to'atasi.” (Ioane 3:16) E na o Iesu fo'i na faaaogā e Ieova e foafoaina ai isi mea uma lava. (Kolose 1:16) Ua na o Iesu fo'i ua ta'ua o “le Upu,” auā na faaaogā o ia e Ieova e faailoa atu ai ana fe'au ma faatonuga i agelu ma tagata.—Ioane 1:14.

¹² E talitonu nisi tagata e tutusa Iesu ma le Atua. Ae e lē o le a'oa'oga lenā a le Tusi Paia. Ua faapea mai le Tusi Paia na foafoaina Iesu, o lona uiga e iai le amataga o Iesu. Ae o Ieova o lē na foafoaina mea uma, e leai sona amataga. (Salamo 90:2) I le avea ai ma Atalii o le Atua, e le'i iai lava se

* Ua ta'ua Ieova o le Tamā talu ai o ia o Lē na foafoaina mea uma lava. (Isaia 64:8) Ua ta'ua Iesu o le Atalii o le Atua talu ai na foafoaina o ia e Ieova. E ta'ua fo'i agelu faapea Atamu, o atalii o le Atua.—Iopu 1:6; Luka 3:38.

11. Aiseā e matuā pele ai Iesu iā Ieova?

12. E faapefea ona tatou iloa e lē tutusa Iesu ma le Atua?

taimi na mafaufau ai Iesu e avea o ia ma Atua. E manino lava le a'oa'oga a le Tusi Paia e sili atu le Tamā i lo o le Atalii. (**Faitau le Ioane 14:28**; 1 Korinito 11:3.) E na o Ieova lava o le “Atua, o Lē e ona le malosi uma lava.” (Kenese 17:1) O ia o lē e silisili ese ma e sili ona malosi i le lagi ma le lalolagi.—Taga'i i le Faaopoopoga 14.

13 E faitau piliona tausaga na galulue faatasi ai Ieova ma lona Atalii o Iesu, a o le'i foafoaina le lagi ma le lalolagi. E mautinoa lava le matuā alofa o le tasi i le isi. (Ioane 3:35; 14:31) O le faaa'oa'otoatoa o Iesu i uiga o lona Tamā, ua māfua ai ona ta'ua o ia i le Tusi Paia “ua foliga i le Atua e lē vaaia.”—Kolose 1:15.

14 Na lotomalie le Atalii pele o Ieova e tuua le lagi ae fanau mai i le lalolagi o se tagata. Na faapefea ona tupu lenā mea? Na faavavega ona tuu e Ieova i le manava o se taupou e igoa iā Maria le ola o lona Atalii. I lenei auala, e le'i mana'omia ai ona iai se tamā faaletagata o Iesu ina ia fanau mai ai o ia. O lea na fanauina ai e Maria se tama tama e lelei atoatoa, ma faaigoa o ia iā Iesu.—Luka 1:30-35.

O LE Ā LE ITUAIGA O TAGATA NA IAI IESU?

15 E tele mea e mafai ona e a'oa'oina e faatatau

13. Aiseā ua faapea mai ai le Tusi Paia o Iesu “ua foliga i le Atua e lē vaaia”?

14. Na faapefea ona fanau mai le Atalii pele o Ieova o se tagata?

15. E faapefea ona e iloa lelei Ieova?

iā Iesu, lona soifuaga ma ona uiga, e ala i le faitau i tusi o le Tusi Paia o Mataio, Mareko, Luka ma Ioane. Ua ta'ua na tusi o Evagelia. Talu ai e pei Iesu o lona Tamā, o mea e te faitauina o le a fesoa-soani fo'i iā te oe e iloa lelei ai Ieova. O le māfua-ga lenā na mafai ai ona faapea mai Iesu: "O lē ua vaai mai iā te a'u, ua vaai fo'i o ia i le Tamā." —Ioane 14:9.

16 Na ta'ua e le to'atele o tagata Iesu o le "A'o-a'o." (Ioane 1:38; 13:13) O se tasi o mea e sili ona tāua sa ia a'oa'oina atu, o "le tala lelei o le malo." O le ā lenei Malo? O le pulega lea a le Atua o le a pule mai i le lagi i le lalolagi atoa, ma aumaia faamanuiaga i tagata e usiusita'i i le Atua. (Mataio 4: 23) O mea uma lava na a'oa'oina e Iesu e mai iā Ieova. Na fetalai Iesu: "O mea ua ou a'oa'oina atu, e lē o ni o'u manatu, a o manatu o lē na auina mai a'u." (Ioane 7:16) Na silafia e Iesu e finagalo Ieova ina ia faalogo tagata i le tala lelei e faapea, o le a pule le Malo o le Atua i le lalolagi atoa.

17 O fea sa a'oa'o atu ai Iesu? O so o se mea lava e na te maua ai tagata. Na ia a'oa'o atu i laufanua o iai faato'aga, i aai, o nuu, maketi, le malumalu, sunako ma fale o aiga. E le'i faatalitalia e Iesu tagata e o atu iā te ia. Peita'i, na masani ona alu o ia

16. O le ā na a'oa'o atu e Iesu, ma o fea e faavae mai ai ana a'o-a'oga?

17. (a) O fea sa a'oa'o atu ai Iesu? (e) Aiseā sa taumafai malosi ai o ia e a'oa'o atu i isi?

i le mea o loo iai tagata. (Mareko 6:56; Luka 19: 5, 6) Sa galue mamafa Iesu ma faaalu le tele o lona taimi ma lona malosi e a'oa'oina ai tagata. O le ā le māfuaaga? Talu ai sa ia silafia o le finagalo lea o lona Tamā, ma e usita'i fo'i o ia i lona Tamā i taimi uma. (Ioane 8:28, 29) Na tala'i fo'i Iesu ona o lona alofa mutimutivale i tagata. (**Faitau le Mataio 9:35, 36.**) Na ia silafia e lē o a'oa'oina e ta'ita'i lotu le mea moni e faatatau i le Atua ma lona Malo. O lea, sa mana'o ai o ia e fesoasoani i le to'atele e mafai ai e faalogo i le tala lelei.

18 O Iesu o se tagata e alofa ma manatu mamafa i tagata. Sa agalelei o ia ma sa faigofie ona talanoa atu tagata iā te ia. Sa fiafia fo'i le fanau iti e ō atu iā te ia. (Mareko 10:13-16) Sa tonu i taimi uma ana gaoioiga. Na 'ino'ino o ia i faiga pi'opi'o ma faiga lē tonu. (Mataio 21:12, 13) Na soifua o ia i se taimi e le'i tele ai ni aiā tatau a fafine, ma lē faaaloogia ma lē faamamaluina ai i latou. Ae e le'i faapena Iesu, sa ia feutaga'i i taimi uma ma fafine i se auala faaaloalo ma faamamaluina i latou. (Ioane 4:9, 27) Sa faaalua fo'i e Iesu le lotomaulalo moni. O se faaa'oa'oga, na ia mulumuluina vae o ona aposetolo i se tasi afiafi, o se gaoioiga e masani ona faia e se auauna.—Ioane 13:2-5, 12-17.

19 Na silafia e Iesu mea sa mana'omia moni e


18. O ā uiga o Iesu e sili ona e fiafia i ai?

19. O le ā se faaa'oa'oga e faaalua ai na silafia e Iesu mea sa mana'omia moni e tagata, ma na finagalo o ia e fesoasoani iā i latou?



Na tala'i Iesu i so o se mea lava e maua ai tagata

tagata, ma na finagalo o ia e fesoasoani iā i latou. Na matuā manino lenei tulaga ina ua ia faaaogāina le mana o le Atua e faamālōlōina faavavega ai tagata. (Mataio 14:14) O se faaa'oa'oga, na sau se tamāloa lepela iā Iesu ma faapea atu iā te ia: "A e finagalo i ai, e mafai lava ona e faamamā iā te a'u." Sa ootia le finagalo o Iesu i le vaai atu i tigā ma mafatiaga o lenei tamāloa. Na tigā alofa o ia i lenei tamāloa ma mana'o e fesoasoani iā te ia. O lea na faaloaloa atu ai lona aao ma pa'i atu i le tamāloa, ma faapea atu: "Ou te loto i ai. Inā mamā ia oe." O le mea lenā na tupu, na faamālō-



lōina le tamāloa mai i lona ma'i. (Mareko 1:40-42) Se'i mafaufau i faalogona o lenā tamāloa.

FAAMAONI PEA I LONA TAMĀ

²⁰ O Iesu le faaa'oa'oga sili o le usiusita'i i le Atua. E tusa lava po o ā mea na tutupu ma po o ā fo'i gaoioiga na faia e ona fili iā te ia, ae sa ia faamaoni pea i lona Tamā. O se faaa'oa'oga, e le'i agasala Iesu ina ua taumafai Satani e faaosoosoina o ia. (Mataio 4:1-11) E le'i talitonu isi sui o le

20, 21. Ua faapefea ona avea Iesu ma faaa'oa'oga sili o le usiusita'i i le Atua?

aiga o Iesu o ia o le Mesia, ma sa latou faapea atu “ua faalētonu lona mafaufau.” E ui i lea, sa faaauau pea ona faia e Iesu le galuega a le Atua. (Mareko 3:21) Ina ua sauāina o ia e ona fili, sa faamaoni pea Iesu i le Atua ma e le'i taumafai fo'i e toe tau ai.—1 Peteru 2:21-23.

²¹ Sa tumau pea ma le faamaoni Iesu iā Ieova, e ui na puapuagatia o ia i se maliu tigā. (**Faitau le Filipi 2:8.**) Se'i mafaufau i le tele o mea sa ia onosaia i le aso na maliu ai. Sa pu'eina o ia, tuua'ia sesē e molimau pepelo i le upuleaga i le Atua, ta'usalaina e faamasino pi'opi'o, ulagia e le motu o tagata, fasi faamo'amo'a e fitafita ma tutu'i i luga o le laau. Ina ua lata ina maliu o ia, sa ia alaga atu: “Ua taunuu!” (Ioane 19:30) Ina ua mavae aso e tolu talu ona maliu Iesu, na toe faatūina ai o ia e Ieova i se tino agaga. (1 Peteru 3:18) I ni nai vaiaso mulimuli ane, na toe afio a'e ai Iesu i le lagi ma “nofo ai i le itu taumatau o le Atua,” ma faatali ai i le taimi e faia ai o ia e Ieova ma Tupu.—Eperu 10:12, 13.

²² Talu ai na tumau ma le faamaoni Iesu i lona Tamā, ua tatou maua ai le avanoa e ola ai e faavavau i se lalolagi parataiso e pei lava ona finagalo i ai Ieova. I le mataupu o sosoo mai, o le a tatou iloiloaina ai pe e faapefea i le maliu o Iesu ona tatou maua ai le avanoa e ola ai e faavavau.

22. O le ā le avanoa ua tatou maua ona o le tumau ma le faamaoni o Iesu i lona Tamā?

A'OA'OGA
MONI 1

O IESU O LE MESIA

“O oe o le Keriso.”—Mataio 16:16

E faapefea ona tatou iloa o Iesu o le Mesia?

Mataio 3:16, 17;

Ioane 1:32-34

Na faailoa mai e Ieova, o Iesu o Iona Atalii.

Mika 5:2;

Mataio 2:1, 3-9

Na faataunuu e Iesu valoaga uma e faatatau i le Mesia.

A'OA'OGA
MONI 2

SA SOIFUA IESU O SE AGELU
I LE LAGI A O LE'I AFIO
MAI I LE LALOLAGI

“Na ou sau mai i le lagi.”—Ioane 6:38

O ā mea na faia e Iesu a o iai i le lagi?

Kolose 1:15, 16

Na muamua foafoaina e Ieova Iesu, ona ia faaogā Iesu e foafoaina ai isi mea uma lava. E faitau piliona tausaga o a'oa'oina e Iesu mea mai i Iona Tamā.

Luka 1:30-35

Na auina mai e Ieova Iesu i le lalolagi.

**A'OA'OGA
MONI 3**
E ALOFA IESU I TAGATA

“Tuu ai pea tamaiti e ō mai iā te a’u.”—Mareko 10:14

O ā uiga o Iesu e te fiafia i ai?

Mareko 10:13-16

Sa agalelei Iesu, ma sa fiafia tagata e talanoa iā te ia.

Ioane 4:9, 27

Na faaaloalo Iesu i fafine ma faamamaluina i latou.

Ioane 13:2-5, 12-17

Sa lotomaulalo Iesu.

Mataio 9:35, 36;
Mareko 1:40-42

Na mana’o Iesu e fesoasoani i isi.

**A'OA'OGA
MONI 4**
**E FAIA E IESU I TAIMI UMA
LE FINAGALO O LE ATUA**

“Ua ou faamāe’aina le galuega na e tuuina mai iā te a’u e fai.”—Ioane 17:4

E faapefea i le faaa’oa’oga a Iesu ona fesoasoani iā i tatou ina ia faamaoni?

Mataio 4:1-11

Sa tumau pea i le faamaoni Iesu, e ui i faaososoga a le Tiapolo.

Mareko 3:21

Sa faia e Iesu le finagalo o le Atua, e ui sa ulagia o ia e ona aiga.

1 Peteru 2:21-23

E le’i taumafai Iesu e toe tau i atu i ona fili.

Filipi 2:8

Sa tumau pea ma le faamaoni Iesu i le Atua, e ui lava na oo ai iā te ia le oti.

Eperu 10:12, 13;
1 Peteru 3:18

Na toe faatūina e leova Iesu i le lagi.

LE TOGIOLA —LE MEAALOF A SILISILI A LE ATUA

O LE ā se meaalofo sili na e mauaina? E lē faapea se‘i-
loga e taugatā le meaalofo ona faato‘ā tāua lea iā te oe.
Pe a e fiafia i se meaalofo po o se mea fo‘i e sili ona e
mana‘omia, e te lagonaina le lotofaafetai.

² E tele meaalofo ua foa‘iina mai e le Atua iā i tatou.
Peita‘i, e tasi lava le meaalofo e sili ona tatou mana‘o-
mia, o lana meaalofo silisili lea mo tagata. O le a tatou
a‘oa‘oina i lenei mataupu, na auina mai e Ieova lona
Alo o Iesu Keriso ina ia mafai ai ona tatou ola e faava-
vau. (**Faitau le Mataio 20:28.**) O le auina mai o Iesu
i le lalolagi o se togiola, ua faamaonia ai e Ieova lona
alofa moni mo i tatou.

O LE Ā LE TOGIOLA?

³ O le togiola, o le auala lea a Ieova e faasa‘oloto ai
tagata mai i le agasala ma le oti. (Efeso 1:7) Ina ia ma-
lamalama i le māfuaaga e mana‘omia ai le togiola, e
tatau ona tatou iloa le mea na tupu i le faitau afe o
tausaga ua mavae i le faato‘aga o Etena. Na agasala o
tatou ulua‘i mātua o Atamu ma Eva. Talu ai na la aga-
sala, o le i‘uga, na la feoti ai. E tatou te feoti fo‘i ona
ua tuufaasolo mai iā i tatou le tulaga agasala o Atamu
ma Eva.—Taga‘i i le Faaopoopoga 9.

1, 2. (a) E faapefea ona e iloa le tāua o se meaalofo? (e) Aiseā
ua avea ai le togiola o le meaalofo silisili a le Atua?

3. Aiseā ua feoti ai tagata?

⁴ Ina ua foafoaina e Ieova le ulua'i tagata o Atamu, na Ia foa'i atu iā te ia se mea e sili ona tāua, o le ola lelei atoatoa. Sa lelei atoatoa lona mafaufau ma lona tino. Sa lē tatau ona oo iā Atamu le ma'i, le tino matua faapea le oti. Talu ai na foafoaina Atamu e Ieova, na pei ai la Ieova o se tamā iā te ia. (Luka 3:38) Sa masani ona fetalai atu Ieova iā Atamu. Na faailoa manino atu e le Atua iā te ia le mea e na te faatalitalia mai iā te ia, ma tuuina atu galuega e na te faia e maua ai le fiafia.—Kenese 1:28-30; 2:16, 17.

⁵ Na faia Atamu "i le faatusa o le Atua." (Kenese 1:27) Na tuuina e le Atua iā te ia uiga e pei o Ona uiga e aofia ai le alofa, atamai, faamasinotonu ma le malosi. Na ia tuuina atu fo'i iā Atamu le sa'olotoga e filifili ai. E le'i pei Atamu o se masini e faatonutonu. Na foafoaina o ia e le Atua i se auala e mafai ai ona ia filifili pe fai le mea sa'o po o le mea sesē. Pe ana filifili Atamu e usiusita'i i le Atua, semanū o loo ola pea e faavavau o ia i le Parataiso.

⁶ Ina ua lē usiusita'i Atamu i le Atua ma faasalaina o ia i le oti, e matuiā i'uga na oo i ai. Na ia melea lana faiā faapitoa ma Ieova, lona ola lelei atoatoa, ma le Parataiso lea sa nofo ai. (Kenese 3:17-19) Na filifili Atamu ma Eva e lē usiusita'i i le Atua, o lea, e lē iai se faamoemoe mo i la'ua. Ona o le gaoioiga sa faia e Atamu, ua 'oo mai ai le agasala i le lalolagi, o le oti

4. O ai Atamu, ma o ā mea na foa'i atu iā te ia?

5. O le ā le uiga o le faaupuga i le Tusi Paia, na faia Atamu "i le faatusa o le Atua"?

6. (a) O le ā na melea e Atamu ina ua lē usiusita'i i le Atua?
(e) Ua faapefea ona aafia ai i tatou?

fo'i ona o le agasala, ona oo mai ai lea o le oti i tagata uma auā ua agasala uma lava.' (Roma 5:12) Ina ua agasala Atamu, na ia "faatauina atu" o ia ma i tatou e avea ma pologa i le agasala ma le oti. (Roma 7:14) Pe e iai se faamoemoe mo i tatou? Ioe, na saunia e Ieova le togiola.

⁷ O le ā le togiola? E lua mea e aofia ai i le togiola. Muamua, o le togiola o se tau lea e totogi e faasa'olotoina ai se tagata, pe toe faatau mai ai se mea. Lua, o le togiola o se tau e tutusapau ma le tau o le mea lea o loo totogi.

⁸ E leai se tagata e mafai ona ia faasa'olotoina i tatou mai i i'uga mata'utia ua oo i ai, ina ua agasala Atamu ma tuufaasolo mai ai le oti iā i tatou. Peita'i, na saunia e Ieova le auala e faasa'olotoina ai i tatou mai i le agasala ma le oti. Se'i o tatou iloilo ina po o le ā le tāua o le togiola, ma pe e faapefea ona tatou maua mai ai aogā.

LE AUALA NA SAUNIA AI E IEOVA LE TOGIOLA

⁹ E leai se tasi o i tatou e mafai ona totogiina le togiola mo le ola lelei atoatoa lea na melea e Atamu. Aiseā? Talu ai o i tatou uma lava e lē lelei atoatoa. (Salamo 49:7, 8) O le togiola sa tataua ona totogiina, o se isi fo'i ola lelei atoatoa. O le māfuaaga lenā e ta'ua ai o le "togiola e fetau lelei." (1 Timoteo 2:6) Sa tataua ona tutusa lelei le ola lelei atoatoa e totogi atu, ma le ola lelei atoatoa lea sa melea e Atamu.

7, 8. O le ā le togiola?

9. O le ā e mana'omia ina ia totogi ai le togiola?

10 Na faapefea ona saunia e Ieova le togiola? Na auina mai e Ieova i le lalolagi lona Atalii e sili ona pele. O lona Atalii lea o Iesu, o ia o lana foafoaga muamua lava. (1 Ioane 4:9, 10) Sa finagalo malie Iesu e tuua lona afioaga i le lagi ma lona Tamā. (Filipi 2:7) Na tuuina e Ieova le ola o Iesu i le manava o Maria, ma fanau mai ai Iesu o se tagata e lelei atoatoa e aunoa ma se agasala.—Luka 1:35.

11 Ina ua lē usiusita'i le ulua'i tagata o Atamu iā Ieova, na ia melea ai le ola lelei atoatoa mo tagata uma. Pe e mafai e se isi tagata ona aveesea le oti mo i latou uma na tupuga mai iā Atamu? Ioe, e mafai. (**Faitau le Roma 5:19.**) Na foa'i e Iesu o lē e leai se agasala, lona ola lelei atoatoa e fai ma togiola. (1 Korinito 15:45) E mafai e lona ola lelei atoatoa ona aveesea ai le oti mo fanau uma a Atamu.—1 Korinito 15:21, 22.

12 O loo faamatalaina i le Tusi Paia le ogaoga o mafatiaga na oo iā Iesu a o le'i maliu. Na sasa faamo'a-mo'a o ia, tutu'i i luga o se laau ma onosaia se maliu e sili ona tigā. (Ioane 19:1, 16-18, 30) Aiseā na tatau ai ona matuā puapuagatia Iesu? Talu ai o le faamatalaga a Satani e faapea, e leai se tagata e mafai ona faamaoni pea i le Atua pe a feagai ma tofotofoga ogaoga. Na faamaonia e Iesu e mafai e se tagata lelei atoatoa ona faamaoni pea i le Atua, e tusa lava pe oo iā te ia

10. Na faapefea ona saunia e Ieova le togiola?

11. E faapefea ona avea se tagata se to'atasi ma togiola mo tagata uma?

12. Aiseā na tatau ai ona matuā puapuagatia Iesu?

mafatiaga e sili ona ogaoga. Se'i mafaufau i le matuā fiasia o le finagalo o Ieova iā Iesu.—Faataoto 27:11; taga'i i le Faaopoopoga 15.

13 O ā mea na aofia ai i le totogiina o le togiola? I le 33 T.A. iā Nisani 14 e tusa ai ma le kalena faa-Iutaia, na faatagaina ai e Ieova fili o Iesu e fasiotia o ia. (Eperu 10:10) Ina ua mavae aso e tolu, na toe faatūina Iesu e Ieova, e lē i se tino faaletagata ae i se tino agaga. O le vaega faai'u o le totogiina o le togiola, na toe afio ai Iesu i le lagi i le Atua. (Eperu 9:24) Na talia e le Atua le gaoioiga na faia e Iesu, o le foa'i atu lea o lona ola e fai ma taulaga. Talu ai ua uma ona totogi le togiola, ua tatou maua la le avanoa e sa'oloto ai mai i le agasala ma le oti.—**Faitau le Roma 3:23, 24.**

O AOGĀ O LE TOGIOLA MO OE

14 O lea ua tatou maua aogā mai i le meaalofo sili-sili a le Atua. Se'i o tatou iloiloina pe e faapefea ona aogā le togiola iā i tatou i le taimi lenei faapea le lumana'i.

15 E faamagaloina a tatou agasala. E faigatā ona tatou faia le mea sa'o i taimi uma, ma i nisi taimi e tatou te faia ai ni faamatalaga ma ni gaoioiga sesē. O ā gaoioiga e mana'omia ona tatou faia ina ia faamagaloina ai i tatou? E tatau ona tatou salamō moni mai i la tatou gaoioiga sesē ua fai, ma talosaga atu ma le lotomaulalo iā Ieova e faamagalo i tatou. Pe a faia

13. O ā mea na aofia ai i le totogiina o le togiola?

14, 15. O le ā e tatau ona tatou faia ina ia faamagaloina ai a tatou agasala?

faapea, ona tatou mautinoa ai lea ua faamagaloina a tatou agasala.—Kolose 1:13, 14; 1 Ioane 1:8, 9.

16 E tatou te maua se lotofuatiaifo lelei. Pe afai e ta'u mai e o tatou lotofuatiaifo ua tatou faia se gaio-oiga sesē, e oo iā i tatou lagona nofosala, ma atonu e lagona fo'i ua leai so tatou faamoemoe ma pei ua leai so tatou aogā. Ae e leai se māfuaaga e tatou te fiu ai. Pe afai e tatou te ōle atu iā Ieova mo le faamagaloga, e tatou te mautinoa o le a ia faafofoga mai ma faamagalo i tatou. (Eperu 9:13, 14) E finagalo Ieova e tatou te talanoa atu iā te ia e faatatau i o tatou faafitauli ma vaivaiga. (Eperu 4:14-16) O le i'uga, e mafai ona tatou maua ai se lotofuatiaifo lelei i le silafaga a le Atua.—Taga'i i le Faaopoopoga 16.

17 Ua tatou maua le faamoemoe o le ola e faavavau. Ua ta'ua i le Roma 6:23: “O le totogi o le agasala o le oti lea, a o le meaalofa a le Atua o le ola e faavavau lea, e ala iā Keriso Iesu lo tatou Alii.” Talu ai na maliu Iesu mo i tatou, e mafai la ona tatou ola e faavavau ma maua le soifua mālōlōina lelei atoatoa. (Faaaliga 21:3, 4) Ae o le ā e tatau ona tatou faia ina ia maua ai na faamanuiaga?

PO O LE A E TALIA LE TOGIOLA?

18 Se'i mafaufau i ou faalogona pe a avatu e se tasi iā te oe se meaalofa matagofie. O le togiola o le

16. O le ā e tatau ona tatou faia ina ia maua ai se lotofuatiaifo lelei?

17. O ā faamanuiaga e mafai ona tatou maua ona o le maliu o Iesu mo i tatou?

18. E faapefea ona tatou iloa e alofa Ieova iā i tatou?

ΙΗΣΟΥΣ ΟΝΑΣ ΖΩΡΑΙΟΣ
Ο ΒΑΣΙΛΕΥΣ ΤΩΝ ΝΙΟΥΔΑΙΩΝ

Na foa'i mai e leova
lona Atalii pele o se
togiola mo i tatou



meaalofa lea e sili ona tautele, ma e tatau ona tatou matuā lotofaafetai ai iā Ieova. Ua faapea mai le Ioane 3:16: “O le alofa tele o le Atua i le lalolagi, na ia foa’i mai ai lona Atalii e to’atasi.” Ioe, o le alofa tele o Ieova iā i tatou ua ia foa’i mai ai lona Atalii pele o Iesu. E tatou te iloa fo’i e alofa Iesu iā i tatou, auā na finagalo malie o ia e maliu mo i tatou. (Ioane 15:13) O le meaalofa o le togiola e tatau ona faatalitonuina ai oe, e alofa moni lava Ieova ma Iesu iā te oe.—Kalatia 2:20.

19 O lea la ua e a’oa’oina e faatatau i le silisili ese o le alofa o le Atua. Ae e faapefea la ona avea oe ma ana uō? E lē faigofie ona e alofa i se tasi e te lē iloa. Ua faapea mai le Ioane 17:3, e mafai ona tatou **iloa Ieova**. A o e faia lenei mea, o le a faalolotoina ai lou alofa mo ia, o le a e mana’o e faafiafia lona finagalo, ma o le a avea oe ma ana uō. O lea, ia faaauau pea ona a’oa’oina e faatatau iā Ieova e ala i le su’esu’e i le Tusi Paia.—1 Ioane 5:3.

20 **Ia faaalua le faatuatua i le taulaga togiola a Iesu.** Ua faapea mai le Tusi Paia, “o lē e faatuatua i le Alo e maua e ia le ola e faavavau.” (Ioane 3:36) O le ā le uiga o le faaalua o le faatuatua? O lona uiga, o le faia lea o mea na a’oa’oina i tatou e Iesu e fai. (Ioane 13:15) E lē lava le tau ina faapea atu e tatou te talitonu iā Iesu. E tatau ona tatou gaoioi ina ia faamaonia atu lo tatou faatuatua. Ua faapea mai le Iakopo 2:26: “[E] mate le faatuatua pe a leai ni galuega.”

19, 20. (a) E faapefea ona avea oe ma uō a Ieova? (e) E faapefea ona e faaalua le faatuatua i le taulaga togiola a Iesu?



A o tatou a'oa'oina
mea e faatatau iā
leova, o le a avea ai i
tatou ma ana uō ma
faalolotoina ai fo'i lo
tatou alofa mo ia

21 Auai i le Faamanatuga o le maliu o Keriso. I le afiafi pō a o le'i maliu Iesu, na ia a'oa'oina ai e tatau ona tatou faamanatuina lona maliu. E tatou te faia lenei sauniga i tausaga ta'itasi, ma ua ta'ua o le Faamanatuga po o "le talisuaga afiafi a le Alii." (1 Korinito 11:20; Mataio 26:26-28) E finagalo Iesu ina ia tatou manatua na ia foa'iina mai lona ola lelei atoa-toa o se togiola mo i tatou. Na fetalai o ia: "Ia faia pea lenei mea e fai ma faamanatuga iā te a'u." (**Faitau le Luka 22:19.**) O lou auai i le Faamanatuga, e faaalua ai o loo e manatua le togiola ma le silisili ese o le alofa o leova ma Iesu mo i tatou.—Taga'i i le Faaopoopoga 17.

22 O le togiola o le meaalofa silisili lea e mafai ona tatou mauaina. (2 Korinito 9:14, 15) O lenā meaalofa tautele, o le a maua ai fo'i e le faitau miliona ua maliliu aogā. O le a iloiloaina i le Mataupu 6 ma le 7 pe e faapefea ona tupu lenā mea.

21, 22. (a) Aiseā e tatau ai ona tatou auai i le Faamanatuga o le maliu o Keriso i tausaga ta'itasi? (e) O le ā o le a iloiloaina i le Mataupu 6 ma le 7?

A'OA'OGA
MONI 1O I TATOU UMA E MANA'OMIA
LE TOGIOLA

‘Na sau le Atalii o le tagata ina ia foa’i atu lona ola e fai ma togiola e sui a’i tagata e to’atele.’—Mataio 20:28

Aiseā e tatou te mana’omia ai le togiola?

Kenese 3:17-19

Ina ua lē usita’i Atamu i le Atua, na ia melea ai lana faiā faapitoa ma leova, lona ola lelei atoatoa ma le Parataiso lea sa nofo ai.

Roma 5:12

Ona o le gaoioiga sa faia e Atamu, ua tuufaasolo mai ai iā i tatou le agasala ma le oti.

Efeso 1:7

O le togiola o le auala lea a leova e faasa’oloto ai tagata mai i le agasala ma le oti.

A'OA'OGA
MONI 2

NA SAUNIA E IEOVA LE TOGIOLA

“Na auina mai e le Atua lona Atalii e to’atasi i le lalolagi, ina ia tatou maua ai le ola e ala iā te ia.”—1 Ioane 4:9

Na faapefea ona saunia e leova le togiola?

Salamo 49:7, 8

E leai se tasi o i tatou e mafai ona totogiina le togiola, mo le ola lelei atoatoa lea na melea e Atamu.

Luka 1:35

Na auina mai e leova i le lalolagi lona Atalii pele, ina ia fanau mai o se tagata lelei atoatoa.

Roma 3:23, 24;**Eperu 9:24**

Ina ua toe faatūina mai Iesu, na toe afio o ia i le lagi i le Atua. Na talia e le Atua le gaoioiga na faia e Iesu, o le foa’i atu lea o lona ola e fai ma taulaga.

**A'OA'OGA
MONI 3**

UA TATOU MAUA SE FAAMOEMOE MONI ONA O LE TOGIOLA

'E na te soloiesea loimata uma i o latou mata, e lē toe iai se oti.'—Faaaliga 21:4

O ā aogā e tatou te maua mai i le togiola?

1 Ioane 1:8, 9

E mafai ona faamagaloina a tatou agasala.

Eperu 9:13, 14

E mafai ona tatou maua se lotofuatiaifo mamā i le silafaga a le Atua.

Roma 6:23

Ua tatou maua le faamoemoe o le ola e faavavau.

Kalatia 2:20

O le meaalofa o le togiola e faamaonia ai e alofa moni leova ma Iesu iā i tatou.

**A'OA'OGA
MONI 4**

E MANA'OMIA ONA TATOU TALIAINA LE TOGIOLA

'Na foa'i mai e le Atua lona Atalii e to'atasi, ina ia maua ai e tagata uma e faatuatua iā te ia le ola e faavavau.'
—Ioane 3:16

E faapefea ona tatou faaalua le lotofaafetai mo le meaalofa a le Atua o le togiola?

Ioane 17:3

Ia iloa leova ma Iesu, ma faaa'oa'o iā i la'ua.

Luka 22:19

Auai i le Faamanatuga o le maliu o Keriso i tausaga ta'itasi.

Ioane 3:36; Iakopo 2:26

E lē lava le tau ina faapea atu e tatou te talitonu iā Iesu. E ao ona tatou faia mea na a'oa'oina ai i tatou e Iesu.

O LE Ā LE TULAGA O Ē UA MALILIU?

UA FOLAFOLA mai i le Tusi Paia e iai le taimi “e lē toe iai se oti. (Faaaliga 21:4) Na tatou a’oa’oina i le Mataupu 5, ua mafai ona tatou maua le avanoa e maua ai le ola e faavavau ona o le togiola. Peita’i, o loo feoti pea tagata. (Failauga 9:5) O lea, o se tasi lenei o fesili tāua: O le ā le tulaga o ē ua maliliu?

² E sili ona tāua le tali o lenei fesili pe afai e maliu se tasi e pele iā i tatou. Atonu e tatou te tuufesili: ‘O le ā ua tupu iā te ia? Pe o mafai ona ia vaai mai iā i tatou? Pe e mafai ona ia fesoasoani mai iā i tatou? Po o le a iai se taimi e toe feiloa’i ai ma ia?’

³ E eseese auala e taliina ai e lotu na fesili. E a’oa’o i nisi lotu pe afai e te amiolelei e te alu i le lagi, ae afai e te amioleaga e susunu oe i le afi. O nisi lotu e talitonu pe a e oti ona avea lea o oe ma agaga, ma nonofo faatasi ma ou tuua ua maliliu. E faapea mai isi lotu pe a e maliu o le a faamasinoina oe, ona e toe fanau mai lea pe toe ola mai i se isi tino atonu o se tagata po o se manu.

⁴ E foliga mai e eseese a’oa’oga e a’oa’o e lotu. Ae e toetoe o lotu uma e a’oa’oina se talitonuga e tasi e

1-3. (a) O ā fesili e tuufesili ai tagata e faatatau i le tulaga o ē ua maliliu? (e) O ā auala ua taliina ai e nisi o lotu na fesili?

4. O le ā le talitonuga e tasi o loo a’oa’oina e lotu e faatatau i le tulaga o le tagata pe a oti?

faapea: Pe a oti le tagata, e iai sona agaga e ola pea. Pe e moni lenā a'oa'oga?

O LE Ā LE TULAGA O Ē UA MALILIU?

⁵ E silafia e leova le tulaga o ē ua maliliu, ma na ia fetalai **pe a oti le tagata e lē toe iai se ola iā te ia.** O le oti o le tuufaafegai o le ola. O lea, pe a oti le tagata e **lē iai** sona agaga e ola pea i se isi nofoaga, faatasi ma ona manatunatuga ma faalogona.* Pe a tatou feoti, e lē mafai ona tatou toe vāai, faalogo ma mafaufau.

⁶ Na tusi le tupu o Solomona “o ē ua oti, latou te **lē iloa se mea.**” E lē toe lagona e i latou ua feoti le alofa po o le ita, ma “e leai se galuega, po o ni fua-fuaga, po o le poto, po o le atamai i le Tuugamau.” (Faitau le Failauga 9:5, 6, 10.) O loo faamatalaina fo’i i le Salamo 146:4 pe a oti le tagata, e faaumatia pe uma ai ma “ona manatunatuga.”

LE FETALAIGA A IESU E UIGA I LE OTI

⁷ Ina ua maliu le uō pele a Iesu o Lasalo, na ia fetalai atu i ona soo: “O loo mālōlō [moe] la tatou uō o Lasalo.” E le’i uiga le fetalaiga a Iesu e faapea o loo mālōlō po o moe Lasalo. Na fetalai atili o ia: “Ua oti Lasalo.” (Ioane 11:11-14) O lea, na faatusa e Iesu le oti i le moe. E le’i faapea atu o ia o loo i le lagi Lasalo, po o faatasi fo’i ma ona tuua ua maliliu. E le’i fetalai fo’i o ia o loo faapuapuagatia Lasalo i le afi, po ua toe

* E talitonu nisi tagata pe a oti se tasi, e iai sona agaga e ola pea. Mo nisi faamatalaga taga’i i le Faaopoopoga 18.

5, 6. O le ā le tulaga o ē ua maliliu?


7. O le ā le fetalaiga a Iesu e uiga i le oti?

fanau pe toe ola mai i se isi tino atonu o se tagata po o se manu. Na uiga atu lana fetalaiga e faapea e pei lava o loo moe gase Lasalo. I isi mau o le Tusi Paia, o loo faatusaina ai le oti i le moe gase.—Salamo 13:3; Luka 8:52.

8 Pe na foafoaina e le Atua Atamu ma Eva ina ia feiti? E leai. Na foafoaina i la'ua e Ieova e ola e faavavau ma maua le soifua mālōlōina lelei atoatoa. Ina ua foafoaina e Ieova tagata, na ia tuuina iā i latou se

8. E faapefea ona tatou iloa e le'i foafoaina e le Atua tagata ina ia feiti?

Na foafoaina e Ieova tagata ina ia ola e faavavau i le lalolagi



faanaunauga ina ia ola e faavavau. (Failauga 3:11) E lē manana'ō mātua e vāai atu o mama'i ma feoti a latou fanau, ma o faalogona fo'i na o Ieova iā i tatou. Pe afai la na foafoaina i tatou e le Atua e ola e faavavau, aiseā la e tatou te feoti ai?

LE MĀFUAAGA UA MALILIU AI TAGATA

⁹ I le faato'aga o Etena, na fetalai atu ai Ieova iā Atamu: “E mafai ona e ‘ai i laau uma o le faato'aga ma e ma'ona ai. A o le laau e iloa ai le lelei ma le leaga, aua ne'i e ‘ai ai, auā o le aso e te ‘ai ai, e te oti ai lava.” (Kenese 2:9, 16, 17) E le'i faigatā ona usita'ia lenā faatonuga manino, ma na iai le aiā a Ieova e faatonu ai Atamu ma Eva i le mea e lelei ma le mea e leaga. O lo la'ua usiusita'i iā Ieova, e faaalua ai lo la faaaloalo i lana pule. E faaalua ai fo'i lo la lotofaafetai mo mea uma ua ia foa'iina mai mo i la'ua.

¹⁰ Ae pagā lea, na filifili Atamu ma Eva e lē usiusita'i iā Ieova. Na fai atu Satani iā Eva: “E moni ea na fetalai mai le Atua, e aua ne'i lua aai mai i fua o laau uma o le faato'aga?” Na tali mai Eva: “O fua o laau o le faato'aga, e mafai ona ma aai ai. A o le fua o le laau o loo i le ogatotonu o le faato'aga, na fetalai mai le Atua, ‘Aua lava ne'i oulua aai ai, aua fo'i ne'i oulua papa'i i ai, ina ne'i oulua feoti.’” —Kenese 3:1-3.

¹¹ Ona fai atu lea o Satani: “E lua te lē oti lava. Auā

9. Aiseā na talafeagai ai le faatonuga sa avatu e Ieova iā Atamu ma Eva?

10, 11. (a) Na faapefea ona faasesēina e Satani Atamu ma Eva? (e) Aiseā e matuā leai ai lava se faamolemolega mo le gaoioiga na faia e Atamu ma Eva?

ua silafia e le Atua, o le aso lava lua te aai ai e pupula ai o oulua mata, ona pei ai lea o oulua o le Atua, e iloa le lelei ma le leaga.” (Kenese 3:4-6) Na mana’o Satani ina ia mafaufau Eva, e mafai e ia lava ona filifili le mea e lelei ma le mea e leaga. I le taimi e tasi, na pepelo Satani e faatatau i le mea e tupu pe a lē ususita’i Eva. Na fai atu o ia e lē oti Eva. O lea, na ‘ai ai e Eva le fua o le laau ma avatu i lana tane. Na iloa e Atamu ma Eva na faatonu e Ieova i la’ua e **aua** le ‘ai i le fua o le laau. Ina ua la aai ai, sa la filifili ai e lē ususita’i i le faatonuga manino ma talafeagai na avatu. Na la faaalua ai fo’i le lē faaloalo i lo la Tamā alofa i le lagi. E matuā leai lava se faamolemolega mo le gaoioiga na la faia.

12 Pagā le faanoanoa ona e le’i faaalua e o tatou ulua’i mātua le faaloalo i Lē na foafoaina i la’ua! O ā ni ou faaloga ae fouvale iā te oe sou alo na e taumafai malosia e tausia a’e, ma faia gaoioiga e feteena’i ma mea na e a’oa’oina ai o ia? Pe e te lē lagona ai le matuā faanoanoa?

13 Ina ua lē ususita’i Atamu ma Eva, na la melea ai le avanoa e ola ai e faavavau. Na fetalai Ieova iā Atamu: “Auā o le efuefu oe, e te toe fo’i atu lava i le efuefu.” (**Faitau le Kenese 3:19.**) O lona uiga o le a toe liu efuefu Atamu, e pei lava e le’i foafoaina o ia. (Kenese 2:7) Ina ua agasala Atamu, na oti o ia ma e le’i toe iai lava se Atamu.

12. Aiseā o se tulaga e faanoanoa ai le lē ususita’i o Atamu ma Eva iā Ieova?

13. O le ā le uiga o le fetalai a Ieova “e te toe fo’i atu lava i le efuefu”?

14 Pe ana faapea na usiusita'i Atamu ma Eva i le Atua, semanū o loo la soifua pea e oo mai lava i le taimi nei. Ae ona o lo la lē usiusita'i, na la agasala ai ma oo atu ai i le oti. Ua pei le agasala o se faama'i mata'utia na tuufaasolo mai iā i tatou mai i o tatou ulua'i mātua. O i tatou uma lava e fananau mai o ni tagata agasala, ma o le māfuaaga lenā e tatou te feoti ai. (Roma 5:12) Peita'i, e lē o le finagalo lenā o le Atua mo tagata. E le'i finagalo lava o ia ina ia feoti tagata, ma o loo ta'ua i le Tusi Paia le oti o se "fili." —1 Korinito 15:26.

E TUUSA'OLOTO I TATOU E LE A'O'A'OGA MONI E FAATATAU I Ē UA MALILIU

15 Ua tuusa'oloto i tatou mai i le tele o manatu sesē, ona o le a'oa'oga moni e faatatau i le tulaga o ē ua maliliu. Ua a'oa'oina i tatou i le Tusi Paia e faapea, e lē lagona e i latou ua maliliu le tigā po o le faanoanoa. E lē mafai ona tatou talanoa ma i latou, e lē mafai fo'i ona latou talanoa mai iā i tatou. E lē mafai

Na faia Atamu mai i le efuefu, ma na toe fo'i o ia i le efuefu



14. Aiseā e tatou te feoti ai?
 15. Ua faapefea i le a'oa'oga moni e faatatau i le tulaga o ē ua maliliu ona tuusa'oloto ai i tatou?

ona tatou fesoasoani iā i latou, e lē mafai fo'i ona latou fesoasoani mai iā i tatou. E lē mafai ona latou faia se mea e tatou te afāina ai, o lea, e lē tatau ai ona tatou fefefe iā i latou. Peita'i ua a'oa'oina e le tele o lotu e faapea, o loo ola pea ē ua maliliu i se isi nofoaga, ma e mafai ona tatou fesoasoani iā i latou pe a tatou avatu tupe i patele ma ta'ita'i lotu. Ae pe a tatou iloa le a'oa'oga moni e faatatau i le tulaga o ē ua maliliu, o le a lē faasesēina ai la i tatou i na pepelo.

16 E faaaogā e Satani lotu sesē e faasesēina i tatou ma manatu ai o loo feola pea ē ua maliliu. O se faata'ita'iga, ua a'oa'oina e isi lotu pe a tatou feoti, e ola pea o tatou agaga i se isi nofoaga. Po o le mea lenā o loo a'oa'oina i lau lotu, pe o a'oa'oina ai oe i le faamatalaga a le Tusi Paia e faatatau i ē ua maliliu? E faaaogā e Satani pepelo ina ia liliuese ai tagata mai iā leova.

17 E mata'utia mea o loo a'oa'oina e le tele o lotu. O se faata'ita'iga, ua a'oa'oina e isi lotu e susunu e faavavau tagata leaga i le afi i seoli. O lenā a'oa'oga pepelo e ta'uleagaina ai leova, auā e lē taitai ona ia faapuapuagatia tagata. (**Faitau le 1 Ioane 4:8.**) O ā ni ou faalogona pe a faasalaina e se tasi se tamaitiiti e ala i le susunuina o ona lima i se afi? E te manatu e matuā sauā lenā tagata, ma e te lē fia faamasani

16. O le ā le a'oa'oga sesē o loo a'oa'oina i le tele o lotu e faatatau i ē ua maliliu?

17. E faapefea ona ta'uleagaina leova i le a'oa'oga e faapea e susunuina tagata i le afi i seoli?

fo'i iā te ia. O faalogona tonu lava na e mana'ō Sātani e oo iā i tatou e faatatau iā Ieova.

18 Ua faapea mai nisi lotu, pe a feoti tagata e avea i latou o ni agaga. E a'oa'ō e nei lotu, e tataua ona tatou faaaloalo i na agaga ma ia fefefe fo'i iā i latou, auā e mafai ona avea i latou o ni uō malolosi po o ni fili e sili ona leaga. O le to'atele o tagata e talitonu i lenā a'oa'ōga pepelo. E latou te fefefe i tagata ua maliliu, o lea, ua latou tapua'i atu ai iā i latou pe taumafai e faamalie i latou nai lo o Ieova. Ia manatua, e lē o toe lagona e i latou ua maliliu se mea. O lea la, e lē tataua ona tatou fefefe iā i latou. E tataua ona tatou faamalie le finagalo o Ieova ma tapua'i tau lava o ia, auā o ia o Lē na foafoaina i tatou ma o ia o le Atua moni. —Faaaliga 4:11.

19 E tuusa'oloto i tatou mai i a'oa'ōga sesē a lotu, pe a tatou iloa le a'oa'ōga moni e faatatau i le oti. O le a fesoasoani lenei a'oa'ōga moni iā i tatou, ina ia malamalama ai i folafolaga matagofie a Ieova e faatatau i lo tatou olaga ma lo tatou lumana'i.

20 I aso anamua, na fesili ai Iopu o se auauna a le Atua e faapea: “Pe a oti le tagata, pe e toe ola mai ea o ia?” (Iopu 14:14) Pe e mafai moni lava ona toe ola mai se tagata ua oti? E faaosofia lo tatou naunau i le tali ua saunia mai e Ieova i le Tusi Paia, e faatatau i lea tulaga. O le a tatou iloiloaina lenā manatu i le mataupu o sosoo mai.

18. Aiseā e lē tataua ai ona tatou fefefe i ē ua maliliu?

19. O le ā le aogā o lo tatou iloaina o le a'oa'ōga moni e faatatau i le oti?

20. O le ā o le a tatou iloiloaina i le mataupu o sosoo mai?

A'OA'OGA
MONI 1

PE A OTI LE TAGATA,
E NA TE LĒ TOE ILOA SE MEA

“O ē ua oti, latou te lē iloa se mea.”—Failauga 9:5

O le ā le tulaga o ē ua maliliu?

Salamo 146:3, 4;

Failauga 9:6, 10

Pe a tatou feoti, e lē mafai
ona tatou toe vāai, faalogo
ma mafaufau.

Ioane 11:11-14

Na faatusa e Iesu le oti
i le moe.

A'OA'OGA
MONI 2

E LE'I FINAGALO LAVA
IEOVA E FEOTI TAGATA

“A o le laau e iloa ai le lelei ma le leaga, aua ne'i e 'ai ai,
auā o le aso e te 'ai ai, e te oti ai lava.”—Kenese 2:17

Aiseā e tatou te feoti ai?

Kenese 3:1-6

Na pepelo Satani e faatatau i le
mea e tupu pe a lē usiusita'i Eva
i le faatonuga a le Atua. Ina ua lē
usiusita'i Atamu ma Eva iā Ieova,
na la agasala ai ma mulimuli ane
la feoti.

Kenese 3:19

Ina ua oti Atamu, e le'i toe iai
lava o ia.

Roma 5:12

Ua pei le agasala o se faama'i
mata'utia na tuufaasolo mai iā i
tatou mai i o tatou ulua'i mātua o
Atamu ma Eva. O i tatou uma lava
e fananau mai o ni tagata agasala,
ma o le māfuaaga lenā e tatou te
feoti ai.

1 Korinito 15:26

O loo ta'ua i le Tusi Paia le oti
o se fili.

**A'OA'OGA
MONI 3**
**E TUUSA'OLOTO I TATOOU E LE
A'OA'OGA MONI E FAATATAU
I Ë UA MALILIU**

“Pe a oti le tagata, pe e toe ola mai ea o ia? Ou te faatali . . . se'ia oo ina tuusa'oloto a'u.”—Iopu 14:14

E faapefea i le iloaina o le a'oa'oga moni e faatatau i le tulaga o Ë ua maliliu, ona tuusa'oloto ai i tatou mai i manatu sesē?

1 Ioane 4:8

O le a'oa'oga o le susunu o tagata i le afi i seoli e ta'uileagaina ai leova. E lē taitai ona ia faapuapugatia tagata.

Faaaliga 4:11

O le to'atele o tagata e fefefe i Ë ua maliliu. O lea, ua latou tapua'i atu ai iā i latou, pe taumafai e faamalie i latou nai lo o leova. O leova le Atua moni, ma e tatau ona tatou faamalie lona finagalo ma tapua'i tau lava o ia.

O LE A IAI LE TOETŪ

SE'I faapea ua faasalaina oe i le olaga atoa i le falepuipui ona o se solitulafono e te le'i faia. E leai se avanoa e toe tatala mai ai oe i tua. Ua foliga mai ua leai sou faamoemoe, ma ua leai se isi mea e mafai ona e faia. Peita'i, a o e matuā mafatia i nei faalogona, ae e iloa ane e iai se tasi e iai le malosi e mafai ona tatalaina oe mai i le falepuipui, ma ua ia folafola atu o le a ia fesoasoani iā te oe. O ā ni ou faalogona?

² O i tatou uma lava e tai pei o loo nofo pologa i le oti. Po o ā lava a tatou taumafaiga, e lē mafai ona tatou sao mai ai. Peita'i, e iai iā Ieova le mana e faasa'olotoina ai i tatou mai i le oti. Ua ia folafola mai fo'i o le a ia faamautinoa e 'faaumatia le fili mulimuli, o le oti lea.'—1 Korinito 15:26.

³ Se'i manatu i le to'afilemu o ou faalogona pe a e lē toe popole i le oti. Peita'i, e lē na o le oti o le a aveesea e Ieova. O le a ia toe faatutūina mai fo'i i latou ua maliliu. Se'i mafaufau i le uiga o lenā mea mo oe. Ua folafola mai e Ieova, o le a toe feola mai i latou o loo nofo to'ilalo i le 'oti.' (Isaia 26:19) O le mea lenā o loo ta'ua i le Tusi Paia o le toetū.

1-3. O le ā o loo tatou nofo pologa uma ai, ma o le ā le auala o le a faasa'olotoina ai i tatou e leava?

PE A MALIU SE TASI E PELE IĀ I TATOU

⁴ Pe a maliu se tasi o lo tatou aiga po o se uō va-valalata, e matuā faigatā lava ona onosaia le tigā ma le ootia o o tatou faalogona. E leai se mea e mafai ona tatou faia ina ia toe ola mai ai lenā tagata. Peita’i, ua aumaia i le Tusi Paia le faamāfanafanaga moni mo i tatou. (**Faitau le 2 Korinito 1:3, 4.**) Se’i o tatou iloilo ina se faaa’oa’oga se tasi e faaalua ai le matuā naunau o Ieova ma Iesu, e toe faatutūina mai ē pele iā i tatou ua maliliu. A o soifua Iesu i le lalolagi, sa masani ona ia asiasi atu iā Lasalo ma ona tuafāfine o Mareta ma Maria. O i latou nei e to’atolu o ni uō mamae a Iesu. O loo ta’ua i le Tusi Paia: “E alofa Iesu iā Mareta, ma lona uso, ma Lasalo.”—Ioane 11:3-5.

⁵ I se tasi aso, na maliu ai Lasalo. Na alu atu Iesu e faamāfanafana iā Mareta ma Maria. Ina ua faalogo Mareta ua maliu mai Iesu, ona alu ai lea e faafeiloa’i o ia i fafo atu o le aai. Na fialia o ia ina ua feiloa’i iā Iesu. Peita’i na ia faapea atu: “Ana e iai iinei, semanū e lē oti lo’u tuagane.” Na manatu Mareta ua tuai ona sau Iesu. Na silasila atu Iesu o loo tagi Maria. Ina ua ia iloa atu lo la faanoanoa, ona ootia ai lea o lona finagalo, ma na tagi o ia. (Ioane 11:21, 33, 35) O lea, na

4. (a) O fea e tatou te maua ai le faamāfanafanaga pe a maliu se tasi o lo tatou aiga po o se uō? (e) O ai nisi o uō mamae a Iesu? 5, 6. (a) O ā faalogona o Iesu ina ua silasila atu o loo fetagisi aiga ma uō a Lasalo? (e) Aiseā o se faamāfanafanaga ai le iloaina o faalogona o Iesu e faatatau i le oti?

lagona fo'i e Iesu le tigā, lea e tatou te lagonaina pe a maliu se tasi e pele iā i tatou.

⁶ O le iloaina e tutusa faalogona o Iesu ma o tatou faalogona pe a maliu se tasi, o se faamā-fanafanaga mo i tatou. E pei Iesu o lona Tamā. (Ioane 14:9) E iai iā Ieova le mana e aveesea ai e faavavau le oti, ma o le mea lenā e lē o toe umi ona ia faia lea.

“LASALO E, INĀ SAU IA I FAFO!”

⁷ Ina ua taunuu atu Iesu i le tuugamau sa tuu ai le tino o Lasalo, na pupuni le gutu o le tuugamau i se maa telē. Na fetalai atu Iesu: “Ia aveese le maa.” Peita'i e le'i mana'o Mareta e faia e tagata lenā mea, ona ua fā aso talu ona iai le tino o Lasalo i le tuugamau. (Ioane 11:39) Ae e le'i iloa e Mareta le gaoioiga o le a faia e Iesu e fesoasoani ai i lona tuagane.

⁸ Na fetalai atu Iesu iā Lasalo: “Inā sau ia i fafo!” Ona sosoo ai lea ma le vaaia e Mareta ma Maria o se mea mata'ina. 'Ua sau i fafo le tagata na oti, o loo fusi ona vae ma ona lima i 'ie.' (Ioane 11:43, 44) Ioe, o lea ua toetū mai Lasalo. Ma'eu le mata'ina o lenei vavega! Na toe faatūina e Iesu Lasalo, ma ua toe faatasi nei o ia ma lona aiga ma uō. Ua mafai ona latou opo o ia, pa'i atu ma talanoa iā te ia.

7, 8. (a) Aiseā e le'i mana'o ai Mareta e aveese le maa mai i le gutu o le tuugamau o Lasalo? (e) O le ā na faia e Iesu?

**“LE TAMA’ITA’I E, OU TE FAI ATU IĀ TE OE,
INĀ TŪ IA I LUGA!”**

9 Pe na toe faatutū e Iesu tagata i lona lava mana? E leai. A o le’i toe faatūina e Iesu Lasalo, na tatalo atu o ia iā Ieova, ma na foa’i mai e Ieova iā te ia le mana e toe faatū ai Lasalo. (**Faitau le Ioane 11:41, 42.**) E lē na o Lasalo le tagata na toe faatūina mai i le oti. O loo ta’ua i le Tusi Paia se teineitiiti e 12 tausaga, o lē na maua i se ma’i tigāina. Na fai taumafaiga uma a lona tamā o Iairo e sa’ili ai se fesoasoani, ma na ia ‘ai’oi atu iā Iesu e faamālōlō lona afafine. E na o le pau lava lea o lona alo. A o talanoa atu Iairo iā Iesu, ae ō mai nisi tamāloloa ma fai atu iā Iairo: “Ua oti lou afafine! Aiseā e toe faalavelave ai i le a’oa’o?” Peita’i na faapea atu Iesu iā Iairo: “Aua e te fefe, ae ia e faatuatua, ona toe ola ai lea o ia.” Ona aga’i atu lea o Iesu ma Iairo i lona fale. A o latalata atu i la’ua i le fale, na iloa ma lagona atu e Iesu le fetagisi o tagata. Na fetalai atu Iesu iā i latou: “Aua le toe fetagisi, auā e le’i oti le teine, o loo moe.” Atonu na mafaufau mātua o le teineitiiti po o le ā le uiga o le fetalaiiga a Iesu. O lea, na ia faapea atu ai i tagata ia ō uma i fafo, ae ave na o mātua o le teineitiiti i le potu o loo taoto ai le teineitiiti. Ona tago atu lea o Iesu i le lima o le teineitiiti ma

9, 10. (a) O ai na foa’iina atu iā Iesu le mana e toe faatutūina ai tagata? (e) Aiseā e tāua ai iā i tatou tala e uiga iā i latou na toe faatutūina mai i le oti?

faapea atu iā te ia: “Le tama’ita’i e, ou te fai atu iā te oe, Inā tū ia i luga!” Se’i mafaufau i le fiafia o mātua o le teineitiiti, ina ua tū o ia i luga ma amata ona savali. O lea ua toe faatūina e Iesu le la tama. (Mareko 5:22-24, 35-42; Luka 8:49-56) Talu mai lenā aso, o taimi uma e la te vāai atu ai i le la tama teine, e la te manatua ai le gaoioiga na faia e Ieova mo i la’ua e ala mai iā Iesu.*

10 Na toe maliliu i se taimi mulimuli ane i latou na faatutūina e Iesu. Peita’i, e tāua faamatalaga e tatou te faitau i ai e uiga i nei tagata, ona e tatou te maua ai se faamoemoe moni. E finagalo Ieova e toe faatutū tagata, ma o le mea tonu lenā o le a ia faia.

LESONA MAI I TALA E UIGA IĀ I LATOU NA TOE FAATUTŪINA MAI I LE OTI

11 O loo ta’ua manino i le Tusi Paia “o ē ua oti, latou te lē iloa se mea.” O le tulaga tonu lenā na oo iā Lasalo. (Failauga 9:5) E tusa ai ma le fetalaiga a Iesu, e pei lava o loo moe Lasalo. (Ioane 11:11) A o iai o ia i le tuugamau, ‘e le’i iloa e ia se mea.’

* O loo faamatalaina i isi tala o le Tusi Paia le toe faatutūina mai o ē talavou ma ē matutua, tane ma fafine, tagata Isaraelu ma tagata o nuu ese. E mafai ona e faitau i na tala i le 1 Tupu 17:17-24; 2 Tupu 4:32-37; 13:20, 21; Mataio 28:5-7; Luka 7:11-17; 8:40-56; Galuega 9:36-42; 20:7-12.

11. O le ā e tatou te a’oa’oina mai i le Failauga 9:5 e faatatau iā Lasalo?



Na toe faatūina e Elia
le tama a se fafine ua oti
lana tane.—1 Tupu 17:17-24

Na toe faatūina e le
aposestolo o Peteru le
fafine Kerisiano o Toreka.
—Galuega 9:36-42



Se'í mafaufau i le fiafia
o aiga ma uō a Lasalo
ina ua toe faatūina o ia.
—Ioane 11:38-44

¹² Ina ua toe faatūina e Iesu Lasalo, e to'atele tagata na vāai i ai. Na iloa fo'i e fili o Iesu, o ia sa faia lenei vavega. Na toe ola mai Lasalo, ma o le faamaoniga lenā e iloa ai na tupu moni lava le toetū. (Ioane 11:47) E to'atele fo'i tagata na asiasi iā Lasalo. O le i'uga, na amata ai ona latou tali-tonu o Iesu na auina mai e le Atua. E le'i fiafia fili o Iesu i lenā mea, o lea na latou faufau ai e fasi-oti o ia faapea ma Lasalo.—Ioane 11:53; 12:9-11.

¹³ Na fetalai Iesu o le a toe faatutūina “i latou uma o loo i tuugamau.” (Ioane 5:28) O lona uiga, e iai i latou ua maliliu o le a toe faatutūina mai e Ieova. Ae ina ia toe faatūina e Ieova se tagata, e tatau ona ia manatua mea uma e faatatau i lenā tagata. Pe e mafai moni ona ia manatua mea uma e faatatau i lenā tagata? Se'i manatu, e faitau pili-ona fetu i le vateatea. Ua ta'ua i le Tusi Paia e silafia e Ieova igoa o fetu ta'itasi. (**Faitau le Isaia 40:26.**) O lea, pe afai e mafai ona ia manatua igoa o fetu ta'itasi, e mautinoa fo'i la e faigofie ona ia manatua mea uma e faatatau iā i latou o le a ia toe faatutūina mai. O le vala e sili ona tāua, na foafoaina e Ieova mea uma, o lea, e tatou te mautinoa e iai lona mana e toe faatutūina mai ai tagata.

12. E faapefea ona tatou mautinoa na toe faatūina moni lava Lasalo?

13. Aiseā e tatou te mautinoa ai o le a toe faatutūina mai e Ieova ē ua maliliu?

14 Na talitonu le tagata faamaoni o Iopu i le toetū. Na fesili o ia: “Pe a oti le tagata, pe e toe ola mai ea o ia?” Ona ia faapea atu lea iā Ieova: “E te valaau mai, ona ou tali atu ai lea iā te oe. Auā ua e matuā naunau i le galuega a ou aao.” O le mea moni, na iloa e Iopu o loo naunau Ieova i le taimi o le a Ia toe faatutūina mai ai ē ua maliliu.—Iopu 14:13-15.

15 O ā ni ou faalogona e faatatau i le faamoe-moe o le toetū? Atonu e te mafaufau, ‘Ae faapefea o’u aiga ma uō ua maliliu, po o le a toe faatutūina fo’i i latou?’ E faamāfanafanaina i tatou i le iloaina, e matuā naunau lava Ieova e toe faatutūina mai ē ua maliliu. Se’i o tatou iloiloaina le faamatalaga a le Tusi Paia po o ai o le a toetutū, ma po o fea o le a latou nonofo ai.

O LE A LATOU ‘FAALOGO I LONA LEO MA Ō MAI AI’

16 I le taimi ua te’a, na toe faatasi ai i latou na toe faatutūina mai ma o latou aiga ma uō i luga o le lalolagi. O le tulaga fo’i lenā o le a iai i le luma-na’i, ae o le a sili atu ona lelei. I le ā le itu? O i latou o le a toe faatutūina mai i le lalolagi, o le a maua le avanoa e ola ai e faavavau ma e lē toe

14, 15. O le ā e tatou te a’oa’oina mai i upu a Iopu e faatatau i le toetū?


16. O le ā le ituaiga o olaga o le a maua e i latou o le a toe faatutūina mai i le lalolagi?

feoti. O le a ese fo'i le tulaga o mea o le a iai le lalolagi i lenā taimi, nai lo o le taimi lenei. O le a lē toe iai ni taua, soligatulafono ma ma'i.

¹⁷ O ai i latou o le a toe faatutūina? Na fetalai Iesu, 'o i latou **uma** o loo i tuugamau e faa-

17. O ai i latou o le a toe faatutūina?

I le Parataiso, o le a toe faatutūina
ai ē ua maliliu ma toe faatasi ai
ma ē pele iā i latou



logo i lona leo ma ō mai ai.’ (Ioane 5:28, 29) O loo ta’ua fo’i i le Faaaliga 20:13: “Ua ave a’e e le sami i latou na oti o iai, ua ave a’e fo’i e le oti ma Tuugamau i latou na oti o iai.” Ioe, e faitau piliona tagata o le a toetutū mai. Na ta’ua fo’i e le aposetolo o Paulo, o le a toetutū mai “tagata amiotonu ma tagata amiolētonu.” (**Faitau le Galuega 24:15.**) O le ā le uiga o lenā faamatalaga?

18 O “tagata amiotonu” e aofia ai auauna faamaoni a Ieova na soifua a o le’i afio mai Iesu i le lalolagi. O le a toe faatutūina i luga o lenei lalolagi tagata e pei o Noa, Aperamo, Sara, Mose, Ruta ma Eseta. E mafai ona e faitau e faatatau i nisi o na tane ma fafine i le Eperu mataupu 11. Ae faapefea auauna faamaoni a Ieova e maliliu i le taimi lenei? E toe faatutūina fo’i i latou, auā e aofia ai fo’i i latou i “tagata amiotonu.”

19 O “tagata amiolētonu” e aofia ai le faitau piliona o tagata e le’i maua le avanoa e a’oa’oina ai e faatatau iā Ieova. E ui lava ua maliliu i latou, ae e lē faapea ua galo i latou iā Ieova. O le a ia toe faatutūina i latou, ma o le a latou maua le avanoa e a’oa’oina ai e faatatau iā te ia ma auauna iā te ia.

20 Po o lona uiga la o le a toe faatutūina mai

18. O ai “tagata amiotonu” o le a toe faatutūina?

19. O ai “tagata amiolētonu,” ma o le ā le avanoa ua tuuina atu e Ieova iā i latou?

20. Aiseā o le a lē toe faatutūina ai tagata uma?

tagata uma ua maliliu? E leai. Na fetalai Iesu e iai i latou e lē toe faatutūina mai. (Luka 12:5) O ai e faia le filifiliga pe e tatau ona toe faatūina mai se tagata pe leai? O Ieova le Faamasino Sili, ae ua ia tuuina atu fo'i iā Iesu le pule “e fai [ai] ma faamasino o ē ola ma ē oti.” (Galuega 10:42) O so o se tasi lava la e faamasinoina o ni tagata amioleaga ma e lē manana'o e suia o latou ala, e lē toe faatutūina i latou.—Taga'i i le Faaopoopoga 19.

TOETŪ I LE LAGI

21 O loo faamatalaina fo'i i le Tusi Paia e iai tagata o le a toetutū ma ola i le lagi. Pe a toe faatūina se tasi i le lagi, e toetū mai o ia i se tino agaga ae e lē o se tino o ivi ma aano.

22 O Iesu lē na muamua toe faatūina i se tino agaga. (Ioane 3:13) Ina ua mavae aso e tolu talu ona fasiotia Iesu, na toe faatūina o ia e Ieova. (Salamo 16:10; Galuega 13:34, 35) E le'i toe faatūina mai Iesu i se tino o ivi ma aano. Ua faapea mai le aposetolo o Peteru, “na fasiotia [Iesu] i le tino, ae na toe faaola mai i le agaga.” (1 Peteru 3:18) Na toe faatūina mai Iesu o se agaga malosi. (1 Korinito 15:3-6) Peita'i o loo ta'ua i le Tusi Paia e lē na o ia e toetū mai o se agaga malosi.

23 A o le'i maliu Iesu, na ia faapea atu i ona

21, 22. (a) E faape'i tino o i latou o le a toetutū a'e i le lagi? (e) O ai lē na muamua toe faatūina a'e e ola i le lagi?

23, 24. O ai le lafu mamoe itiiti lea na ta'ua i le fetalaiaga a Iesu, ma e fia lo latou aofa'i?

soo faamaoni: “Ou te alu e sauni se nofoaga mo outou.” (Ioane 14:2) O lona uiga, e iai nisi o soo o Iesu o le a toe faatutūina i le lagi ma faatasi ai ma ia. E to’afia i latou? Na fetalai Iesu o se vaega to’aitiiti po o le “lafu mamoe itiiti.” (Luka 12:32) Na ta’ua e le aposetolo o Ioane le fuainumera tonu ina ua ia vaaia Iesu “o loo tū mai . . . i le Mauga o Siona [faalelagi], o loo faatasi ma ia le selau fā sefulu fā afe.”—Faaaliga 14:1.

²⁴ O anafea na amata ai ona toe faatutūina Kerisiano e 144,000? Ua ta’ua i le Tusi Paia, sa tupu ina ua mǎe’a ona amata pule Keriso i le lagi. (1 Korinito 15:23) O loo tatou ola i lenā taimi, ma e toetoe o i latou uma o le 144,000 ua uma ona toe faatutūina a’e i le lagi. O i latou o loo toetoe i le lalolagi ma maliliu i le taimi lenei, o le a faafuase’i ona toe faatutūina i le lagi. Peita’i, o le to’atele o tagata ua maliliu o le a toe faatutūina i le lumana’i i le Parataiso i lenei lalolagi.

²⁵ E lē o toe umi ona faasa’oloto lea e Ieova o tagata uma mai i le oti, ma o le a lē toe iai lava se oti. (**Faitau le Isaia 25:8.**) Ae o ā mea o le a faia e i latou e toe faatutūina i le lagi? Ua faamatala mai i le Tusi Paia, o le a latou pule faatasi ma Iesu i le pulega a le Malo. O le a tatou a’oa’oina atili e faatatau i lenei Malo i le mataupu o sosoo mai.

25. O le ā o le a tatou a’oa’oina i le mataupu o sosoo mai?

A'OA'OGA
MONI 1

O LE A AVEESEA E IEOVA LE OTI

“Ona faaumatia lea o le fili mulimuli, o le oti lea.”

—1 Korinito 15:26

O le ā le faamāfanafanaga e tatou te maua mai i le Tusi Paia pe a maliu se tasi?

2 Korinito 1:3, 4

Pe a maliu se tasi o le aiga po o se uō vavalalata, e leai se mea e mafai ona tatou toe faia. Peita'i, ua aumaia i le Tusi Paia le faamāfanafanaga moni mo i tatou.

Isaia 25:8; 26:19

E iai iā leova le mana e aveesea ai e faavavau le oti. O le a ia toe faatutūina mai fo'i i latou ua maliliu.

A'OA'OGA
MONI 2

E MAFAI ONA TATOU
FAATUATUAINA O LE A
TUPU MONI LE TOETŪ

“Le tama'ita'i e, ou te fai atu iā te oe, Inā tū ia i luga!”

—Mareko 5:41

Aiseā e mafai ai ona tatou faatuatuaina o le a tupu moni le toetū?

Ioane 11:1-44

Na toe faatūina e Iesu Lasalo.

Mareko 5:22-24, 35-42

Na toe faatūina e Iesu se teineitiiti.

Ioane 11:41, 42

Na toe faatutūina e Iesu i latou na maliliu e ala i le mana o leova.

Ioane 12:9-11

E to'atele tagata na vāai i le toe faatutūina e Iesu o ē na maliliu. E oo fo'i i fili o Iesu, na latou iloa e mafai ona ia faia lenā mea.

**A'OA'OGA
MONI 3**
**O LE A TOE FAATUTŪINA MAI
E IEOVA LE FAITAU PILIONA
O I LATOU UA MALILIU**

“E te valaau mai, ona ou tali atu ai lea iā te oe. Auā ua e matuā naunau i le galuega a ou aao.”—Iopu 14:13-15

O ai o le a toe faatutūina?
Ioane 5:28, 29

E iai i latou ua maliliu o le a toe faatutūina mai e leova.

Galuega 24:15

O le a toe faatutūina mai ē amio-tonu ma ē amiolētonu.

Isaia 40:26

E silafia e leova igoa o fetu ta'itasi, e mautinoa fo'i la e faigofie ona ia manatua mea uma e faatatau iā i latou o le a ia toe faatutūina mai.

**A'OA'OGA
MONI 4**
**E IAI I LATOU O LE
A TOE FAATUTŪINA A'E
E OLA I LE LAGI**

“Ou te alu e sauni se nofoaga mo outou.”
—Ioane 14:2

O ai o le a toe faatutūina a'e e ola i le lagi?
1 Peteru 3:18

O Iesu lē na muamua toe faatūina a'e e ola i le lagi.

Luka 12:32

Na fetalai Iesu e na o se vaega to'aitiiti o ona soo o le a toe faatutūina a'e e ola i le lagi.

Faaaliga 14:1

Ua filifilia e leova le to'a 144,000 e ola i le lagi.

O LE Ā LE MALO O LE ATUA?

E FAITAU miliona tagata e iloa le tatalo masani ua ta'ua o le Tatalo a le Alii. Na faaaogā e Iesu lenei tatalo e a'oa'o ai ona soo i le auala e tatalo ai. O ā mea sa ia tatalo ai? Aiseā e tāua ai lenei tatalo iā i tatou i aso nei?

² Na fetalai Iesu: “Ia faapea ona outou tatalo: ‘Lo matou Tamā e o i le lagi, ia faapaiaina lou suafa. Ia oo mai lou malo. Ia faia lou finagalo i le lalolagi, e pei ona faia i le lagi.’ ” (**Faitau le Mataio 6:9-13.**) Aiseā na a'oa'oina ai i tatou e Iesu e tatalo mo na vala e tolu?—Taga'i i le Faaopoopoga 20.

³ Ua tatou a'oa'oina o le suafa o le Atua o Ieova. Na tatou iloiloaina fo'i le finagalo o le Atua mo tagata ma le lalolagi. Ae o le ā le uiga o upu a Iesu e faapea: “Ia oo mai lou malo”? O le a tatou iloiloaina po o le ā le Malo o le Atua, o mea o le a faia e lenā Malo, ma le auala o le a faapaiaina ai e lenā Malo le suafa o le Atua.

O LE Ā LE MALO O LE ATUA?

⁴ Na faavaeina e Ieova se pulega i le lagi, ma

-
1. O le ā le tatalo masani o le a tatou iloiloaina?
 2. O ā vala tāua e tolu na a'oa'oina i tatou e Iesu e tatalo ai?
 3. O le ā e mana'omia ona tatou iloa e faatatau i le Malo o le Atua?
 4. O le ā le Malo o le Atua, ma o ai le Tupu o lenā Malo?

tofia Iesu e avea ma Tupu o lenā pulega. Ua ta'ua i le Tusi Paia lenā pulega o le Malo o le Atua. O Iesu “le Tupu o tupu ma le Alii o alii.” (1 Timoteo 6:15) E sili atu mea lelei e mafai ona faia e Iesu, ma e sili atu lona malosi nai lo o isi pule uma faaletagata.

⁵ Na toe afio Iesu i le lagi, ina ua mavae aso e 40 talu ona toe faatūina mai o ia. Mulimuli ane, na tofia o ia e Ieova e avea ma Tupu o le Malo. (Galuega 2:33) O le a pule le Malo o le Atua mai i le lagi i le lalolagi. (Faaaliga 11:15) O le māfuaaga lenā ua ta'ua ai le Malo o le Atua i le Tusi Paia o le “malo i le lagi.”—2 Timoteo 4:18.

⁶ Ua ta'ua i le Tusi Paia e sili atu Iesu nai lo o se isi lava tupu faaletagata, auā “e na o ia lava e lē mafai ona oti.” (1 Timoteo 6:16) E iai le taimi o le a feoti uma ai pule faaletagata, ae e lē oo lava le oti iā Iesu. E tumau e faavavau mea lelei uma o le a faia e Iesu mo i tatou.

⁷ Ua ta'ua i valoaga o le Tusi Paia o le a avea Iesu o se Tupu e faamasinotonu ma alofa mutimuti-vale: “O le a oo iā te ia le agaga o Ieova ma tumau ai, o le agaga o le atamai ma le malamalama, o le agaga o le fautuaga ma le mana, o le agaga o le poto ma le mata'u iā Ieova; e fiafia o ia i le mata'u iā Ieova. O le a lē faamasino e ia e tusa ma mea e vaai i ai ona mata, e lē a'oa'i atu [pe fautua atu]

5. O fea e pule mai ai le Malo o le Atua, ma e pule i le ā?

6, 7. Aiseā e sili atu ai Iesu nai lo o se isi lava tupu?

fo'i e tusa ma mea e faalogo i ai ona taliga. E faamasino e ia ma le amiotonu ē ua faatauvaā [pe matitiva]." (Isaia 11:2-4) Pe e te mana'o i se tupu faapena?

⁸ Ua filifilia e le Atua ni tagata e pule faatasi ma Iesu i le Malo i le lagi. O se faata'ita'iga, na faapea atu le aposetolo o Paulo iā Timoteo: "Afai tatou te tumau pea, e tatou te pule faatasi o ni tupu." (2 Timoteo 2:12) E to'afia i latou o le a pule faatasi ma Iesu o ni tupu?

⁹ E pei ona tatou a'oa'oina i le Mataupu 7, na vaaia e le aposetolo o Ioane se vaaiga na ia iloa atu ai Iesu o se Tupu i le lagi faatasi ma isi tupu e to'a 144,000. O ai nei tupu e 144,000? Ua faamatala e Ioane, o i latou nei ua tusia le "suafa [o Iesu] ma le suafa o lona Tamā i o latou muāulu." Ua toe faauau lana faamatalaga: "O i latou fo'i nei ua mulimuli atu i le Tama'i Mamoe [o Iesu lea] i mea uma e alu i ai o ia. O i latou ia ua faatauina mai i tagata." (**Faitau le Faaaliga 14:1, 4.**) O le 144,000, o Kerisiano faamaoni ia ua filifilia e le Atua, e 'pule mai o ni tupu i le lalolagi' faatasi ma Iesu. Pe a mabiliu i latou, o le a toe faatutūina a'e i latou i le lagi. (Faaaliga 5:10) Talu mai le taimi o le 'auposetolo, ua filifilia ai e Ieova Kerisiano faamaoni e faia a'e ai lenā vaega o tupu e 144,000.

8. E faapefea ona tatou iloa e iai isi o le a pule faatasi ma Iesu?

9. (a) E to'afia i latou o le a pule faatasi ma Iesu? (e) O anafea na amata ai ona filifilia i latou e le Atua?

10 O le alofa tele mai o Ieova iā i tatou, na ia filifilia ai tagata e pule faatasi ma Iesu. O le a avea Iesu o se pule lelei ona e malamalama o ia iā i tatou. Talu ai sa soifua Iesu i le lalolagi, e na te silafia lelei la faalogona o se tagata, ma tigā e oo i ai pe a feagai ma mafatiaga. Na faapea mai Paulo e “tigā alofa faatasi [Iesu] ma i tatou i o tatou vai-vaiga,” ma “sa tofotofoina o ia i mea uma lava e pei o i tatou.” (Eperu 4:15; 5:8) E malamalama fo’i le 144,000 i tulaga o tagata. Sa latou tauivi fo’i ma le tulaga lē lelei atoatoa ma ma’i. O lea, e mafai ona tatou mautinoa e malamalama Iesu ma le 144,000 i o tatou faalogona, faapea fo’i faa-fitauli e tatou te fesaga’ia.

O LE Ā O LE A FAIA E LE MALO O LE ATUA?

11 Sa a’oa’oina e Iesu ona soo e tatalo ina ia faia le finagalo o le Atua i le lagi. Aiseā? Na tatou a’oa’oina i le Mataupu 3, sa fouvale Satani le Tia-polo iā Ieova. Ina ua mǎe’a lana fouvalega, na faatagaina e Ieova o ia ma agelu lē faamaoni po o temoni, e nonofo ai pea i le lagi mo sina taimi. O lea, e lē o i latou uma i le lagi sa faia le finagalo o le Atua. I le Mataupu 10, o le a tatou a’oa’oina atili ai e faatatau iā Satani ma temoni.

10. Aiseā o se fuafuaga alofa ai le filifilia e Ieova o Iesu ma le 144,000 e pule mai i tagata?

11. Aiseā na a’oa’oina ai e Iesu ona soo e tatalo ina ia faia le finagalo o le Atua i le lagi?

12 O loo faamatalaina i le Tusi Paia e le'i umi ona avea Iesu ma Tupu o le Malo o le Atua, ae aga'i atu loa e tau ma Satani. (**Faitau le Faaaliga 12:7-10.**) O loo ta'ua i le fuaiupu e 10 ni mea tāua se lua na tutupu. Muamua, ua amata ona pule le Malo o le Atua lea o loo avea ai Iesu Keriso ma Tupu. Lua, ua lafo ese Satani mai i le lagi i le lalolagi. Mulimuli ane, o le a tatou iloiloina ai ua mǎe'a ona tutupu nei mea.

13 Ua faamatalaina i le Tusi Paia le olioli o agelu faamaoni, ina ua lafo ese Satani ma ana temoni mai i le lagi. Ua faapea mai le Faaaliga 12:12: 'Ia olioli le lagi ma outou o loo nonofo ai!' O le taimi la lenei, ua iai le filemu atoatoa ma le autasi i le lagi, talu ai ua faia e i latou uma le finagalo o le Atua.

14 Peita'i, e matuā ese lava le tulaga o loo iai le lalolagi. E mata'utia mea o loo tutupu i tagata 'auā ua alu ifo le Tiapolo' ma "ua lotoa [ita] tele, auā ua na iloa ua puupuu lona taimi." (Faaaliga 12:12) Ua matuā ita Satani. Ua lafo ese o ia mai i le lagi, ma ua ia iloa e lē o toe umi ona faaumatia lea o ia. O lea, ua ia faia ai taumafaiga uma e faatupuina ai faafitauli, tigā ma mafatiaga i le lalolagi atoa.

12. O ā mea tāua e lua na tutupu o loo faamatalaina i le Faaaliga 12:10?

13. O le ā na tupu i le lagi ina ua lafo ese Satani?

14. O le ā ua tupu i le lalolagi talu ona lafo ese Satani mai i le lagi?

15 Peita'i, e lē o suia ai lava le finagalo o le Atua mo le lalolagi. O loo finagalo pea o ia ina ia ola e faavavau tagata lelei atoatoa, i le lalolagi parataiso. (Salamo 37:29) E faapefea la ona faatau-nuina e le Malo o le Atua lenei mea?

16 O loo ta'ua i le valoaga i le Tanielu 2:44: "O aso o ia tupu, o le a faatūina ai e le Atua o le lagi o le malo e lē faaumatia lava. O lea malo fo'i e lē tuuina atu i se isi nuu. O le a ia tu'imomoina ma faaumatia malo uma, ae e tumau lea malo e faavavau." O le ā e tatou te a'oa'oina mai i lenei valoaga e faatatau i le Malo o le Atua?

17 Muamua, ua ta'u mai ai o le a amata ona pule le Malo o le Atua i "aso o ia tupu." O lona uiga, na amata ona pule le Malo o le Atua a o pule pea isi malo i le lalolagi. Lua, ua ta'u mai ai o le a tumau pea e faavavau le Malo o le Atua, ma e leai se isi faigāmalo e mafai ona suitulaga i ai. O le manatu lona tolu, ua faailoa mai ai o le a iai le taua i le va o le Malo o le Atua ma malo o lenei lalolagi. O le a manumalo le Malo o le Atua ma avea ai ma malo e tasi e pule i le lalolagi, ona faato'ā mafai ai lea ona maua e tagata le malo e sili ona lelei.

18 O le ā o le a tupu a o le'i amata le taua i le va

15. O le ā le finagalo o le Atua mo le lalolagi?

16, 17. O le ā ua faailoa mai i le Tanielu 2:44 e faatatau i le Malo o le Atua?

18. O le ā le igoa o le taua faai'u i le va o le Malo o le Atua ma malo o lenei lalolagi?

o malo o lenei lalolagi ma le Malo o le Atua? O le a faasesēina e temoni “tupu o le lalolagi uma, e faapotopototo i latou i le taua o le aso tele o le Atua o Lē e ona le malosi uma lava.” O le mea moni, o le a faasagatau malo o lenei lalolagi i le Malo o le Atua, ae o le a manumalo le Malo o le Atua. O lenei taua faai'u e ta'ua o Amaketo.—Faaaliga 16: 14, 16; taga'i i le Faaopoopoga 10.

¹⁹ Aiseā e tatou te mana'omia ai le Malo o le Atua? O nisi nei o māfuaaga e tolu. Muamua, o i tatou o tagata agasala. O lea, e tatou te mama'i ai ma feoti. Ae ua ta'ua i le Tusi Paia, o le a tatou ola e faavavau i le pulega a le Malo o le Atua. O le mea moni lenā, auā ua faapea mai le Ioane 3:16: “O le alofa tele o le Atua i le lalolagi, na ia foa'i mai ai lona Atalii e to'atasi, ina ia lē fano tagata uma e faatuatua iā te ia, a ia maua le ola e faavavau.”

²⁰ O le māfuaaga lona lua, ona o loo si'omia i tatou i tagata amioleaga. O le to'atele e talapepelo, taufaa'ole'ole ma ola i ni olaga lē mamā taufeusua'iga. E leai se mea e mafai ona tatou faia e aveese ai i latou, ae o le a mafai ona faia faapea e le Atua. O i latou e faaauau pea ona faia mea leaga, o le a faaumatia iā Amaketo. (**Faitau le Salamo 37:10.**) O le māfuaaga lona tolu e

19, 20. Aiseā e tatou te mana'omia ai le Malo o le Atua e pule i le lalolagi?



Ua faateteleina mafatiaga i le
lalolagi talu mai le taimi na lafo
ese ai Satani ma ana temoni mai
i le lagi. E lē o toe umi ona
faamuta lea o nei mafatiaga

tatou te mana'omia ai le Malo o le Atua, ona e lē taulau pulega a malo faaletagata, e sauā ma faapi'opi'o. E latou te lē o naunau e fesoasoani i tagata ina ia usiusita'i i le Atua. Ua ta'ua i le Tusi Paia 'ua pule le tagata i le isi tagata ma ua matuā afāina ai o ia.'—Failauga 8:9.

²¹ Pe a uma Amaketo, ona faamautinoa lea e le Malo o le Atua ua faia le finagalo o le Atua i le lalolagi. O se faata'ita'iga, o le a aveesea e le Malo o le Atua Satani ma ana temoni. (Faaaliga 20:1-3) O le a lē toe iai se tasi e ma'i pe oti. O le a mafai e tagata faamaoni uma ona ola e faavavau i le Pa-

21. O le a faapefea ona faamautinoa e le Malo o le Atua ua faia le finagalo o le Atua i le lalolagi?

O le a faamautinoa e le Malo o le Atua ua faia le finagalo o le Atua i le lalolagi



rataiso ona o le togiola. (Faaaliga 22:1-3) O le a faapaiaina e le Malo o le Atua le suafa o le Atua. O le ā le uiga? O lona uiga pe a pule le Malo o le Atua i le lalolagi, o le a faamamaluina e tagata uma le suafa o Ieova.—Taga'i i le Faaopoopoga 21.

O ANAFEA NA AVEA AI IESU MA TUPU?

22 Na a'oa'o e Iesu ona soo e tatalo: "Ia oo mai lou malo." E manino mai la, e faato'ā oo mai le Malo o le Atua i le lumana'i. E faavae muamua e Ieova lona malo, ma tofia Iesu e avea ma Tupu o

22. E faapefea ona tatou iloa e le'i avea Iesu ma Tupu a o iai i le lalolagi, po o le taimi lava na toe afio ai i le lagi?



lenā Malo. Pe na avea Iesu ma Tupu i le taimi lava na toe afio ai i le lagi? E leai. Sa tatau ona ia faatali. Ina ua mavae sina taimi talu ona toe faatūina mai Iesu, na faamanino mai e Peteru ma Paulo lenei manatu ina ua la faasino atu le valoaga i le Salamo 110:1 iā Iesu. I le valoaga, na fetalai ai Ieova: “Ia e nofo i lo’u itu taumatau se’ia ou faia ou fili ma mea e tū ai ou vae.” (Galuega 2:32-35; Eperu 10:12, 13) O le ā le umi e tatau ona faatali ai Iesu, ona faato’ā fai lea o ia e Ieova ma Tupu?

²³ Mo le tele o tausaga a o le’i oo i le 1914, sa malamalama se vaega o Kerisiano faamaoni, o lenā tausaga o se tausaga tāua i valoaga o le Tusi Paia. O mea na tutupu i le lalolagi talu mai le 1914, ua faamaonia ai le sa’o o nei Kerisiano faamaoni. Na amata ona pule Iesu o se Tupu i lenā tausaga. (Salamo 110:2) E le’i umi talu ona pule Iesu o se Tupu, ae lafo mai Satani i le lalolagi ma “ua puupuu lona taimi.” (Faaaliga 12:12) I le mataupu o sosoo mai, o le a tatou iloiloaina ai nisi faamaoniga o loo tatou ola i lenā taimi. O le a tatou a’oa’oina ai fo’i, e lē o toe umi ona faamautinoa lea e le Malo o le Atua ua faia le finagalo o le Atua i le lalolagi.—Taga’i i le Faaopopoga 22.

23. (a) O anafea na amata ai ona pule Iesu o le Tupu o le Malo o le Atua? (e) O le ā o le a tatou a’oa’oina i le mataupu o sosoo mai?

A'OA'OGA
MONI 1

O LE MALO O LE ATUA
O SE PULEGA MONI

“Ia oo mai lou malo. Ia faia lou finagalo i le lalolagi, e pei ona faia i le lagi.”—Mataio 6:9-13

O le ā le Malo o le Atua?

Faaaliga 11:15

O le a pule mai le Malo o le Atua mai i le lagi i le lalolagi.

1 Timoteo 6:15

O Iesu le Tupu o le Malo o le Atua.

Faaaliga 14:1, 4

O le a pule faatasi Iesu ma le 144,000 mai i le lagi.

Eperu 4:15; 5:8

E malamalama Iesu ma le 144,000 i o tatou faalogona, faapea faafitauli o loo tatou fesaga'ia.

A'OA'OGA
MONI 2

O LE A AVEA IESU
MA PULE E SILI ONA LELEI

“E faamasino e ia ma le amiotonu ē ua faatauvaā [pe matitiva].”—Isaia 11:4

Aiseā ua sili ai ona lelei le filifilia o Iesu e avea ma Tupu o le Malo?

1 Timoteo 6:16

E iai le taimi o le a feoti uma ai pule faaletagata, ae e soifua pea Iesu. E tumau e faavavau mea lelei uma o le a faia e Iesu mo i tatou.

Isaia 11:2-4

E sili atu mea lelei e mafai ona faia e Iesu nai lo o se isi lava pule faaletagata. E sili atu lona malosi nai lo o pule uma lava faaletagata. E faamasinotonu o ia ma alofa mutimutivale.

**A'OA'OGA
MONI 3**
**O LE A FAAMAUTINOA E LE
MALO O LE ATUA UA FAIA
LE FINAGALO O LE ATUA**

'O le a faatūina e le Atua o le lagi o le malo e lē faaumatia lava.'—Tanielu 2:44

O ā mea ua mǎe'a ona faia e le Malo o le Atua?
O ā mea o le a faia e le Malo i le lumana'i?

Faaaliga 12:7-12

Ina ua mǎe'a ona avea Iesu ma Tupu i le 1914, na ia lafo ese Satani mai i le lagi i le lalolagi.

O le mǎfuaaga lenā ua faatuputeleina ai faafitauli, tigā ma mafatiaga i le lalolagi atoa.

Failauga 8:9;
Faaaliga 16:16

Iā Amaketo, o le a faaumatia ai e le Malo o le Atua malo faaletagata uma e sauā ma faimea pi'opi'o.

Salamo 37:10

O le a faaumatia tagata o ē e faaauau ona faia mea leaga.

Faaaliga 22:1-3

Pe a pule le Malo o le Atua i le lalolagi, o le a lē toe iai se tasi e ma'i pe oti, ma o le a faamamaluina e tagata uma le suafa o le Atua.

PO UA LATA MAI LE I'UGA O LE LALOLAGI?

PE NA e matamata i tala fou ma mafaufau e faapea, 'Po o le a atili ona leaga le tulaga o mea i le lalolagi?' O le faatupula'ia o faigatā ma faiga sauā, ua māfua ai ona talitonu nisi ua lata mai le i'uga o le lalolagi. Pe e moni lenā manatu? Pe e iai se auala e iloa ai mea o le a tutupu i le lumana'i? Ioe e iai. E ui lava e lē mafai e tagata ona valoia mea o le a tutupu i le lumana'i, ae e mafai e Ieova ona faia faapea. Ua ia faailoa mai i le Tusi Paia e faatatau i lo tatou lumana'i faapea mea o le a tutupu i le lalolagi.—Isaia 46:10; Iakopo 4:14.

² Pe a tatou faitau i le Tusi Paia e faatatau i le i'uga o le lalolagi, e lē o uiga atu i le i'uga o le lalolagi paneta, ae o le i'uga o faiga amioleaga i le lalolagi. Na a'oa'oa e Iesu tagata e faapea, o le a pule le Malo o le Atua i le lalolagi. (Luka 4:43) Na fia iloa e ona soo po o afea e oo mai ai le Malo o le Atua. Na latou fesili iā Iesu: "Pe e oo afea ia mea, ma o le ā fo'i le faailoga o lou faatasi mai, ma le taufaai'ui'uga o le faiga o mea a le

1. O fea e tatou te iloa ai mea o le a tutupu i le lumana'i?

2, 3. O le ā na fia iloa e soo o Iesu, ma o le ā le tali a Iesu?

lalolagi?" (Mataio 24:3) E le'i ta'u atu e Iesu iā i latou le taimi tonu, ae e na o mea o le a tutupu a o le'i oo mai le i'uga o lenei lalolagi. O mea sa fetalai Iesu o le a tutupu, o loo tutupu i le taimi nei.

³ O le a iloiloaina i lenei mataupu faamaoniga e iloa ai o loo tatou ola i le taimi a o toetiiti lava oo i le i'uga o le lalolagi. Muamua, se'i o tatou iloiloaina se taua na tupu i le lagi, ina ia mafai ai ona tatou malamalama i le māfuaaga ua faateleina ai le tulaga leaga i le lalolagi.

SE TAUA I LE LAGI

⁴ I le Mataupu 8, na tatou a'oa'oina ai na avea Iesu ma Tupu i le lagi i le 1914. (Tanielu 7:13, 14) Ua faamatala mai i le tusi o Faaaliga le mea na tupu: "Ona tau ai lea o le taua i le lagi: O Mikaele [po o Iesu] ma ana agelu ua tau ma le tarako [Satani], ua tau fo'i le tarako ma ana agelu ma i latou."* Na faato'ilaloina Satani ma ana temoni ma na lafo mai i latou i le lalolagi. Se'i manatu i le olioli o agelu i lenā taimi! Ae faapefea tagata i le lalolagi? Ua ta'ua i le Tusi Paia, talu mai le taimi na lafo mai ai Satani ma ana temoni i le

* O Mikaele le isi igoa mo Iesu Keriso. Mo nisi faamatalaga, faamolemole taga'i i le Faaopoopoga 23.

4, 5. (a) O le ā na tupu i le lagi ina ua mǎe'a ona avea Iesu ma Tupu? (e) E tusa ai o le Faaaliga 12:12, o le ā ua tupu i le lalolagi ina ua lafo mai i ai Satani?

lalolagi ma faasolo mai ai, ua avea o se vaitaimi o puapuaga mo le fanau a tagata. Aiseā? Talu ai ua ita tele le Tiapolo, “auā ua na iloa ua puupuu lona taimi.”—Faaaliga 12:7, 9, 12.

⁵ O loo faia e le Tiapolo le mea e gata ai lona mafai e faatupuina ai puapuaga i le lalolagi. Ua ita tele Satani auā e lē o toe umi se taimi, ona taofia loa lea e le Atua o ana gaoioiga i le lalolagi. Se'i o tatou iloiloaina le fetalaiga a Iesu e faatatau i mea o le a tutupu a o faagasolo aso e gata ai.—Taga'i i le Faaopoopoga 24.

ASO E GATA AI

⁶ **Taua.** Na fetalai Iesu: “O le a siitaua atu isi atunuu i isi atunuu, ma isi malo i isi malo.” (Mataio 24:7) E sili atu le to'atele o tagata ua fasiotia i taua i o tatou taimi, nai lo o se isi lava taimi i le talafaasolopito. Ua ta'ua i se lipoti mai i se faalapotopotoga e su'esu'e i mea o loo tutupu, talu mai le 1914, e silia ma le 100 miliona tagata ua fasiotia i taua. E faatoluina le aofa'i o tagata na fasiotia i taua i le 100 tausaga ua mavae i le va o le 1900 ma le 2000, nai lo o tagata na fasiotia i le 1,900 tausaga muamua atu. Se'i manatu i puapuaga ma tigā ua oo i le faitau miliona o tagata ona o taua.

⁷ **Oge.** Na fetalai Iesu: 'O le a iai oge.' (Mataio 24:7) E ui lava i le tele o mea'ai ua maua i

6, 7. O ā ni faamatalaga moni e faatatau i taua ma oge i aso nei?

le taimi lenei nai lo o se isi lava taimi, ae o loo fia aai pea tagata. Aiseā? E lē o lava tupe e faatau ai a latou mea'ai, po o fanua fo'i e fai ai faato'aga. E silia ma le piliona tagata e itiiti ifo i le tālā le tupe e latou te maua i le aso, e faatau ai mea e latou te mana'omia. Ua faapea mai le Faalapotopotoga o le Soifua Mālōlōina i le Lalolagi (WHO), e faitau miliona tamaiti e maliliu i tausaga ta'itasi. O le māfuaaga autū, e lē lava mea'ai ina ia maua ai pea le soifua mālōlōina.

8 Mafui'e. Na valoia e Iesu: 'O le a iai mafui'e te tele.' (Luka 21:11) E faatalitalia i tausaga ta'itasi le tele o mafui'e malolosi. Talu mai le tausaga e 1900, e silia i le lua miliona ta-

8, 9. E faapefea ona faamaonia ua taunuu valoaga a Iesu e faatatau i mafui'e ma faama'i'i?





gata ua maliliu ona o mafui'e. E ui lava o loo iai masini faaonapōnei lea e ono mafai ona mua'i iloa ai mafui'e a o le'i tupu, ae o loo maliliu pea le to'atele o tagata.

° **Faama'i.** Na valoia e Iesu o le a iai "faama'i." O le a vave le pipisi o faama'i mata'utia ma maliliu ai le to'atele. (Luka 21:11) E ui lava ua iloa e foma'i auala e togafitia ai le tele o faama'i, ae o loo iai pea faama'i e lē o maua se vaifofō. O le mea moni, ua ta'ua i se tasi o lipoti, i tausaga ta'itasi e maliliu ai le faitau miliona mai i faama'i e pei o le fatafata vaivai, malalia ma le manava tatā mata'utia. E lē gata i lea, i le 40 tausaga ua mavae, e silia i le 30 isi faama'i fou ua maua e foma'i, ma o nisi o nei faama'i e lē mafai ona togafitia.

UIGA O TAGATA I ASO E GATA AI

10 Ua ta'ua i le 2 Timoteo 3:1-5: "O aso e gata ai e oo mai ai aso e sili ona faigatā." Na faamatalaina e le aposetolo o Paulo uiga o le a faaalua e le to'atele o tagata i aso e gata ai. Na ia ta'ua o le a avea tagata ma ē

- e manatu faapito
- e manana'ō tele i tupe
- e lē usiusita'i i mātua
- e lē faamaoni
- e lē alolofa i aiga
- e lē amio pulea
- e sauā
- e sili ona naunau i mea faafiafia nai lo o le alolofa i le Atua
- e faafoliga mai e alolofa i le Atua ae e lē manana'ō e usiusita'i iā te ia

11 Po o uiga ma amiooga nei a le to'atele o

10. Ua faapefea ona faatau-nuina le 2 Timoteo 3:1-5 i aso nei?

11. E tusa ai ma le Salamo 92:7, o le ā o le a tupu i tagata amioleaga?



tagata i la outou vaipanoa? O le tulaga lea i le lalolagi atoa. Peita'i, e iai le gaoioiga o le a faia e le Atua e faatatau i nei tulaga. Ua ia folafola mai: "Pe a tupu olaola o ē e amioleaga e pei o le vao ma fuga mai i latou uma o ē e faia mea e tigā ai, ina ia faaumatia i latou e faavavau."—Salamo 92:7.

TALA LELEI I ASO E GATA AI

12 Na valoia i le Tusi Paia a o faagasolo aso e gata ai, o le a faateteleina tigā ma mafatiaga. Ae na ta'ua ai fo'i o le a iai mea lelei o le a tutupu ai.

13 Malamalamaga i le Tusi Paia. Na tusi le perofeta o Tanielu e faatatau i aso e gata ai e faapea: "O le a faatuputeleina le poto sa'o." (Tanielu 12:4) I le taimi lea, o le a foa'i ai e le Atua i ona tagata le tomai e atili ai ona malamalama lelei i le Tusi Paia, nai lo o se isi lava taimi. Na faia faapea e Ieova aemaise lava talu mai le 1914. O se faata'ita'iga, ua ia a'oa'oina i tatou e faatatau i le tāua o lona suafa ma lona finagalo mo le lalolagi, faapea le a'oa'oga moni e faatatau i le togiola, le tulaga o ē ua maliliu, ma le toetū. Na tatou a'oa'oina e na o le Malo o le Atua e mafai ona fo'ia faafitauli uma o loo tatou fesaga'ia. Na tatou a'oa'oina fo'i le auala e maua ai le fiasia, ma pe e faapefea ona ola i se auala e ōgatusa ma

12, 13. O ā mea ua a'oa'oina ai i tatou e Ieova a o faagasolo aso e gata ai?

le finagalo o le Atua. Ae o le ā la e tatau ona faia e auauna a le Atua i mea ua latou a'oa'oina? E tatou te maua le tali i se isi valoaga.—Taga'i i Faaopoopoga 21 ma le 25.

14 Le galuega tala'i i le lalolagi aoao. Na fetalai Iesu e faatatau i aso e gata ai e faapea: “O le a tala'iina atu lenei tala lelei o le malo i le lalolagi atoa.” (Mataio 24:3, 14) Ua tala'ia le tala lelei o le Malo i le silia i le 230 atunuu ma i le silia ma le 700 gagana. I le lalolagi atoa, o loo fesoasoani Molimau a Ieova mai 'i atunuu uma, ma ituaiga uma,' i tagata ina ia malamalama po o le ā le Malo, ma o le ā o le a faia e lea Malo mo le fanau a tagata. (Faaaliga 7:9) E latou te faia lenei auuunaga e aunoa ma se totogi. E ui lava e itagia ma sauāina i latou e le to'atele o tagata, ae e leai se mea e mafai ona taofia le galuega tala'i e pei lava ona valoia e Iesu.—Luka 21:17.

O LE Ā LAU GAOIOIGA E FAI?

15 Pe e te talitonu o loo tatou ola i aso e gata ai? O le tele o valoaga a le Tusi Paia e faatatau i aso e gata ai ua faataunuuina. E lē o toe umi ona filifili lea o Ieova e faamuta le tala'iina o le tala lelei, ona oo mai ai lea “o le i'uga.” (Mataio 24:14)

14. O fea o loo tala'ia ai le tala lelei o le Malo, ma o ai o loo faia lea galuega tala'i?

15. (a) Pe e te talitonu o loo tatou ola i aso e gata ai, ma aiseā? (e) O le ā o le a tupu iā i latou e ususita'i iā Ieova ma ē e lē ususita'i iā te ia?

“O le a tala’iina atu
lenei tala lelei o le
malo i le lalolagi atoa.”
—Mataio 24:14



O le ā le i'uga? O loo faasino atu iā Amaketo lea o le a aveesea ai e le Atua mea leaga uma. O le a faaaogā e Ieova Iesu ma ana agelu malolosi, e faaumatia so o se tasi e lē mana'ο e usiusita'i iā te Ia ma lona Alo. (2 Tesalonia 1:6-9) Pe a mǎe'a lenā, o le a lē toe faasesēina e Satani ma ana temoni tagata. O i latou uma e manana'ο e usiusita'i i le Atua ma lagolagoina atoatoa lona Malo, o le a vāai i le faataunuuga o folafolaga uma a le Atua.—Faaaliga 20:1-3; 21:3-5.

16 E lē o toe umi ona faaumatia lea o lenei lalolagi o loo pulea e Satani. O lea, e tǎua tele ai ona tatou fesili ifo iā i tatou lava, 'O le ā e tatau ona ou faia?' E finagalo Ieova ina ia e a'oa'oina le tele o mea e te mafaia mai i le Tusi Paia. E lē tatau ona e manatu māmā i lau su'esu'ega. (Ioane 17:3) E faia sauniga a Molimau a Ieova i vaiaso ta'itasi, e fesoasoani ai i tagata ina ia malamalama i le Tusi Paia. Ia taumafai e auai e lē aunoa i na sauniga. (**Faitau le Eperu 10:24, 25.**) Pe afai ua e iloa e tatau ona faia ni suiga i lou olaga, aua e te fefe e faia faapea. A o e faia nei suiga, o le a atili faamalosi ai la oulua faiā ma Ieova.—Iakopo 4:8.

17 Na faamatala e le aposetolo o Paulo o le a oo mai le faaumatiaga o tagata amioleaga, i se taimi

16. Talu ai ua lata tele mai le i'uga, o le ā e tatau ona e faia?

17. Aiseā o le a faate'ia ai le to'atele pe a oo mai le i'uga?

e lē faatalitalia e le to'atele lea “e pei o se gaoi i le pō.” (1 Tesalonia 5:2) Na valoia e Iesu o le a filifili le to'atele e lē ano i faamaoniga o loo tatou ola i aso e gata ai, i lona faapea mai: “E pei lava o aso o Noa, o le a faapena fo'i le faatasi mai o le Atalii o le tagata [po o aso e gata ai]. Auā e pei o na aso a o le'i oo i le lolo, na latou aai ma inu, na faaipoipo alii ma tama'ita'i, se'ia oo lava i le aso na ulu atu ai Noa i le vaa; ma latou te le'i ano i ai se'ia oo mai le lolo ma tafieseā ai i latou uma.”—Mataio 24:37-39.

18 Na lapata'i mai Iesu e lē tatau ona faalavelavea i tatou “i le 'ai tele, ma le inu tele, ma le popole i mea o le olaga nei.” Na fetalai o ia o le a faafuase'i ona oo mai le i'uga “e pei o se mailei,” ma o le a “oo mai iā i latou uma o ē o nonofo i le lalolagi atoa.” Ona fetalai atili lea o ia: “O lea la, ia mataala pea, ma ia faatoga atu i taimi uma [pe tatalo faatauānau], ina ia outou sao mai i nei mea uma o le a oo mai, ma ia tutū i luma o le Atalii o le tagata.” (Luka 21:34-36) Aiseā e tāua tele ai le utagia o le lapata'iga a Iesu? Talu ai e lē o toe umi ona faaumatia lea o le lalolagi amioleaga a Satani. E na o i latou e finagalo malie i ai Ieova ma Iesu o le a faasaoina mai i le i'uga, ma ola e faavavau i le lalolagi fou.—Ioane 3:16; 2 Peteru 3:13.

18. O le ā le lapata'iga na aumaia e Iesu?

**A’OA’OGA
MONI 1**

**UA FAAILOA MAI E LE ATUA
IĀ I TATOU MEA O LE A TUTUPU
I LE LUMANA’I**

“O Lē ua ta’u mai talu mai le amataga le i’uga, ma ta’u mai fo’i talu mai aso anamuā mea e le’i faia.”—Isaia 46:10

O ā mea ua tatou iloa e faataatau i le taimi o le i’uga?

Tanielu 7:13, 14

Na avea Iesu ma Tupu i le lagi i le 1914.

Mataio 24:3-14

Na valoia e Iesu taimi faigatā mo tagata.

Faaaliga 12:7-9, 12

E le’i umi talu ona avea Iesu ma Tupu, ae ia lafo ese Satani mai i le lagi i le lalolagi. Ua ita tele Satani, auā “ua puupuu lona taimi” o loo totoe, ona taofia loa lea e le Atua o ana gaioioiga i le lalolagi.

**A’OA’OGA
MONI 2**

**O LOO TATOU OLA I LE TAIMI
O LE I’UGA**

‘O le ā le faailoga o le taufaai’ui’uga o le faiga o mea a le lalolagi?’—Mataio 24:3

Po ua e vaaia le faataunuuga o valoaga o le Tusi Paia?

Mataio 24:7; Luka 21:11

Ua tele atu taua, oge, mafui’e ma faama’i ua tatou vaaia i le taimi lenei nai lo o se isi lava taimi.

2 Timoteo 3:1-5

Na faamatala e le aposetolo o Paulo amioga a tagata o le a iai i aso e gata ai.

Tanielu 12:4

O loo fesoasoani mai le Atua i ona tagata i le taimi nei, ina ia atili ona malamalama lelei i le Tusi Paia, nai lo o se isi lava taimi.

Mataio 24:14

O loo tala’ia le tala lelei o le Malo i le lalolagi atoa.

**A'OA'OGA
MONI 3**

**IA GAOIOI NEI LOA E FAAMALIE
LE FINAGALO O IEOVA**

“E oo mai lava le aso o Ieova e pei o se gaioi i le pō.”

—1 Tesalonia 5:2

Talu ai ua lata tele mai le i'uga, o le ā e mana'omia ona e faia?

Ioane 17:3

Aua e te manatu māmā i lau su'esu'ega o le Tusi Paia.

Eperu 10:24, 25

Ia faaaauu pea ona a'oa'oina le tele o mea, e ala i le auai i sauniga a Molimau a Ieova.

Iakopo 4:8

Ia faia suiga mana'omia i lou olaga, ina ia atili ai ona e mafuta vavalalata atu i le Atua.

Luka 21:34-36

Ia 'alofia mea e tosina ese ai oe, ma taula'i atu i le tapua'iga iā Ieova.

LE MEA MONI E FAATATAU I AGELU MA TEMONI

E FINAGALO Ieova e tatou te iloa lona aiga. O agelu o se vaega o le aiga o le Atua. I le Tusi Paia, ua ta'ua i latou o 'atalii o le Atua.' (Iopu 38:7) O ā mea e fai e agelu? Na faapefea ona latou fesoasoani i tagata i le taimi ua te'a? Pe e mafai ona latou fesoasoani mai iā i tatou i aso nei?—Taga'i i le Faaopoopoga 8.

² E mana'omia ona tatou iloa po o ai na foafoaina agelu. O loo ta'ua i le Kolose 1:16, ina ua uma ona foafoaina e Ieova o Iesu, ona 'foafoaina loa lea o isi mea uma i le lagi ma le lalolagi.' E aofia ai agelu i na foafoaga. E to'afia agelu na foafoaina? Ua faapea mai le Tusi Paia e faitau selau miliona agelu.—Salamo 103:20; Faaaliga 5:11.

³ Ua a'oa'o'ina fo'i i le Tusi Paia, na muamua foafoaina e Ieova agelu a o le'i foafoaina le lalolagi. O ā ni faalogona o agelu ina ua latou vāai atu i le lalolagi? O loo ta'ua i le tusi o Iopu na olioli i latou. O i latou o se aiga vavalalata o loo auuana faatasi iā Ieova.—Iopu 38:4-7.

E FESOASOANI AGELU I TAGATA O LE ATUA

⁴ E naunau mai agelu i tagata faapea le finagalo o Ieova mo le lalolagi ma tagata. (Faataoto 8:30, 31;

-
1. Aiseā e tatau ai ona tatou a'oa'o'ina e faatatau i agelu?
 2. O ai na foafoaina agelu, ma e to'afia agelu na foafoaina?
 3. O le ā le faamatalaga o loo i le Iopu 38:4-7 e faatatau i agelu?
 4. E faapefea ona tatou iloa e naunau agelu i tagata?

1 Peteru 1:11, 12) E mautinoa le matuā faanoanoa o agelu ina ua fouvale Atamu ma Eva. Ae e mautinoa e sili atu lo latou faanoanoa i le taimi lenei, i le vāai mai i le to'atele o tagata e lē o usiusita'i i le Atua. Peita'i pe a salamō se tasi ma toe fo'i i le Atua, e olioli agelu. (Luka 15:10) E naunau moni agelu iā i latou e auauna i le Atua. E faaaogā e Ieova agelu e fesoasoani ma pui-puia ana auauna i le lalolagi. (Eperu 1:7, 14) Se'i o tatou iloiloina ni faaa'oa'oga.

⁵ Na auina e Ieova ni agelu se to'alua, ina ia fesoasoani iā Lota ma lona aiga e sosola ese mai i le faaumatiaga o aai o Sotoma ma Komoro. (Kenese 19:15, 16) I le faitau selau o tausaga mulimuli ane ai, na lafo ai le perofeta o Tanielu i le lua o leona. Peita'i e le'i afāina o ia, talu ai “na auina mai e [le] Atua lana agelu e punitia gutu o leona.” (Tanielu 6:22) A o iai le aposetolo o Peteru i le falepuipui, na auina atu e Ieova se agelu e faasa'oloto o ia. (Galuega 12:6-11) Sa fesoasoani fo'i agelu iā Iesu a o iai o ia i le lalolagi. O se faaa'oa'oga ina ua mǎe'a lona papatisoga, na “auauna atu agelu iā te ia.” (Mareko 1:13) Ina ua lata fo'i i le taimi e fasio-tia ai Iesu, na 'faamalosi atu se agelu iā te ia.'—Luka 22:43.

⁶ I aso nei, e lē o toe faaali mai ni agelu i tagata. Peita'i, o loo faaaogā pea i latou e le Atua e fesoasoani mai ai i ana auauna. Ua ta'ua i le Salamo 34:7: “E tolauapi le agelu a Ieova e si'osi'omia ai i latou o ē e

5. O ā auala na fesoasoani ai agelu i auauna a le Atua i aso ua mavae?

6. (a) E faapefea ona tatou iloa e fesoasoani mai agelu i tagata i aso nei? (e) O ā fesili o le a tatou taliina?

matata'u iā te ia, ma e na te lavea'iina fo'i i latou." Aiseā e tatou te mana'omia ai le puipuiga? Talu ai o loo iai ni o tatou fili malolosi o loo manana'o e faia se mea e tatou te afāina ai. Ae o ai i latou? O fea e latou te ō mai ai? E faapefea ona latou taumafai e faia mea e tatou te afāina ai? Ina ia tali na fesili, se'i o tatou iloiloina po o le ā na tupu ina ua mavae sina taimi puupuu, talu ona foafoaina Atamu ma Eva e le Atua.

"Na auina mai e lo'u Atua lana agelu e punitia gutu o leona."

—Tanielu 6:22



O TATOU FILI E LĒ VAAIA

⁷ Na tatou a'oa'oina i le Mataupu 3, sa fouvale se agelu i le Atua ma mana'o e pule i isi. Ua ta'ua o ia i le Tusi Paia o Satani le Tiapolo. (Faaaliga 12:9) Na mana'o fo'i Satani ina ia fouvale isi i le Atua. Sa mafai ona ia faasesēina Eva. Talu mai lenā taimi, ua mafai ona ia faasesēina toetoe o tagata uma. Peita'i, e iai i latou sa faamaoni pea iā Ieova, e pei o Apelu, Enoka ma Noa.—Eperu 11:4, 5, 7.

⁸ I aso o Noa, na fouvale nisi o agelu ma tuua lo latou nofoaga i le lagi, ae ō mai i le lalolagi e ola ai o ni tagata. O le ā le māfuaaga? O loo ta'ua i le Tusi Paia na latou manana'o e fai ni a latou avā. (**Faitau le Kenese 6:2.**) Peita'i, e lē tatau i agelu ona faia lenā gaioiga. (Iuta 6) E pei o na agelu amioleaga, na toetoe o tagata uma sa iai i lenā taimi na sauā ma faia amioga faapi'opi'o. O lea, na filifili ai Ieova e faaumatia tagata amioleaga, e ala i le aumaia o se lolo na aafia ai le lalolagi atoa. Ae na ia faasaoina ana auauna faamaoni. (Kenese 7:17, 23) Ina ia faasaoina e nei agelu amioleaga i latou lava, na latou toe fo'i ai i le lagi. Ua ta'ua i latou i le Tusi Paia o temoni. Na latou filifili e aufaatasi ma Satani i lana fouvalega, ma na avea ai le Tiapolo ma o latou pule.—Mataio 9:34.

⁹ Talu ai sa fouvale nei temoni iā Ieova, e na te le'i toe taliaina i latou i lona aiga. (2 Peteru 2:4) E lē o toe

7. O le ā ua faia e tagata ona o faiga taufaasesē a Satani?

8. (a) Na faapefea ona avea nisi o agelu ma temoni? (e) O le ā na faia e temoni ina ia faasaoina ai mai i le Lolo?

9. (a) O le ā na tupu i temoni ina ua latou toe fo'i i le lagi? (e) O le ā o le a tatou iloiloaina?

mafai ona liutino i tagata temoni. Ae o loo faaauau pea ona latou “faasesēina le lalolagi atoa.” (Faaaliga 12:9; 1 Ioane 5:19) Se’i o tatou iloiloina pe e faapefea ona latou faasesēina pe ta’ita’isesēina le to’atele.—**Faitau le 2 Korinito 2:11.**

AUALA UA FAASESĒINA AI E TEMONI TAGATA

10 E tele auala ua faasesēina ai e temoni tagata. Pe a fesoota’i tagata ma temoni, e latou te faia a lē i se auala tuusa’o pe auala atu fo’i i se isi e pei o se faataulāitu po o sē e valoia le lumana’i. Ua ta’ua nei faiga o faiga faatemoni po o faiga faaagaga. Peita’i, ua faatonuina i tatou i le Tusi Paia e taumamao ese mai i so o se mea lava e iai se sootaga ma temoni. (Kalatia 5:19-21) Aiseā? E pei lava ona faaaogā e se tagata tulimanu se mailei e pu’e ai manu, e faapena fo’i ona faaaogā e temoni nei faiga taufaasesē e maileia ma pulea ai tagata.—Taga’i i le Faaopoopoga 26.

11 O se tasi o faiga taufaasesē a temoni o valovaloga. E faasino atu lea i le faaaogā o le mana o temoni, ina ia taumafai ai e iloa mea o le a tutupu i le lumana’i po o mea e lē o iloa e isi. E ono taumafai se tasi e faia faapea e ala i le sa’ili i fetu, sa’ili i faailoga, faipelē ma faia fofō faataulāitu. O le to’atele o tagata e manatu e leai se afāina o nei faiga. Peita’i, e sesē lenā manatu. O se faaa’oa’oga, ua faaalua mai i le Tusi Paia e galulue faatasi temoni ma ē faia valovaloga. I le Galuega 16:16-18, e tatou te faitau ai e faatatau i “se temoni e vavalo”

10. O ā auala ua faasesēina ai e temoni tagata?

11. O le ā e faasino atu i ai valovaloga, ma aiseā e tatau ai ona tatou ‘alofia nei faiga?

na fesoasoani i se teine ina ia faia “valovaloga.” Ae ina ua tulieseā e le aposetolo o Paulo le temoni, na lē mafai e le teine ona toe faia ni valovaloga.

12 E iai fo’i se isi faiga taufaasesē e faaaogā e temoni e maileia ai tagata. E taumafai temoni e faatalitōnu i tatou e mafai ona tatou talanoa i ē ua maliliu, ma o loo feola pea i latou i se isi nofoaga, ma e mafai ona latou fesoota’i ma i tatou pe faia ni gaoioiga e tatou te afāina ai. O se faata’ita’iga, atonu ua maliu se uō po o se tauaiga o se tasi. O lea, ua alu ai lenei tagata i se tasi e pei o se faataulāitu o lē e faapea mai e mafai ona ia fesoota’i ma ē ua maliliu. Atonu e fai atu e le faataulāitu se faamatalaga manaia e faatatau i lē ua maliu, ma taumafai fo’i e faata’ita’i le leo o lē ua maliu. (1 Samu- elu 28:3-19) O le tele o tū ma aga mo maliu e pei o tau- samiga ma fiafiaga pe a uma ona teu le maliu, talagā teu, taulaga mo ē ua maliliu, ma nisi gaoioiga fai mo le leoleoina o le maliu, e faavae mai fo’i i le talitonuga e faapea, o loo ola pea le tagata ua oti i se isi nofoaga. O nei tū ma aga e fesoota’i atu i faiga faatemoni. Pe a lē faia se vaega a Kerisiano i nei tū ma aga, e ono fai- tioina, faaesea pe faifai fo’i iā i latou o latou aiga po o nuu. Peita’i, ua malamalama Kerisiano e lē o feola ē ua maliliu i se isi nofoaga. E lē mafai lava ona fesoota’i ma ē ua maliliu, ma e lē mafai fo’i ona latou faia ni ga- oioiga e tatou te afāina ai. (Salamo 115:17) Ia matuā faaeteete. Aua lava ne’i e taumafai e fesoota’i ma ē ua maliliu po o temoni, pe aafia fo’i i ni faiga e iai se

12. (a) Aiseā e lē o se gaoioiga atamai ai le taumafai e fesoota’i ma ē ua maliliu? (e) Aiseā e matuā leai ai se vaega a auauna a le Atua i nisi o tū ma aga mo maliu?

The image is a composite. The top portion shows a priest in a yellow vestment holding a book with a circular emblem on its cover. The bottom portion shows a young man in a green shirt with his hands clasped in prayer, and another young man in a plaid shirt reading a book. The background is a light blue gradient.

AUALA E TETEE ATU AI IĀ SATANI MA TEMONI

- Lafoa'i mea uma e iai sootaga i faiga faataulāitu, faiga faatemoni ma faiga faagaga
- Su'esu'e le Tusi Paia
- Tatalo iā leova le Atua

sootaga i temoni.—**Faitau le Teuteronome 18:10, 11; Isaia 8:19.**

13 E lē gata e faasesēina e temoni tagata, ae e latou te faafefe fo’i i latou. Ua iloa e Satani ma ana temoni, ‘ua puupuu lava lo latou taimi’ o totoe ona aveese loa lea o i latou e le Atua mai i le lalolagi. O le māfuaaga lea ua sili atu ai ona latou sauā ma taufaamata’u i le taimi lenei nai lo o se isi lava taimi. (Faaaliga 12:12, 17) Peita’i, e faitau afe tagata sa fefefe muamua i temoni, ae e lē o toe fefefe i le taimi lenei. Na faapefea ona latou sa’oloto mai i le fefe i temoni?

TETEE ATU I TEMONI MA SA’OLOTO AI MAI IĀ I LATOU

14 Ua ta’u mai i le Tusi Paia le auala e tatou te tetee atu ai i temoni ma sa’oloto ai mai iā i latou. O se faa-a’oa’oga, na iai nisi i le aai o Efeso sa fesoota’i ma temoni a o le’i iloa a’oa’oga moni mai i Tusinga Paia. Na faapefea ona latou sa’oloto mai i temoni? O loo ta’ua i le Galuega 19:19: “E to’atele i latou o ē na faia faiga faaagaga, ua faaputupu faatasi a latou tusi, ma susunu ai i le afi i luma o tagata uma.” O lo latou manana’o e avea ma Kerisiano, na latou susunuina ai a latou tusi uma e faatatau i faiga faaagaga. O le gaioiga fo’i lenā e tataua ona faia i aso nei. O i latou uma o ē e manana’o e auauna iā Ieova, e mana’omia ona latou lafoa’i mea uma e iai se sootaga i faiga faate-moni. E aofia ai so o se mea e faafoliga mai ai e leai se afāina o faiga faataulāitu, faiga faatemoni ma faiga

13. O le ā ua mafai ona faia e le to’atele sa fefefe muamua i temoni?

14. E pei o Kerisiano i le ulua’i senituri, e faapefea ona tatou sa’oloto mai i temoni?

faaagaga e pei o tusi, mekasini, faamatalaga e faatatau i le sa'ili'ili i fetu, ata tifaga, musika ma taaloga e fesoota'i i faiga faatemoni. E aofia ai fo'i asoa ma isi mea e faaaogā e tagata e puipuia ai i latou mai i mea leaga. —1 Korinito 10:21.

15 Ina ua mavae ni nai tausaga talu ona susunuina e nisi o tagata i Efeso a latou tusi e faatatau i faiga faaagaga, na tusi le aposetolo o Paulo e **mana'omia pea** ona latou 'tau ma agaga leaga uma.' (Efeso 6:12) O le mea moni, e ui lava ua uma ona latou susunuina a latou tusi, ae sa taumafai pea temoni e faia se mea e afāina ai i latou. O le ā la se isi gaoioiga na mana'omia ona latou faia? Na faapea atu Paulo: "Ia outou ave le talita telē o le faatuatua, lea e mafai ai ona outou tineia [pe taofia] ai aū fanafana mū uma a lē o loo leaga." (Efeso 6:16) E pei lava ona puipuia se fitafita i lana talita, e mafai fo'i e lo tatou faatuatua ona puipuia i tatou. Pe afai e tatou te talitonuina atoatoa Ieova e mafai ona ia puipuia i tatou, o le a mafai ona tatou tetee atu iā Satani ma temoni.—Mataio 17:20.

16 E faapefea ona faamalosia lo tatou faatuatua iā Ieova? E mana'omia ona tatou faitauina le Tusi Paia i aso ta'itasi, ma faata'ita'i ona faalagolago iā Ieova e na te puipuia i tatou. Pe a tatou talitonu atoatoa iā Ieova, o le a lē mafai e Satani ma temoni ona faia se mea e tatou te afāina ai.—1 Ioane 5:5.

17 O le ā se isi gaoioiga na mana'omia ona faia e Ke-

15. O le ā se isi gaoioiga e mana'omia ona tatou faia e tetee atu ai iā Satani ma temoni?

16. E faapefea ona faamalosia lo tatou faatuatua iā Ieova?

17. O le ā se isi gaoioiga e mafai ona puipuia ai i tatou mai i temoni?

risiano i Efeso? Sa latou ola a'e i se aai e tumu i faiga faatemoni. O lea na faapea atu ai Paulo: 'Ia faaaauau ona tatalo i taimi uma.' (Efeso 6:18) Na tatau ona latou talosaga atu iā Ieova mo le puipuiga i taimi uma. Ae faapefea i tatou? O loo tatou ola fo'i i se lalolagi ua tumu i faiga faatemoni. E mana'omia fo'i la ona tatou talosaga atu iā Ieova mo lana puipuiga, ma faaaogā lona suafa pe a tatou tatalo atu iā te ia. (**Faitau le Faataoto 18:10.**) Pe a faaaauau ona tatou talosaga atu iā Ieova e lavea'i i tatou mai iā Satani, o le a tali mai Ieova i a tatou tatalo.—Salamo 145:19; Mataio 6:13.

18 Pe a tatou lafoa'ia mea uma i o tatou olaga e iai se sootaga i faiga faatemoni ma faalagolago iā Ieova e puipuia i tatou, o le a mafai ona tatou tetee atu iā Satani ma temoni. E lē tatau ona tatou fefefe iā i latou. (**Faitau le Iakopo 4:7, 8.**) E matuā sili atu ona malosi Ieova nai lo o temoni. Na ia faasalaina i latou i aso o Noa, ma o le a ia faaumatia i latou i le lumana'i. (Iuta 6) Ia manatua, e lē na o i tatou o loo tauina lenei taua. O loo faaaogā e Ieova ana agelu e puipuia i tatou. (2 Tupu 6:15-17) E tatou te mautinoa e mafai ona tatou manumalo i la tatou taua faasagatau iā Satani ma temoni, ona o le fesoasoani a Ieova.—1 Peteru 5: 6, 7; 2 Peteru 2:9.

19 Peita'i, afai la o loo faatupuina e Satani ma temoni le tele o mafatiaga, aiseā ua lē faaumatia ai loa i latou e le Atua? O le a taliina lenā fesili i le mataupu o sosoo mai.

18, 19. (a) E faapefea ona tatou manumalo i la tatou taua faasagatau iā Satani ma temoni? (e) O le ā le fesili o le a taliina i le mataupu o sosoo mai?

A'OA'OGA
MONI 1

O AGELU O SE VAEGA
O LE AIGA O LE ATUA

“Ia vivii atu iā Ieova, outou o ana agelu o ē e malolosi tele.” –Salamo 103:20

O ā mea e tatou te iloa e faatatau i agelu?

Iopu 38:4-7

Na muamua foafoaina e Ieova agelu ona faato'ā foafoaina ai lea o le lalolagi.

Faaaliga 5:11

E faitau miliona agelu o loo iai.

1 Peteru 1:11, 12

E naunau agelu i le finagalo o Ieova mo le lalolagi.

Luka 15:10

E naunau moni agelu iā i latou e auauna i le Atua.

A'OA'OGA
MONI 2

E FESOASOANI AGELU
I AUAUNA A LE ATUA

“E tolauapi le agelu a Ieova e si'osi'omia ai i latou o ē e matata'u iā te ia, ma e na te lavea'iina fo'i i latou.”

–Salamo 34:7

E faapefea ona tatou iloa e mafai e agelu ona fesoasoani mai i tagata?

Kenese 19:15, 16;

Tanielu 6:22; Luka 22:43;

Galuega 12:6-11

Na fesoasoani agelu iā Lota, Tanielu, Iesu ma Peteru.

Eperu 1:7, 14

E faaaogā e Ieova ana agelu e fesoasoani ma puipuia ana auauna i aso nei.

**A'OA'OGA
MONI 3**
**E TAUMAFAI AGELU LEAGA E FAIA
SE MEA E TATOU TE AFĀINA AI**

“[E lē] faasesēina i tatou e Satani, auā tatou te lē vālea i ana togafiti.”—2 Korinito 2:11

O ai temoni, ma aiseā e leaga ai i latou?

Faaaliga 12:9

Na fouvale se agelu iā leova. Ua ta'ua o ia o Satani.

Kenese 6:2

I aso o Noa, na iai ni agelu sa fouvale ma ō mai i le lalolagi.

Mataio 9:34

Na aufaatasi nei agelu i le fouvalega a Satani ma avea ai ma temoni.

Teuteronome 18:10, 11

E taumafai temoni e faasesē tagata, ma faia so o se gaoioiga e latou te mafai ina ia afāina ai tagata.

**A'OA'OGA
MONI 4**
**E MAFAI ONA E TETEE ATU
IĀ SATANI MA TEMONI**

“Ia tetee atu i le Tiapolo, ona sola ese ai lea o ia mai iā te outou.”—Iakopo 4:7

E faapefea ona e maua le fesoasoani a leova e tetee atu ai iā Satani ma temoni?

Galuega 19:19

Lafoa'i mea uma e iai le sootaga i faiga faatemoni, ia e foliga atu ai e lē afāina po o se mea e lelei faiga faataulāitu, temoni po o faiga faagaga.

Efeso 6:16, 18

Faamalosia lou faatuatua e ala i le su'esu'eina o le Tusi Paia, ma tatalo mo le puipuiga a le Atua.

Faataoto 18:10

Faaagā le suafa o leova.

AISEĀ UA MATUĀ TELE AI MAFATIAGA?

UA FAATAMA'IA e se galulolo se nuu. Ua tafana e se tamāloa ni tagata i totonu o se falesā, ma ua manu-nu'a ma maliliu ai le to'atele. Ua maliu se tinā ona o le kanesa, ae tuua ai lana fanau e to'alima.

² Pe a tutupu ni mala po o ni faalavelave faapea, e tuufesili le to'atele pe aiseā ua tutupu ai nei mea, ma pe aiseā fo'i ua tumu ai le lalolagi i le feitaga'i ma mafatiaga. Pe sa iai se taimi na e mafaufau ai faapena?

³ Ua faamatalaina i le Tusi Paia ni tagata na malolosi lo latou faatuatua i le Atua, ae sa latou tuufesili fo'i faapena. O se faaa'oa'oga, na fesili le perofeta o Sapakuka iā Ieova: “Aiseā ea ua e faaali mai ai iā te a'u o mea tigā ma ua e silasila mai ai pea i puapuaga? Aiseā ua faoa ai mea ma faia faiga sauā i o'u luma, aiseā fo'i ua faia ai fefinaua'iga ma tula'i mai ai misa?”—Sapakuka 1:3.

⁴ I le Sapakuka 2:2, 3, e tatou te faitau ai i le tali a le Atua i le fesili a Sapakuka, ma Lana folafolaga o le a ia faasa'o le tulaga o mea. E matuā alofa Ieova i tagata. Ua faapea mai le 1 Peteru 5:7: “O loo manatu mamafa mai o ia iā te outou.” O le mea moni, e sili

1, 2. O le ā e tuufesili ai le to'atele o tagata?

3, 4. (a) O ā fesili na tuufesili ai Sapakuka? (e) Na faapefea ona taliina e Ieova fesili a Sapakuka?

atu ona tigā le finagalo o le Atua i mafatiaga o tagata nai lo o i tatou. (Isaia 55:8, 9) O lea, se'i o tatou iloiloina le fesili lenei: Aiseā ua matuā tele ai mafatiaga i le lalolagi?

AISEĀ UA MATUĀ TELE AI MAFATIAGA?

⁵ E masani ona faapea mai faife'au, patele ma a'oa'oa' faalelotu, o le finagalo o le Atua ia oo mafatiaga i tagata. E ono faapea mai fo'i nisi, o mea uma e tutupu i tagata e aofia ai mala, ua uma ona filifilia e le Atua ma e lē mafai ona tatou malamalama i le māfuaaga ua ia faia ai faapea. Atonu e faapea mai isi e maliliu tagata e aofia ai ma tamaiti, ina ia mafai ai ona faatasi ma le Atua i le lagi. Peita'i e lē moni na manatu, talu ai e lē faatupuina e le Atua mea leaga. Ua ta'ua i le Tusi Paia: "E mamao lava i le Atua moni ona faia o se mea leaga, ma Lē e ona le malosi uma lava ona faia o se mea e lē tonu!"—Iopu 34:10.

⁶ E tuua'ia e le to'atele o tagata le Atua mo mafatiaga uma o loo tutupu i le lalolagi, ona e latou te manatu o loo pulea e le Atua le lalolagi. Ae e pei ona tatou a'oa'oina mai i le Mataupu 3, o lē o loo pulea moni le lalolagi o Satani le Tiapolo.

⁷ O loo faamatala mai i le Tusi Paia, "o le lalolagi atoa o loo nofo to'ilalo i le pule a lē o loo leaga." (1 Ioane 5:19) E ita tele ma sauā Satani le pule o lenei lalolagi, ma ua ia "faasesēina le lalolagi atoa."

5. (a) O le ā ua a'oa'oina e le tele o a'oa'oa' faalelotu e faatatau i mafatiaga? (e) O le ā le a'oa'oga a le Tusi Paia?

6. Aiseā e tuua'ia ai e le to'atele le Atua mo mafatiaga uma o loo tutupu i le lalolagi?

7, 8. Aiseā ua matuā tele ai mafatiaga i le lalolagi?

(Faaaliga 12:9) E faata'ita'i le to'atele o tagata iā te ia, ma o se tasi lenā o māfuaaga ua tumu ai le lalolagi i pepelo, feitaga'i ma le sauā.

⁸ E iai isi māfuaaga ua tele ai mafatiaga i le lalolagi. Ina ua uma ona fouvale Atamu ma Eva, ona tuufaasolo mai lea o le agasala i le la fanau. O le i'uga, ua oo ai mafatiaga i isi tagata ona o mea e faia e isi. E masani ona latou manana'o e sili atu i latou nai lo o isi. E latou te femisaa'i, fetaua'i ma sauāina isi tagata. (Failauga 4:1; 8:9) O isi taimi e māfua ona mafatia tagata ona 'e tutupu faafuase'i mea i le taimi e le'i faatalitalia.' (Failauga 9:11) Pe afai e sesē le nofoaga e latou te iai i le taimi sesē, e mafai ona aafia i latou i ni faalavelave faafuase'i po o nisi mea leaga.

⁹ E lē taitai faatupuina e Ieova mafatiaga. E lē tuua'ia o ia mo taua, soligatulafono ma faiga lē tonu. E na te lē faatupuina mala e pei o mafui'e, afā ma lologa. Ae atonu e te tuufesili, 'Pe afai la o Ieova o lē e silisili ona malosi i le lagi ma le lalolagi, aiseā la ua ia lē taofia ai le tutupu o nei mea mata'utia?' E tatou te iloa e silasila alofa mai le Atua iā i tatou. O lea, e mautinoa e iai se māfuaaga tāua ua ia lē taofia ai le tutupu pea o mafatiaga.—1 Ioane 4:8.

AISEĀ UA LĒ TAOFIA AI E LE ATUA MAFATIAGA?

¹⁰ I le faato'aga o Etena, na faasesēina ai Atamu ma Eva e le Tiapolo. Na tuua'ia e Satani le Atua i le

9. Aiseā e mafai ai ona tatou mautinoa e iai se māfuaaga tāua ua lē taofia ai e le Atua le tutupu pea o mafatiaga?

10. Na faapefea ona lu'ia e Satani le pule a Ieova?

avea o ia o se Pule leaga. Na ia faapea atu o loo tao-fia e le Atua se mea lelei mai iā Atamu ma Eva. Na mana’o Satani e talitonu Atamu ma Eva, e sili atu ona lelei le auala e na te pule ai nai lo o Ieova, ma e la te lē mana’omia fo’i le Atua.—Kenese 3:2-5; taga’i i le Faaopoopoga 27.

11 Na lē usiusita’i Atamu ma Eva iā Ieova ma la fouvale ai iā te ia. Na la manatu o loo iā i la’ua le aiā e filifili ai le mea e sa’o ma le mea e sesē. O le a faapefea ona faamaonia e Ieova e sesē Atamu ma Eva, ma e na te silafia le mea e lelei mo i tatou?

12 Ina ua agasala Atamu ma Eva, e le’i faaumatia e Ieova i la’ua. Nai lo o lea, sa ia faatagaina i la’ua e fai sa la fanau. Ona faatagaina lea e Ieova o le fanau a Atamu ma Eva, e filifili po o ai e latou te manana’o e avea ma o latou pule. O le finagalo o Ieova ia tumu le lalolagi i tagata lelei atoatoa, ma e taunuu lava lenā mea e tusa po o ā taumafaiga a le Tiapolo.—Kenese 1:28; Isaia 55:10, 11.

13 Na lu’ia e Satani Ieova i luma o le faitau miliona o agelu. (Iopu 38:7; Tanielu 7:10) O lea, sa tuu atu e Ieova iā Satani le avanoa e faamaonia ai pe moni lana tuua’iga. Na tuuina atu fo’i e Ieova i tagata le avanoa e faavae ai a latou lava faigāmalo i lalo o le ta’ita’iga a Satani, e faaalua ai pe e mafai ona latou taulau e aunoa ma le fesoasoani a le Atua.

11. O le ā le fesili e mana’omia ona tatou taliina?

12, 13. (a) Aiseā e le’i faaumatia ai e Ieova Atamu ma Eva, e ui na la agasala? (e) Aiseā ua tuu atu ai e Ieova le avanoa iā Satani e avea ai ma pule o lenei lalolagi, ma tuu atu le avanoa i tagata e latou te pulea ai i latou lava?

14 Na taumafai tagata e pulea i latou lava mo le faitau afe o tausaga, ae e lē o taulau lava a latou taumafaiga. Ua faamaonia ai o Satani o le pepelo. E **matuā mana'omia** e tagata le fesoasoani a le Atua. Ua moni ai upu a le perofeta o Ieremia: “Ieova e, ua ou iloa lelei, e lē o i le tagata lona ala. E lē o i le tagata fo'i e savali, ona faatonuina le mea e ui ai o ia.” —Ieremia 10:23.

AISEĀ UA UMI AI LE TAIMI O FAATAGA PEA E IEOVA LE IAI O MAFATIAGA?

15 Aiseā ua umi ai le taimi o faataga pea e Ieova le iai o mafatiaga? Aiseā e na te lē taofia ai le tutupu o mea leaga? E umi se taimi e mana'omia ina ia faamaonia ai e lē taulau le pule a Satani. Ua uma taumafaiga a tagata i a latou faigāmalo eseese ae e lē o taulau lava. E ui lava ua alualu i luma le atamai i faiga faasaienisi ma masini faaonapōnei, ae o loo faatupula'ia pea faiga lē tonu, mativa, soligatulafono ma taua. E lē mafai ona tatou pulea i tatou lava e aunoa ma le fesoasoani a le Atua.

16 Peita'i, e lē o faaleleia e Ieova faafitauli ua māfua ona o Satani, ona o le a pei ai o loo ia lagolagoina le pulega a Satani, ae e lē taitai faia e le Atua lenā mea. E talitonu fo'i tagata e mafai ona latou pulea i latou lava e aunoa ma se faafitauli. Peita'i e pepelo lenā manatu, ma e lē lagolagoina fo'i e Ieova, auā e lē talapepelo lava o ia.—Eperu 6:18.

14. A o faagasolo taimi, o le ā ua faamaonia mai ai?

15, 16. (a) Aiseā ua umi ai le taimi o faataga pea e Ieova le iai o mafatiaga? (e) Aiseā ua lē faaleleia ai e Ieova faafitauli ua māfua ona o Satani?

17 Pe e mafai e Ieova ona faaleleia faafitauli ua māfua ona o le fouvalega a Satani ma tagata? Ioe e mafai, auā e leai se mea e faigatā i le Atua. E silafia e Ieova le taimi e faamuta ai le avanoa o loo tuu atu e faamaonia ai le sesē o tuua'iga uma a Satani. Ona sosoo ai lea ma le suia e Ieova o le lalolagi e avea o se parataiso, e pei lava ona sa mua'i finagalo i ai o ia. O le a toe faatutūina mai ē uma "o loo i tuugamau." (Ioane 5:28, 29) E lē toe mama'i pe feoti tagata. O le a toe faaleleia e Iesu mea uma sa faaleagaina e Satani. O le a faaaogā e Ieova Iesu "ina ia faalēaogāina ai galuega a le Tiapolo." (1 Ioane 3:8) E tatou te lotofaafetai iā Ieova ona o loo onosa'i mai pea iā i tatou, ina ia mafai ai ona tatou iloa lelei o ia ma filifili o ia e avea ma o tatou Pule. **(Faitau le 2 Peteru 3:9, 10.)** E tusa pe e tatou te mafatia, ae e fesoasoani mai o ia iā i tatou ina ia onosa'i.—Ioane 4:23; **faitau le 1 Korinito 10:13.**

18 E lē faamalosia e Ieova i tatou e filifili o ia e avea ma o tatou Pule. Na ia tuuina mai i tagata le meaalofa o le sa'olotoga e filifili ai. Se'i o tatou iloiloina po o le ā le aogā o lenei meaalofa tautele iā i tatou.

E FAAPEFEA ONA E FAAOGĀ LE MEAALOFA O LE SA'OLOTOGA E FILIFILI AI?

19 E matuā eseese lava i tatou ma manu, ona o le meaalofa matagofie a Ieova o le sa'olotoga e filifili

17, 18. O le ā o le a faia e Ieova i faafitauli ua māfua ona o Satani?
19. (a) O le ā le meaalofa matagofie ua tuuina mai e Ieova iā i tatou? (e) Aiseā e tatau ai ona tatou talisapaia lenei meaalofa?

ai. E gaoioi manu e fua i le auala na foafoaina ai i latou. Ae e mafai ona tatou filifili le auala e tatou te manana'ō e ola ai, ma filifili pe e tatou te manana'ō e faamalie le finagalo o Ieova. (Faataoto 30:24) E lē pei fo'i i tatou o masini e faia mea ua uma ona faapolokalameina e fai. Ua iā i tatou le sa'olotoga e filifili ai po o ā uiga e tatou te faaalua, po o ai a tatou uō ma po o le ā le auala e tatou te faaaogā ai o tatou olaga. E finagalo Ieova e tatou te maua le olioli i le olaga.

20 E finagalo Ieova e tatou te alolofa iā te ia. (Mataio 22:37, 38) E pei o ia o se tamā e fiafia e faalogo atu o faapea mai lona alo "Ou te alofa iā te oe," o se faamatalaga e sau mai i lona loto ae e lē o faamalosia o ia e faia faapea. Ua tuu mai e Ieova iā i tatou le sa'olotoga e filifili ai pe auauna iā te ia pe leai. Na filifili Satani, Atamu ma Eva e teena Ieova. Ae e faapefea oe, o le a lē auala o le a e faaaogāina ai lau meaalofa o le sa'olotoga e filifili ai?

21 Ia faaaogā lou sa'olotoga e filifili ai e auauna ai iā Ieova. E faitau miliona i latou ua filifili e faafiafia le finagalo o le Atua, ae tetee iā Satani. (Faataoto 27:11) O le ā le gaoioiga e mafai ona e faia i le taimi lenei, ina ia e iai i le lalolagi fou a le Atua pe a ia aveesea mafatiaga uma? O le a taliina lenā fesili i le mataupu o sosoo mai.

20, 21. O le ā le filifiliga e sili ona lelei e mafai ona e faia i le taimi lenei?

A'OA'OGA
MONI 1

E LĒ FAATUPUINA E IEOVA
MAFATIAGA

“E mamao lava i le Atua moni ona faia o se mea leaga, ma Lē e ona le malosi uma lava ona faia o se mea e lē tonu!”—Iopu 34:10

Aiseā ua matuā tele ai mafatiaga i le lalolagi?

1 Ioane 5:19

O le pule o le lalolagi o Satani le Tiapolo.

Failauga 8:9

Ua māfua ona oo mafatiaga i isi tagata ona o mea e faia e isi.

Failauga 9:11

E oo mafatiaga i tagata i nisi taimi, ona o le sesē o le nofoaga e latou te iai i le taimi sesē.

1 Peteru 5:7

E alofa moni leova i tagata. E lē fialia o ia pe a silasila mai o loo mafatia tagata.

A'OA'OGA
MONI 2

NA LU'IA E SATANI
LE AIĀ A IEOVA E PULE AI

‘Ua silafia e le Atua, o le a pupula o oulua mata, ona pei ai lea o oulua o le Atua, e iloa le lelei ma le leaga.’

—Kenese 3:5

Aiseā na amana'ia ai e leova le lu'i a Satani?

Kenese 3:2-5

Na tuua'ia e Satani le Atua i le avea o ia o se pule leaga. Na mana'o Satani e talitonu tagata, e iai la latou aiā e filifili ai le mea e sa'o ma le mea e sesē.

Iopu 38:7

Na lu'ia e Satani leova i luma o le faitau miliona o agelu.

**A'OA'OGA
MONI 3**
UA LĒ TAULAU LE LU'I A SATANI

“E lē o i le tagata fo'i e savali, ona faatonuina le mea e ui ai o ia.”—Ieremia 10:23

Aiseā ua umi ai le taimi o mafatia tagata?

Isaia 55:9

Ua tele faigāmalo eseese ua faia e tagata, ae e lē o mafai lava ona latou taulau i le pulea o le lalolagi e aunoa ma le fesoasoani a le Atua.

2 Peteru 3:9, 10

O loo onosa'i mai pea leova ina ia mafai ona tatou iloa o ia, ma filifili o ia e avea ma o tatou Pule.

1 Ioane 3:8

O le a faaaogā e leova Iesu ina ia toe faaleleia mea uma sa faaleagaina e Satani.

**A'OA'OGA
MONI 4**
**FAAOGĀ LOU SA'OLOTOGA E
FILIFILI AI E AUAUNA AI IĀ IEOVA**

“Lo'u atalii e, ia atamai oe . . . ona ou mautali ai lea i lē o loo taufaifai mai.”—Faataoto 27:11

Aiseā e lē faamalosiā ai i tatou e leova e auauna iā te ia?

Faataoto 30:24

E gaoioi manu e fua i le auala na fofoaina ai. Peita'i, ua tuuina mai e leova iā i tatou le sa'olotoga e filifili ai. E mafai ona tatou filifili pe e tatou te auauna iā te ia pe leai.

Mataio 22:37, 38

E finagalo leova e tatou te auauna iā te ia ona o lo tatou alofa mo ia.

E FAAPEFEA ONA AVEA OE MA UŌ A LE ATUA?

O AI e te mana'ō e avea ma au uō? E mautinoa e te mana'ō e faauō i se tasi e te fiafia i ai. O se tasi e lelei le lua va feagai ai, e iai ni ona uiga agalelei ma uiga e te fiafia i ai.

² E iai i latou e filifilia e Ieova e avea ma ana uō. O se faata'ita'iga, o se tasi sa avea ma uō a Ieova o Aperamo. (Isaia 41:8; Iakopo 2:23) Na fiafia fo'i Ieova iā Tavita auā na ia fetalai, o ia 'o se tagata ua malie i ai lona loto.' (Galuega 13:22) Sa matuā 'pele' fo'i le perofeta o Tanielu iā Ieova.—Tanielu 9:23.

³ Na faapefea ona avea Aperamo, Tavita ma Tanielu ma uō a Ieova? Na fetalai Ieova iā Aperamo: “Ua e faalogo i lo'u leo.” (Kenese 22:18) E avea Ieova ma uō a i latou e usiusita'i ma le lotomaulalo iā te ia. E mafai fo'i ona avea se nuu atoa ma ana uō. Na fetalai Ieova i le nuu o Isaraelu: “Ia outou faalogo mai i lo'u leo, ona avea ai lea o a'u ma o outou Atua, ma avea fo'i outou ma o'u nuu.” (Jeremia 7:23) O lea, pe a e mana'ō moni lava e avea oe ma uō a Ieova, e mana'omia fo'i ona e usiusita'i iā te ia.

1, 2. O ai nisi sa avea ma uō a Ieova?

3. Na faapefea ona avea Aperamo, Tavita ma Tanielu ma uō a Ieova?

E PUIPUIA E IEOVA ANA UŌ

⁴ Ua ta'ua i le Tusi Paia o loo sa'ili e Ieova auala “ina ia faaali atu [ai] lona malosi iā i latou e atoa-toa o latou loto iā te ia.” (2 Nofoaiga a Tupu 16:9) I le Salamo 32:8, ua folafola atu ai e Ieova i ana uō: “Ou te foa'i atu iā te oe le tofā mamao, ma faatonu oe i le ala e ao ona e savali ai. Ou te fautua atu fo'i ma ou vaai iā te oe.”

⁵ E iai se filii malosi o loo mana'o e taofia i tatou mai i le avea ma uō a le Atua. Peita'i, e finagalo Ieova e puipuia i tatou. (**Faitau le Salamo 55:22.**) I le avea ai ma uō a Ieova, e tatou te auauna iā te ia ma o tatou lotoatoa. E tatou te faamaoni iā te ia e ui lava i tulaga faigatā. E iai fo'i iā i tatou le uiga mautinoa e pei o le faisalamo, o lē na tusi e faata-tau iā Ieova e faapea: “Ou te lē tautevateva fo'i auā o loo iai o ia i lo'u itu taumatau.” (Salamo 16:8; 63:8) E faapefea ona taumafai Satani e taofia i tatou mai i le avea ma uō a le Atua?

UA TUUA'IA E SATANI TAGATA

⁶ Na tatou a'oa'oina i le Mataupu 11, na lu'ia e Satani Ieova ma tuua'ia o ia i le talapepelo ma faiga lē tonu, e ala i le lē tuuina atu o le avanoa iā Atamu ma Eva, e filifili ai e i la'ua lava po o le ā le mea sa'o ma le mea sesē. Ua faailoa mai i le tusi o Iopu, e tuua'ia fo'i e Satani tagata o ē manana'o e avea ma uō a le Atua. Ua faapea mai Satani e

4, 5. E faapefea ona puipuia e Ieova ana uō?

6. O ā tuua'iga a Satani e faatatau i tagata?

māfua ona latou auauna i le Atua, ona o mea o loo Ia foa'i mai mo i latou ae e lē ona o lo latou alofa mo Ia. Ua faapea mai fo'i Satani e mafai ona ia faaliliueseina **so o se tasi** mai i le Atua. Se'i o tatou iloilo po o le ā e tatou te a'oa'oina mai iā Iopu, ma le auala na puipuia ai o ia e Ieova.

⁷ O ai Iopu? O Iopu o se tagata amiolelei sa soifua i le pe ā ma le 3,600 tausaga ua mavae. Na fetalai Ieova e le'i iai lava se tasi e pei o ia i le lalolagi i lenā taimi. Sa faaalua e Iopu le faaaloalo loloto mo le Atua, ma na 'ino'ino o ia i mea leaga. (Iopu 1:8) Ioe, sa silasila mai Ieova iā Iopu o ia o se uō moni.

⁸ Na faapea mai Satani sa auauna Iopu i le Atua ona o māfuaaga manatu faapito. Na fai atu Satani iā Ieova: "Po ua e lē si'osi'omia ea o ia i le pā, ma lona fale, atoa ma ana mea uma? Ua e faamanuia fo'i galuega a ona lima, ma ua faateleina ana manu i le laueleele. Ae peita'i, ia aapa atu lou aao faamolemole, ma tago i mea uma ua iā te ia, pe e lē faifai ai o ia i ou lava luma."—Iopu 1:10, 11.

⁹ Na tuua'ia e Satani Iopu e pau lava le māfuaaga na ia auauna ai iā Ieova, ona o mea o loo ia maua mai i le Atua. Na faapea mai fo'i Satani e mafai ona ia faaliliueseina Iopu mai i le auauna iā Ieova. E le'i fiafia Ieova i manatu o Satani. Peita'i,

7, 8. (a) O ā faalogona o Ieova e faatatau iā Iopu? (e) O le ā le faamatalaga a Satani e faatatau iā Iopu?

9. O le ā le avanoa na tuu atu e Ieova iā Satani?

sa ia tuu atu pea iā Satani le avanoa e tofotofoina ai Iopu, pe e moni na avea o ia ma uō a Ieova ona o lona alofa.

UA OSOFA'IA IOPU E SATANI

10 Muamua, na aveesea pe faatama'ia e Satani lafumanu uma a Iopu. Ona sosoo ai lea ma lona fasiotia toetoe o auauna uma a Iopu. Ioe, ua aveese uma mea mai iā Iopu. O le osofa'iga mulimuli a Satani, na ia fasiotia ai le fanau e to'asefulu a Iopu e ala i se matagi. E ui i lea, na faamaoni pea Iopu iā Ieova. "E le'i agasala Iopu i nei mea uma pe ta'ulegaina fo'i le Atua i se mea."—Iopu 1:12-19, 22.

11 E le'i fiu Satani i ana taumafaiga. Na ia lu'ia le Atua e ala i le faapea atu: "Tago atu i ona ivi ma lona tino, pe e lē faifai ai o ia i ou lava luma." O lea, na taia ai Iopu e Satani i se faama'i e sili ona mata'utia. (Iopu 2:5, 7) Ae sa faamaoni pea Iopu iā Ieova. Na faapea atu o ia: "Se'ia oo lava i lo'u oti, ou te lē aveesea [lafoa'ia] lo'u faamaoni!"—Iopu 27:5.

12 E le'i iloa e Iopu se mea e faatatau i tuua'iga a Satani, po o le māfuaaga fo'i na feagai ai o ia ma mafatiaga ogaoga. Na manatu o ia o Ieova ua

10. Na faapefea ona osofa'ia Iopu e Satani, ma o le ā le auala na ia tali atu ai?

11. (a) O le ā se isi mea na faia e Satani iā Iopu? (e) O le ā le auala na tali atu ai Iopu?

12. Na faapefea ona faamaonia e Iopu e pepelo Satani?

māfua ai ona mafatiaga. (Iopu 6:4; 16:11-14) Ae ui i nei mea, sa tumau pea ona faamaoni Iopu iā Ieova. O lea la ua manino mai le māfuaaga na avea ai o ia ma uō a le Atua. Sa avea o ia ma uō a le Atua talu ai sa alofa o ia i le Atua, ma e le'i manatu faapito o ia. E pepelo uma tuua'iga a Satani.

13 E ui lava e le'i iloa e Iopu le mea na tupu i le lagi, ae sa ia faamaoni pea i le Atua ma faamaonia ai e leaga Satani. Na tauia Iopu e Ieova ona o lona faamaoni i le la faauōga.—Iopu 42:12-17.


O AUALA O LOO TUUA'IA AI OE E SATANI

14 E mafai ona e a'oa'oina ni lesona tāua mai i le mea na tupu iā Iopu. I aso nei, o loo tuua'ia i tatou e Satani e faapea e māfua ona tatou auauna iā Ieova, ona o mea o loo tatou maua mai iā te Ia. O loo ta'ua i le Iopu 2:4 le faamatalaga a Satani e faapea: “O mea uma fo'i ua iai i le **tagata** e avatu e ia e sui ai lona ola.” O lea, e lē na o Iopu na tuua'ia e Satani i le manatu faapito. O loo ia tuua'ia fo'i tane ma fafine **uma**. I le faitau selau tausaga muli-muli ane talu ona maliu Iopu, o loo taufaifai pea Satani iā Ieova ma tuua'ia ana auauna. O se faaa'oa'oga, o loo ta'ua i le Faataoto 27:11: “Lo'u atalii e, ia atamai oe ma faafiafia ai lo'u loto, ona ou mau-tali ai lea i lē o loo taufaifai [pe taufaaleaga] mai.”

15 E mafai ona e filifili e usita'i iā Ieova ma avea

13. O le ā le i'uga na oo i ai ona o le faamaoni o Iopu?

14, 15. O le ā le tuua'iga a Satani i tane ma fafine uma?



Na tauia e leova lopus ona o
lona faamaoni i le la faauōga

ma ana uō faamaoni, e faamaonia atu ai e pepelo Satani. O le avea ma uō a le Atua, o le filifiliga sili lea ona lelei ma tāua e mafai ona e faia, e ui lava atonu e mana'omia ona e faia ai ni suiga tetele i lou olaga. E faapea mai Satani e lē mafai ona e faamaoni i le Atua pe a e feagai ma faafitauli. E taumafai o ia e faasesē i tatou ina ia lē faamaoni ai i le Atua. E faapefea ona ia faia lenei mea?

16 E faaaogā e Satani auala eseese, e taumafai ai e taofia i tatou mai i le avea ma uō a le Atua. O osofa'iga a Satani "e pei o se leona o loo tagi leotele, e sa'ili se tasi e na te 'aina." (1 Peteru 5:8) Aua ne'i faate'ia oe pe a taumafai au uō, tagata o lou aiga, po o isi e taofia oe mai i le su'esu'eina o le Tusi Paia ma le faia o le mea sa'o. Atonu e oo iā te oe lagona e pei ua osofa'ia oe.* (Ioane 15:19, 20) Ua liua fo'i e Satani o ia lava "e avea ma agelu o le malamalama." Atonu la o loo taumafai o ia e faasesē i tatou ina ia lē usiusita'i ai iā Ieova. (2 Korinito 11:14) O le isi auala e faaaogā e Satani, o le faasesēina lea o i tatou ina ia manatu, e lē mafai ona tatou

* E lē o le uiga o lenei mea e faapea, o loo faatonutonuina e Satani tagata o loo taumafai e taofia oe mai i le su'esu'eina o le Tusi Paia. Peita'i, o Satani o "le atua o lenei faiga o mea a le lalolagi," ma "o le lalolagi atoa o loo nofo to'ilalo i [lana] pule." O lea, e lē faate'ia ai la i tatou pe a taumafai nisi e taofia i tatou mai i le auuna atu iā Ieova.—2 Korinito 4:4; 1 Ioane 5:19.

16. (a) O ā auala e faaaogā e Satani e taumafai ai e taofia tagata mai i le auuna iā Ieova? (e) O le ā se isi auala e ono taofia ai oe e le Tiapolo mai i le auuna iā Ieova?

ausia agavaa ina ia avea ai ma auaua a le Atua.
—Faataoto 24:10.

USIUSITA'I I TULAFONO A IEOVA

17 Pe a tatou usiusita'i iā Ieova, e tatou te faamaonia atu ai o Satani o lē e pepelo. O le ā o le a fesoasoani iā i tatou ina ia usiusita'i ai? Ua ta'ua i le Tusi Paia: “Ia e alofa atu fo'i iā Ieova lou Atua ma lou lotoatoa, ma lou ola atoa, ma lou malosi atoa.” (Teuteronome 6:5) E tatou te usiusita'i iā Ieova ona e tatou te alolofa iā te ia. A o tuputupu a'e lo tatou alofa mo Ieova, o le a tatou manana'o fo'i e faia mea uma e finagalo i ai o ia. Na tusi le aposetolo o Ioane: “O le alofa lenei i le Atua, ia

17. Aiseā e tatou te usiusita'i ai iā Ieova?

'INO'INO I MEA E INOSIA E IEOVA

- | | |
|---|---|
| <ul style="list-style-type: none"> ■ Fasioti tagata
Esoto 20:13; 21:22, 23 | <ul style="list-style-type: none"> ■ Ifo i tupua
1 Korinito 10:14 |
| <ul style="list-style-type: none"> ■ Amioga lē mamā taufeousa'iga
Levitiko 20:10, 13, 15, 16;
Roma 1:24, 26, 27, 32;
1 Korinito 6:9, 10 | <ul style="list-style-type: none"> ■ Onā
1 Korinito 5:11 ■ Gaoi
Levitiko 6:2, 4;
Efeso 4:28 |
| <ul style="list-style-type: none"> ■ Faiga faatemoni
Teuteronome 18:9-13;
1 Korinito 10:21, 22;
Kalatia 5:20, 21 | <ul style="list-style-type: none"> ■ Pepelo
Faataoto 6:16, 19;
Kolose 3:9;
Faaaliga 22:15 |

tatou tausī i ana poloa'iga; ma e lē mamafa ana poloa'iga.”—1 Ioane 5:3.

18 Ae o ā nisi o mea ua faailoa mai e Ieova iā i tatou e leaga? O loo iai ni faaa'oa'oga i le pusa “‘Ino'ino i Mea e Inosia e Ieova.” Atonu i le taimi muamua e te manatu e lē leaga le tele o nisi o nei mea. Ae pe a e faitau i le Tusi Paia ma manatunatu loloto i ai, o le a e malamalama ai i le atamai o le usita'ia o tulafono a Ieova. Atonu o le a uuna'ia ai fo'i oe e faia ni suiga i lou olaga. E iai taimi atonu e faigatā ai ona e faia na suiga. Peita'i, pe a e faia faapea, o le a e maua le filemu ma le fiafia i le

18, 19. (a) O ā nisi o mea ua faailoa mai e Ieova e leaga? (e) E faapefea ona tatou iloa e lē o talosaga mai Ieova e tatou te faia se mea e lē mafai ona tatou faia?

- **Matape'ape'a**
1 Korinito 5:11
- **Sauā**
Salamo 11:5; Faataoto 22:24, 25; Malaki 2:16; Kalatia 5:20, 21
- **Palauvale ma le faitala**
Levitiko 19:16; Efeso 5:4; Kolose 3:8
- **Faaogā sesē o le toto**
Kenese 9:4; Galuega 15:20, 28, 29
- **E te lē mana'o e tausī lou lava aiga**
1 Timoteo 5:8
- **Aafia i faigātaua po o faiga faapolotiki**
Isaia 2:4; Ioane 6:15; 17:16
- **Ulaula ma le faaogā o fualaau faasāina**
Mareko 15:23; 2 Korinito 7:1

avea ai o se uō faamaoni a le Atua. (Isaia 48:17, 18) E faapefea ona tatou mautinoa e mafai ona tatou faia nei suiga?

19 E lē taitai talosaga mai Ieova e tatou te faia se mea e lē mafai ona tatou faia. (Teuteronome 30: 11-14) I le avea ai o ia o se Uō moni, e sili atu lona silafia o i tatou nai lo o i tatou lava. E na te silafia itu e tatou te lelei ai faapea o tatou vaivaiga. (Salamo 103:14) Ua faalaeiauina i tatou e le aposetolo o Paulo e faapea: “E faamaoni le Atua, ma e na te lē tuua outou i se faaosoosoga e sili atu nai lo o le mea tou te lavātia, ae pe a oo mai le faaosoosoga, e saunia e ia se auala e sao ai outou, ina ia outou tumau ai.” (1 Korinito 10:13) E tatou te mautinoa e foa’i mai lava e Ieova le malosi e tatou te faia ai le mea sa’o. O le a ia foa’i atu iā te oe “le mana lea e sili atu i le malosi o tagata,” ina ia mafai ai ona e onosaia tulaga faigatā. (2 Korinito 4:7) Ina ua uma ona fesoasoani Ieova iā Paulo i tulaga faigatā, na mafai e Paulo ona faapea atu: “O mea uma lava, ua ou maua le malosi mai iā te ia o lē na foa’i maia iā te a’u le mana.”—Filipi 4:13.

FIAFIA I MEA E FIAFIA I AI IEOVA

20 Pe a fia avea i tatou ma uō a Ieova, e lē tatau ona tatou faia mea e lē fiafia i ai lona finagalo. Peita’i, e iai se isi mea e sili atu e tatau ona tatou faia. (Roma 12:9) E fiafia uō a Ieova i mea e fiafia i

20. O ā uiga e tatau ona e faata’ita’i i ai, ma aiseā?

ai Ieova. Ua faamatalaina na mea i le **Salamo 15: 1-5. (Faitau.)** E faata'ita'i uō a Ieova i ona uiga, ma faaalua "le alofa, o le olioli, o le filemu, o le faapalepale, o le agalelei, o le mataalofa, o le faatuatua, o le agamalu, ma le amio pulea."—Kalatia 5:22, 23.

21 O le ā e fesoasoani iā te oe ina ia iloa ai auala e faaalua ai na uiga matagofie? E mana'omia ona e a'oa'oina po o ā mea e fiafia i ai Ieova, e ala i le faitau ma su'esu'e e lē aunoa i le Tusi Paia. (Isaia 30:20, 21) Pe a e faia faapea, o le a tuputupu a'e lou alofa mo Ieova. A o tuputupu a'e lou alofa mo ia, o le a e mana'o e ususita'i iā te ia.

22 O suiga e te ono faia i lou olaga, e mafai ona faatusa atu i le aveese o ni ofu tuai ae ofu ni ofu fou. Ua ta'ua i le Tusi Paia, e mana'omia ona e "toese le tagata tuai" ae ofu i le "tagata fou." (Kolose 3:9, 10) Atonu e lē faigofie ona faia leni mea. Peita'i, pe a tatou faia nei suiga ma ususita'i iā Ieova, ua ia folafola mai o le a ia tauia i tatou i 'se tau tele.' (Salamo 19:11) Tau ina ia e filifili e ususita'i iā Ieova ma faamaonia ai o Satani o lē e pepelo. Ia auauna iā Ieova ona o le alofa lē manatu faapito, ae e lē ina ia maua ai se tau i le lumana'i. O le faia faapea, o le a avea ai oe ma uō moni a le Atua.

21. O le ā e fesoasoani iā te oe ina ia iloa ai auala e faaalua ai uiga e fiafia i ai le Atua?

22. O le ā le i'uga o lou ususita'i iā Ieova?

A'OA'OGA
MONI 1

E USIUSITA'I UŌ A IEOVA IĀ TE IA

“Ia outou faalogo mai i lo’u leo, ona avea ai lea o a’u ma o outou Atua, ma avea fo’i outou ma o’u nuu.”

—Ieremia 7:23

Pe e mafai ona avea ma uō a le Atua?

Kenese 22:18; Iakopo 2:23

Na avea Aperaamo ma uō a leova, ona sa faalogo ma faatuatua iā te ia.

2 Nofoaiga a Tupu 16:9

O le a fesoasoani mai leova iā i latou e usiusita’i.

Salamo 25:14; 32:8

E foa’i mai e leova i ana uō le tofā mamao.

Salamo 55:22

O le a puipuia e leova ana uō.

A'OA'OGA
MONI 2

NA AVEA IOPU MA UŌ A LE ATUA
MA SA TUMAU O IA I LE FAAMAONI

“E le’i agasala Iopu i nei mea uma pe ta’ulegaina fo’i le Atua i se mea.”—Iopu 1:22

Na faapefea ona osofa’ia e Satani Iopu, ma o le ā le auala na tali atu ai Iopu?

Iopu 1:10, 11

Na tuua’ia e Satani Iopu e faapea, e manatu faapito o ia ma e lē alofa i le Atua.

Iopu 1:12-19; 2:7

Na tuu e leova le avanoa iā Satani e na te aveesea ai mea uma sa iā Iopu, ma na taia fo’i e Satani Iopu i se faama’i e sili ona mata’utia.

Iopu 27:5

E le’i iloa e Iopu le māfuaaga na oo ai mafatiaga ogaoga iā te ia, ae na tumau pea o ia i le faamaoni.

**A'OA'OGA
MONI 3**
**O LOO TAUMAFAI SATANI E LILIU
ESE OE MAI IĀ IEOVA**

‘O mea uma ua iai i le tagata e avatu e ia e sui ai lona ola.’—Iopu 2:4

E faapefea ona taumafai Satani e faaleagaina la tatou faauōga ma leova?

2 Korinito 11:14

E taumafai Satani e faasesē i tatou ina ia lē ususita’i ai i le Atua.

Faataoto 24:10

E taumafai Satani e faasesē i tatou i le manatu e faapea, e lē mafai ona tatou ausia agavaa ina ia avea ai ma auauna a le Atua.

1 Peteru 5:8

E osofa’ia i tatou e Satani.

Faataoto 27:11

la filifili e ususita’i iā leova ma avea ma ana uō faamaoni. O le a faamaonia ai o Satani o lē e pepelo.

**A'OA'OGA
MONI 4**
**E TATOU TE USIUSITA’I IĀ IEOVA
ONA E TATOU TE ALOLOFA IĀ TE IA**

“O le alofa leni i le Atua, ia tatou tausi i ana poloa’iga.”
—1 Ioane 5:3

E faapefea ona avea oe ma uō a leova?

Teuteronome 6:5

la faaalua le alofa i le Atua.
E fesoasoani lea iā te oe ina ia e ususita’i ai.

Isaia 48:17, 18

la faalogo iā leova ma e maua ai pea aogā.

Teuteronome 30:11-14

la talitonuina leova e lē taitai ona ia talosaga mai e te faia se mea e lē mafai ona e faia.

Filipi 4:13

la faia pea le mea sa’o, ma o le a foa’i mai e leova iā te oe le malosi e te mana’omia.

IA FAATĀUA LE MEALLOFA O LE OLA

O IEOVA “o le Atua soifua.” (Jeremia 10:10) O ia o Lē na foafoaina i tatou, ma foa’i mai le ola o loo tatou ola ai. Ua ta’ua i le Tusi Paia: “Na e foafoaina mea uma lava, ma o lou finagalo fo’i ua iai nei mea ma na foafoaina ai.” (Faaaliga 4:11) O le mea moni, e finagalo Ieova e tatou te maua le ola, auā o se mea-alofa tautele lea mai iā te ia.—**Faitau le Salamo 36:9.**

² E aumaia e Ieova mea e tatou te mana’omia mo lo tatou ola, e pei o mea’ai ma vaitaumafa. (Galuega 17:28) E sili atu i lenā, e finagalo o ia ina ia tatou maua le fiafia i le olaga. (Galuega 14:15-17) Ina ia taulau manuia i le olaga, e mana’omia ona tatou usita’ia tulafono a le Atua.—Isaia 48:17, 18.

LE SILAFAGA A LE ATUA I LE OLA

³ Ua a’oa’oina i le Tusi Paia e tautele o tatou ola ma ola o isi iā Ieova. O se faaa’oa’oga, ina ua matuā ita Kaino i lona uso la’itiiti o Apelu, na lapata’ia o ia e Ieova e mana’omia ona pulea lona ita. Peita’i e le’i faalogo Kaino. Na atili ona ita o ia ma ‘faaoolima ai iā Apelu lona uso, ma oti ai o ia.’ (Kenese 4:3-8) Na faasalaina e Ieova Kaino ona o lona fasiotia o Apelu. (Kenese 4:9-11) O lea, o le ita ma le ‘ino’ino o ni uiga mata’utia, auā e mafai ona i’u atu ai i le sauā. O se ta-

-
1. O ai na foa’iina mai le ola o loo tatou ola ai?
 2. E faapefea ona taulau manuia o tatou olaga?
 3. O le ā na faia e Ieova ina ua fasiotia Apelu e Kaino?

gata faapena e lē mafai ona ia maua le ola e faavavau. (**Faitau le 1 Ioane 3:15.**) Ina ia faafiafia le finagalo o Ieova, e tatau ona a'oa'oina i tatou ina ia alolofa i tagata uma.—1 Ioane 3:11, 12.

4 I le faitau afe tausaga mulimuli ane ai, ina ua tuuina atu e Ieova iā Mose Tulafono e Sefulu, na ia faailoa atu ai e tautele i lana silafaga le ola. Na ta'ua i se tasi o tulafono: “Aua e te fasioti tagata.” (Teuteronome 5:17) Pe afai e fasioti ma le loto i ai e se tasi se isi tagata, o le a fasiotia o ia.

5 O le ā le silafaga a le Atua i le faapa'ū tama? E tautele iā Ieova le ola o se pepe e le'i fanau mai. I le Tulafono na tuuina atu e Ieova i le fanauga a Isaraelu, na ia faailoa atu ai pe afai e lavea se tinā ma'itaga i se tasi ma oti ai lana pepe, o le a fasiotia lenā tagata. (**Faitau le Esoto 21:22, 23; Salamo 127:3.**) E tatou te a'oa'oina mai ai iinei, e leaga le faapa'ū tama.—Taga'i i le Faaopoopoga 28.

6 E faapefea ona tatou faamaonia atu iā Ieova e tautele iā i tatou o tatou ola faapea ola o isi? E ala lea i le lē faia o se gaoioiga e lamatia ai o tatou ola faapea ola o isi. O lea, e tatou te lē faaaogā ai tapaa po o fualaa faasāina, ona e aafia ai lo tatou soifua mālōlōina ma e tatou te ono maliliu ai.

7 Na foa'i mai e le Atua o tatou ola ma o tatou tino, ma e tatau la ona tatou faaaogā i le auala e finagalo i

4. O le ā e tatou te a'oa'oina e faatatau i le meaalofa o le ola, mai i se tasi o tulafono na tuuina atu e le Atua i le fanauga a Isaraelu?

5. O le ā le silafaga a le Atua i le faapa'ū tama?

6, 7. E faapefea ona tatou faamaonia atu iā Ieova e tautele iā i tatou le ola?

E TAUTELE LE OLA



- E tatou te lē faia le faapa'ū tama

- E tatou te lē ulaula tapaa pe faaaogā fualaau faasāina



- E tatou te lē feita i isi tagata



ai o ia. O lea, e mana'omia ona tausī lelei o tatou tino. Pe a tatou lē faia faapea, o le a lē mamā i tatou i le silafaga a le Atua. (Roma 6:19; 12:1; 2 Korinito 7:1) E lē mafai ona tatou tapua'i iā Ieova o lē na foa'ia mai le ola, pe a tatou lē vaai i le ola o se mea tautele. Atonu e faigatā ona tatou tuua ni masaniga leaga. Peita'i, o le a fesoasoani mai Ieova pe afai e tatou te faia ni taumafaiga, ona e tatou te vaai i le ola o se mea tautele.

8 Ua tatou a'oa'oina o le ola o se meaalofa tautele. E talitonu Ieova o le a tatou faia taumafaiga uma e 'alofia ai mea e lamatia ai o tatou ola, po o ola o isi. O se faata'ita'iga, o le auala e ave ai a tatou taavale, uila afi po o se isi lava auala o femalagaa'iga. E tatou te 'alofia taaloga sauā ma lamatia ai le ola. (Salamo 11:5) E tatou te taumafai fo'i e faamautinoa ua saogalemu o tatou fale. Na faatonuina e Ieova le fanauga a Isaraelu: "Afai e te fausia se fale fou, ia e fausia fo'i ma se puipui e si'o ai le tualuga, ne'i e nofosala i le faamasaatoto pe afai e pa'ū ai se tasi mai i lou fale." —Teuteronomie 22:8.

9 E tāua fo'i i le silafaga a Ieova le auala e tatou te tausī ai manu. E na te faatagaina i tatou e tapē manu mo meataumafa ma lavalava, ma pe afai fo'i e lamatia ai o tatou ola. (Kenese 3:21; 9:3; Esoto 21:28) Peita'i, e lē tataua ona tatou faasauā i meaola, pe tapē fo'i e aunoa ma se māfuaaga tataua pe e mo taaloga. —Faataoto 12:10.

8. O ā mea e tatou te faia e faamautinoa ai e lē o iai i se tulaga lamatia o tatou ola po o ola o isi?

9. O le ā le auala e tataua ona tatou tausī ai manu?

FAATĀUA LE TULAGA PAIA O LE OLA

10 E paia le toto iā Ieova, talu ai e faaāta mai e le toto le ola. Ina ua uma ona fasiotia e Kaino Apelu, na fetalai atu Ieova iā Kaino: “O loo alaga mai iā te a’u le toto o lou uso mai i le eleele.” (Kenese 4:10) Na faaāta mai e le toto o Apelu lona ola, ma na faasalaina e Ieova Kaino i lona fasiotia o Apelu. Ina ua mǎe’a fo’i le Lolo i aso o Noa, na toe faailoa mai e Ieova o le toto o le ola. Na faataga e Ieova Noa ma lona aiga e aai i aano o manu, e ala i le fetalai atu: “Ia fai ma a outou mea’ai ia manu uma e feoa’i. Ou te avatua fo’i iā te outou o laau ‘aina uma.” Peita’i, e tasi le mea sa faatonuina i latou e Ieova e aua le aai ai: “A o le aano o le manu ma lona toto; o lona ola lea, aua tou te aai ai.”—Kenese 1:29; 9:3, 4.

11 Pe tusa ma le 800 tausaga mulimuli ane talu ona avatu e Ieova le faatonuga iā Noa e aua le ‘aina le toto, ona toe fetalai atu fo’i lea i ona tagata: “O so o se tasi o le fanauga a Isaraelu, po o se tagata ese o aumau iā te outou e alu e tulimanu ma maua se manu o le vao, po o se manulele e ‘aina, e ao ona ia faaalua lona toto ma tanu i le eleele.” Ona ia fetalai atu lea: “Aua tou te aai i le toto.” (Levitiko 17:13, 14) Na finagalo Ieova ina ia manatu pea ona tagata i le toto o se mea e paia. E mafai ona latou ‘aina le aano o le manu, ae e lē o lona toto. Pe a tapē se manu e faaaogā mo mea’ai, e tataua ona latou faaalua le toto o le manu i le eleele.

10. E faapefea ona tatou iloa e faaāta mai e le toto le ola?

11. O le ā le faatonuga a le Atua na ia avatu i le nuu o Isaraelu e faatatau i le toto?

12 I ni nai tausaga mulimuli ane talu ona maliu Iesu, na faapotopoto faatasi ai le ‘auapose-tolo ma toe-aina i le faapotopotoga Kerisiano i Ierusalemā, ina ia faia se filifiliga po o ā vaega o le Tulafono na avatu i le nuu o Isaraelu, e mafai ona tausia pea e Kerisiano. (Faitau le Galuega 15:28, 29; 21:25.) Na fesoasoani Ieova iā i latou ina ia malamalama, e tautele pea le toto iā te ia, ma e tatau ona latou vaai pea i le toto o se mea paia. E le’i mafai e ulua’i Kerisiano, ona ‘aina le aano o se manu e le’i mamā lelei ona faaalu ese lona toto, pe ‘aina pe inuina le toto. Pe a latou ‘aina pe inuina le toto, ua tutusa lava le leaga ma le tapua’i i tupua ma le faia o feusua’iga lē mamā. O lea, talu mai lenā taimi e le’i manana’o lava Kerisiano moni e ‘aina pe inuina le toto. Ae faapefea aso nei? O loo finagalo pea Ieova e tatou te vaai i le toto o se mea paia.

13 Po o lona uiga la e tatau fo’i i Kerisiano ona teena tuigātoto? Ioe, auā ua faatonuina i tatou e Ieova e aua le ‘aina pe inuina le toto. Pe afai e faatonu oe e se foma’i e aua le inuina se ‘ava malosī, po o le a e tuuina lenā ‘ava malosī i lou tino? E mautinoa lava e leai. I se tulaga tutusa, o le faatonuga ina ia aua ne’i ‘aina pe inuina le toto, o lona uiga e lē tatau ona tatou taliaina ni tuigātoto.—Taga’i i le Faaopopoga 29.

14 Ae faapefea pe a fai atu se foma’i o le a e oti pe

12. O le ā le vaai a Kerisiano i le toto?

13. Aiseā e lē taliaina ai e Kerisiano tuigātoto?

14, 15. (a) O le ā le manatu o Kerisiano i le ola? (e) Po o le a latou lē ususita’i i le tulafono a le Atua, ina ia taumafai ai e faaumiumi o latou ola? Faamatala.

afai e te lē taliaina se tuigātoto? E tatau i tagata ta'i-to'atasi ona filifili pe usita'ia le tulafono a le Atua i le toto. E matuā faatāua e Kerisiano le meaalofa a le Atua o le ola. E tatou te sa'ilia ni togafitiga faafoma'i e lē faaaogāina ai le toto, ina ia faaumiumi ai pea o tatou ola. Peita'i, e tatou te lē taliaina ni tuigātoto.

15 E tatou te taumafai e maua pea le soifua mālō-lōina. Peita'i, ona e tautele i le Atua le ola, e tatou te lē taliaina ai tuigātoto. E sili atu ona tāua le ususita'i iā Ieova, nai lo o le lē ususita'i iā te ia ina ia taumafai ai e faaumiumi o tatou ola. Na fetalai Iesu: "O sē e fia faasaoina lona ola, e ma'imau ia, a o sē e faama'imau lona ola ona o a'u, e maua e ia." (Mataio 16:25) E tatou te manana'o e ususita'i iā Ieova, talu ai e tatou te alolofa iā te ia. E na te silafia le mea e sili ona lelei mo i tatou, ma e tatou te vaai i le ola o se mea e tautele ma paia e pei ona silasila i ai Ieova. —Eperu 11:6.

16 E maumaua'i auauna faamaoni a le Atua e usita'ia lana tulafono i le toto. E latou te lē 'aina pe inuina le toto, ma e latou te lē taliaina fo'i tuigātoto.* Peita'i, e latou te taliaina isi togafitiga faafoma'i e lē faaaogāina ai le toto ina ia faaumiumi ai pea lo latou ola. E latou te talitonu e silafia e le Puna o le ola ma le toto le mea e sili ona lelei mo i latou. Pe e te talitonu e na te silafia le mea e sili ona lelei mo oe?

* Mo faamatalaga e faatatau i tuigātoto, taga'i i itulau e 77-79 o le tusi *'Ia Faatumau iā te Outou i le Alofa o le Atua,* lomina e Moli-mau a Ieova.

LE AUALA E TASI NA FAATAGA E IEOVA E FAAAOGĀ AI LE TOTO

17 I le Tulafono na tuuina atu e le Atua iā Mose, na ia faailoa atu ai i le nuu o Isaraelu: “O le ola o le mea-ola ua iai i lona toto, ma ua ou tuuina le toto i luga o le fata faitaulaga mo outou e fai ai le togisala [pe talosaga ai mo le faamagaloga] mo o outou ola, auā o le toto e fai ai le togisala.” (Levitiko 17:11) Pe a agasala se tagata Isaraelu, sa mafai ona ia talosaga atu mo le faamagaloga a Ieova e ala i le tuuina atu o se manu i le ositaulaga e faia ai le taulaga, ma e liligi fo’i e le ositaulaga se vaega o le toto o le manu i luga o le fata faitaulaga i le malumalu. E na o le pau lea o le auala na faatagaina i latou e Ieova e faaaogā ai le toto.

18 Ina ua afio mai Iesu i le lalolagi, na ia foa’i lona ola po o lona toto ina ia faamagalolo ai a tatou agasala. O lea, na lē toe mana’omia ai ona toe faaaogā manu e fai ai taulaga. (Mataio 20:28; Eperu 10:1) E tāua tele le ola o Iesu, ma e faavae i lana taulaga, na mafai ai ona tuuina atu e Ieova i tagata uma le avanoa e ola ai e faavavau.—Ioane 3:16; Eperu 9:11, 12; 1 Peteru 1: 18, 19.

19 E tatou te lotofaafetai iā Ieova ona o lana mea-alofo matagofie o le ola. E tatou te manana’o fo’i e

17. O le ā le auala e tasi na faataga e Ieova e faaaogā ai le toto i Isaraelu?

18. O le ā le avanoa ua mafai ona tatou maua ona o le taulaga a Iesu?

19. O le ā e tatau ona tatou faia ina ia ‘mamā ai mai i le toto o tagata uma’?



E faapefea ona e faailoa atu e tāua iā te oe le ola ma le toto?

taʻu atu i tagata e mafai ona latou ola e faavavau, pe afai e latou te faatuatua iā Iesu. E tatou te alolofa i tagata, ma e faia a tatou taumafaiga uma e aʻoaʻoina i latou i le auala e maua ai le ola e faavavau. (Esekielu 3:17-21) O le faia faapea, o le a mafai ai foʻi ona tatou fai atu le faamatalaga a le aposetolo o Paulo: “Ua mamā aʻu mai i le toto o tagata uma, auā ou te leʻi taofia le taʻuina atu iā te outou o le finagalo uma o le Atua.” (Galuega 20:26, 27) Ioe, e iloa lo tatou matuā faatāuaina o le ola ma le toto, pe afai e tatou te taʻu atu i isi e faatatau iā Ieova ma le tautele o le ola i lana silafaga.

A'OA'OGA
MONI 1IA FAATĀUA LE MEAALOFA
O LE OLA

“O loo iā te oe le puna o le ola.”—Salamo 36:9

E faapefea ona tatou faaalua atu e tatou te faatāua le ola?

Galuega 17:28; Faaaliga 4:11

O le ola o se meaalofa mai iā leova, ma e tataua ona tatou faatāuaina.

Esoto 21:22, 23;

Teuteronomie 5:17

E sesē le fasioti tagata ma le faapa'ū tama.

1 Ioane 3:11, 12, 15

E leaga le 'ino'ino i le isi tagata.

2 Korinito 7:1

'Alofia masaniga lē mamā, e pei o le ulaula ma le faaaogāina o fualaau faasāina.

Salamo 11:5

'Alofia faafiafiaga ma taaloga sauā.

A'OA'OGA
MONI 2

OLA MA LE TOTO

“Auā o le ola o ituaiga uma o meaola, o lona toto lea, ua iai le ola i le toto.”—Levitiko 17:14

O le ā le silafaga a le Atua i le ola ma le toto?

Kenese 4:10;

Teuteronomie 12:23

E faaāta mai e le toto le ola.

Kenese 9:3, 4

E mafai ona tatou aai i le aano o se manu, ae e lē o lona toto.

Galuega 15:28, 29; 21:25

O le poloa'iga a le Atua ina ia taumamao mai i le toto, e aofia ai le faaaogā o le toto mo togafitiga faafoma'i.

Eperu 11:6

O la tatou faiā ma leova, o le mea sili lea ona tāua i o tatou olaga.

O AUALA NA FAAAOGĀ AI LE
TOTO NA FAATAGA E IEOVA

'E faamamāina i tatou mai i agasala uma i le toto o Iesu.'
—1 Ioane 1:7

O le ā le avanoa ua mafai ona tatou maua ona o le taulaga a Iesu?

Levitiko 17:11

I aso anamua, pe a agasala se tagata Isaraelu, sa mafai ona ia talosaga atu mo le faamagaloga a Ieova e ala i le tuuina atu o se manu i le ositaulaga e faia ai le taulaga, ma e liligi fo'i e le ositaulaga se vaega o le toto o le manu i luga o le fata faitaulaga.

Mataio 20:28;**Eperu 9:11-14**

Ina ua afio mai Iesu i le lalolagi, na ia foa'i lona ola po o lona toto ina ia faamagalo ai a tatou agasala. O lea, na lē toe mana'omia ai ona toe faaaogā manu e fai ai taulaga.

Ioane 3:16

E tāua tele le ola o Iesu, ma e faavae i lana taulaga, ua mafai ai ona tuuina atu e Ieova i tagata uma le avanoa e ola ai e faavavau.

E MAFAI ONA FIAFIA LOU AIGA

NA FAIA e Ieova le Atua le ulua'i faaipoipoga. Ua faamatalaina i le Tusi Paia, na ia foafoaina le ulua'i fafine ma "aumaia o ia i le tamāloa." O le fiafia tele o Atamu, na ia faapea atu ai: "O le ivi lava leni o o'u ivi ma le aano o o'u aano." (Kenese 2: 22, 23) Ua faaalua mai ai, e finagalo Ieova e maua e tagata faaipoipo le fiafia.

² Ae o le tulaga e faanoanoa ai, o le to'atele o tagata e lē o fiafia o latou aiga. Peita'i, e tele ta'iala ma mataupu silisili o loo i le Tusi Paia e fesoasoani i sui uma o le aiga ina ia taulau manuia ai o latou aiga, ma maua le fiafia i le faifaimea faatasi.—Luka 11:28.

O MEA E FAATALITALIA E LE ATUA MAI I TANE

³ O loo ta'ua i le Tusi Paia, e tatau i se tane lelei ona alofa ma faaloalo i lana avā. Faamolemole **faitau le Efeso 5:25-29**. E feutaga'i i taimi uma se tane ma lana avā i se auala alofa. E na te puipuia, tausia, ma lē faia se mea e afāina ai lana avā.

⁴ Ae o le ā e tatau ona faia e se tane pe a faia e lana avā ni mea sesē? Ua faatonuina tane e faapea:

1, 2. O le ā e finagalo Ieova ina ia maua e aiga?

3, 4. (a) O le ā le auala e tatau ona feagai ai le tane ma lana avā? (e) Aiseā e tāua ai i se tane ma se avā ona faamagalalo e le tasi le isi?

“Ia lolofa atu **pea** i a outou avā, ma aua le soona feita iā i latou.” (Kolose 3:19) Tane, ia manatua e tou te sesē fo’i. Pe a e mana’o la e faamagalalo oe e le Atua, e tatau fo’i ona e faamagalalo atu i lau avā. (Mataio 6:12, 14, 15) Pe a lotomalilie uma le tane ma le avā e faamagalalo e le tasi le isi, o le a fesoasosani iā i la’ua e maua ai se faaipoipoga fiafia.

⁵ E faatalitalia e Ieova tane ina ia āva i a latou avā. E tatau i se tane ona mafaufau lelei i mana’oga faaletino ma mana’oga tau faalogona o lana avā, auā o se mataupu tāua. Pe a lē lelei le auala e feagai ai se tane ma lana avā, e ono lē faafofoga mai Ieova i ana tatalo. (1 Peteru 3:7) E sili atu ona tāua iā Ieova tagata e lolofa iā te ia. E lē sili atu iā te ia tamāloloa nai lo o fafine.

⁶ Na fetalai Iesu, “ua lē [o] toe to’alua” le tane ma le avā, “ae ua avea i la’ua ma **tino e tasi.**” (Mataio 19:6) E faamaoni le tasi i le isi, ma e lē tatau ona feusua’i ma nisi e ese mai i a latou paaga faaipoipo. (Faataoto 5:15-21; Eperu 13:4) E lē tatau i se tane ma se avā ona manatu faapito i ona lava mana’oga taufeusua’iga. (1 Korinito 7:3-5) E tatau i se tane ona manatua, “e leai se tane e ita i **lona lava tino; ae e na te fafaga ma faapelepele i ai.**” O lea, e tatau ona ia alofa ma faapelepele i lana avā. E mana’o le avā ina ia tausia o ia e lana tane i se auala alofa ma agalelei.—Efeso 5:29.

5. Aiseā e tatau ai i se tane ona āva i lana avā?

6. O le ā le uiga o le avea o le tane ma le avā ma “tino e tasi”?



Ua faapefea ona avea Sara ma faaa'oa'oga lelei mo avā?

O MEA E FAATALITALIA E LE ATUA MAI I AVĀ

7 O aiga ta'itasi uma lava e mana'omia se tasi e avea ma ulu, po o se tasi e ta'ita'ia i latou ina ia mafai ona latou galulue felagolagoma'i. O loo ta'ua i le 1 Korinito 11:3: "O le ulu o tane ta'ito'a-tasi uma o Keriso; o le ulu o le fafine o le tane; a o le ulu o Keriso o le Atua."

8 O tane uma lava e iai taimi e sesē ai. Ae pe afai e lagolagoina ma le lotoatoa e se avā faai'uga a lana tane, o le a maua e le aiga atoa aogā. (1 Peteru 3:1-6) Ua ta'ua i le Tusi Paia: "Ia matuā faaaloalo [le avā] i lana tane." (Efeso 5:33) Ae faapefea pe afai e lē tutusa talitonuga faalelotu a le tane ma le avā? E tatau pea i le avā ona matuā faaaloalo i lana tane. O loo faamatalaina i le Tusi Paia: "[O] outou avā, ia gaua'i atu i a outou lava tane, ma afai e lē

7. Aiseā e mana'omia ai e aiga se tasi e avea ma ulu?

8. E faapefea ona faaalialia e se avā le matuā faaaloalo i lana tane?

usiusita'i nisi i le upu, e mafai ona maua i latou i le amiolelei a a latou avā e aunoa ma se upu, auā ua latou vāaitino i a outou amioga mamā ma le **matuā faaaloalo.**" (1 Peteru 3:1, 2) O le faaa'oa'oga lelei a se avā, e mafai ona fesoasoani i lana tane ina ia malamalama ma faaaloalo ai i ona tali-tonuga.

⁹ O le ā e mafai ona fai e se avā pe a lē tutusa o la manatu ma lana tane? E tatau ona ia faaali atu ona manatu i se auala faaaloalo. O se faata'ita'iga, na faia e Sara se faamatalaga e le'i fiafia i ai Aperamo. Peita'i, na fetalai atu Ieova iā Aperamo: "Ia faalogo iā te ia." (Kenese 21:9-12) E seāseā faia e se tane Kerisiano se filifiliga e feteena'i ma le Tusi Paia. O lea, e tatau i lana avā ona lagolagoina o ia. (Galuega 5:29; Efeso 5:24) O se avā lelei, e na te tausia lelei le aiga. (**Faitau le Tito 2:4, 5.**) Pe a vāai lana tane ma le fanau i lona galue mamafa auā le tausia o i latou, o le a atili ai ona latou alolofa ma faaaloalo iā te ia.—Faataoto 31:10, 28.

¹⁰ O nisi taimi, e vave ona faia e tane ma avā le faai'uga e nonofo eseese pe tatala fo'i le faaipopoga. Peita'i, ua ta'ua i le Tusi Paia "e lē tatau i se avā ona tuua lana tane," ma "e lē tatau i le tane ona tuua lana avā." (1 Korinito 7:10, 11) E iai tulaga e matuā mata'utia lava e ono filifili ai se tane ma se

9. (a) O le ā e tatau ona faia e se avā pe a lē tutusa o la manatu ma lana tane? (e) O le ā le fautuaga mo avā o loo i le Tito 2:4, 5?
10. O le ā le faamatalaga a le Tusi Paia e faatatau i le nonofo eseese ma le tatalaina o faaipopoga?

avā e nonofo eseese. Peita'i, e lē tatau ona manatu māmā i lenā filifiliga. Ae faapefea le tatalaina o le faaiipoipoga? Ua faaalua i le Tusi Paia e pau le mā-fuaaga talafeagai e tatala ai faaiipoipoga, pe afai lea ua faia e le tane po o le avā feusua'iga ma se tasi e lē o sana paaga faaiipoipo.—Mataio 19:9.

O MEA E FAATALITALIA E LE ATUA MAI I MĀTUA

11 Mātua, ia taumafai e faaalu le tele o le taimi e mafai ai ma lau fanau. E mana'omia outou e a

11. O le ā le mea e sili ona mana'omia e fanau nai lo o se isi lava mea?

O Iesu o se faaa'oa'oga lelei mo sui ta'itasi o le aiga



outou fanau. E sili atu i lenā, e latou te manana'oina ia outou a'oa'oina i latou e faatatau iā Ieova. —Teuteronomie 6:4-9.

12 Ua matuā faateteleina le leaga o le lalolagi a Satani, ma e iai tagata e manana'oina e faia gaoioiga e afāina ai a tatou fanau. E aofia ai fo'i le faaleagaina o i latou e ala i faiga taufeusua'iga. E faigatā i nisi o mātua ona talanoa i fanau e faatatau i lenei mataupu. Ae e tatau i mātua ona lapata'ia a latou fanau e faatatau i tagata faapea, ma a'oa'oina le fanau i le auala e tetee atu ai iā i latou. Mātua e, e tatau ona outou puipuia a outou fanau.* —1 Peteru 5:8.

13 E iai i mātua le tiute tauave o le a'oa'oina o a latou fanau i le auala e tatau ona amioa'i ai. E faapefea ona e a'oa'oina lau fanau? E mana'omia e lau fanau toleniga. Peita'i, e lē tatau ona avatu faasa'oga i se auala sauā pe inainā. (Jeremia 30:11) O lea, aua ne'i e a'oa'ia lau fanau a o e ita. E te lē mana'oina e avea au upu e pei o le "tutu'i o le pelu" ma faatigā ai i o latou faalogona. (Faataoto 12:18) A'oa'oina lau fanau ina ia malamalama i le mātuaaga e mana'omia ai ona latou usi-usita'i.—Efeso 6:4; Eperu 12:9-11; taga'i i le Faaopopoga 30.

* E mafai ona e maua nisi faamatalaga i le auala e puipuia ai lau fanau i le mataupu e 32 o le tusi *Ia Faalogo i le Faia'oga Sili*, lomina e Molimau a Ieova.

-
12. O le ā e tatau ona faia e mātua ina ia puipuia ai a latou fanau?
 13. O le ā le auala e tatau ona a'oa'oina ai e mātua a latou fanau?

O MEA E FAATALITALIA E LE ATUA MAI I FANAU

14 Sa usiusita'i i taimi uma Iesu i lona Tamā, e ui i tulaga faigatā. (Luka 22:42; Ioane 8:28, 29) E faatalitalia fo'i e Ieova fanau ina ia usiusita'i i o latou mātua.—Efeso 6:1-3.


15 Fanau e, e tusa pe e faigatā iā te outou ona usiusita'i i mātua, ae manatua pe a outou usiusita'i, o le a fiafia Ieova ma o outou mātua iā te outou.*—Faataoto 1:8; 6:20; 23:22-25.

16 E mafai e le Tiapolo ona faaaogā au uō ma isi

* E pau le taimi e faato'ā lē usiusita'i ai se tamaitiiti i ona mātua, pe afai e manana'o mātua e faia e le tamaitiiti se mea e lē tusa ai ma le tulafono a le Atua.—Galuega 5:29.

14, 15. Aiseā e tatau ai i fanau ona usiusita'i i o latou mātua?

16. (a) E faapefea ona taumafai Satani e faaososoina talavou e faia mea leaga? (e) Aiseā e tāua ai ona e filifili ni uō e alolofa iā Ieova?



O le ā o le a fesoasoani i talavou e faamaoni ai i le Atua pe a faaososoina e faia mea leaga?

talavou e faaosoosoina oe e faia mea leaga. E iloa lelei e le Tiapolo e faigatā tele i fanau ona teena lenei faaosoosoga. O se faaa'oa'oga, sa iai uō a le afafine o Iakopo o Tina e lē alolofa iā Ieova. O le i'uga, na oo ai le tele o faafitauli iā Tina ma lona aiga. (Kenese 34:1, 2) Pe afai e lē alolofa au uō iā Ieova, atonu e latou te faaosoosoina oe e faia se mea e lē fiafia i ai o ia. O le i'uga, o le a aumaia ai le tele o tigā iā te oe, o lou aiga ma le Atua. (Faataoto 17:21, 25) O le māfuaaga lenā e tāua tele ai ona e sa'ili ni uō e alolofa iā Ieova.—1 Korinito 15:33.

E MAFAI ONA FIAFIA LOU AIGA

17 Pe a mulimuli sui ta'itasi o le aiga i faatonuga a le Atua, o le a latou 'alofia ai mafatiaga ma le tele o faafitauli. O lea, pe afai o oe o se tane, ia alofa i lau avā ma feagai ma ia i se auala alofa. Pe afai o oe o se avā, ia faaaloalo ma gaua'i i lau tane, ma faa-a'oa'o i le faaa'oa'oga a le avā o loo faamatalaina i le Faataoto 31:10-31. Pe afai o oe o se matua, ia a'o-a'o lau fanau ina ia alolofa i le Atua. (Faataoto 22:6) Pe afai o oe o se tamā, ia ta'ita'ia lou aiga i se auala "lelei." (1 Timoteo 3:4, 5; 5:8) Fanau, ia usi-usita'i i o outou mātua. (Kolose 3:20) Ia manatua e mafai e sui ta'itasi o le aiga ona faia ni mea sesē. O lea, ia lotomaulalo ma talosaga atu le tasi i le isi mo le faamagaloga. O le mea moni, o loo i le Tusi Paia ta'iala mai i le Atua mo sui ta'itasi o le aiga.

17. O le ā le tiute tauave o loo iai i su'i ta'itasi o le aiga?

A'OA'OGA
MONI 1

NA AMATAINA E IEOVA LE
FAATULAGAGA O LE AIGA

“O le mea lea ou te tootuli ai i le Tamā, o lē ua maua ai e aiga uma i le lagi ma le lalolagi o latou igoa.”

—Efeso 3:14, 15

E faapefea ona maua e lou aiga le fiafia?

Kenese 1:26-28

Na foafoaina e Ieova le ulua'i aiga.

Efeso 5:1, 2

O le auala autū i le mauaina o se aiga fiafia, o le faaa'oa'o lea iā Ieova ma Iesu.

A'OA'OGA
MONI 2

O AUALA E AVEA AI
O SE TANE PO O SE AVĀ LELEI

“Ia ta'itasi outou ma alofa i lana lava avā . . . A o le avā, ia matuā faaaloalo o ia i lana tane.”—Efeso 5:33

O le ā le auala e tatau ona feagai ai le tane ma le avā?

Efeso 5:22-29

O le tiute o le tane o le tausia o le aiga. E tatau ona ia alofa i lana avā, ma e tatau i le avā ona lagolagoina filifiliga e faia e le tane.

Kolose 3:19; 1 Peteru 3:4

E mana'omia ona agalelei, manatu mamafa ma amana'ia e le tasi faalogona o le isi.

1 Peteru 3:1, 2, 7

E tatau i se tane ma se avā ona āva ma faaaloalo le tasi i le isi.

1 Timoteo 5:8; Tito 2:4, 5

E tatau i se tane ona galue mo le tausiga o lona aiga. E tatau i se avā ona tausia lelei lona aiga.

**A'OA'OGA
MONI 3**
**O AUALA E AVEA
AI O SE MATUA LELEI**

“Aua le faatigā loto i a outou fanau, a ia tausia pea i latou i a’oa’iga ma apoapoa’iga a Ieova.”—Efeso 6:4

O le ā le tiute tauave ua iai i mātua?

Teuteronome 6:4-9;

Faataoto 22:6

E mana’omia ona faaavanoa sou taimi e a’oa’o ai lau fanau e faataatau iā leova. E amata mai lava i le taimi a o lāiti le fanau, ia onosa’i a o e fesoasoani iā i latou ta’ito’atasi e avea ma uō a leova.

1 Peteru 5:8

A’oa’o lau fanau i auala e ‘alofia ai le faaleagaina o i latou e ala i faiga taufesusua’iga ma isi lamatiaga.

Ieremia 30:11;

Eperu 12:9-11

E mana’omia ona a’oa’i lau fanau, ae aua le faia a o e ita pe i se auala sauā fo’i.

**A'OA'OGA
MONI 4**
**O MEA E FAATALITALIA
E LE ATUA MAI I FANAU**

“Le fanau e, ia usiusita’i i o outou mātua.”—Efeso 6:1

Fanau, aiseā e tatau ai ona outou usiusita’i i o outou mātua?

Faataoto 23:22-25;

Kolose 3:20

O lo outou usiusita’i o le a faafiafiaina ai leova faapea o outou mātua.

1 Korinito 15:33

Sa’ili ni uō e alolofa iā leova. O le faia faapea, o le a faigofie ai iā te oe ona faia le mea sa’o.

LE AUALA E TATAU ONA TAPUA'I AI I LE ATUA

O LE tele o lotu e faapea mai o loo latou a'oa'oina le mea moni e uiga i le Atua. Peita'i, e lē o le tulaga moni lenā. O le māfuaaga, ona e matuā eseese lava mea o loo a'oa'oina e lotu e faatatau i le Atua, faapea le auala e tatau ona tapua'i ai iā te ia. E faapefea la ona tatou iloa le auala e tatau ona tapua'i ai iā Ieova le Atua? E na o Ieova lava e mafai ona ia faailoa mai.

² Ua tuuina mai e Ieova le Tusi Paia, ina ia mafai ai ona tatou a'oa'oina le auala e tatau ona tapua'i atu ai iā te ia. O lea, ia su'esu'e le Tusi Paia, ona fesoasoani mai lea o Ieova iā te oe ina ia maua aogā o ana a'oa'oga, talu ai e silasila alofa mai o ia iā te oe.—Isaia 48:17.

³ Ua faapea mai isi tagata e talia e le Atua lotu uma, ae e lē o le mea lenā na a'oa'oina e Iesu. Na fetalai o ia: “E lē ulu atu i le malo o le lagi i latou uma o ē fai mai iā te a'u, 'Le Alii e, le Alii e,' ae e na o lē na te faia le finagalo o lo'u Tamā.” O lea, e

-
1. O ai e tatau ona faailoaina mai le auala e tatau ona tatou tapua'i atu ai i le Atua?
 2. E faapefea ona e a'oa'oina le auala e tatau ona tapua'i atu ai i le Atua?
 3. O le ā e finagalo le Atua e tatou te faia?

mana'omia ona tatou iloa po o le ā le finagalo o le Atua, ona fai lea. E tāua tele lenei mea, talu ai na faatusa e Iesu i latou e lē ususita'i i le Atua i tagata solitulafono, “o ē faia mea leaga.”—Mataio 7: 21-23.

⁴ Na fetalai Iesu, o le a lē faigofie i taimi uma le faia o le finagalo o le Atua. Na fetalai o ia: “Ia outou ulu atu i le faitoto'a vaitiiti, auā e vatele ma lautele le auala e tau atu i le faaumatiaga, ma e to'atele fo'i i latou e ui ai. Ae e vaitiiti le faitoto'a ma e lauitiiti fo'i le auala e tau atu i le ola, e to'aitiiti fo'i i latou o ē e maua.” (Mataio 7:13, 14) O le auala lauitiiti po o le auala e tatau ona tapua'i ai i le Atua, e i'u atu i le ola e faavavau. Ae o le auala lautele po o le auala e lē tatau ona tapua'i ai i le Atua, e i'u atu i le oti. Peita'i, e lē finagalo Ieova e oti se tasi. Ua ia tuuina mai i tagata uma le avanoa e a'oa'oina ai e faatatau iā te ia.—2 Peteru 3:9.

LE AUALA E TATAU ONA TAPUA'I AI I LE ATUA

⁵ Na fetalai Iesu e mafai ona tatou iloa i latou o loo mulimuli i le auala e tatau ona tapua'i ai i le Atua, e ala i le iloiloina o o latou talitonuga ma gaoioiga. Na faapea mai o ia: “Tou te iloa i latou i o latou fua.” Na fetalai atili o ia: 'E fua mai e laau lelei uma o fua lelei.' (Mataio 7:16, 17) E lē o le

4. O le ā le fetalaiaga a Iesu e faatatau i le faia o le finagalo o le Atua?

5. E faapefea ona e iloa i latou o loo mulimuli i le auala e tatau ona tapua'i ai i le Atua?

uiga o lenei mea, o i latou e tapua'i i le Atua e lelei atoatoa. Peita'i, e taumafai auauna a le Atua e faia i taimi uma le mea sa'o. O le a tatou iloiloaina nei po o le ā e fesoasoani iā i tatou, ina ia iloa ai i latou o loo mulimuli i le auala e tatau ona tapua'i ai i le Atua.

6 E tatau ona faavae a tatou a'oa'oga i le Tusi Paia. Ua ta'ua i le Tusi Paia: "O Tusitusiga Paia uma e mai i le agaga o le Atua, ma e aogā e a'oa'o ai, e a'oa'i ai, e faasa'o ai mea, e faatonu ai i le amiotonu, ina ia matuā agavaa ai le tagata o le Atua, e lava saunia mo galuega lelei uma." (2 Timoteo 3:16, 17) Na tusi le aposetolo o Paulo i Kerisiano e faapea: "Ina ua outou maua le afioga a le Atua, na outou faalogo ai mai iā i matou, ona outou talia lea, e lē o le upu a tagata, a o le mea moni, o le afioga a le Atua." (1 Tesalonia 2:13) E na o le Afioaga lava a le Atua, le Tusi Paia e faavae ai le tapua'iga moni. E lē faavae i ni manatu o tagata, aganuu po o se isi lava mea.

7 O mea uma lava sa a'oa'oina e Iesu na faavae mai i le Afioaga a le Atua. (**Faitau le Ioane 17:17.**) Sa masani ona ia ta'ua Tusitusiga Paia. (Mataio 4: 4, 7, 10) E mulimuli auauna moni a le Atua i le faaa'oa'oga a Iesu, ma faavae mea e latou te a'o-a'oina atu i le Tusi Paia.

6, 7. (a) Aiseā e faavae ai a'oa'oga a le tapua'iga moni i le Tusi Paia? (e) O le ā e tatou te a'oa'oina mai i le faaa'oa'oga a Iesu?

8 E tatau ona tatou tapua'i tau lava o Ieova. O loo ta'ua i le Salamo 83:18: "O oe e ou le suafa o Ieova, e na o oe lava o Lē e Silisili Ese i le lalolagi uma." Na finagalo Iesu ina ia iloa e tagata po o ai tonu le Atua moni, ma na ia a'oa'o atu le suafa o le Atua. (**Faitau le Ioane 17:6.**) Na fetalai Iesu: "E tatau ona e tapua'i iā Ieova lou Atua, ma e na o ia fo'i e tatau ona e avatu i ai le auaunaga paia." (Mataio 4:10) O lea, i le avea ai ma auauna a le Atua, e tatou te mulimuli i le faaa'oa'oga a Iesu. E tatou te tapua'i tau lava o Ieova, faaaogā lona suafa, ma a'oa'o isi i le suafa o le Atua ma mea o le a ia faia mo i tatou.

9 E mana'omia ona tatou faaalua le alofa moni o le tasi i le isi. Na a'oa'oina e Iesu ona soo ina ia alofa le tasi i le isi. (**Faitau le Ioane 13:35.**) E lē tāua po o fea le atunuu e tatou te ō mai ai, po o ā a tatou aganuu, ma pe e tatou te mau'oa pe matitiva. O lo tatou alofa o le tasi i le isi, e tatau ona autasia ai i tatou o se 'auuso. (Kolose 3:14) O lea, e tatou te lē auai ai i taua ma fasiotia ai tagata. Ua ta'ua i le Tusi Paia: "E iloa le fanau a le Atua ma le fanau a le Tiapolo i le mea moni leni: O lē ua lē faaauau ona faia le amiotonu e lē mai i le Atua o ia, e faapena fo'i le tagata ua lē alofa i lona uso." Ua faapea atili mai le mau: "E tatau

8. O le ā ua tatou a'oa'oina mai iā Iesu e faatatau i le auala e tapua'i atu ai iā Ieova?

9, 10. E faapefea ona faaalua le alofa o le tasi i le isi?

ona tatou alolofa o le tasi i le isi; e lē pei o Kaino o lē e mai i lē o loo leaga, lea na ia fasiotia lona uso.”—1 Ioane 3:10-12; 4:20, 21.

10 E tatou te faaaogā o tatou taimi, malosi ma alagā'oa e fesoasoani ma faalaeiau ai le tasi i le isi. (Eperu 10:24, 25) E tatou te “faia mea lelei i tagata uma.”—Kalatia 6:10.

11 E tatou te talitonu e na o Iesu Keriso le auala e mafai ona maua ai le faaolataga. Ua ta'ua i le Tusi Paia: ‘E leai se isi e mafai ona maua ai le faaolataga, auā e leai se isi igoa i lalo o le lagi ua tuuina mai e le Atua i tagata, e tatau ona faaolaina ai i tatou.’ (Galuega 4:12) I le Mataupu 5 o lenei tusi, na tatou a'oa'oina ai na auina mai e Ieova Iesu ina ia foa'i lona ola o se togiola mo tagata usiusita'i. (Mataio 20:28) Ua filifilia e Ieova Iesu e pule o se Tupu mai i le lagi i le lalolagi. O le māfuaaga lenā ua faailoa mai ai i le Tusi Paia, e tatau ona tatou usiusita'i iā Iesu pe afai e tatou te manana'o e ola e faavavau.—Faitau le Ioane 3:36.

12 E lē tatau ona faia sa tatou vaega i faiga faapolotiki. E le'i iai se vaegafai a Iesu i faiga faapolotiki. A o faia lona faamasinoga, na ia faapea atu i le kovana Roma o Pilato: “O lo'u malo e lē mai le lalolagi lenei.” (Faitau le Ioane 18:36.) E pei o Iesu, e tatou te faamaoni i le Malo o le Atua i

11. Aiseā e tatou te talitonu ai e na o Iesu Keriso le auala e mafai ona maua ai le faaolataga?

12. Aiseā e leai ai sa tatou vaegafai i faiga faapolotiki?

le lagi. O le māfuaaga lea e leai ai sa tatou vaega-fai i faiga faapolotiki, e tusa lava po o fea e tatou te nonofo ai. Peita'i, ua faatonuina i tatou i le Tusi Paia ina ia usiusita'i i "faipule silisili" po o faigāmalo. (Roma 13:1) E tatou te usita'ia tulafono a atunuu o loo tatou nonofo ai. Ae pe afai e fetee-na'i na tulafono ma tulafono a le Atua, ona tatou faaa'oa'o lea i le 'auapose-tolo o ē na faapea atu: "E tatau ona matou usiusita'i i le Atua o le pule, nai lo o tagata."—Galuega 5:29; Mareko 12:17.

¹³ E tatou te talitonu e na o le Malo o le Atua e mafai ona fo'ia faafitauli i le lalolagi. Na fetalai Iesu o le a tala'iina le "tala lelei o le malo" i le lalolagi atoa. (Faitau le Mataio 24:14.) E leai se malo faaletagata e mafai ona faia mea o le a faia e le Malo o le Atua mo i tatou. (Salamo 146:3) Na a'oa'oina i tatou e Iesu e tatalo mo le Malo o le Atua e faapea: "Ia oo mai lou malo. Ia faia lou finagalo i le lalolagi, e pei ona faia i le lagi." (Mataio 6:10) Ua ta'ua i le Tusi Paia o le a faaumatia e le Malo o le Atua malo faaletagata uma, ma "e tumau lea malo e faavavau."—Tanielu 2:44.


¹⁴ I le māe'a ai ona e iloiloaina o nei manatu, ia fesili ifo iā te oe lava: 'O ai o loo faavae a latou a'oa'oga i le Tusi Paia? O ai o loo faailoaina atu i isi le suafa o le Atua? O ai o loo faaalua le alofa moni o

13. O le ā e tatou te tala'ia atu e faatatau i le Malo o le Atua?

14. O ai e te talitonu o loo mulimuli i le auala e tatau ona tapua'i ai i le Atua?

O I LATOU E TAPUA'I I LE ATUA

- e faavae a latou a'oa'oga i le Tusi Paia
- e tapua'i tau lava o leova, ma a'oa'oina isi i lona suafa
- e alofa le tasi i le isi
- e talitonu na auina mai e le Atua lesu ina ia faaolaina i tatou
- e leai sa latou vaegafai i faiga faapolotiki
- e tala'i atu e na o le Malo o le Atua e mafai ona fo'ia faafitauli i le lalolagi



le tasi i le isi, ma talitonu na auina mai e le Atua Iesu ina ia faaolaina i tatou? O ai e lē o iai sa latou vaegafai i faiga faapolotiki? O ai o loo tala'ia e na o le Malo o le Atua e mafai ona fo'ia o tatou faafitauli?' E na o Molimau a Ieova.—Isaia 43:10-12.

O LE Ā LE GAOIOIGA E AO ONA E FAIA?

15 E lē lava le tau ina talitonu o loo soifua le Atua, auā e oo fo'i i temoni e latou te talitonu o loo soifua o ia, ae e latou te lē usiusita'i iā te ia. (Iakopo 2:19) Pe a tatou manana'o e talia e le Atua le auala e tatou te tapua'i ai, e tatau ona tatou talitonu o loo soifua o ia ma faia mea e finagalo i ai o ia.

16 Ina ia talia e le Atua le auala e tatou te tapua'i ai, e tatau ona tatou teena lotu sesē. Na tusi le perofeta o Isaia: "Ia ō ese mai i totonu iā te ia, ia outou tausisi i le mamā." (Isaia 52:11; 2 Korinito 6:17) O le māfuaaga lea e tatau ai ona tatou teena so o se mea e iai se sootaga i tapua'iga sesē.

17 O ai e faasino atu i ai lotu sesē? E faasino atu lea i so o se lotu lava o loo a'oa'oina tagata, ina ia tapua'i i le Atua i se auala e lē tusa ai ma lana Afioga. Ua ta'ua i le Tusi Paia lotu sesē uma o

15. O le ā e tatau ona tatou faia pe a tatou manana'o e talia e le Atua le auala e tatou te tapua'i ai?

16. Aiseā e tatau ai ona tatou teena lotu sesē?

17, 18. (a) O le ā e faasino atu i ai "Papelonia le Aai Tele"?
(e) Aiseā e mana'omia ai ona vave ō ese mai i lotu sesē?

“Papelonia le Aai Tele.” (Faaaliga 17:5) O le ā le māfuaaga? Ina ua mavae le Lolo i aso o Noa, na amata ai ona alia'e mai le tele o a'oa'oga sesē faalotu i le aai o Papelonia. Ua salalau atu nei a'oa'oga sesē i le lalolagi atoa. O se faata'ita'iga, na tapua'i tagata sa nonofo i Papelonia i atua e tolutasi. I aso fo'i nei, o loo a'oa'oina ai e le tele o lotu o le Atua o le Tolutasi. Peita'i, e manino lava le a'oa'oga i le Tusi Paia e na o le to'atasi lava le Atua moni o Ieova, ma o Iesu lona Alo. (Ioane 17:3) Sa talitonu fo'i tagata na nonofo i Papelonia, e iai se agaga o le tagata e ola pea pe a maliu o ia, ma e mafai ona faapuapuagatia lenā agaga i le afi. Peita'i, e lē moni na talitonuga.—Taga'i i Faaopopoga 14 ma le 18.

18 Na valoia e le Atua e lē o toe umi ona faaumatia lea o lotu sesē uma. (Faaaliga 18:8) Po ua e malamalama i le māfuaaga e tatau ai ona e vave alu ese mai i lotu sesē? E finagalo Ieova le Atua e te faia lenā mea a o le'i tuai.—Faaaliga 18:4.

19 Pe a e filifili e tuua lotu sesē ma auauna iā Ieova, atonu o le a lē malamalama nisi o au uō ma tagata o lou aiga i lau filifiliga, ma atonu o le a latou faapogaia ni tulaga faigatā i lou olaga. E ui i na tulaga, e lē tuulafoa'ia lava oe e Ieova. O le a avea oe o se vaega o lona aiga i le lalolagi aoao, lea e iai le faitau miliona o tagata e alolofa moni

19. O le a faapefea ona tausia oe e Ieova, pe a e filifili e auauna iā te ia?

le tasi i le isi. O le a e maua fo'i le faamoemoe o le ola e faavavau i le lalolagi fou a le Atua. (Mareko 10:28-30) Atonu i se taimi mulimuli ane, o le a filifili ai nisi o au uō ma tagata o lou aiga sa tetee muamua iā te oe ma lau filifiliga ina ia auauna iā Ieova, e su'esu'e le Tusi Paia.

20 E lē o toe umi ona tafiesea lea e le Atua o mea leaga uma, ma o le a pule ai loa lona Malo i le lalolagi. (2 Peteru 3:9, 13) E mautinoa o se taimi sili ona fiafia lenā. O le a tapua'i tagata uma iā Ieova i le auala e finagalo i ai o ia. O lea, e tāua tele ai ona faia nei loa sau gaoioiga, ma tapua'i i le Atua i le auala e finagalo i ai o ia.

20. Aiseā e tāua ai ona tapua'i i le Atua i le auala e finagalo i ai o ia?

O lou auauna iā Ieova faatasi ma ona tagata, o le a avea ai oe o se vaega o se 'auaiga i le lalolagi atoa



A'OA'OGA
MONI 1

VALA E ILOA AI
LE TAPUA'IGA MONI

“E vaitiiti le faitoto‘a ma e lauitiiti fo‘i le auala e tau atu i le ola, e to‘aitiiti fo‘i i latou o ē e maua.”—Mataio 7:14

E faapefea ona tatou iloa e lē taliaina e le Atua tapua'iga uma?

Mataio 7:21-23

E lē talia e le Atua lotu uma. E lē o lotu uma e faia le finagalo o le Atua.

Mataio 7:13, 14

O le tapua'iga moni e i'u atu ai i le ola e faavavau. Ae o le tapua'iga sesē e i'u atu ai i le faaumatiaga a'ia'i.

Mataio 7:16, 17

E mafai ona e iloa le tapua'iga moni i gaoioiga e faia e ona tagata tapua'i. E lē mana'omia ona e su'esu'e e faatatau i lotu uma, ae ia su'esu'e na o manatu o loo i le Tusi Paia.

A'OA'OGA
MONI 2

LE AUALA E TATAU
ONA TAPUA'I AI I LE ATUA

1 Tesalonia 2:13;

2 Timoteo 3:16, 17

la talitonu ma a'oa'o atu na o manatu o loo i le Tusi Paia.

Mataio 4:10; Ioane 17:6

Tapua'i iā leova ma faaaogā lona suafa.

Ioane 13:35

la faaalua le alofa moni o le tasi i le isi.

Ioane 3:36; Galuega 4:12

la usita'i iā Iesu. E ala mai iā Iesu le faaolataga mai iā leova.

Ioane 18:36; Galuega 5:29

Aua ne'i iai sau vaega e fai i faiga faapolotiki.

Mataio 24:14; 6:10

la a'oa'o isi e na o le Malo o le Atua o le a fo'ia o tatou faafitauli.

E MANA'OMIA ONA E GAOIOI E TUSA MA MEA UA E TALITONU I AI

O le ā e tatau ona e faia pe afai e te mana'ō e talia e le Atua lau tapua'iga?

Iakopo 2:19

E lē lava le tau ina talitonu i le Atua. E mana'omia ona e faia mea e finagalo i ai o ia, e pei ona ia ta'ua i le Tusi Paia.

Isaia 52:11; Faaaliga 17:5

Ua a'oa'oina tagata e lotu sesē po o "Papelonía le Aai Tele," ina ia tapua'i i le Atua i le auala e lē finagalo i ai o ia. E aofia i a'oa'oga sesē faalelotu le Tolutasi, o le iai o se agaga e ola pea pe a oti le tagata, ma le afi i seoli.

Faaaliga 18:4, 8

E lē o toe umi ona faaumatia lea e leova o lotu sesē uma. E mana'omia ona e teena so o se mea e iai se sootaga i lotu sesē.

Mareko 10:28-30

E te ono feagai ma teteega, ae e lē tuulafoa'ia lava oe e leova.

IA FILIFILI E TAPUA'I I LE ATUA

A O E su'esu'eina le Tusi Paia, na e iloa ai o le to'a-tele o tagata o loo faapea mai e tapua'i i le Atua, e latou te a'oa'oa atu pe faia gaoioiga e inosia e le Atua. (2 Korinito 6:17) O le māfuaaga lenā ua faatonuina ai i tatou e Ieova e o'ese mai i lotu sesē po o "Papelonia le Aai Tele." (Faaaliga 18:2, 4) O le ā lau gaoioiga o le a fai? E tofua uma lava i tatou ta'ito'atasi ma se filifiliga e fai, ma e tataua ona tatou fesili ifo, 'Pe ou te mana'oa e tapua'i i le Atua i le auala o loo ia finagalo ai, po o le auala ua ou masani ai?'

² Pe afai ua e tuua pe faamavae mai i se lotu sesē, o se filifiliga lelei lenā. Peita'i, e ono mauua pea i lou loto nisi o tu ma aga a lotu sesē o loo e fiafia pea i ai. Se'i o tatou iloiloaina nisi o na tu ma aga, ma iloa ai pe aiseā e tāua tele ai ona tatou vaai i nei tu ma aga e pei o le auala e silasila i ai Ieova.

TUPUA MA LE TAUMAFAI E FAAMALIE TUAU UA MALILIU

³ Ua faaaogā e nisi tagata tupua po o faatusa i o latou fale, e tapua'i atu ai i le Atua mo le tele o

1, 2. O le ā le fesili e tataua ona e fesili ifo ai, ma aiseā e tāua ai lenā fesili?

3. (a) Aiseā e ono faigatā ai i nisi ona taofia le faaaogāina o tupua i a latou tapua'iga? (e) O le ā le faamatalaga a le Tusi Paia e faatatau i le faaaogāina o tupua e tapua'i atu ai i le Atua?

tausaga. Pe afai o le gaoioiga lea o loo e faia, atonu la e lē logolelei i lau faalogo pe e sesē fo'i i lou manatu, le lē faaaogāina o faatusa po o ni tupua e tapua'i ai i le Atua. Ae ia manatua, ua a'oa'oina i tatou e Ieova i le auala e tatau ona tapua'i atu ai iā te ia. Ua faailoa ma le manino mai fo'i i le Tusi Paia, e lē finagalo Ieova e tatou te faaaogāina tupua i la tatou tapua'iga.—**Faitau le Esoto 20:4, 5; Salamo 115:4-8; Isaia 42:8; 1 Ioane 5:21.**

⁴ Atonu e faaalu e nisi le tele o le taimi ma le malosi e taumafai ai e faamalie o latou tuua ua maliliu. E latou te ono faia ni gaoioiga e pei o le faamautinoa ua teu lelei tuugamau o tuua, ma le manatu e faapea o le a faafiafia ai i latou, ma 'alofia ai le faatupuina o lo latou ita. E iai fo'i nisi atonu e tapua'i i o latou tuua ua maliliu. Peita'i, ua tatou a'oa'oina e lē mafai e i latou ua maliliu ona fesoasoani mai, pe faia fo'i se mea e tatou te afāina ai. E latou te lē o feola i se isi nofoaga. O le mea moni, o se lamatiaga le taumafai e fesoota'i ma i latou ua maliliu. Aiseā? Talu ai o so o se fe'au e foliga mai o loo aumai mai i ē ua maliliu, o le mea moni e mai i temoni. O le māfuaaga lenā na faatonuina ai e Ieova le nuu o Isaraelu, ina ia aua lava ne'i taumafai e fesoota'i ma ē ua maliliu pe aafia fo'i i so o se ituaiga o faiga faatemoni.—**Teuteronomie 18:10-12; taga'i i Faaopoopoga 26 ma le 31.**

4. (a) Aiseā e lē tatau ai ona tatou taumafai e faamalie o tatou tuua ua maliliu? (e) Aiseā na faatonuina ai e Ieova ona tagata ina ia aua lava ne'i taumafai e fesoota'i ma ē ua maliliu?

⁵ O ā auala e mafai ona fesoasoani iā te oe ina ia lē toe faaaogāina ai tupua e tapua'i ai i le Atua, ma aua ne'i toe taumafai e faamalie tuua ua maliliu? E mana'omia ona e faitau i le Tusi Paia, ma mafaufau loloto i le silafaga a Ieova i nei mea. E silasila o ia i nei faiga o ni mea "inosia." (Teuteronomie 27:15) Tatalo iā Ieova i aso uma mo le fesoasoani, ina ia vaai i mea e pei o le auala e na te silasila ai, ma tapua'i i le auala e finagalo i ai o ia. (Isaia 55:9) E mafai ona e mautinoa e foa'i atu e Ieova iā te oe le malosi e te mana'omia, ina ia aveesea ai so o se mea e fesoata'i atu i tapua'iga sesē.

PE E TATAU ONA TATOU FAAMANATUINA LE KERISIMASI?

⁶ O le Kerisimasi o se tasi o aso faamanatu iloga i le lalolagi, ma e toetoe o tagata uma e manatu i ai o le aso lea e faamanatu ai le fanau mai o Iesu. Peita'i, o le Kerisimasi e fesoata'i atu i tapua'iga sesē. Ua faamatalaina i se tasi o tusi, sa faamanatu e tagata faapaupau o Roma le aso fanau o le lā iā Tesema 25. Na manana'o ta'ita'i lotu ina ia avea le to'atele o tagata faapaupau ma Kerisiano. E ui lava la e le'i fanau Iesu iā Tesema 25, ae na latou filifili pea e faamanatuina le aso na fanau ai Iesu i lenā aso. (Luka 2:8-12) Peita'i, e le'i faamanatuina e soo o Iesu le Kerisimasi. Na ta'ua i se tasi o tusi, i totonu

5. O ā auala e mafai ona fesoasoani iā te oe ina ia lē toe faaaogāina ai tupua, ma aua ne'i taumafai e faamalie tuua ua maliliu?

6. Aiseā na filifilia ai Tesema 25 e faamanatu ai le aso na fanau ai Iesu?

o le 200 tausaga talu ona mavae le fanau mai o Iesu, “e leai ma nisi na iloa ma e lē to’atele na amana’ia le aso tonu na fanau ai o ia.” (*Sacred Origins of Profound Things*) Na amata le faamanatuina o le Kerisimasi, ina ua mavae le silia ma le 300 tausaga talu ona mǎe’a le taimi na soifua ai Iesu i le lalolagi.

⁷ E iloa e le to’atele le amataga faapaupau o le Kerisimasi ma tu ma aga e aofia ai, e pei o le faia o patī ma le foa’i o meaalofa. O se faata’ita’iga, na iai le taimi na faasā ai ona faamanatu le Kerisimasi i Egelani ma isi vaega o Amerika, ona o le faapaupau o lona amataga. O so o se tasi lava na faamanatuina le Kerisimasi e faasalaina. Ae a o faagasolo taimi, na amata ai ona toe faamanatu e tagata le Kerisimasi. E lē faamanatuina e Kerisiano moni le Kerisimasi, ona e latou te manana’o e faamalie le finagalo o le Atua i so o se mea lava e latou te faia.

PE E TATAU ONA TATOU FAAMANATUINA ASO FANAU?

⁸ O se isi aso faamanatu ta’uta’ua i le to’atele o tagata o o latou aso fanau. Pe e tatau i Kerisiano ona faamanatuina aso fanau? E pau lava aso fanau o loo ta’ua i le Tusi Paia, o aso fanau sa faamanatuina e i latou e le’i tapua’i iā Ieova. (Kenese 40:20; Mareko 6:21) Na faaaogā aso fanau e faamamaluina ai atua sesē. O le mǎfuaaga lenā na vaai ai ulua’i Kerisiano i le “faamanatuina o le aso fanau o so o se tasi o

7. Aiseā e lē faamanatuina ai e Kerisiano moni le Kerisimasi?

8, 9. Aiseā e le’i faamanatuina ai e ulua’i Kerisiano aso fanau?

se aganuu faapaupau.”—*The World Book Encyclopedia*.

⁹ Na talitonu tagata Roma ma tagata Eleni anamua, o taimi uma lava e fanau mai ai se tagata, e iai se agaga e faatasi ma lenā tagata, ma o le a puipuia e lenā agaga lea tagata i lona olaga atoa. Ua faamatalaina i se tasi o tusi: “E iai le faiā faapitoa i le va o lenā agaga ma se atua e tutusa lona aso fanau ma le tagata e ona le aso fanau.”—*The Lore of Birthdays*.

¹⁰ Pe e te manatu e finagalo malie Ieova i aso faamanatu e fesoota'i i lotu sesē? (Isaia 65:11, 12) E leai. O le māfuaaga lenā e tatou te lē faamanatuina ai aso fanau, po o so o se aso faamanatu lava e iai se sootaga ma lotu sesē.

PE E TĀUA LE ILOAINA O LE AMATAGA O ASO FAAMANATU?

¹¹ Ua iloa e nisi tagata le amataga faapaupau o le Kerisimasi ma isi aso faamanatu, ae o loo faaauau pea ona latou faamanatuina. E latou te manatu o nei aso faamanatu o se avanoa lelei lea e faifaimea faatasi ai ma aiga. Po o lou lagona lenā? E lē o se mea leaga le mana'o e faifaimea faatasi ma ou aiga. Na amataina e Ieova lenei faatulagaga o le aiga, ma e finagalo o ia ina ia lelei la tatou faiā ma i latou. (Efeso 3:14, 15) Peita'i, e tatau ona tatou taula'i atu i le mauaina o se faiā lelei ma Ieova,

10. Aiseā e lē tatau ai i Kerisiano i aso nei ona faamanatuina aso fanau?

11. (a) Aiseā e faamanatu ai e nisi tagata aso faamanatu? (e) O le ā e tatau ona e faatāuaina?

nai lo o le faamalieina o o tatou tauaiga e ala i le faamanatuina o aso faamanatu sesē faalelotu. O le māfuaaga lenā na faapea mai ai le aposetolo o Paulo: “Ia faamautinoa pea po o ā mea e fiafia i ai le Alii.”—Efeso 5:10.

12 O le to'atele o tagata e manatu e lē tāua le amataga o se aso faamanatu. Peita'i e lē o le silafaga lenā a Ieova. E lē finagalo malie o ia i aso faamanatu e amata mai i lotu sesē, pe faamamaluina ai tagata po o se atunuu. O se faata'ita'iga, e tele aso faamanatu sa faia e tagata Aikupito mo o latou atua sesē. Ina ua ō ese le nuu o Isaraelu mai i Aikupito, na latou faata'ita'ia ai se tasi o aso faamanatu faapaupau a tagata Aikupito, ma ta'ua o “se tausamiga iā Ieova.” Ae na faasalaina i latou e Ieova ona o le faia o lenā mea. (Esoto 32:2-10) E pei lava ona ta'ua e le perofeta o Isaia, e lē tatau ona tatou “papa'i atu i se mea e lē mamā.”—Faitau le Isaia 52:11.

IA AGALELEI A O FEUTAGA'I MA ISI

13 Pe a e filifili e te lē toe faamanatuina aso faamanatu, atonu o le a tele ni fesili e te tuufesili ai. O se faata'ita'iga: O le ā e tatau ona ou faia pe a fesili mai ē matou te faigaluega faatasi, i le māfuaaga ou te lē faamanatuina ai le Kerisimasi? O le ā e tatau ona ou faia pe a aumai e se tasi se meaalofo o le Kerisimasi? O le ā e tatau ona ou faia pe a faatalitalia e la'u paaga faaipoipo ou te faamanatuina se aso faa-

12. O ā aso faamanatu e lē fiafia i ai le finagalo o Ieova?

13. O ā fesili e te ono tuufesili ai, pe a e filifili e te lē toe faamanatuina aso faamanatu?

manatu? E faapefea ona ou fesoasoani i la'u fanau ina ia 'alofia le faanoanoa, ona o le lē faamanatuina o se aso faamanatu po o latou aso fanau fo'i?

14 E tāua ona faaaogā le mafaufau lelei, pe a e filifili po o le ā le faamatalaga ma le gaoioiga e ao ona e fai pe a tula'i mai se tulaga faapea. O se faata'ita'iga, pe a faapea mai tagata "Manuia le Kerisimasi," e lē mana'omia ona e lē ano i ai, ae e mafai ona e tali atu: "Faafetai lava." Peita'i a tula'i mai ni tulaga e fia iloa atili ai e le tagata nisi faamatalaga, e te ono filifili la e faamatala iā te ia le māfuaaga e te lē faamanatuina ai se aso faamanatu. Ae ia faia pea i se auala agalelei, faautauta ma faaaloalo. Ua ta'ua i le Kolose 4:6: "Ia lē aunoa ona outou tautatala atu i upu e logolelei, ia faamāi i le masima, ina ia outou iloa le auala e tali atu ai i tagata ta'ito'atasi." E te ono faamatala i ai e te fiafia e faifaimea faatasi ma isi ma avatu meaalofo, ae e te lē faia faapea pe afai e fesoota'i atu i nei aso faamanatu.

15 O le ā e tataua ona e faia pe afai e avatu e se tasi se meaalofo iā te oe? E lē o aumaia i le Tusi Paia se lisi o tulafono, peita'i, o loo ta'ua ai e tataua ona faamautinoa e lelei o tatou lotofuatiaifo. (1 Timoteo 1: 18, 19) Atonu e lē iloa e le tagata o loo avatuina iā te oe le meaalofo, e te lē faamanatuina aso faamanatu. Pe atonu fo'i e faapea atu lenā tagata iā te oe: "Ou te iloa e te lē faamanatuina lea aso faamanatu,

14, 15. O le ā e mafai ona e faia pe a faamanuia atu e se tasi le Kerisimasi, pe avatu fo'i se meaalofo mo oe?

ae ou te mana'o pea e avatu lenei meaalofo ma oe." Po o le ā lava le tulaga, ae e mafai ona e filifili pe e te taliaina le meaalofo pe leai. Peita'i, po o le ā lava le filifiliga e te faia, ia faamautinoa o loo lelei lou lotofuatiaifo. E tatou te lē manana'o e faia se mea e iai se aafiaga leaga i la tatou faiā ma leova.

AE FAAPEFEA OE MA LOU AIGA?

16 O le ā e tatau ona e faia pe a manana'o lou aiga e faamanatu se aso faamanatu? E lē tatau ona e finau ma i latou. Ia manatua, e iai la latou aiā e filifili ai le mea e latou te manana'o e fai. Ia faaalua pea le agalelei ma faaaloalo i a latou filifiliga, e pei fo'i ona e mana'o e latou te faaaloalo i au filifiliga. (**Faitau le Mataio 7:12.**) Ae afai e manana'o lou aiga e tou te faatasitasi i taimi o aso faamanatu, o le ā e tatau ona e faia? A o le'i faia sau filifiliga, tatalo iā leova mo le fesoasoani ina ia e faia ai le filifiliga sa'o. Mafaufau i le mataupu lea ua tula'i mai, ma fai ni au sa'ili'iliga e faatatau i lea mataupu. Manatua, e te mana'o e faafiafia i taimi uma le finagalo o leova.

17 O le ā e mafai ona e faia e fesoasoani ai i lau fanau, pe a latou mātauina isi tagata o loo faamanatuina aso faamanatu? E mafai ona e fuafua e faia se mea faapitoa mo i latou mai i lea taimi i lea taimi. E mafai fo'i ona e avatu ni meaalofo

16. O le ā e tatau ona e faia pe a manana'o lou aiga e faamanatu se aso faamanatu?

17. O le ā e mafai ona e faia e fesoasoani ai i lau fanau e 'alofia faalagona o le faanoanoa, pe a faamanatu e isi aso faamanatu?



E fiafia i latou o loo
auauna iā leova



ma i latou, i taimi e latou te lē faatalitalia. Ae o le meaalofa sili e mafai ona e avatu i lau fanau, o lou taimi ma lou alofa.

AUAI I LE TAPUA'IGA MONI

18 Ina ia faafiafiaina Ieova, e mana'omia ona tatou o ese mai i lotu sesē ma lafoa'i tu ma aga ma aso faamanatu e fesoota'i atu i na lotu sesē. Peita'i, e mana'omia fo'i ona tatou auai i le tapua'iga moni. E faapefea? O se tasi o auala, o le auai lea e lē aunoa i sauniga faa-Kerisiano. (**Faitau le Eperu 10: 24, 25.**) O sauniga o se vala tāua lea o le tapua'iga moni. (Salamo 22:22; 122:1) E mafai ona tatou fe-faalaieiaua'i le tasi i le isi pe a faapotopoto faatasi. —Roma 1:12.

19 O se isi vala o le filifili e auai i le tapua'iga moni, o le faailoa atu lea i isi o mea ua e a'oa'oina mai i le Tusi Paia. O le to'atele o tagata ua pagatia ona o mea leaga o loo tutupu i le lalolagi. Atonu e te iloa nisi o loo iai na faalogona. Ia ta'u atu iā i latou le faamoemoe matagofie ua e maua mo le lumana'i. A o e auai i sauniga faa-Kerisiano ma faa-iloa atu i isi a'oa'oga moni mai i le Tusi Paia, o le a e iloa ai e lē o toe iai iā te oe se faanaunauga e auai i lotu sesē ma a latou tū ma aga. E mafai ona e mauintinoā o le a e fiafia, ma o le a matuā faamanuia e Ieova au taumafaiga, pe afai e te filifili e tapua'i i le auala e finagalo i ai o ia.—Malaki 3:10.

18. Aiseā e tataua ai ona tatou auai i sauniga faa-Kerisiano?

19. Aiseā e tāua ai ona e faailoa atu i isi a'oa'oga a le Tusi Paia?

A'OA'OGA
MONI 1

ALU ESE MAI I TAPUA'IGA SESĒ

'Ia ō ese mai iā i latou, ma ia outou vavaeese, ma aua tou te toe papa'i atu i se mea e lē mamā.'—2 Korinito 6:17

Aiseā e sesē ai le tapua'i i tupua, le tapua'i i tuua ua maliliu ma taumafai e faamalie i latou?

Esoto 20:4, 5; 1 Ioane 5:21
E lē finagalo leova e tatou te faaaogāina tupua i la tatou tapua'iga.

Teuteronome 18:10-12
O i latou o loo fesoota'i ma tagata ua maliliu, o le mea moni o loo latou fesoota'i ma temoni.

A'OA'OGA
MONI 2

E LĒ O ASO FAAMANATU UMA E TALIA E LE ATUA

"Ia faamautinoa pea po o ā mea e fialia i ai le Alii."
—Efeso 5:10

E faapefea ona e iloa pe e tatau ona e auai i se aso faamanatu pe leai?

Esekielu 44:23;
2 Korinito 6:14, 15
Iloilo pe e iai ni amataga faapaupau o lenā aso faamanatu.

Esoto 32:2-10
E tusa pe e lelei faanaunauga o i latou e amataina se aso faamanatu, ae atonu e lē fialia i ai le finagalo o le Atua.

Tanielu 3:1-27
'Alofia aso faamanatu e viivii ai tagata, faalapopotoga, po o se atunuu.

1 Timoteo 1:18, 19
Ia faaaogā le mafaufau lelei. Ae e tatau ona faamautinoa o loo lelei lou lotofuatiaifo i le silafaga a leova.

IA FAAMATALA ATU I ISI OU
TALITONUGA I SE AUALA E
LOGOLELEI

“Ia lē aunoa ona outou tautatala atu i upu e logolelei, ia faamāi i le masima, ina ia outou iloa le auala e tali atu ai i tagata ta'ito'atasi.”—Kolose 4:6

O le ā le auala e tatau ona e faamatalaina atu ai i isi ou talitonuga?

Mataio 7:12

Ia faaaloalo i filifiliga a isi, e pei fo'i ona e mana'o e latou te faaaloalo i au filifiliga.

2 Timoteo 2:24

Ia faaalua pea le agalelei, ma aua le finau ma isi e uiga i ou talitonuga.

1 Peteru 3:15

Ia tali atu e faatatau i ou talitonuga i se uiga agamalu ma faaaloalo.

Eperu 10:24, 25

I sauniga faa-Kerisiano, o le a faalaeiauina ai oe e i latou o loo iai ma fesoasoani atu iā te oe ina ia iloa le faamatalaga e ao ona fai, pe a fesili mai se tasi e faatatau i ou talitonuga.

LE FAAEAGA O LE TATALO

E MATUĀ la'itiiti lava le lalolagi pe a fua i le telē o le vateatea. Pe a silasila mai Ieova i le lalolagi, e pei tagata i atunuu uma o sina vai e sisina ifo mai i le pakete. (Salamo 115:15; Isaia 40:15) E ui lava e matuā faatauvaava lava i tatou pe a faatusatusa i le vateatea, ae ua ta'ua i le Salamo 145:18, 19: "E latalata Ieova iā i latou uma e valaau atu iā te ia, o i latou uma e valaau atu iā te ia ma le faamaoni. E faia e ia o mea e mana'o ai i latou o ē e matata'u iā te ia, e faafofoga fo'i o ia i a latou alaga, ma ia faaolaina i latou." Ma'eu lenei faaeaga matagofie ua tatou maua! E finagalo Ieova o Lē silisili ese na foafoaina mea uma lava, e faalatalata mai iā i tatou ma faafofoga mai i a tatou tatalo. O le mea moni, o le tatalo o se faaeaga, o se meaalofa faapitoa ua tuuina mai e Ieova iā i tatou ta'ito'atasi.

² Peita'i, e faato'ā faafofoga mai lava Ieova pe afai e tatou te tatalo atu i le auala e finagalo i ai o ia. E faapefea ona faia lenā mea? Se'i o tatou iloiloaina po o le ā le faamatalaga o loo i le Tusi Paia e uiga i tatalo.

AISEĀ E TATAU AI ONA TATALO IĀ IEOVA?

³ E finagalo Ieova e te tatalo pe talanoa atu iā te ia. E faapefea ona tatou iloa lenā manatu? Faamolemole

1, 2. (a) Aiseā e te manatu ai o le tatalo o se meaalofa faapitoa? (e) Aiseā e mana'omia ai ona tatou iloa a'oa'oga o loo i le Tusi Paia e uiga i le tatalo?

3. Aiseā e tatau ai ona e tatalo iā Ieova?

faitau le Filipi 4:6, 7. Se'i mafaufau i lenā valaaulia māfana. E naunau moni mai lava Ieova o le Alii Pule Silisili Ese o le lagi ma le lalolagi iā te oe, ma e finagalo ina ia e faailoa atu iā te ia ou lagona ma ou faafitauli.

⁴ E fesoasoani le tatalo iā i tatou ina ia maua ai se faiā vavalalata ma Ieova. Pe a talanoa e lē aunoa ni uō ma faailoa atu e le tasi i le isi ona manatu, popolega ma faalogona, o le a atili faamalosia ai le la faauōga. E talitutusa lenā ma le tatalo atu iā Ieova. Ua ia faailoa mai iā te oe e ala i le Tusi Paia ona manatunatuga ma faalogona, faapea mea o le a ia faia i le lumana'i. E mafai fo'i ona e faailoa atu iā te ia ou faalogona loloto, e ala i le talanoa atu iā te ia e lē aunoa. O lou faia faapea, o le a atili faamalosia ai la oulua faauōga ma Ieova.—Iakopo 4:8.

O LE Ā E TATAU ONA TATOU FAIA INA IA FAAFOFOGAINA AI A TATOU TATALO E IEOVA?

⁵ Pe e faafofoga Ieova i tatalo uma? E leai. I aso o le perofeta o Isaia, na fetalai atu ai Ieova i le fanauga a Isaraelu: “E tusa lava pe tele ni a outou tatalo e fai, ou te lē faalogo atu lava i ai; auā ua tutumu o outou lima i le faamasaatoto.” (Isaia 1:15) O lea pe a tatou lē faateete, e tatou te ono faia ai ni mea e inosia e Ieova ma i'u atu ai i le lē faafofogaina o a tatou tatalo.

⁶ Pe a tatou manana'o e faafofoga mai Ieova i a

4. E faapefea i lou tatalo e lē aunoa iā Ieova ona faamalosia ai lau faauōga ma ia?

5. E faapefea ona tatou iloa e lē faafofoga Ieova i tatalo uma?

6. Aiseā e tāua tele ai le iai o le faatuatua, ma e faapefea ona e faamaonia atu e te faatuatua?

E finagalo “Lē na faia le lagi ma le lalolagi” e faafofoga mai i a tatou tatalo.—Salamo 115:15



tatou tatalo, e tatau ona tatou faatuatua iā te ia. (Mareko 11:24) Ua faapea mai le aposetolo o Paulo: “A aunoa ma le faatuatua e lē mafai ona faafiafiaina ai o ia, auā o lē e faalatalata atu i le Atua, e tatau ona ia talitonu o loo soifua o ia, ma e na te tauia ē e matuā sa’ili iā te ia.” (Eperu 11:6) Ae e lē lava le tau ina fai atu e tatou te faatuatua. E mana’omia ona faamaonia lo tatou faatuatua, e ala i le usiusita’i iā Ieova i aso uma.—**Faitau le Iakopo 2:26.**

⁷ E tatau ona tatou faaalua le lotomaulalo ma le faaaloalo a o tatalo atu iā Ieova. Aiseā? Pe a tatou talanoa i se tupu po o se palemia, e tatou te talanoa atu i se auala faaaloalo. O Ieova o le Atua o Lē e ona le malosi uma lava. Pe e lē tatau la ona sili atu le faaaloalo ma le lotomaulalo e tatou te faaalua pe a talanoa atu iā te ia? (Kenese 17:1; Salamo 138:6) E tatau fo’i ona moni

7. (a) Aiseā e tatau ai ona tatou faaalua le lotomaulalo ma le faaaloalo a o tatalo atu iā Ieova? (e) E faapefea ona tatou faaalua atu e moni a tatou tatalo ma e sau mai i o tatou loto?

a tatou tatalo iā Ieova ma ia sau mai i le loto, ae lē o le tautū i upu ua tatou masani ai.—Mataio 6:7, 8.

8 O le ā se isi laasaga tāua e tatou te faia a o tatalo atu iā Ieova? E tatau ona tatou faia taumafaiga uma e gaoioi ai e ōgatusa ma mea o loo tatou tatalo ai. O se faata'ita'iga, pe a tatou tatalo iā Ieova mo o tatou mana'oga i aso ta'itasi, e lē tatau la ona tatou paiē ma faatalitalia e foa'i mai e Ieova mea e mana'omia, e ui e mafai ona tatou galulue ina ia maua na mea. E tatau ona tatou galulue mamafa, ma talia po o le ā lava le galuega e mafai ona tatou faia. (Mataio 6:11; 2 Tesalonia 3:10) Pe afai fo'i e tatou te tatalo iā Ieova mo le fesoasoani ina ia manumalo mai i le faia o se mea sesē, e tatau la ona tatou 'alofia so o se tulaga e ono faaosoosoina ai i tatou. (Kolose 3:5) Se'i o tatou iloilo ina nisi o fesili masani e faatatau i le tatalo.

FESILI MASANI E FAATATAU I LE TATALO

9 O ai e tatau ona tatou tatalo i ai? Na a'oa'o e Iesu ona soo ina ia tatalo i lo 'tatou Tamā i le lagi.' (Mataio 6:9) Na fetalai fo'i o ia: "O a'u o le ala, o le upu moni ma le ola. E leai se tasi e alu atu i le Tamā pe a lē ui mai iā te a'u." (Ioane 14:6) O lea, e **na o** Ieova lava e tatau ona tatou tatalo i ai e ala i le **suafa** o Iesu. O le ā le uiga o le tatalo e ala i le suafa o Iesu? Ina ia talia e Ieova a tatou tatalo, e mana'omia ona tatou faaalua le faaaloalo i tulaga faapitoa na tuuina atu e Ieova iā Iesu. E pei ona tatou a'oa'o ina, na afio mai Iesu i le

8. Pe a tatou tatalo e faatatau i se mea, o le ā se isi laasaga tāua e tatau ona tatou faia?

9. O ai e tatau ona tatou tatalo i ai, ma o le ā ua tatou a'oa'o ina mai i le Ioane 14:6 e faatatau i le tatalo?

lalolagi ina ia lavea'iina i tatou mai i le agasala ma le oti. (Ioane 3:16; Roma 5:12) Na tofia fo'i e Ieova Iesu e aveva ma Ositaulaga Sili ma Faamasino.—Ioane 5:22; Eperu 6:20.

10 Pe e tatau ona iai se auala faapitoa e tatou te tutū pe nonofo ai a o tatalo? E leai, e lē o faapea mai Ieova e tatou te tootutuli, nonofo pe tutū pe a tatalo atu. Ua tatou a'oa'oina mai i le Tusi Paia, e mafai ona tatou talanoa atu iā Ieova i so o se auala lava ae ia faaaloalo. (1 Nofoaiga a Tupu 17:16; Neemia 8:6; Tanielu 6:10; Mareko 11:25) O le mea e sili ona tāua iā Ieova, o le sa'o lea o le uuna'iga e tatou te tatalo atu ai, ae e lē o le auala e tatou te tutū pe nonofo ai a o tatalo atu. E mafai ona tatalo leotele pe tatalo lē leoa fo'i e tusa lava po o fea o loo tatou iai, ma i so o se taimi lava. Pe a tatou tatalo iā Ieova, e tatou te talitonu o le a ia faafofoga mai e tusa lava pe e lē lagona mai e isi tagata.—Neemia 2:1-6.

11 O ā mea e mafai ona ta'ua i a tatou tatalo? E mafai ona tatou tatalo mo so o se mea lava e tusa ai ma le finagalo o Ieova. Ua ta'ua i le Tusi Paia: “Po o ā lava mea tatou te talosaga atu ai e tusa ma lona finagalo, e faafofoga mai lava o ia iā i tatou.” (1 Ioane 5:14) Pe e mafai ona tatou tatalo e faatatau i mea e patino iā i tatou? Ioe e mafai. E tatau ona pei le tatalo iā Ieova o le talanoa atu i se uō mamae. E mafai ona tatou faailoa atu iā Ieova so o se mea lava o loo i o tatou loto ma mafaufau. (Salamo 62:8) E mafai ona

10. Pe e tatau ona iai se auala faapitoa e tatou te tutū pe nonofo ai a o tatalo? Faamatala.

11. O ā nisi o mea e mafai ona ta'ua i a tatou tatalo iā Ieova?

tatou tatalo atu iā te ia ina ia foa'i mai lona agaga paia malosi, e fesoasoani iā i tatou e faia le mea sa'o. (Luka 11:13) E mafai fo'i ona tatou tatalo mo le atamai e faia ai filifiliga sa'o, ma le malosi e onosaia ai faigatā. (Iakopo 1:5) E tatau ona tatou talosaga atu iā Ieova e faa-magalo mai a tatou agasala. (Efeso 1:3, 7) E tatau fo'i ona tatou tatalo mo isi, e aofia ai o tatou aiga ma o tatou uso ma tuafāfine i le faapotopotoga.—Galuega 12:5; Kolose 4:12.

12 O le ā e tatau ona faatāua i a tatou tatalo? E tatau ona faatāua Ieova ma lona finagalo. E tatau ona tatou faafetai atu iā te ia mai i o tatou loto, mo mea uma ua ia faia mo i tatou. (1 Nofoaiga a Tupu 29:10-13) E tatou te iloa lenā mea, talu ai a o iai Iesu i le lalolagi, na ia a'oa'oina ai ona soo i le auala e tatalo ai. (**Faitau le Mataio 6:9-13.**) Na fetalai Iesu e tatau i ona soo ona muamua tatalo ina ia faapaiaina le suafa o le Atua. Ona sosoo ai lea ma lona faapea mai, e tatau ona tatou tatalo ina ia oo mai le Malo o le Atua ma ia faia le finagalo o Ieova i le lalolagi atoa. Ina ua mǎe'a ona ia ta'ua nei mea e sili ona tāua, ona faato'ā faapea mai lea o Iesu e tatau ona tatalo mo mea e tatou te mana'omia. Pe a tatou ta'ua muamua Ieova ma lona finagalo i a tatou tatalo, e faaalua atu ai o mea ia e sili ona tāua iā i tatou.

13 O le ā le umi e tatau ona tatou tatalo ai? E lē o ta'ua i le Tusi Paia. E mafai ona pupuu pe uumi a tatou tatalo. O se faata'ita'iga, atonu e tatou te faia se tatalo puupuu mo mea'ai, ae fai se tatalo umi pe a faailoa

12. O le ā e tatau ona faatāua i a tatou tatalo?


13. O le ā le umi e tatau ona tatou tatalo ai?

atu iā Ieova o tatou popolega pe faafetai atu fo'i iā te ia. (1 Samuelu 1:12, 15) E tatou te lē manana'ο e faia ni tatalo uumi e tau ina ia faaοfo ai isi, e pei ona sa faia e nisi tagata i aso o Iesu. (Luka 20:46, 47) E lē fiafia Ieova i tatalo faapena. O le mea e tāua iā te ia o lo tatou tatalo atu lea mai i o tatou loto.

14 O le ā le tele e tatau ona tatou tatalo ai? Ua

14. O le ā le tele e tatau ona tatou tatalo ai, ma o le ā ua tatou a'ο-ο'oina mai ai e faatautu iā Ieova?

E mafai ona e tatalo
i so o se taimi





E mafai ona tali mai leova i a tatou tatalo
e ala i le fesoasoani e aumaia e isi Kerisiano

valaaulia i tatou e Ieova e talanoa atu iā te ia e lē aunoa. Ua ta’ua i le Tusi Paia e tatau ona tatou “finafinau i le tatalo,” ma “ia tatalo e lē aunoa.” (Roma 12:12; 1 Tesalonia 5:17) E nofosauni Ieova i taimi uma e faafofoga mai i a tatou tatalo. E mafai ona tatou faafetai atu iā te ia i aso ta’itasi mo lona alofa ma lona limafoa’i. E mafai fo’i ona tatou talosaga atu iā te ia mo lana ta’ita’iga, faamāfanafanaga ma ia foa’i mai le malosi. Pe afai e tatou te faatāua moni lava lo tatou faaeaga o le tatalo atu iā Ieova, o le a tatou faaaogā so o se avanoa e talanoa atu ai iā te ia.

¹⁵ Aiseā e tatau ai ona tatou faapea atu “amene” i le faai’uga o se tatalo? O le upu “amene” o lona uiga

15. Aiseā e tatau ai ona tatou faapea atu “amene” i le faai’uga o se tatalo?

“o lea lava,” pe “ia faapea ona fai.” O se auala lea e faaali atu ai e moni lava upu o loo faia i a tatou tatalo, o lona uiga e faamaoni a tatou upu. (Salamo 41:13) Ua a’oa’oina i tatou i le Tusi Paia, e talafeagai fo’i le faapea atu “amene” i le faai’uga o se tatalo i se leo lē leoa pe leotele fo’i i luma o le lautele, e faailoa atu ai e tatou te ioe i mea na ta’ua i a tatou tatalo.—1 Nofoaiga a Tupu 16:36; 1 Korinito 14:16.

O AUALA E TALI MAI AI LE ATUA I A TATOU TATALO

16 Pe e moni lava e tali mai Ieova i a tatou tatalo? Ioe e tali mai o ia. Ua faamatalaina o ia i le Tusi Paia o le “Faafofoga tatalo.” (Salamo 65:2) E faafofoga ma tali mai Ieova i tatalo a le faitau miliona o tagata lotofaamaoni, ma e tele auala e na te faia ai faapea.

17 E tali mai Ieova i a tatou tatalo e ala i agelu ma ana auauna i le lalolagi. (Eperu 1:13, 14) E tele faaa’o-a’oga o tagata na tatalo e fia malamalama i le Tusi Paia, ma e le’i umi ae asiasi atu i ai se tasi o Molimau a Ieova. Ua faaalua i le Tusi Paia e aofia fo’i agelu i le faalauiloaina atu o le “tala lelei” i le lalolagi atoa. (**Faitau le Faaaliga 14:6.**) O le to’atele fo’i o i tatou sa tatalo iā Ieova e faatatau i se faafitauli po o se mana’oga patino, ma e le’i umi ae maua le fesoasoani na mana’omia mai i se uso po o se tuafafine Kerisiano.—Faataoto 12:25; Iakopo 2:16.

18 E faaaogā e Ieova lona agaga paia e tali mai ai i a tatou tatalo. Pe a tatou tatalo mo se fesoasoani ina ia

16. Pe e moni lava e tali mai Ieova i a tatou tatalo? Faamatala.

17. E faapefea ona tali mai Ieova i a tatou tatalo e ala i agelu ma ana auauna i le lalolagi?

18. E faapefea ona faaaogā e Ieova lona agaga paia ma le Tusi Paia e tali mai ai i a tatou tatalo?

onosaia ai se faafitauli, atonu e faaaogā e Ieova lona agaga paia e aumai ai iā i tatou le ta'ita'iga ma le malosi. (2 Korinito 4:7) E tali mai fo'i Ieova i a tatou tatalo e ala i le Tusi Paia, ma fesoasoani ai iā i tatou e faia ni filifiliga atamai. Pe a tatou faitau i le Tusi Paia, e tatou te ono maua ai ni mau e mafai ona fesoasoani iā i tatou. E mafai fo'i ona uuna'ia e Ieova se tasi o faia sona sao i le sauniga, ina ia faia se tali e fetau lelei ma lo tatou tulaga, pe uuna'ia fo'i se toeaina i le faapopotoga e faailoa mai iā i tatou se manatu mai i le Tusi Paia.—Kalatia 6:1.

19 Peita'i e iai taimi e te ono tuufesili ai, 'Aiseā e lē vave ai ona tali mai Ieova i a'u tatalo?' Manatua, e silafia e Ieova le taimi ma le auala e tali mai ai i a tatou tatalo. E silafia e ia mea e tatou te mana'omia. Atonu e faaaauu pea ona tatou tatalo mo se taimi, ina ia faaalua atu ai e moni lava a tatou upu, ma e tatou te faatuatua moni lava iā Ieova. (Luka 11:5-10) O nisi taimi e tali mai ai Ieova i a tatou tatalo i se auala atonu e tatou te le'i faatalitalia. O se faata'ita'iga, atonu e tatou te tatalo ona o se tulaga faigatā ua tula'i mai. Ae nai lo o le aveesea e Ieova o lenā tulaga faigatā, atonu e na te foa'i mai iā i tatou le malosi ina ia onosaia ai lenā tulaga.—Faitau le Filipi 4:13.

20 Ma'eu se faaeaga mata'ina ua tatou maua e tatalo atu ai iā Ieova! E tatou te mautinoa o le a ia faafofoga mai iā i tatou. (Salamo 145:18) O le tele fo'i e tatou te tatalo atu ai iā Ieova mai i o tatou loto, o le atili fo'i lenā ona malosi o la tatou faauōga ma ia.

19. Aiseā e ono foliga mai ai e lē o tali mai Ieova i a tatou tatalo?

20. Aiseā e tatau ai ona tatou tatalo atu iā Ieova i le tele o taimi?

A'OA'OGA
MONI 1

E FINAGALO IEOVA E FAAFOFOGA
MAI I A TATOU TATALO

“E latalata Ieova iā i latou uma e valaau atu iā te ia,
o i latou uma e valaau atu iā te ia ma le faamaoni.”

—Salamo 145:18

O le ā e tatau ona tatou faia pe a tatou manana’o e
faafofoga mai leova i a tatou tatalo?

Eperu 11:6

E tatau ona tatou faaalua le
faatuatua.

Salamo 138:6

E tatau ona tatou lotomaulalo
ma faaaloalo.

Iakopo 2:26

E tatau ona ōgatusa a tatou
amioga ma a tatou tatalo.

Mataio 6:7, 8

E tatau ona moni a tatou tatalo
ma ia sau mai i le loto. E lē tatau
ona tatou tautū i upu ua tatou
masani ai.

Isaia 1:15

E tatau ona tatou ola e tusa ai
ma le finagalo o le Atua.

A'OA'OGA
MONI 2

FESILI MASANI E FAATATAU
I LE TATALO

O ai e tatau ona tatou tatalo i ai?

Mataio 6:9; Ioane 14:6

Pe e tatau ona iai se auala
faapitoe a tatou te tutū pe nonofo
ai a o tatalo?

1 Nofoaiga a Tupu 17:16;

Neemia 8:5, 6; Tanielu 6:10;

Mareko 11:25

Pe e faafofoga mai leova i a tatou
tatalo lē leoa?

Neemia 2:1-6

O le ā le umi e tatau ona tatalo ai?

1 Samuelu 1:12, 15;

Luka 20:46, 47

O le ā le tele e tatau ona tatou
tatalo ai?

Roma 12:12; 1 Tesalonia 5:17

Aiseā e tatou te faapea atu ai
“amene” i le faai’uga o se tatalo?

1 Nofoaiga a Tupu 16:36;

1 Korinito 14:16

**A'OA'OGA
MONI 3**
**O MEA E MAFAI ONA TA'UA
I A TATOOU TATALO**

“Po o ā lava mea tatou te talosaga atu ai e tusa ma lona finagalo, e faafofoga mai lava o ia iā i tatou.”—1 Ioane 5:14

O ā nisi o mea e mafai ona ta'ua i a tatou tatalo?

Mataio 6:9, 10

Tatalo ina ia faataunuuna le finagalo o leova.

1 Nofoaiga a Tupu 29:10-13

Tatalo e faaalua ai le lotofaafetai.

Mataio 6:11-13

Tatalo mo mea e tatou te mana'omia ma o tatou popolega.

Luka 11:13

Tatalo mo le agaga paia.

Iakopo 1:5

Tatalo mo le atamai e faia ai filifiliga lelei.

Filipi 4:13

Tatalo mo le malosi e tumau ai.

Efeso 1:3, 7

Tatalo mo le faamagaloina o a tatou agasala.

Galuega 12:5

Tatalo mo isi.

**A'OA'OGA
MONI 4**
**E TALI MAI IEOVA
I A TATOOU TATALO**

“Le Faafofoga tatalo e, e ō atu iā te oe tagata uma lava.”
—Salamo 65:2

O ā auala e tali mai ai leova i a tatou tatalo?

Faataoto 12:25; Faaaliga 14:6

E mafai e leova ona faaaogā agelu po o tagata e fesoasoani mai iā i tatou.

2 Korinito 4:7

E aumai e lona agaga paia le fesoasoani e tatou te mana'omia.

Filipi 4:6, 7, 13

E foa'i mai e leova le filemu ma le malosi e tatou te mana'omia ina ia tumau ai.

Kalatia 6:1; 2 Timoteo 3:16, 17

E na te foa'i mai le atamai e ala i le Tusi Paia ma le faapotopotoga.

PE E TATAU ONA TUUINA ATU LO'U OLA I LE ATUA MA PAPATISOINA?

E TELE a'oa'oga moni o le Tusi Paia ua e a'oa'oina a o faagasolo lau su'esu'ega i lenei tusi, e pei o le folafolaga a le Atua mo le ola e faavavau, le tulaga o ē ua maliliu ma le faamoemoe o le toetū. (Failauga 9:5; Luka 23:43; Ioane 5:28, 29; Faaaliga

1. O le ā e te ono mafaufau i ai pe a mǎe'a ona e su'esu'eina lelei lenei tusi?



21:3, 4) Atonu ua amata ona e auai i sauniga a Molimau a Ieova, ma ua e talitonu o i latou o le tapua'iga moni. (Ioane 13:35) Atonu ua amata ona atia'e sa oulua faauōga māfana ma Ieova, ma atonu ua e filifili e auauna iā te ia. O lea e te ono mafaufau ai, 'O le ā e tatau ona ou faia i le taimi lenei ina ia auauna ai i le Atua?'

² O le mea lenā sa mafaufau i ai se tamāloa Aitioppe sa ola i taimi o Iesu. Ina ua mavae le toe faatūina mai o Iesu, na tala'i atu ai lona soo o Filipino i lenā tamāloa. Na faamaonia atu e Filipino i lenei tamāloa o Iesu o le Mesia. Na matuā pā'ia le loto o lenā tamāloa ona o mea na ia a'oa'oina. O lea, na ia faapea atu ai loa: "Faauta! O le vai, o le ā se mea e taofia ai a'u mai i le papatisoina?"—Galuega 8: 26-36.

³ Ua a'oa'oina ma le manino i le Tusi Paia, pe afai e te fia auauna iā Ieova e tatau ona e papatiso. Na fetalai Iesu i ona soo: "[Ia] fai tagata o nuu uma lava ma soo, ma **papatiso atu iā i latou.**" (Mataio 28:19) Na faataatia fo'i e Iesu le faaa'oa'oga e ala i le papatisoina o ia. Sa faatofu atoa lona tino i le vai, ae e lē na o le faatulutulu o le vai i lona ao. (Mataio 3:16) Pe a papatisoina fo'i se Kerisiano i aso nei, e tatau fo'i ona faatofu atoa lona tino i le vai.

2. Aiseā na mana'o ai se tamāloa Aitioppe e papatisoina o ia?

3. (a) O le ā le faatonuga na avatu e Iesu i ona soo? (e) O le ā le auala e tatau ona papatisoina ai se tagata?

⁴ Pe a e papatiso, e faailoa atu ai i isi e te mana'oma'oni lava e avea oe ma uō a le Atua ma auauna iā te ia. (Salamo 40:7, 8) O lea, e te ono tuufesili ai, 'O ā laasaga e mana'omia ona ou faia ina ia mafai ai ona ou papatiso?'

POTO MA LE FAATUATUA

⁵ A o le'i mafai ona papatisoina oe, e tatau ona e **iloa** Ieova ma Iesu. O lona uiga, e tatau ona e maua le poto e faatatau iā Ieova ma Iesu. Na amata ona e maua lenā poto i le taimi na e su'esu'eina ai le Tusi Paia. (**Faitau le Ioane 17:3.**) Peita'i, e tele isi mea e ao ona e iloaina. O loo ta'ua i le Tusi Paia e tatau ona "faatumuina [oe] i le poto sa'o" e faatatau i le finagalo o Ieova. (Kolose 1:9) O le a fesoasoani sauniga faa-Kerisiano a Molimau a Ieova iā te oe, ina ia atili vavalalata ai la oulua faiā ma Ieova. O se tasi na o mā-fuaaga tāua e tatau ai ona e auai e lē aunoa i na sauniga.—Eperu 10:24, 25.

⁶ O le mea moni, e lē faatalitalia e Ieova ina ia e iloa mea uma i le Tusi Paia a o le'i papatisoina oe. E le'i faatalitalia e Ieova le tamāloa Aitiope ina ia iloa mea uma a o le'i papatisoina o ia. (Galuega 8:30, 31) E faaauau pea ona tatou a'oa'oina mea e faatatau i le Atua. (Failauga 3:11) Ae ina ia mafai

4. O le ā ua e faailoa atu i isi pe a papatisoina oe?

5. (a) O le ā le mea muamua e tatau ona e faia a o le'i mafai ona papatisoina oe? (e) Aiseā e tāua ai sauniga faa-Kerisiano?

6. O le ā le tele e mana'omia ona e iloa e faatatau i le Tusi Paia a o le'i papatisoina oe?

ona papatisoina oe, e mana'omia ona e iloa ma talia a'oa'oga faavae o loo i le Tusi Paia.—Eperu 5:12.

⁷ O loo ta'ua i le Eperu 11:6: “A aunoa ma le faatuatua e lē mafai ona faafiafiaina [le Atua].” O lea, e mana'omia ona e faaalua le faatuatua a o le'i mafai ona papatisoina oe. O loo faamatalaina i le Tusi Paia sa iai nisi i le aai anamua o Korinito na faalogo i mea sa a'oa'oina e soo o Iesu, ma o le i'uga, na “talitonu ma papatisoina i latou.” (Galuega 18:8) I se tulaga talitutusa, o lou su'esu'eina o le Tusi Paia ua fesoasoani iā te oe ina ia e **faatua-tua** ai i folafolaga a le Atua, ma le aogā o le taulaga togioa a Iesu lea e mafai ona faasa'olotoina ai i tatou mai i le agasala ma le oti.—Iosua 23:14; Galuega 4:12; 2 Timoteo 3:16, 17.

FAAILOA ATU I ISI A'OA'OGA MONI O LE TUSI PAIA

⁸ A o faateleina mea e te a'oa'oina mai i le Tusi Paia ma mātauina le aogā i lou olaga, o le a atili ai ona malosilou faatuatua. O le a e mana'o e **faailoa atu i isi mea o loo e a'oa'oina**. (Ieremia 20:9; 2 Korinito 4:13) Ae o ai e tatau ona e faailoa atu i ai nei mea ua e a'oa'oina?

⁹ Atonu e te mana'o e faailoa atu mea ua e a'o-

7. Ua faapefea ona fesoasoani iā te oe lou su'esu'eina o le Tusi Paia?

8. O le ā o le a uuna'ia ai oe e faailoa atu i isi mea ua e a'oa'oina?
9, 10. (a) Atonu o ai e mafai ona e amata faailoa atu i ai mea ua e a'oa'oina? (e) O le ā e tatau ona e faia pe afai e te fia tala'i faatasi ma le faapotopotoga?

a'oina i ou aiga, uō, tuaoi po o i latou e tou te faigaluega faatasi. O se mea lelei le faia faapea. Peita'i, ia e faia i taimi uma i se auala agalelei ma alofa. I se taimi mulimuli ane, o le a mafai ona e tala'i faatasi ma le faapotopotoga. Pe afai ua e fia tala'i, e mafai ona e talanoa atu i le Molimau a Ieova o loo a'oa'oina oe e faatatau i le Tusi Paia, ma faailoa atu iā te ia e te fia auai i le galuega tala'i faatasi ma le faapotopotoga. Pe afai e manatu lenā tagata ua mafai ona e tala'i ma o loo e ola e tusa ai ma ta'iala a le Tusi Paia, ona faia lea o se tou talanoaga ma ni toeaina se to'alua mai i le faapotopotoga.

10 O le ā o le a faia i lenā talanoaga? O le a talanoa atu nei toeaina iā te oe ina ia iloa ai po ua e malamalama ma talitonu i a'oa'oga faavae o le Tusi Paia, ola e tusa ai ma ta'iala o le Tusi Paia i aso uma, ma pe e te mana'o moni lava e avea o se tasi o Molimau a Ieova. Ia manatua e leoleoina e toeaina sui uma o le faapotopotoga, e aofia ai ma oe. O lea, aua e te fefe e talanoa atu iā i latou. (Galuega 20:28; 1 Peteru 5:2, 3) Pe a mae'a lenā talanoaga, o le a faailoa atu e toeaina po ua mafai ona e tala'i faatasi ma le faapotopotoga.

11 Atonu e faamatala atu e toeaina iā te oe, e mana'omia ona e faia nisi suiga a o le'i mafai ona e tala'i faatasi ma le faapotopotoga. Aiseā e tāua tele

11. Aiseā e tāua tele ai ona e faia ni suiga a o le'i mafai ona e tala'i faatasi ma le faapotopotoga?

ai lou faia o nei suiga? Talu ai o loo fai i tatou ma sui o Ieova pe a tatou talanoa atu i isi e faatatau iā te ia, o lea, e tatau ai ona tatou ola i se auala e faamamaluina ai o ia.—1 Korinito 6:9, 10; Kalatia 5:19-21.

SALAMŌ MA LILIU

¹² E iai se isi mea e tatau ona e faia a o le'i mafai ona papatisoina oe. Na ta'ua e le aposetolo o Peteru: "O le mea lea, inā **salamō** ia ma liliu, ina ia soloiese a outou agasala." (Galuega 3:19) O le ā le uiga o le salamō? O lona uiga, o le matuā faanoanoa lea i so o se mea sesē lava sa tatou faia. O se faata'ita'iga, pe afai sa e ola i se olaga lē mamā taufeusua'iga, e mana'omia la ona e salamō. E tusa fo'i pe na e faia taumafaiga uma e fai le mea sa'o i lou olaga atoa, e mana'omia lava ona e salamō, talu ai o i tatou uma lava e agasala ma e mana'omia ona talosaga atu i le Atua mo lana faamagaloga.—Roma 3:23; 5:12.

¹³ Pe e lava le tau ina faanoanoa mo mea sesē sa e faia? E leai. Na faapea mai Peteru e mana'omia fo'i ona e "**liliu**." O lona uiga e mana'omia ona e teena so o se amioga sesē lava sa faia i le taimi ua te'a, ma amata loa ona faia le mea sa'o. Ina ia faata'ita'i lenei mea, se'i faapea o le taimi muamua lea ua e malaga atu ai i se nofoaga patino. E le'i umi ae e iloa ane e sesē le itu o loo e aga'i i ai. O le

12. Aiseā e mana'omia ai ona salamō tagata uma?

13. O le ā le uiga o le "liliu"?

ā lau mea o le a fai? E mautinoa o le a e alu lemū, tu, liliu ma aga'i atu i le itu sa'o ina ia taunuu ai i le nofoaga o loo e fia aga'i atu i ai. I se tulaga talitutusa, a o e su'esu'eina le Tusi Paia, e te ono mā-tauina ai ni masaniga po o ni vala i lou olaga e mana'omia ona faia ai ni suiga. Ia e lotomalie e "liliu" pe faia suiga mana'omia, ma amata ona faia le mea sa'o.

TUUINA ATU LOU OLA I LE ATUA

14 O se isi laasaga tāua e mana'omia ona e faia a o le'i papatisoina oe, o le **tuuina atu** lea o lou ola iā Ieova. Pe a tuuina atu lou ola iā Ieova, e te faia se tatalo e ta'utino atu ai o le a e tapua'i tau lava o ia, ma o le a avea le faia o lona finagalo ma mea e sili ona tāua i lou olaga.—Teuteronome 6:15.

15 E tai pei le ta'utino atu iā Ieova o le a e au-auna tau lava o ia, o lou ta'utino atu lea i se tasi e te alofa i ai o le a oulua faatasi i le olaga atoa. Se'i faapea o loo faia se faigāuō a se alii ma se tama'ita'i. O le tele o mea e iloa e le alii e faatatau i le tama'ita'i, o le atili fo'i lenā ona alofa i ai ma mana'o ai e faaipoipo iā te ia. E ui lava o se filifiliga e tatau ona mafaufau lelei i ai, ae ua talia e lea alii lenei tiute tauave talu ai e alofa i le tama'ita'i.

16 A o e a'oa'oina mea e faatatau iā Ieova, o le a oo ina e alofa iā te ia ma mana'o e faia le mea sili

14. E faapefea ona e tuuina atu lou ola i le Atua?

15, 16. O le ā e uuna'ia ai se tasi e tuuina atu lona ola i le Atua?

e auauna ai iā te ia. O lenei mea o le a uuna'ia ai oe e faia se tatalo e ta'utino atu ai o le a e auauna iā te ia. Ua ta'ua i le Tusi Paia e tataui so o se tasi e fia mulimuli iā Iesu ona “faafitia e ia o ia lava.” (Mareko 8:34) O le ā le uiga o lenā manatu? O lona uiga, e te faamuamua i lou olaga le usiusita'i iā Ieova. E sili atu le tāua o le mea e finagalo i ai Ieova nai lo o ou faanaunauga ma ou sini.—**Faitau le 1 Peteru 4:2.**

AUA E TE FEFE E TUUINA ATU LOU OLA

17 O nisi tagata e lē tuuina atu o latou ola iā Ieova, ona o le fefefe ne'i lē mafai ona latou ola e tusa ai ma la latou ta'utinoga e auauna iā te ia. E latou te lē manana'o e faatigā le finagalo o Ieova. Atonu e latou te manatu fo'i pe afai e lē tuuina atu o latou ola iā Ieova, e lē faasalaina fo'i la i latou e Ieova mo gaoioiga e latou te faia.

18 O lou alofa mo Ieova o le a fesoasoani iā te oe e manumalo ai i le faalogona fefe ina ne'i e faatigā i lona finagalo. O lou alofa mo ia, o le a e faia ai le mea sili e ola ai e tusa ma lau ta'utinoga na faia iā te ia. (Failauga 5:4; Kolose 1:10) O le a e lē manatu ai e faigatā tele ona e faia le finagalo o Ieova. Na tusi le apusetolo o Ioane: “O le alofa lenei i le Atua, ia tatou tausi i ana poloa'iga; ma e lē mafa ana poloa'iga.”—1 Ioane 5:3.

17. Aiseā ua lē tuuina atu ai e nisi o latou ola iā Ieova?

18. O le ā o le a fesoasoani iā te oe e manumalo ai i le faalogona fefe ina ne'i e faatigā i le finagalo o Ieova?

19 E lē mana'omia ona avea oe o se tagata lelei atoatoa ina ia tuuina atu ai lou ola iā Ieova. E na te lē o faatalitalia i tatou e faia se mea e sili atu nai lo o le mea e mafai ona tatou faia. (Salamo 103:14) O le a ia fesoasoani iā te oe e faia le mea sa'o. (Isaia 41:10) Ia faatuatua iā Ieova ma lou lotoatoa, "ona ia faasa'oina lea o ou ala."—Faataoto 3:5, 6.

TA'UTINOGA I LUMA O TAGATA E MAUA AI LE FAAOLATAGA

20 Pe e te manatu ua e nofosauni e tuuina atu lou ola iā Ieova? Pe a mǎe'a ona tuuina atu lou ola iā Ieova, ua e nofosauni nei mo le isi laasaga. E mana'omia ona **papatisoina** oe.

21 Ia faailoa atu i le sooupu o le 'autoeaina o la outou faapotopotoga, ua mǎe'a ona tuuina atu lou ola iā Ieova ma ua e fia papatiso. O le a ia faatulaga ni toeaina ina ia autaluina ma oe a'oa'oga faavae o le Tusi Paia. Afai e ioe na toeaina ua e agavaa mo le papatisoga, o le a latou faailoa atu iā te oe e mafai ona e papatiso i se fonotaga po o se tauaofiaga o loo loma a Molimau a Ieova. I na faatasi-tasiga, o le a faia ai se lauga lea e faamatalaina ai le uiga o le papatisoga. Ona fai atu lea e le failauga o ni fesili se lua i ē uma o loo fuafua e papatiso. O lou taliina o na fesili, o le a e "ta'utino atu ai

19. Aiseā e lē tatau ai ona e fefe e tuuina atu lou ola iā Ieova?

20. O le ā le isi laasaga pe a mǎe'a ona tuuina atu lou ola i le Atua?

21, 22. E faapefea ona e 'ta'utino atu lou faatuatua i luma o tagata'?



A o le'i papatisoina oe, e
tatau ona e su'esu'e i le
Tusi Paia

O le faatuatua e
tatau ona uuna'ia
ai oe e faailoa atu
i isi ou talitonuga



i luma o tagata" lou faatuatua.—Roma
10:10.

22 Ona sosoo ai lea ma le papatiso-
ina o oe. O le a faatofuina atoa lou
tino i le vai. O le papatisoga e faailoa
atu ai i tagata uma, ua tuuina atu lou
ola iā Ieova ma ua avea nei oe o se tasi
o Molimau a Ieova.

O LE Ā LE UIGA O LOU PAPATISOGA?

23 Na fetalai Iesu o le a papatisoina ona soo “i le suafa o le Tamā, ma le Atalii, ma le agaga paia.”

23. O le ā le uiga o le papatisoina “i le suafa o le Tamā, ma le Atalii, ma le agaga paia”?

Po ua e ta’utino atu iā leova
o le a e auauna iā te ia?

O le papatisoina o oe,
ua faalia ai e te mana’o
e faia le finagalo
o le Ātua



(Faitau le Mataio 28:19.) O le ā le uiga o lenā manatu? O lona uiga, e te amana'ia le pule a Ieova ma le matafaioi a Iesu i le faataunuuina o le finagalo o le Atua, faapea le auala o loo faaaogā ai e le Atua lona agaga paia ina ia faataunuu lona finagalo.—Salamo 83:18; Mataio 28:18; Kalatia 5:22, 23; 2 Peteru 1:21.

²⁴ E iai se uiga tāua o lou papatisoga. Pe a faa-tofuina lou tino i le vai, o lona uiga ua e lafoa'ia pe fulitua i lou olaga sa iai muamua. O lou toe ea a'e mai i le vai, ua faaalua ai o le a e amata se olaga fou i le faia o le finagalo o le Atua, ma o le a e auaua iā te ia se'ia oo i le faavavau. Ia manatua, e lē o tuuina atu lou ola i se tagata, se faalapotopotoga po o se galuega. O lea ua tuuina atu lou ola iā Ieova.

²⁵ O lou tuuina atu o le a fesoasoani iā te oe e atia'e ai se faauōga māfana ma le Atua. (Salamo 25:14) E lē o le uiga o lenei mea e faapea, pe a papatiso se tagata ona mautinoa lea o lona mauaina o le faaolataga. Na tusi le aposetolo o Paulo: "Ia faaauau ona outou galulue mo lo outou faaolataga, i le mata'u ma le gatete." (Filipi 2:12) O le papatisoga ua na o se amataga. Ae e faapefea la ona e mafuta vavalalata atu pea iā Ieova? O le a taliina lenā fesili i le mataupu mulimuli o lenei tusi.

24, 25. (a) O le ā le uiga o le papatisoga? (e) O le ā o le a tatou iloiloina i le mataupu mulimuli?

A'OA'OGA
MONI 1

PE E TATAU ONA OU PAPATISO?

“Faauta! O le vai, o le ā se mea e taofia ai a’u mai i le papatisoina?”—Galuega 8:36

Aiseā e tatau ai ona e papatiso? O le ā le auala e tatau ona papatisoina ai oe?

O le papatisoga e faaalua ai ua e fuitua i lou olaga sa iai muamua, ma ua e amata se olaga fou i le faia o le finagalo o le Atua.

Mataio 28:19, 20

E mana’omia ona papatisoina oe ina ia auaua ai iā leova.

Salamo 40:8

O le papatisoga e faailoa atu ai i isi e te mana’o e auaua i le Atua.

Mataio 3:16

E tatau ona faatofu atoa lou tino i le vai e pei o le auala sa papatisoina ai Iesu.

A'OA'OGA
MONI 2

E LĒ FAATALITALIA E IEOVA
SE MEA E SILI ATU NAI LO
O LE MEA E TE MAFAIA

“O le alofa lenei i le Atua, ia tatou tausi i ana poloa’iga; ma e lē mamafa ana poloa’iga.”—1 Ioane 5:3

Aiseā e lē tatau ai ona e fefe e tuuina atu lou ola iā leova?

Salamo 103:14; Isaia 41:10

E lē mana’omia ona avea oe o se tagata lelei atoatoa ina ia tuuina atu ai lou ola iā leova. O le a ia fesoasoani mai iā te oe e faia le mea sa’o.

Kolose 1:10

O lou alofa mo leova o le a fesoasoani iā te oe e manumalo ai i le faalogona fefe ina ne’i e faatigā i lona finagalo.

LAASAGA E MANA'OMIA ONA
UIA A O LE'I OO I LE PAPATISOGA

“Lo’u Atua e, ou te fiafia e fai lou finagalo, ua i totonu fo’i iā te a’u lau tulafono.”—Salamo 40:8

O le ā e mana’omia ona e faia ina ia tuuina atu ai lou ola iā leova?

Ioane 17:3

SU’ESU’E I LE AFIGA A LE ATUA
Ia iloa leova ma Iesu Keriso.
O le tele o mea e te a’oa’oina e
faatatau iā i la’ua, o le faateleina
fo’i lenā o lou alofa mo i la’ua.

Eperu 11:6

FAAMALOSIA LOU FAATUATUA
Ia talitonu atoatoa i folafolaga a
le Atua, ma le aogā o le taulaga a
Iesu ina ia faasa’olotoina ai i tatou
mai i le agasala ma le oti.

Galuega 3:19

SALAMŌ
O lona uiga o le matuā faanoanoa
lea i mea sesē uma sa e faia i le
taimi ua te’a.

LILIU

O lona uiga o le lē toe faia lea o
so o se amioga sesē ae ia faia le
mea sa’o.

1 Peteru 4:2

TUUINA ATU LOU OLA
E tuuina atu lou ola iā leova pe a
e faia se tautoga e ala i le tatalo,
ina ia tapua’i atu iā te ia ma avea
le faia o lona finagalo ma mea e
sili ona tāua i lou olaga.

IA MAFUTA VAVALALATA ATU PEA IĀ IEOVA

SE'I faapea o loo e savali i le auala, ae agi malosi mai se matagi. Ua amata ona pōuliuli le lagi, emo uila, pāpā faititili ma totō mai timuga. Ua e faatopetope atu e su'e se mea e te lafi ai, ma ua e iloa atu se nofoaga e te malu ai. E mautinoa lou matuā fiafia.

² I se tulaga talitutusa, e faapena fo'i le tulaga ua iai le lalolagi i aso nei, o loo faateteleina le leaga. E te ono mafaufau, 'O fea e mafai ona ou maua ai le puipuiga?' Na tusi se faisalamo o le Tusi Paia: "Ou te fai atu iā Ieova: 'O oe o lo'u sulufa'iga ma o lo'u 'olo malosi, o lo'u Atua o lē ou te faatuatua i ai.' " (Salamo 91:2) O le mea moni, e mafai e Ieova ona aumaia se mapusaga mo o tatou faafitauli i le taimi lenei, ma ua ia aumaia se faamoemoe matagofie mo le lumana'i.

³ E faapefea ona puipuia i tatou e Ieova? E mafai ona ia fesoasoani mai iā i tatou ina ia taulimaina so o se faafitauli o loo tatou fesaga'ia. E sili atu fo'i lona malosi nai lo o se isi lava atonu o loo taumafai e faia se mea e tatou te afāina ai. E tusa fo'i pe e tupu se mea leaga iā i tatou i le taimi lenei, ae e tatou te mautinoa o le a faaleleia e Ieova i le lumana'i mea

1, 2. O fea e mafai ona tatou maua ai le puipuiga i aso nei?

3. E faapefea ona avea Ieova ma o tatou sulufa'iga?

uma ua faaleagaina. Ua faalaeiauina i tatou i le Tusi Paia: "Ia outou faatumau iā te outou i le alofa o le Atua." (Iuta 21) E mana'omia ona tatou mafuta vavalalata atu iā Ieova, ina ia mafai ai ona maua lana fesoasoani i taimi faigatā. Ae e faapefea ona tatou faia lenā mea?

TALI ATU I LE ALOFA O LE ATUA

⁴ Ina ia faatumauina la tatou faiā vavalalata ma Ieova, e mana'omia ona tatou iloa le tele o lona alofa iā i tatou. Se'i mafaufau i mea uma ua faia e Ieova mo i tatou. Ua ia aumaia se lalolagi matagofie ma faatumulia i laau matagofie ma laau eseese. Ua ia aumaia fo'i mea'ai susua ma vai mamā e feinu ai. E ala i le Tusi Paia, ua a'oa'oina ai e Ieova i tatou i ona uiga matagofie ma lona suafa. E sili atu i lenā, na ia faaalua lona alofa iā i tatou ina ua ia auina mai lona Alo pele o Iesu i le lalolagi, e foa'i mai lona ola mo i tatou. (Ioane 3:16) Ona o lenā taulaga, ua tatou maua ai se faamoemoe matagofie mo le lumana'i.

⁵ Ua faatulagaina e Ieova lona Malo lea e pule ai Keriso, o se pulega i le lagi lea ua toetiiti aveesea mafatiaga uma. E ala i le Malo, o le a avea le lalolagi o se parataiso, lea o le a nonofo ai tagata uma i le filemu ma le fiafia e oo i le faavavau. (Salamo 37:29) O se isi auala ua faaalua mai ai e Ieova lona alofa, o le a'oa'oina lea o i tatou i le auala sili e ola ai i le taimi lenei. Ua ia valaaulia fo'i i tatou e tatalo

4, 5. Ua faapefea ona faaalua mai e Ieova lona alofa mo i tatou?

atu iā te ia, ma e nofosauni o ia i taimi uma e faafofoga mai i a tatou tatalo. Ua faaalua mai ma le manino e Ieova lona alofa mo i tatou uma ta'ito'a-tasi.

6 O le ā le auala e tatau ona e tali atu ai i le alofa o Ieova? Ia faailoa atu iā te ia lou lotofaafetai mo mea uma ua ia faia mo oe. Pagā lea, o le to'atele o tagata i aso nei e lē o faaalua le lotofaafetai. O le tulaaga fo'i lenā sa iai a o soifua Iesu i le lalolagi. I se tasi taimi, na faamālōlō ai e Iesu lepela e to'asefulu, ae e **na o le to'atasi** na faafetai atu iā te ia. (Luka 17:12-17) E tatou te manana'o ia pei o le tamāloa na faafetai iā Iesu, ma faaalua pea le lotofaafetai iā Ieova.

7 E mana'omia fo'i ona tatou faaali atu lo tatou alofa mo Ieova. Na fetalai Iesu i ona soo e tatau ona latou alolofa iā Ieova ma o latou lotoatoa, ola atoa ma le mafaufau atoa. (**Faitau le Mataio 22:37.**) O le ā le uiga o lenā manatu?

8 Pe e lava le tau ina faapea atu e tatou te alolofa iā Ieova? E leai. Pe afai e tatou te alolofa iā Ieova ma o tatou lotoatoa, ola atoa ma le mafaufau atoa, e tatou te faaalua le alofa iā te ia e ala i a tatou gaioioiga. (Mataio 7:16-20) Ua a'oa'oina ma le manino i le Tusi Paia, pe afai e tatou te alolofa i le Atua, e tatou te usiusita'i i ana poloa'iga. Pe e faigatā ona

6. O le ā le auala e tatau ona e tali atu ai i le alofa o Ieova?

7. O le ā le tele e tatau ona tatou alolofa ai iā Ieova?

8, 9. E faapefea ona tatou faaalua atu iā Ieova e tatou te alolofa iā te ia?

faia lenā mea? E leai, auā 'e lē mamafa poloa'iga' a leova.—Faitau le 1 Ioane 5:3.

⁹ E tatou te maua ni olaga fiafia ma faamalieina, pe afai e tatou te usiusita'i iā leova. (Isaia 48:17, 18) Ae o le ā o le a fesoasoani iā i tatou ina ia mafuta va-valalata atu ai pea iā leova? Se'i o tatou iloiloina lenā fesili.

IA MAFUTA VAVALALATA ATU PEA IĀ IEOVA

¹⁰ Na faapefea ona avea oe ma uō a leova? E ala i lou su'esu'eina o le Tusi Paia, ua tele ai mea ua e iloa e uiga iā leova ma atia'e ai se faauōga ma ia. O lenei faauōga e pei o se afi e te mana'o e mumū pea. E pei lava ona mana'omia o ni fafie ina ia mumū ai pea le afi, e faapena fo'i ona mana'omia ona e a'o-a'oina pea e faatatau iā leova, ina ia faatumauina ai pea le malosi o la oulua faauōga ma Ia.—Faataoto 2: 1-5.

¹¹ A o faaauau ona e su'esu'eina le Tusi Paia, o le a e a'oa'oina ai mea e matuā pā'ia ai lou loto. Se'i mātau lagona o soo e to'alua o Iesu a o ia faamatala-ina atu iā i la'ua valoaga o le Tusi Paia. Na la faapea ane: "Pe e le'i mū ea o ta loto a o fetalai mai o ia iā i ta'ua i le auala, ma faamatala mai Tusitusiga Paia?" —Luka 24:32.

¹² E pei lava ona pā'ia loto o soo o Iesu ina ua la

10. Aiseā e tatau ai ona e a'oa'oina pea e faatatau iā leova?

11. O le ā le aafiaga o a'oa'oga o le Tusi Paia iā te oe?

12, 13. (a) O le ā e ono tupu i lo tatou alofa mo le Atua? (e) E faapefea ona tatou faatumauina pea lo tatou alofa mo leova?

malamalama i Tusitusiga Paia, atonu e faapena fo'i lou naunau ina ua amata ona e malamalama i le Tusi Paia. Na fesoasoani lea iā te oe e iloa ai Ieova ma alofa iā te ia. E te lē mana'o e maalili lenā alofa. —Mataio 24:12.

13 O le taimi lava e avea ai oe ma uō a le Atua, e mana'omia ona e taumafai malosi e faatumauina pea le malosi o lenā faauōga. E tatau ona faaauau pea ona e a'oa'oina mea e faatatau iā Ieova ma Iesu, ma manatunatu i mea o loo e a'oa'oina ma le auala e faatatauina ai i lou olaga. (Ioane 17:3) Pe a e faitau pe su'esu'e i le Tusi Paia, fesili ifo iā te oe lava: 'O le ā ua ou a'oa'oina mai i lenei mea e faatatau iā Ieova le Atua? Aiseā e tatau ai ona ou alofa iā te ia ma lo'u lotoatoa ma lo'u ola atoa?' —1 Timoteo 4:15.

E pei ona mana'omia o ni fafie ina ia mumū ai pea le afi, e faapena fo'i ona mana'omia ni taumafaiga ina ia faamalosia ai pea lou alofa mo Ieova



14 Pe a iai sau uō mamae, e te talanoa iā te ia i taimi uma ma o lenā mea e faamalosia ai pea la oulua faauōga. E faapena fo'i pe a tatou talanoa e lē aunoa iā Ieova e ala i le tatalo, e faatumauina ai pea le malosi o lo tatou alofa mo ia. (**Faitau le 1 Tesalonia 5:17.**) O le tatalo o se meaalofo matagofie mai i lo tatou Tamā i le lagi. E tatau ona tatou tatalo atu iā te ia i taimi uma mai i o tatou loto. (Salamo 62:8) E lē tatau ona a'o faatauloto a tatou tatalo, ae e tatau ona moni upu e faia i a tatou tatalo. Ioe, pe afai e faaauau pea ona tatou su'esu'e i le Tusi Paia ma tatalo mai i o tatou loto, o le a faatumauina ai pea le malosi o lo tatou alofa mo Ieova.

TALANOA ATU I ISI E FAATATAU IĀ IEOVA

15 Pe a tatou manana'o e mafuta vavalalata atu pea iā Ieova, e mana'omia fo'i ona tatou talanoa atu i isi e faatatau i lo tatou faatuatua iā te ia. O le talanoa atu i isi e faatatau iā Ieova, o se faaeaga matagofie. (Luka 1:74) O se tiute tauave fo'i na tuuina mai e Iesu i Kerisiano moni uma. E tatau iā i tatou ta'ito'atasi ona tala'i atu le tala lelei o le Malo o le Atua. Po ua e faia lenā mea?—Mataio 24:14; 28:19, 20.

16 Na vaai le aposetolo o Paulo i le galuega tala'i o se galuega e tautele, ma na ia ta'ua lenā galuega o se "oa." (2 Korinito 4:7) O le talanoa atu i isi e faatatau iā Ieova ma lona finagalo, o le galuega sili lea

14. E faapefea i le tatalo ona faatumauina ai pea le malosi o lo tatou alofa mo Ieova?

15, 16. O le ā lau vaaiga i le galuega tala'i?

ona tāua e mafai ona e faia. O se auala lea e te au-auna ai iā Ieova, ma e na te faatāua galuega o loo e faia mo ia. (Eperu 6:10) E aogā fo’i le tala’iga iā te oe ma i latou e faalogo iā te oe, auā e te fesoasoani ai i isi ma oe lava ina ia mafuta vavalalata atu iā Ieova ma ia maua le ola e faavavau. **(Faitau le 1 Korinito 15:58.)** Pe e iai se isi galuega e te maua ai le fiafia moni nai lo o lenei galuega?

17 Ua matuā faanatinati lava le galuega tala’i. E tataua ona tatou “tala’i atu le upu” ma ia faia ma le “maelega.” (2 Timoteo 4:2) O le upu i le ulua’i gaganā Eleni ua faaliliuina i le “maelega,” e faasino atu i le faia o mea ma se uiga faanatinati. E mana’omia ona faalogo tagata e faatatau i le Malo o le Atua. Ua ta’ua i le Tusi Paia: “O loo latalata mai le aso tele o Ieova. O loo lata mai lava, e matuā televave mai lava.” “E lē faatuai mai” le i’uga. (Sefanaia 1:14; Sapakuka 2:3) Ioe, e lē o toe umi ona faaumatia lea e Ieova o le lalolagi amioleaga a Satani. Ae a o le’i tupu lenā mea, e mana’omia ona lapata’ia tagata ina ia mafai ai ona latou filifili e au-auna iā Ieova.

18 E finagalo Ieova e tatou te tapua’i atu iā te ia faatasi ma isi Kerisiano moni. Ua ta’ua i le Tusi Paia: “Ia tatou manatunatu fo’i le tasi i le isi ina ia faatupu ai le alofa ma galuega lelei, aua ne’i tuulafoa’i ina le faapotopotoina o i tatou e pei o le masani a

17. Aiseā ua faanatinati ai le galuega tala’i?

18. Aiseā e tataua ai ona tatou tapua’i atu iā Ieova faatasi ma isi Kerisiano moni?

isi, a ia fefaalaeiaua'i, ia sili fo'i ona faia faapea auā ua outou iloa ua matuā latalata mai lava le aso." (Eperu 10:24, 25) E tatau ona tatou faia le mea e gata ai lo tatou mafai ina ia auai ai i sauniga uma. O sauniga ua tatou maua ai le avanoa e faalaeiau ma faamalosia ai e le tasi le isi.

19 Pe a e auai i sauniga, o le a e maua ai ni uō lelei e fesoasoani atu iā te oe e tapua'i iā Ieova. O le a e feiloa'i ai i uso ma tuafāfine eseese, o ē e pei o oe o loo taumafai e faia le mea e gata ai lo latou mafai e auauna ai iā Ieova. E lē lelei atoatoa i latou e pei o oe, ma e latou te faia mea sesē. Pe a latou faia se mea sesē, ia e nofosauni e faamagalo i latou. (**Faitau le Kolose 3:13.**) Ia taula'i atu pea i uiga lelei o ou uso ma tuafāfine Kerisiano. O lou faia faapea, o le a fesoasoani iā te oe e alofa ai iā i latou ma atili mafuta vavalalata atu ai iā Ieova.

LE OLA MONI

20 E finagalo Ieova ina ia maua e ana uō uma se olaga e sili ona lelei. Ua tatou a'oa'oina mai i le Tusi Paia, o le a matuā ese lava lo tatou olaga o le a iai i le lumana'i, mai i le olaga o loo iai i le taimi nei.

21 I le lumana'i, o le a tatou ola ai e faavavau ae e lē mo na o ni nai tausaga se 70 pe 80. O le a tatou maua le "ola e faavavau" i se olaga soifua mālōlōina atoatoa, filemu ma fiafia i le parataiso. O loo

19. O le ā e mafai ona fesoasoani iā i tatou ina ia alolofa ai i o tatou uso ma tuafāfine Kerisiano?

20, 21. O le ā "le ola moni"?

ta'ua i le Tusi Paia lenā olaga o “le ola moni.” Ua folafola e Ieova o le a ia foa'i mai lenā ola moni, ae e tatau ona tatou faia taumafaiga uma i le taimi lenei ina ia “taofimau” ai i lenā ola moni.—1 Timoteo 6: 12, 19.

22 E mafai faapefea ona tatou “taofimau i le ola moni”? E tatau ona tatou “faia mea lelei” ma “ia tamaoaiga i galuega lelei.” (1 Timoteo 6:18) O lona uiga, e mana'omia ona tatou faatatauina mea e tatou te a'oa'oina mai i le Tusi Paia. Peita'i, e lē faalagolago le mauaina o le ola moni i a tatou lava taumafaiga, talu ai o le ola e faavavau e lē o se totogi mo a tatou taumafaiga. O le ola e faavavau o se meaalofo foa'ifua mai iā Ieova mo ana auaua faamaoni, o se faaa'oa'oga lea o lona “agalelei faifua.” (Roma 5:15) E naunau moni lo tatou Tamā i le lagi e foa'i mai lenei meaalofo i ana auaua faamaoni.


23 Ia fesili ifo, ‘Po o o’u tapua’i i le Atua i le auala o loo ia finagalo ai?’ Pe afai e te iloa e mana'omia ona e faia ni suiga, e tatau loa ona e faia faapea. Pe a tatou faalagolago iā Ieova ma faia le mea e gata ai lo tatou mafai ina ia ususita’i ai iā te ia, o le a avea o ia ma o tatou sulufa’iga. O le a ia puipuia ona tagata faamaoni a o faagasolo aso e gata ai o le lalolagi amioleaga a Satani. Ona faamautinoa lea e Ieova e

22. (a) E mafai faapefea ona tatou “taofimau i le ola moni”? (e) Aiseā e faapea atu ai o le ola e faavavau e lē o se totogi mo a tatou taumafaiga?

23. Aiseā e mana'omia ai ona sa’o filifiliga e te faia i le taimi lenei?

tatou te ola i le Parataiso e faavavau e pei lava o lana folafolaga. Ioe, e mafai ona e maua le ola moni pe afai e sa'o filifiliga e te faia i le taimi lenei.

E finagalo leova ina ia e maua "le ola moni." Po o le a e mauaina lenā ola moni?



A'OA'OGA
MONI 1

E ALOFA IEOVA IĀ TE OE

“O le alofa tele o le Atua i le lalolagi, na ia foa’i mai ai lona Atalii e to’atasi, ina ia lē fano tagata uma e faatuatua iā te ia, a ia maua le ola e faavavau.”

—Ioane 3:16

E faapefea ona faaalua e le Atua le alofa iā te oe?

Salamo 91:2

O leova lo tatou sulufa’iga.
E mafai ona ia aumaia le mapusaga mo i tatou mai i o tatou faafitauli i le taimi nei.

Salamo 37:29

Ua ia aumaia se faamoemoe matagofie mo i tatou i le lumana’i.

1 Timoteo 6:12, 19

O le a aumaia e le Atua le ola e faavavau i se tulaga lelei atoatoa. O le a tatou maua le filemu, fiafia, ma le soifua lelei atoatoa i se parataiso matagofie.

A'OA'OGA
MONI 2

E FINAGALO IEOVA INA IA
E ALOFA IĀ TE IA

“Ia e alofa atu iā Ieova lou Atua ma lou lotoatoa, ma lou ola atoa, ma lou mafaufau atoa.”—Mataio 22:37

O le ā e uuna’ia oe e le alofa o le Atua e te faia?

Luka 17:12-17

Ia lotofaafetai mo mea uma ua faia e le Atua mo oe.

Mataio 7:16-20

Ia faaalua lou alofa mo le Atua e ala i le faia o lona finagalo i aso ta’itasi.

1 Ioane 5:3

Ia usiusita’i i poloa’iga a le Atua.

1 Timoteo 6:18

Ia taumafai malosi e faia mea lelei mo isi.

IA FAAMALOSIA PEA
LOU ALOFA MO IEOVA

“Ia outou faatumau iā te outou i le alofa o le Atua.”

—luta 21

O le ā o le a fesoasoani iā te oe ina ia mafuta vavalalata atu ai pea iā leova?

1 Tesalonia 5:17

la tatalo e lē aunoa.

Mataio 28:19, 20;

2 Timoteo 4:2

la fai le mea e gata ai lou mafai e talanoa atu ai i isi e faatatau i le Malo o le Atua.

Faataoto 2:1-5

la faaauau pea ona a'oa'oina e faatatau iā leova.

Eperu 10:24, 25

la auai e lē aunoa i sauniga. O le a fesoasoani ou uso ma tuafāfine Kerisiano iā te oe ina ia atili ai ona e mafuta vavalalata atu iā leova.

1 IEOVA

O le suafa o le Atua o leova, ma e tusa ai ma sa'ili'iliga ua talafeagai ona faapea atu o le uiga o lenā suafa: "E Gaoioi o la e Tusa ai ma Tulaga Mana'omia." O leova o le Atua e ona le malosi uma lava, ma na ia foafoaina mea uma. E iai iā te ia le mana e faia ai so o se mea e finagalo i ai.

Na tusia le suafa o le Atua i mata'itusi e fā i le gagana Eperu. I le gagana faa-Peretania, o na mata'itusi o le YHWH po o le JHVH. E toetoe 7,000 taimi e alia'e mai ai le suafa o le Atua i ulua'i tusitusiga Eperu i le Tusi Paia. E eseese auala e sipelaina ai e tagata i le lalolagi le suafa o leova, ma e latou te faaleoina i le auala e masani ona tautatala ai tagata i la latou gagana.

► Mataupu 1, palakalafa 15

2 O LE TUSI PAIA "E MAI I LE AGAGA O LE ATUA"

O le Atua o le Tusitala o le Tusi Paia, ae na ia faaaogā tane e tusiaina. E talitutusa lea ma se tagata faipisinisi o loo fai atu i lana failautusi e tusia se tusi, ae o faamatalaga o loo iai o manatu o le tagata faipisinisi. Na faaaogā e le Atua lona agaga paia, e ta'ita'ia ai tane na ia faaaogā e faamauina ona manatu i le Tusi Paia. E eseese auala na ta'ita'ia ai e le agaga o le Atua i latou. O nisi taimi na latou vaaia ai ni faaaliga po o ni miti, ona latou tusia lea o mea na latou vaaia.

► Mataupu 2, palakalafa 5

3 MATAUPU SILISILI

O mataupu silisili o a'oa'oga ia mai i le Tusi Paia, lea e fesoasoani iā i tatou ina ia faia ai ni filifiliga lelei. O

se faata'ita'iga, o le mataupu silisili “o aumea [uō] leaga e faaleagaina ai mea lelei ua masani ai tagata.” E tatou te a'oa'oina mai ai, e mafai ona iai se aafiaga lelei po o se aafiaga leaga iā i tatou ona o tagata e tatou te faauō i ai. (1 Korinito 15:33) I le mataupu silisili “o le mea e lūlūina e le tagata, o le mea lava lea e na te seleseleina mai” ua tatou a'oa'oina mai ai, e lē mafai ona tatou 'alofia i'uga o a tatou gaioioiga. —Kalatia 6:7.

► Mataupu 2, palakalafa 12

4 VALOAGA

O se fe'au mai i le Atua, lea e faamatalaina ai lona finagalo, se a'oa'oga e faatatau i amioga tatau, poloa'iga po o se fe'au faafaamasinoga. E mafai fo'i ona faasino atu i se fe'au e faatatau i se mea o le a tupu i le lumana'i. E tele valoaga i le Tusi Paia ua uma ona faataunuuina.

► Mataupu 2, palakalafa 13

5 VALOAGA E FAATATAU I LE MESIA

E tele valoaga o loo i le Tusi Paia e faatatau i le Mesia, ma na faataunuuina e Iesu na valoaga uma. Taga'i i le pusa “Valoaga e Faatatau i le Mesia.”

► Mataupu 2, palakalafa 17, faamatalaga pito i lalo

6 LE FINAGALO O IEOVA MO LE LALOLAGI

Na foafoaina e Ieova le lalolagi e avea o se parataiso e nonofo ai tagata e alolofa iā te ia. E le'i suia lava le finagalo o Ieova mo le lalolagi. E lē o toe umi ona aveesea lea e le Atua o mea leaga ma foa'i atu i ona tagata le ola e faavavau.

► Mataupu 3, palakalafa 1

VALOAGA E FAATATAU I LE MESIA

LE MEA NA TUPU	VALOAGA	FAATAUNUUGA
Na fanau mai i le ituaiga o Iuta	Kenese 49:10	Luka 3:23-33
Na fanau mai i se taupou	Isaia 7:14	Mataio 1:18-25
Na tupuga mai i le tupu o Tavita	Isaia 9:7	Mataio 1:1, 6-17
Na fetalai leova o Iesu Iona Atalii	Salamo 2:7	Mataio 3:17
E le'i talitonu le to'atele o Iesu o le Mesia	Isaia 53:1	Ioane 12:37, 38
Na ulu atu i Ierusalem a o ti'eti'e i se asini	Sakaria 9:9	Mataio 21:1-9
Na faalata e sana uō mamae	Salamo 41:9	Ioane 13:18, 21-30
Na faalata i tupe siliva e 30	Sakaria 11:12	Mataio 26:14-16
E le'i tali atu a o tuua'ia o ia	Isaia 53:7	Mataio 27:11-14
Sa fai le vili i lona ofu	Salamo 22:18	Mataio 27:35
Na tauemua a o tautau i le laau	Salamo 22:7, 8	Mataio 27:39-43
E le'i gau sona ivi	Salamo 34:20	Ioane 19:33, 36
Na tanu ma tagata mau'oa	Isaia 53:9	Mataio 27:57-60
Lona toetū	Salamo 16:10	Galuega 2:24, 27
Na faatūina a'e i le lagi i le itu taumatau o le Atua	Salamo 110:1	Galuega 7:55, 56

7 SATANI LE TIAPOLO

O Satani le agelu na amataina le fouvalega i le Atua. Ua faaigoaina o ia o Satani o lona uiga “o Lē e tetee,” talu ai e faasagatau o ia iā leova. Ua ta’ua fo’i o ia o le Tiapolo, o lona uiga “o Lē e taufaaleaga,” talu ai e na te faia talapepelo e faatatau i le Atua ma faasesēina tagata.

► Mataupu 3, palakalafa 4

8 AGELU

Ua leva ona foafoaina e leova agelu, a o le’i foafoaina le lalolagi. Na foafoaina agelu e ola i le lagi, ma e silia i le selau miliona i latou. (Tanielu 7:10) E iai o latou igoa ma e eseese o latou uiga. E teena ma le lotomaulalo e agelu faamaoni le tapua’i atu o tagata iā i latou. E eseese o latou tulaga ma galuega ua tofia i ai i latou. O nisi o nei galuega e aofia ai le auauna i luma o le nofoālii o leova, faaoo atu ana fe’au, puipui ma ta’ita’ia ana auauna o loo i le lalolagi, faaoo mai ana sala faafaamasinoga ma lagolagoina le galuega tala’i. (Salamo 34:7; Faaaliga 14:6; 22:8, 9) I le lumana’i, o le a latou tau faatasi ai ma Iesu i le taua o Amaketo.—Faaaliga 16:14, 16; 19:14, 15.

► Mataupu 3, palakalafa 5; Mataupu 10, palakalafa 1

9 AGASALA

O le agasala, e faasino atu i so o se faalogona, mafaufauga po o gaoioiga e tatou te faia e lē fiafia i ai leova, pe e lē tusa fo’i ma lona finagalo. Talu ai e faaleagaina e le agasala la tatou faiā ma le Atua, o lea ua ia aumaia ai tulafono ma mataupu silisili e fesoasoani iā i tatou e ‘alofia ai le faia ma le loto i ai o

se agasala. I le amataga, na lelei atoatoa mea uma na foafoaina e leova. Ae ina ua filifili Atamu ma Eva e lē usiusita'i iā leova, na la agasala ai ma e le'i toe lelei atoatoa i la'ua. Na la ola matutua ma feoti. E tatou te ola matutua fo'i ma feoti, ona ua tuufaasolo mai iā i tatou le agasala mai iā Atamu.

► Mataupu 3, palakalafa 7; Mataupu 5, palakalafa 3

10 AMAKETO

O le taua lea a le Atua e faaumatia ai le lalolagi a Satani ma mea leaga uma.

► Mataupu 3, palakalafa 13; Mataupu 8, palakalafa 18

11 MALO O LE ATUA

O le Malo o le Atua o se pulega ua faavaeina e leova i le lagi. O Iesu Keriso le Tupu o lenā Malo. I le lumana'i, o le a faaaogā ai e leova le Malo e aveesea mea leaga uma. O le a pule le Malo o le Atua i le lalolagi.

► Mataupu 3, palakalafa 14

12 IESU KERISO

Na muamua foafoaina e le Atua Iesu i lo o isi mea uma lava. Na auina mai e leova Iesu i le lalolagi ina ia maliu mo tagata uma. Ina ua uma ona fasiotia Iesu, na toe faatūina o ia e leova. O loo pule nei Iesu i le lagi o le Tupu o le Malo o le Atua.

► Mataupu 4, palakalafa 2

13 LE VALOAGA E UIGA I VAIASO E FITU SEFULU

Na valoia mai pe mua'i faailoa mai i le Tusi Paia le taimi e alia'e mai ai le Mesia. O le a tupu lenei mea i le faai'uga o le vaitaimi e ta'ua o vaiaso e 69, lea na amata i le 455 T.L.M. ae faai'u i le 29 T.A.*

* O le T.L.M. o lona uiga o "Tausaga a o Lumana'i le Mesia," a o le T.A. o lona uiga o "Tausaga o le Alii."

"VAIASO E FITU SEFULU"

490 tausaga

"fitu
vaiaso"
(49 tausaga)

"vaiaso e ono
sefulu lua"
(434 tausaga)

1 vaiaso
(7 tausaga)

455

406

◀ T.L.M. | T.A. ▶

29

33

36

'O le poloa'iga
e toe fausia
Ieruselema'



Toe fausia
Ieruselema



Taunuu mai
le Mesia



"Fasiotia"
le Mesia



Le faai'uga
o "vaiaso e
fitu sefulu"



E faapefea ona tatou iloa na faai'uina lenā vaitaimi i le 29 T.A.? Na amata vaiaso e 69 i le 455 T.L.M., ina ua taunuu Neemia i Ierusalem ma amata ona toe fausia le aai. (Tanielu 9:25; Neemia 2:1, 5-8) E pei lava ona tatou mafaufau i le fuainumera e 12 pe a ta'u le upu "taseni," e faapena fo'i ona tau o tatou mafaufau i le fuainumera e 7 pe a ta'u le upu "vaiaso." O vaiaso o loo ta'ua i lenei valoaga e lē o uiga atu i vaiaso e ta'i fitu aso le umi, ae e faasino atu i vaiaso e ta'i fitu tausaga le umi, e tusa lea ma le auala e tele ina faitauina ai aso o valoaga i le Tusi Paia e faapea, o "le aso mo le tausaga." (Numera 14:34; Esekielu 4:6) O lona uiga, e fitu tausaga le umi o vaiaso ta'itasi. Pe a faatele vaiaso e 69 i tausaga e fitu, ona maua ai lea o tausaga e 483. Pe a tatou faitauina la tausaga e 483 e amata mai i le 455 T.L.M., ona taunuu ai lea i le 29 T.A. O le tausaga tonu lava lenā na papatisoina ai Iesu ma avea ai ma Mesia.—Luka 3:1, 2, 21, 22.

I lenei valoaga, na valoia ai fo'i se isi vaiaso, o lona uiga o isi tausaga e fitu. A o faagasolo lenā vaitaimi, e fasiotia ai le Mesia i le 33 T.A., ma e amata i le 36 T.A. ona tala'ia le tala lelei o le Malo o le Atua i atunuu uma ae e lē na o tagata lutaia.—Tanielu 9:24-27.

► Mataupu 4, palakalafa 7

14 LE A'OA'OGA SESĒ O LE TOLUTASI

Ua a'oa'oina i le Tusi Paia o leova le Atua o Lē na foafoaina mea, ma na ia foafoaina muamua Iesu i lo o isi mea uma lava. (Kolose 1:15, 16) O Iesu e lē o le Atua e Ona le malosi uma lava. E le'i iai se taimi na ia faapea ai e tutusa o ia ma le Atua, auā na ia ta'utino: "E sili le Tamā iā te a'u." (Ioane 14:28; 1 Korinito 15:28) E lē o iai i le Tusi Paia le upu "Tolutasi." Peita'i

ua a'oa'oina e nisi lotu o le Atua e tolu atua ae e tasi lava i latou: o le Atua o le Tamā, le Alo ma le agaga paia. E sesē lenā a'oa'oga.

O le agaga paia o le mana galue lea o le Atua. O lona mana galue lea e lē vaaiā, e na te faaaogā e faataunuu ai lona finagalo. E lē o se atua le agaga paia ma e leai se tino. O se faaa'oa'oga, na “faatutumuina” ulua'i Kerisiano “i le agaga paia” ma na fetalai leova: ‘Ou te liligi ifo lo'u agaga i luga o ituaiga uma o tagata.’—Galuega 2:1-4, 17.

► Mataupu 4, palakalafa 12; Mataupu 15, palakalafa 17

15 LE KOLUSE

E lē faaaogāina e Kerisiano moni le koluse pe a tapua'i atu i le Atua. Aiseā e latou te faia ai faapea?

(1) Ua leva ona faaaogā le koluse i tapua'iga sesē. I taimi anamua sa faaaogā ai i tapua'iga i mea faalenatura, ma sauniga faapaupau na faia ai feusua'iga. I totonu o le 300 tausaga ina ua mavae le maliu o Iesu, e le'i faaaogāina e Kerisiano le koluse i la latou tapua'iga. Mulimuli ane, na faaaogā ai e le emeperoa o Roma o Konesetatio le koluse e fai ma faailoga o le faa-Kerisiano. Sa faaaogā lenā faailoga ina ia taliagofie ai le faa-Kerisiano, ae e leai ma se fesoota'iga iā Iesu Keriso. Ua ta'ua i le *New Catholic Encyclopedia*: “Sa faaaogā le koluse i vaitaimi a o lumana'i le faa-Kerisiano ma sa faaaogā fo'i e tagata e lē o ni Kerisiano.”

(2) E le'i maliu Iesu i luga o se koluse. O upu Eleni ua faaliliuina i le “koluse” o lona uiga “o se laau tū sa'o,” “o se laupapa” po “o se laau.” O loo faamatalaina i le

The Companion Bible: “E leai lava ma se vaega o le [Feagaiga Fou] sa tusia i le gagana Eleni, o ta’ua ai ni laupapa se lua.” Na maliu Iesu i se laau tū sa’o.

(3) E lē finagalo leova e tatou te faaaogāina ni tupua po o ni faatusa i la tatou tapua’iga.—Esoto 20:4, 5; 1 Korinito 10:14.

► Mataupu 5, palakalafa 12

16 LOTOFUATIAIFO

O le lotofuatiaifo o se lagona i totonu o i tatou e iloa ai le mea sa’o ma le mea sesē. E mafai ona ta’ita’ia ai i tatou e faia le mea lelei, ma taofia i tatou mai i le faia o mea leaga. Pe a tatou toleniina o tatou lotofuatiaifo ma usiusita’i i ai, o le a faatuputeleina ai lo tatou alofa ma lo tatou faatuatua iā leova.

► Mataupu 5, palakalafa 16; Mataupu 16, palakalafa 15

17 LE FAAMANATUGA

Na faatonuina e Iesu ona soo e faamanatu le Faamanatuga o lona maliu. E latou te faia lenā mea i tausaga ta’itasi iā Nisani 14. O le aso fo’i lea na faamanatuina ai e tagata Isaraelu le Paseka. E faasolo atu i tagata uma e iai i le Faamanatuga le areto ma le uaina, lea e faaāta ai le tino ma le toto o Iesu. O i latou o le a pule faatasi ma Iesu i le lagi, e aai i le areto ma inu i le uaina. Ae o i latou e iai le faamoemoe e ola e faavavau i le lalolagi, e auai ma le faaaloalo i le Faamanatuga, ae e lē aai i le areto pe inuina le uaina.

► Mataupu 5, palakalafa 21

18 AGAGA

I nisi o faaliliuga o le Tusi Paia e pei o le *Faaliliuga a le Lalolagi Fou*, e eseese mea e faasino atu i ai le upu ua faaliliuina i le “agaga” mai i le gagana Eperu ma le gagana Eleni. Ae o taimi uma e faasino atu ai i se mea e lē mafai ona vaaia e tagata, e pei o le savili po o le ea o loo mānavaina e tagata ma manu. E ono faasino atu fo’i nei upu i tino agaga, ma le agaga paia po o le mana galue o le Atua. E mafai fo’i ona faasino atu le agaga i se uuna’iga malosi mai i le loto o le tagata, lea e uuna’ia ai o ia e fai atu ni faamatalaga ma gaoioi i se auala patino.—Numera 14:24; Failauga 3:21; Mataiao 12:43; Luka 1:17; 11:13.

E talitonu le to’atele, pe a oti le tagata e iai sona agaga e lē vaaia e ola pea, ma e faaauau pea ona ola i se isi nofoaga e pei o le lagi po o le afi i seoli. E talitonu fo’i nisi e mafai e le agaga o le tagata ua oti, ona fesoasoani pe faia se gaoioiga e lamatia ai ola o tagata o loo soifua pea.

Peita’i, e lē o a’oa’oga na a le Tusi Paia. O loo ta’ua i le Tusi Paia, pe a oti le tagata e leai sona agaga e ola pea, auā ua toe fo’i o ia i le efuefu. Ina ua faailoa mai e leova le faasalaga iā Atamu, e le’i fetalai o ia e alu le agaga o Atamu i se isi nofoaga. Nai lo o lea, na fetalai o ia o le a toe fo’i Atamu i le efuefu lea na faia mai ai o ia, e leai se ola. (Kenese 3:19) E manino le a’oa’oga i le Tusi Paia, pe a oti le tagata e na te lē toe iloa se mea. E lē mafai ona ia faia se gaoioiga e afāina ai tagata, pe fesoasoani mai fo’i iā i latou. Nai lo o lea, “e toe fo’i atu o ia i le eleele; e faaumatia i lea lava aso ona manatunatuga.”—Salamo 104:29; 146:4; Failauga 9:5, 6, 10.

► Mataupu 6, palakalafa 5; Mataupu 15, palakalafa 17

19 KENA

O Kena o le igoa o se vanu e lata i Ierusalemā na susunu ma faatama'ia ai lapisi. E lē o iai lava se faamaoniga sa faapuapuagatia pe susunuolaina manu po o tagata i lenei vanu i aso o Iesu. O lea, e lē o faaāta mai e Kena se nofoaga e lē mafai ona vaaia, lea e faapuapuagatia pe susunuina ai e faavavau tagata ua maliliu. Ina ua ta'ua e Iesu i latou e lafoina i Kena, sa uiga atu lana fetalaiga i le faaumatiaga atoatoa.—Mataio 5:22; 10:28.

► Mataupu 7, palakalafa 20

20 LE TATALO A LE ALII

O le tatalo lea sa faia e Iesu ina ua ia a'oa'oina ona soo i le auala e tatalo ai. Ua ta'ua fo'i lenā tatalo o le tatalo faaa'oa'o. O se faaa'oa'oga, na a'oa'oina i tatou e Iesu ina ia tatalo e faapea:

“Ia faapaiaina lou suafa”

O loo tatou tatalo ina ia ta'umamāina e leova lona suafa mai i pepelo uma, ina ia faamamaluina ai e i latou uma i le lagi ma le lalolagi lona suafa.

“Ia oo mai lou malo”

O loo tatou tatalo ina ia faaumatia e le Malo o le Atua le lalolagi amioleaga a Satani, pule i le lalolagi atoa, ma suia le tulaga o mea i le lalolagi ina ia avea o se parataiso.

“Ia faia lou finagalo i le lalolagi”

O loo tatou tatalo ina ia faataunuaina le finagalo o le Atua mo le lalolagi, ina ia mafai ai e tagata lelei atoatoa ona ola e faavavau i le Parataiso, e pei lava ona finagalo i ai leova ina ua ia foafoaina tagata.

► Mataupu 8, palakalafa 2

21 LE TOGIOLA

Na saunia e leova le togiola ina ia faasa'olotoina ai tagata mai i le agasala ma le oti. O le togiola, o le tau lea sa mana'omia ona totoi ina ia toe maua mai ai le ola lelei atoatoa lea sa melea e le ulua'i tagata o Atamu, ma toe faaleleia ai le faiā ua faaleagaina i le va o tagata ma leova. Na auina mai e leova Iesu i le lalolagi ina ia maliu mo tagata agasala uma. Ona o le maliu o Iesu, ua maua ai e tagata uma le avanoa e ola ai e faavavau ma maua le tulaga lelei atoatoa.

► Mataupu 8, palakalafa 21; Mataupu 9, palakalafa 13

22 AISEĀ E TĀUA TELE AI LE TAUSAGA 1914?

E tatou te a'oa'oina mai i le valoaga o loo i le Tanielu mataupu e 4, sa faavaeina e le Atua Iona Malo i le 1914.

Le valoaga: Na faaali atu e leova i le tupu o Nepukanesa se miti faavaloga e faatatau i se laau telē na tātuu i lalo. Sa fusi le pogati o le laau i se fusi u'amea ma se fusi apamemea, ina ia taofia ai le tupu a'e o le laau mo se vaitaimi lea e ta'ua o "taimi e fitu," po o tausaga e fitu. Pe a mǎe'a lenā vaitaimi ona toe tupu a'e lea o le laau.—Tanielu 4:1, 10-16.

Le uiga o le valoaga mo i tatou: Ua faaāta mai e le laau le pulega a le Atua. Sa faaogā e leova mo le tele o tausaga ni tupu i Ierusalemā, e pule i le nuu o Isaraelu. (1 Nofoaiga a Tupu 29:23) Ae e le'i tumau pea ona faamaoni na tupu, ma na faamutaina ai a latou pulega. Na faaumatia Ierusalemā i le 607 T.L.M., ma o le tausaga lea na amata ai "taimi e fitu." (2 Tupu 25:1, 8-10; Esekielu 21:25-27) Ina ua fetalai Iesu: 'E solia Ierusalemā e nuu ese se'ia

faataunuuina taimi atofaina o nuu ese,' na faasino atu o ia i na "taimi e fitu." (Luka 21:24) O lea, e le'i faai'uina "taimi e fitu" a o iai Iesu i le lalolagi. Na folafola e leova o le a ia tofia se Tupu i le faai'uga o "taimi e fitu." O le a aumaia e le pulega a lenei Tupu fou o Iesu, le tele o faamanuiaga mo tagata o le Atua i le lalolagi atoa e oo i le faavavau.—Luka 1:30-33.

Le umi o "taimi e fitu": E 2,520 tausaga le umi o "taimi e fitu." Pe a amata ona tatou faitauina tausaga e 2,520 e amata mai i le 607 T.L.M., ona tatou oo ai lea i le tausaga e 1914. O le tausaga lenā na faanofotupu ai e leova, Iesu le Mesia e avea ma Tupu o lona Malo i le lagi.

E faapefea ona maua le fuainumera o le 2,520? Ua ta'ua i le Tusi Paia o le tolu ma le 'afa taimi po o tausaga, e tutusa lea ma aso e 1,260. (Faaaliga 12: 6, 14) O lea, pe a faaluaina lenā fuainumera ona maua lea o "taimi e fitu" po o aso e 2,520. E tutusa aso e 2,520 ma tausaga e 2,520, ona o le auala e tele ina faitauina ai aso o valoaga i le Tusi Paia e faapea, o "le aso mo le tausaga."—Numerā 14:34; Esekielu 4:6.

► Mataupu 8, palakalafa 23

LE MITI A NEPUKANESA I SE LAAU

LE MEA E TATOU TE A'OA'OINA MAI I LE MITI
E FAATATAU I LE MALO O LE ATUA

LE VALOAGA

Se laau telē
(Tanielu 4:10, 11)



“Ia tātuu i lalo le laau”
(Tanielu 4:14)



Pulega

Māe'a le pulega

LE UIGA O LE VALOAGA

O tupu Isaraelu na pulea
tagata o le Atua



Na faaumatia Ierusalem,
ma na muta ai pulega a
tupu Isaraelu

Oketopa
607 T.L.M.




“Ia tuu ai pea se’ia
mavae atu **taimi e fitu**”
(Tanielu 4:16)



“Taimi e fitu”

“E te toe maua
lou malo”
(Tanielu 4:26)



Toe faafo’isia le pulega

2,520 tausaga

T.L.M.

606 tausaga
ma masina e 3

T.A.

1,913 tausaga
ma masina e 9

‘E solia Ierusalem
se’ia faataunuaina
taimi atofaina
o nuu ese’
(Luka 21:24)

Amata ona pule Iesu i
le lagi o le Tupu o
le Malo o le Atua

Oketopa
1914 T.A.



23 MIKAELE LE AGELU SILI

O le faaupuga “agelu sili,” o lona uiga “o le ta’ita’i o agelu.” E na o le tasi le agelu sili o loo ta’ua i le Tusi Paia, ma o lona suafa o Mikaele.—Tanielu 12:1; luta 9.

O Mikaele le Ta’ita’i o le ‘autau o agelu faamaoni a le Atua. O loo ta’ua i le Faaaliga 12:7: ‘O Mikaele ma ana agelu ua tau ma le tarako ma ana agelu.’ O loo faamatalaina i le tusi o Faaaliga o le Ta’ita’i o le ‘autau a le Atua o Iesu, o lea la, o Mikaele o se isi igoa lea mo Iesu.—Faaaliga 19:14-16.

► Mataupu 9, palakalafa 4

24 ASO E GATA AI

E faasino atu lenei faaupuga i le vaitaimi o le a tutupu ai mea iloga i le lalolagi, a o le’i faaumatia e le Malo o le Atua le lalolagi a Satani. O loo faaaogā fo’i i valoaga o le Tusi Paia isi faaupuga talitutusa, e pei o “le taufaai’ui’uga o le faiga o mea a le lalolagi” ma “le faatasi mai o le Atalii o le tagata,” e faasino atu i lenā lava vaitaimi. (Mataio 24:3, 27, 37) Na amata “aso e gata ai” ina ua amata ona pule le Malo o le Atua i le lagi i le 1914, ma o le a faai’uina pe a faaumatia le lalolagi a Satani iā Amaketo.—2 Timoteo 3:1; 2 Peteru 3:3.

► Mataupu 9, palakalafa 5

25 TOETŪ

O le upu toetū, e faasino atu i le toe faafo’isia e le Atua o le ola i se tasi ua maliu. E iva toetū o loo faamauina i le Tusi Paia. Na toe faatutūina e Elia, Elisaia, Iesu, Peteru ma Paulo tagata mai i le oti. Na mafai ona faia nei vavega ona o le mana o le Atua. Ua folafola mai e

leova o le a ia toe faatutūina “tagata amiotonu ma tagata amiolētonu” e ola i le lalolagi. (Galuega 24:15) O loo ta’ua fo’i i le Tusi Paia se toetū i le lagi. E tupu lenei mea, pe a toe faatutūina e le Atua i le lagi i latou ua ia filifilia, e ola faatasi ai ma Iesu.—Ioane 5:28, 29; 11:25; Filipi 3:11; Faaaliga 20:5, 6.

► Mataupu 9, palakalafa 13

26 FAIGA FAATEMONI (FAIGA FAAAGAGA)

O faiga faatemoni po o faiga faaagaga, o se faiga leaga lea o le taumafai e fesoota’i ma agaga, a lē i se auala tuusa’o pe auala atu fo’i i se isi tagata e pei o se tasi e faia fofō faataulāitu, o sē e fesoota’i ma agaga, po o sē e valoia le lumana’i. E faia e tagata faiga faaagaga ona e latou te talitonu i le a’oa’oga sesē e faapea, pe a feiti tagata e ola pea o latou agaga ma avea o ni agaga malolosi. E taumafai fo’i temoni e taa’ina tagata ina ia lē usiusita’i i le Atua. O faiga uma fo’i nei e fesoota’i atu i faiga faatemoni: sa’ili i fetu, faiga faaagaga, faiga faataulāitu, ma talitonuga ma faiga faanuupō. E faaalua nei faiga i le tele o tusi, mekasini, tusi ma faasalalauga i nusipepa e faatatau iā te oe ma lou fetu, ata tifaga, ata, e oo lava i pese. O nei auala ua foliga mai ai e pei e leai se afāina o faiga faataulāitu, temoni ma faiga faaagaga, ma o se mea e fiafia i ai. O le tele o tū ma aga mo maliu e pei o taulaga mo ē ua maliliu, faafiafiaga pe a uma ona teu le maliu, talagā teu ma nisi gaoioiga fai mo le leoleoina o le maliu, e iai fo’i le sootaga i temoni. E tele ina faaaogā e tagata fualaa faasāina, pe a taumafai e faaaogā le mana o temoni.—Kalatia 5:20; Faaaliga 21:8.

► Mataupu 10, palakalafa 10; Mataupu 16, palakalafa 4

27 LE PULE SILISILI ESE A IEOVA

O leova o le Atua o Lē e ona le malosi uma lava, ma na ia foafoaina le lagi ma le lalolagi. (Faaaliga 15:3) O le māfuaaga lea ua ta'ua ai o ia o Lē e ona mea uma lava, ma e iā te ia le pule atoatoa, e pulea ai ana foafoaga uma. (Salamo 24:1; Isaia 40:21-23; Faaaliga 4:11) Na ia faia tulafono mo mea uma na ia foafoaina. Ua iai fo'i iā te ia le pule e tofia ai isi e avea o ni pule. E tatou te lagolagoina le pule silisili ese a le Atua, pe a tatou alolofa ma ususita'i iā te ia.—1 Nofoaiga a Tupu 29:11.

► Mataupu 11, palakalafa 10

28 FAAPA'Ū TAMA

O le faapa'ū tama o se gaoioiga e faia ma le loto i ai, ina ia oo ai le oti i se pepe e le'i fanau mai. E lē māfua ona o se faalavelave faafuase'i, po o se mea e tupu i totonu o le tino o le tinā. E amata mai lava i le taimi e afuafua ai le pepe, o lenā pepe e lē na o se vaega o le tino o le tinā, ae ua avea o se tagata ola.

► Mataupu 13, palakalafa 5

29 TUIGĀTOTO

O se togafitiga faafoma'i lea e tui ai le toto po o ni vaega autū e fā o le toto o se tagata i se isi tagata, pe auala mai fo'i i paina toto sa teuina. O vaega autū nei e fā o le toto: o le vaega faasuāvai toto, sela mūmū, sela papa'e ma vaega faato'a toto.

► Mataupu 13, palakalafa 13

30 A’OA’IGA

I le Tusi Paia, o le upu “a’oa’iga” e lē na o faasalaga e faasino atu i ai. Pe a aumaia a’oa’iga, e faatonuina, a’oa’oina ma faasa’oina i tatou. E lē agaleaga pe sauā leova iā i latou e na te avatu i ai a’oa’iga. (Faataoto 4: 1, 2) Ua faataatia e leova se faaa’oa’oga matagofie mo mātua. Ona e tele aogā e maua mai i a’oa’iga e aumai e leova, e mafai ona faaosofia ai le naunau o le tagata e talia a’oa’iga. (Faataoto 12:1) E alofa leova i ona tagata ma e na te a’oa’oina ma toleniina i latou. E na te aumaia faatonuga e faasa’o ai o latou manatu sesē, ma fesoasoani ai iā i latou e toleniina o latou mafaufau ma gaoioi i se auala e fiafia i ai lona finagalo. O a’oa’iga e avatu e mātua i a latou fanau, e aofia ai le fesoasoani iā i latou e malamalama i māfuaaga e tatau ai ona latou usiusita’i. E aofia ai fo’i le a’oa’oina o fanau ina ia alolofa iā leova, naunau i lana Afioga le Tusi Paia, ma malamalama i mataupu silisili o loo iai.

► Mataupu 14, palakalafa 13

31 TEMONI

O temoni o ni agelu leaga. O i latou o ni agaga leaga e lē vaaia, ma e uigaese lo latou malosī. Na avea ma agelu leaga, ina ua latou filifili i latou lava e avea o ni fili o le Atua, e ala i le lē usiusita’i iā te ia. (Kenese 6:2; Iuta 6) Na latou aufaatasi ma Satani i lana fouvalega faasaga iā leova.—Teuteronomie 32:17; Luka 8:30; Galuega 16:16; Iakopo 2:19.

► Mataupu 16, palakalafa 4

Mo nisi faamatalaga, taga'i i le www.jw.org/sm
pe faafesoota'i Molimau a Ieova.